



Кайковус

Қобуснома



ЯНГИ АСР АВЛОДИ
ТОШКЕНТ
2016

УЎК: 821.512.133-3

КБК: 74.9

К – 17

Кайковус

Қобуснома/Кайковус. Нашрга тайёрловчилар: Субутой Долимов, Улугбек Долимов. – Тошкент: Янги аср авлоди, 2016. – 224 б.

ISBN 978-9943-27-699-4

«Қобуснома» Шарқ ҳалқлари орасида маълум ва машхур. Шул боис, бу дурдана асар кўп маротаба нашр этилган. Олдинги нашрларда парвардигори оламни танимоқ, Ҳақ Таолонинг шукргузарлиги, неъматларга шукр қилмоқ ҳамда пайғамбарлар хилқатига бағишлиланган боблар тушириб қолдирилган эди.

Азиз китобхон! «Қобуснома» (XI) асари таржимаси табдили-нинг тўлдирилган мазкур нашри ўзбек тилида эълон қилинган ва биз китобхонларимизнинг талаб-истакларини инобатга олиб, уни қайтадан нашрга тайёрладик. Китоб сизу бизни ўз тақдиримиз устида жиiddий ўйлашга ундейди.

УЎК: 821.512.133-3

КБК: 74.9

Нашрга тайёрловчилар:
Ўзбекистонда хизмат кўрсатган
фан арбоби **Субутой Долимов** ва
филология фанлари номзоди, доцент
Улугбек Долимов

Нашр учун масъул: **Х. Назиров**

ISBN 978-9943-27-699-4

© Кайковус, «Қобуснома». «Янги аср авлоди», 2016 йил.

МУҚАДДИМА

Буюк мутафаккирлар фарзанд тарбиясига алоҳида эътибор бериб келганлар. Шарқда «Калила ва Димна» номи ила машхур бўлган ҳиндларнинг «Панчатантра» («Беш ҳикмат»), «Тўтинома» номи ила шуҳрат қозонган «Шукасанпата» («Тўтининг етмиш беш ҳикояси»), Юсуф Хос Ҳожибнинг «Қутадғу билиг» («Бахт-саодатга йўлловчи билим»), Муслиҳиддин Саъдийнинг «Гулистон» ва «Бўстон», Носириддин Рабгузийнинг «Қиссаи Рабгузий», Алишер Навоийнинг «Маҳбуб ул-қулуб» («Кўнгилларнинг севгани») ва ўнлаб дурдона асарлар асрлар мобайнида фарзандлар тарбиясида дастур вазифасини ўтаб келмоқда. Бу ганжина китоблар неча-неча авлодга поклик, ростгўйлик, жувонмардлик фазилатларини сингдириб боргани сир эмас. Кайковус қаламига мансуб «Қобуснома» асари Шарқ ҳалқлари орасида маълум ва машҳур. Мўъжаз ривоятлар, ихчам латифалар, кичик-кичик ҳикоятлар китобнинг янада жозибали, ўқишли бўлишини таъминлаган.

Шарқ алломалари ахлоқий-тарбиявий асарларининг асосини Қуръони шариф суралари, Муҳаммад пайғамбар фаолияти ва қўрсатмаларини ифодаловчи ҳадислар, ҳикматли ҳикоялар ташкил қиласди. «Қобуснома» ҳам бундан мустасно эмас: китоб «Парвардигори оламни танимоқ зикрида», «Пайғамбарларнинг хилқати зикрида» боблари билан бошланади.

XI асрнииг 82-83 йилларида Фарбий Эрон подшохининг набираси Кайковус ибн Искандар ўз ўғли Гилоншоҳга бағишлиб «Насиҳатнома»сини яратади ва ўша давр анъанасига кўра уни бо-боси подшоҳ Шамсулмаолий Қобус шарафига «Қобуснома» деб атайди.

«Қобуснома» асрлар мобайнида Фарб ва Шарқ мутафаккирларининг эътиборларини ўзига жалб этиб келган: 1702–1705 йилларда турк тилига, 1786–1787 йилларда Муҳаммад Сиддиқ Рашидий томонидан уйғур тилига, 1881 йилда Қаюм Носирий томонидан татар тилига ҳамда XIX асрдаёқ инглиз, фаранг, олмон, рус тилларига таржима қилинди. 1935 йилда Техрон дорилфунунининг профессори, атоқди адиб Саид Нафисий «Қобуснома»ни Техронда босмадан чиқарди.

1860 йилда «Қобуснома» ўзбек тилига биринчи марта буюк шоир ва мутафаккир Муҳаммад Ризо Огаҳий томонидан таржима қилинди. Огаҳий таржимасининг қўлёзма нусхаси Ўзбекистон Фанлар Академияси Шарқшунослик институтининг қўлёзмалар фондида ва Санкт-Петербургдаги Салтиков-Шчедрин номли кутубхонада ўзбек тилига таржима қилинганда ўша даврда ҳали 16 ёшли шаҳзода бўлган Муҳаммад Раҳмон Феруз (1844–1910)нинг хизматларини ҳам алоҳида таъкидлаб ўтиш мақсадга мувофиқдир. Огаҳийнинг ўзи ёш йигитчча Муҳаммад Раҳим ҳақида гапириб, ҳар қандай ўйин-кулгини йиғишириб қўйиб, «китобхонликқа, маънидонликқа, машғул бўлғанини ушбу «Насиҳатнома»ни шаҳзоданинг топширифи билан таржима қилганини мамнуният билан изҳор қиласди: «...ул шаҳзодаи озоданинг назари анвори мутолаасига етищди ва мусаффо хотирига уни Туркий тил била таржима қилдирмоқ

таманноси тушди. Бу бандай фақир Мұҳаммад Ризо Оғаҳий бир куни ул жаноб мажлисига бориб, дуо шароитин тақдимига еткурдим ва ул жанобнинг лозимул башорати била ҳам ул мажлиснинг бир гүшасида ўтирдим. Дарҳол менга неча турлик меҳрибонликлар кўргузиб, мазкур «Насиҳатнома»ни илкимга бериб дедики: «Бул нусхани туркий тил била таржима қили, токи турк тавойи-фининг авоми ҳам бу паннлардан баҳра олгай ва бизнинг отимиз, сенинг сўзинг олам инқирозигача замон авроқида боқий ва ёдгор қолгай».

Буюк мутафаккир Муслиҳиддин Саъдий Но-сириддин Рабғузий, Абдураҳмон Жомий, Алишер Навоийлар жамият тараққиётида, мамлакат ободончилиги халқ фарновонлигида айрим шахслар, айниқса, подшоҳлар фаолиятига катта баҳо берадилар. Жомий ўзининг «Баҳористон» асарида подшоҳ адолатини порлаб турган қуёшга ўхшатади:

*Агар чиқса адолатнинг қуёши,
Таралгай ҳар томон нури зиёси.
Агар зулм этса золим, бу ситамдин
Жаҳон бўлгай қаро, йўқ интиҳоси.*

Кайковус ҳам подшоҳ адолатини қуёшга тенглаштиради: қуёш ҳаммага, ҳамма ерга тенг, баробар нур сочгани каби, подшоҳ ҳам ҳаммага баробар адолат нурини сочмоғи лозим дейди: «Эй фарзанд, раиятга ҳам шундօғ меҳрибонлик кўргузғил, токи мамлакат обод бўлғай, нединким, подшоҳ офтобдекдур, офтоб бировга соя солиб, яна бировдин юз ўтурмас... Асло зулмни кўнглингта келтурмагилки, одил подшоҳнинг хонадони кўп йиллар боқий қолур ва золимнинг хонумони тезда барбод ва нобуд бўлур, нединким адл ободон-

лик нишонасидур ва зулм вайроналик аломатидур. Ҳукамолар дебдурларки, одил подшоҳ олам хуррамлигининг сарчашмасидур, золим подшоҳ жаҳон ҳаробалигининг тӯфонидур».

Абдураҳмон Жомийнинг ахлоқий қарашлари кўп ўринларда «Қобуснома»даги пандларга ҳамоҳангдир. Жомий ўз фарзанди Зиёвуддин Юсуфга насиҳат қиласар экан, отаси фақат машҳур киши бўлгани учун унинг номи, обрўси билан мақтамасликни, балки унинг номига муносиб фарзанд бўлиб етишишни талаб қиласди. Шунинг учун ҳам Жомий ўз ўғлига шундай ибратомуз шеър билан мурожаат қиласди:

*Нодонлардек отангнинг кимлигини пеш қилма,
Ўзингга сен ҳунардан ўзгани ота билма.*

*Тутун гарчи оташнинг фарзанди бўлса ҳам, бас
Не фойдаки тутунга, оташ зиёси юқмас!?*

Жомийнинг бу мисраси «Қобуснома»нинг ушбу сўзларини эслатади: «Агар киши ҳар қанча олий насаб ва асл бўлса-ю, аммо ҳунари бўлмаса, у ҳалойиқнинг иззат ва ҳурматидин ноумид бўлур. Улуғлик ақл ва билим биладур; насл-насаб била эмас. Отни сенга ота ва онанг қўймишлар, сен унга фарра бўлмагил... Бу от фақат бир нишонадин бошқа нарса эмасдур. Аммо сен ҳунар била бир номга эга бўлғил».

Булардан ташқари, Огаҳий форс тилидан ўндан ортиқ илмий-тарихий, маърифий ҳамда бадиий асарларни ўзбекчалаштирган.

Огаҳий таржималари ичида «Қобуснома» алоҳида ўринлардан бирини эгаллайди. Бу нодир асар 1965, 1973 ва 1986 йилларда адабиётшунос олим Субутой Долимовнинг катта саъй-ҳаракат-

лари билан уч марта нашрдан чиқарилган эди. «Қобуснома» Мұхаммад Ризо Огаҳий таржимаси асосида ҳозирги замон ўзбек адабий тилига табдил қилиниб, катта сўз боши, тарихий ва филологик шарҳ ҳамда изоҳли луғат билан ўқувчиларга тақдим қилинган эди.

Шу ўринда ўзбек китобхонларини «Қобуснома» билан таништирган марҳум олим Субутой Долимов хақида маълумот беришни лозим топдик.

Субутой Долимов (Усмонбек Долимов) ўзбек адабиётшунослиги ва педагогикаси тараққиётига салмоқли ҳисса қўшган заҳматкаш олимдир. У 1907 милодий йилининг савр ойида Тошкент шаҳрида зиёли оиласда таваллуд топди: унинг тоғалари Мирмулла, Мирмуҳсин, Мирмуслим Шермуҳамедовлар аср бошларида маърифатимиз дарғалари сифатида ўлка сиёсий-маданий ва адабий ҳаётида муҳим роль ўйнадилар. Усмонбек илк маълумотни Сағрон маҳалласидаги Ка-бир домланинг мактабида олди. 20 йилларнинг бошида Хадрадаги «Намуна» мактабида ўқишини давом эттириди. Бу мактабда унинг дастлабки шеърлари, ҳикоялари мактаб деворий газетаси «Тонг юлдузи»да чиқиб турди. Деворий газетанинг муҳаррири буюк ёзувчи Ойбек эди. Мазкур «Намуна» мактаби Ойбек, Искандар Икромов, Миркарим Осим, Ҳомил Ёқубов, Аъзам Аюб, Мурод Шамс, Имомхон Ҳусанхўжаев каби ўнлаб илм-фан, адабиёт ва санъат, маданият арбобларини тарбиялаб етиштириди.

Субутой Долимов мустақил иш фаолиятини 1926 йилда «Шамсул-ирфон» мактабида она тили ва адабиёти ўқитувчиси сифатида бошлади. Адабиётга бўлган муҳаббат 1934 йилда С. Долимовни Низомий номидаги Тошкент давлат педагогика

университетининг тил ва адабиёт факультетига етаклади, 1939 йилда у институтни имтиёзли диплом билан тамомлади.

Олим 1943–1957 йилларда Ўзбекистон республикаси Педагогика фанлари илмий-текшириш институтида ўзбек тили ва адабиёти ўқитиши методикаси сектори мудири лавозимида ишлади, айни пайтда Низомий номидаги Тошкент давлат педагогика университетида адабиёт ўқитиши методикаси фанидан талабаларга дарс берди. Олим 1957 йилдан то умрининг охиригача Тошкент давлат дорилфунуни (ҳозирги ЎзМУ)нинг ўзбек филологияси факультетида ўзбек адабиёти тарихи ва адабиёт ўқитиши методикаси фанларидан талабаларга сабоқ берди.

Биз Субутой Долимов ижодий фаолиятига разм солар эканмиз, унинг икки соҳада: адабиёт ўқитиши методикаси ҳамда ўзбек адабиёти тарихи соҳасида мукаммал, бетакрор асарлар яратганлигининг гувоҳи бўламиз. Олим бу икки соҳанинг бирини иккинчисидан кам ёки ортиқ кўрмади. Методист олим сифатида ўзбек адабиёти бўйича мактаблар, педагогика билим юртлари ҳамда олий ўқув юртлари талабалари учун қатор дастурлар тузди, ўқув кўлланмалари, дарсликлар яратди.

Субутой Долимов Ўрта Осиёда маориф тараққиёти тарихи, мадрасаларнинг ташкил топishi ва уларда ўқитиши усусларини алоҳида ўрганди. У Абдулла Авлоний, Саидрасул Саидазизов, Мунаввар Қори Абдурашидхонов, Ҳамза Ҳакимзода Ниёзий, Садриддин Айний каби маърифатпарвар ижодкорлар фаолияти, ўқитиши усуслари ҳақидаги қарашларни тадқиқ қилувчи кўплаб илмий асарлар яратди.

Ўрта мактабларда адабиёт ўқитиши методикасига доир дастлабки илмий-методик асар-

лар ҳам Субутой Долимов қаламига мансубдир. Олим 1952 йилда «Адабиёт ўқитиши методикаси», 1955 йилда «5-синф «Ватан адабиёти» учун методик қўлланма», 1960 йилда «Таълимий баён ва иншо», 1967 йилда институт ва университетлар филология факультетлари талабалари учун «Адабиёт ўқитиши методикаси» дарслиги», 1968 йилда «8-синф «Ўзбек адабиёти тарихи» дарслиги учун методик қўлланма» асарларини яратди.

Субутой Долимовнинг ўзбек адабиёти тарихини ўрганиш ва тадқиқ қилиш соҳасидаги фаолияти ҳам анча мароқли. Олим Лутфийнинг «Гул ва Наврӯз» достонини, Огаҳийнинг «Танланган асарлар»ини, Гулханийнинг «Зарбулмасал» асарини, Мулла Фазлуллоҳ Алмаййнинг «Танланган асарлар»ини, «Калила ва Димна» асарларини нашрга тайёрлади. Халқ оғзаки ижодининг катта билимдони ва тарғиботчиси сифатида Шотурсун Шомақсудов билан ҳамкорликда халқ ибораларини тўплади, уларнинг этимологиясини шарҳлади ва «Кенг уйнинг келинчаги» номи остида икки марта босмадан чиқарди.

Шуни алоҳида таъкидлаш керакки, Субутой Долимов Хоразм шоирлари Мунис Хоразмий, Муҳаммад Раҳимхон Соний (Феруз), Муҳаммад Юсуф Рожий, Комил Хоразмий, хусусан, Муҳаммад Ризо Огаҳий ҳаёти ва ижодини ўрганиш, уларнинг асарларини нашр қилиш ишига 40 йиллик ҳаётини бағишлиди. 1962 йилда «Огаҳийнинг ҳаёти ва ижодий фаолияти» мавзууда номзодлик диссертациясини ҳимоя қилди ва ижодининг маҳсулдорлиги ҳамда асарларининг бадиий гўзаллиги нуқтаи назаридан Огаҳий ўзбек адабиётининг буюк Алишер Навоийдан кейинги энг забардаст вакили деган илмий хуносага келди.

Маълумки, ўзбек мумтоз адабиётини ўрганиш ва нашрга тайёрлашда энг масъулиятли иш асар матни устида ишлашдир. Бу иш тадқиқотчидан кенг кўламдаги билимни, эски ўзбек тилини чуқур билишни, араб форс тилларидан катта билимга эга бўлишиликни талаб қиласди. Шунинг учун бўлса керак, ҳозирда ҳам ўзбек мумтоз адабиёти тадқиқотчилари орасида матншунослар йўқ даражада. 1970 йилда С. Долимов филология фанлари доктори, профессор Фулом Каримов билан ҳамкорликда Муҳаммад Ризо Огаҳийнинг б жилдлик асарлар мажмуасини нашрга тайёрлашга киришди. Мажмуанинг 1, 2-жилдлари Огаҳийнинг лирик девони «Таъвизул-ошиб-қин»ни, 3, 4-жилдлари шоирнинг таржима асарларини, 5, 6-жилдлари Огаҳийнинг муаррих-олим сифатида яратган илмий-тарихий асарларини ўз ичига олади. Бу машаққатли ва масъулиятли ишни Субутой Долимов ҳамда Фулом Каримовлар ўн йил (1970–1980) ичида муваффақиятли ҳал этдилар.

Субутой Долимов бутун умрини ўзбек адабиётшунослиги ва педагогикаси фанини ривожлантиришга, малакали филологлар тарбиялаш ишига бағишлиди. Ўзбекистон республикасида хизмат кўрсатган фан арбоби, республикада хизмат кўрсатган ўқитувчи Субутой Долимов 1991 йил 24 майда вафот этди.

Азиз китобхон! Сиз адабиётшунос олим Субутой Долимов томонидан нашрга тайёрланган Кайковуснинг «Қобуснома» асари таржимаси содда табдили билан танишласиз. Шуни афсус билан таъкидлаш керакки, давр тақозоси туфайли олдинги нашрларда айрим боблар каттагина қисқартиришга учраган, айрим боблар умуман

киритилмаган эди. Бу, албатта, китобнинг қимматини анча тушириб юборган.

Сўнгги йилларда «Қобуснома»га бўлган эҳтиёж сезиларли кучайди. Газета ва журналлар саҳифаларида «Қобуснома»нинг тўлдирилган нашрини тайёрлашга даъват этувчи кўплаб мақолалар эълон қилинди.

Асарнинг ушбу нашри «Қобуснома»нинг муқаддима ва ҳамма қирқ тўрт бобини ўз ичига олган. Нашрга Ўзбекистон Фанлар Академияси Шарқшунослик институтининг қўллөзмалар фондида сақланувчи (инв. № 1274/11) Оғаҳий таржимаси қўллөзмаси асос қилиб олинди, шу билан бирга, профессор Е.Э.Бертельснинг русча таржимаси ва Эрон профессори Сайд Нафисий томонидан тайёрланган Техрон нашридан фойдаланилди.

«Қобуснома»нинг ушбу нашри Сизнинг севимили китобингизга айланишини чин кўнгилдан тилаб қоламиз.

**Улугбек ДОЛИМОВ,
филология фанлари номзоди.**

БИСМИЛЛАХИР
РАҲМОНИР
РАҲИМ

МАВЪИЗАТНОМАИ КАЙКОВУС

(Кайковуснинг насиҳатномаси)

Ҳамду беҳад жавоҳирининг түхфалари ул ҳакими ала ал-итлоқнинг¹ даргоҳи олийисига лойиқдурким, инсон вужудининг таркибин ақлу дониш зевари² била тузди ва дуруд³ беадад завоҳирининг⁴ ҳадиялари ул расули аҳли оғоқнинг⁵ равзаси мутаолийсига мувофиқдурким, куфру исён бадияси ваҳшшийларин мўъжизнишон пандлар била ром қилиб, дини ислом тариқига киргудзи.

Аммо баъд бу мажмуаи мавъизангиз⁶ ва бу марқумай⁷ насиҳатомузни мутолаа қиласувчи дониш ва аҳли тамизни замири байзойи⁸ назийрлариға маълум ва жойкир бўлсин. У салтанат буржининг муаллаҳ ахтари⁹ ул хилофат¹⁰ буржининг мусаффо гавҳари ва ул жоҳи жалол¹¹ осмонининг хуршид дурухшандаси¹² ва ул фазлу камол шабстонининг ферузандаси ва ул ақлу беш

¹ Ҳакими ала ал-итлоқ – мутлақ ҳаким.

² Зевар – безак, зийнат.

³ Дуруд – дуо, олқиши, таҳсин.

⁴ Завоҳир – гуллар, чечаклар.

⁵ Оғоқ – олам, уфқлар.

⁶ Мавъизангиз – насиҳатомуз.

⁷ Марқум – ёзилган.

⁸ Замири байзо – оқ, кўнгил.

⁹ Ахтар – юлдуз, юз, байроқ.

¹⁰ Хилофат – халифлик, ўринбосарлик.

¹¹ Жоҳи жалол – улуғ обрў.

¹² Дурухшанда – порлоқ, нурли, равшан.

асҳобининг¹ меҳрибони, зиллу субҳон² халифат алраҳмон боъис ал-амн вал-амон³ ҳазрат Саййид Муҳаммад Раҳим Баҳодирхон ибн ҳоқони кишваристони Саййид Муҳаммад Баҳодирхон фирдавсмакон⁴ зийда умруҳу ва иқболуҳу ва давлатуҳу⁵ ким бовужуд йигитлик айёми ва айшу тараб ҳангомида ҳеч бир лавҳу луъбға⁶ мойил бўлмай, аксар авқот беш вақт намоз лавозими-нинг адоси фаройизу сунан⁷ шуғулиниңг интиҳо-сидин сўнг китобхонлиққа, маънидонлик ишифа машғул бўлиб, ҳар турлук китобни мутолаа қилур эрди ва ўзга машғулотдин ани аъло ва афзал билур эрди. Байт:

*Шабоб айёмида бу улуг одат,
Валилик рутбасиндуру⁸ аломат.*

Хусусан, ҳар китоб мазмуниким, мавоиза⁹ на-сойиҳфа¹⁰ муштамил¹¹ бўлса, они бағоят севар эрди ва они ўзга китоблардин илгари тутар эрди. Андоқким, бу муборак овонда¹² амир Унсурулмаолий Кайковус бинни Искандар бинни Вушмагирнинг ўз ўғли Гilonшоҳ учун жам қилғон насиҳат-

¹ Асҳоб – дўст, сұхбатдош, улфат.

² Зиллу субҳон – субҳоннинг сояси.

³ Халифат ал-раҳмон боъис ал-амн вал-амон – тинчлик ва хотиржамлик таратувчи.

⁴ Фирдавсмакон – жаннатмакон.

⁵ Зийда умруҳу ва иқболуҳу ва давлатуҳу – умри, иқболи ва давлати узун бўлсин.

⁶ Лавҳу луъб – ўйин-кулги, тараала бедодлик.

⁷ Фаройизу сунан – Аллоҳ томонидан юборилган ибодатлар.

⁸ Рутба – мартаба, унвон, даражা.

⁹ Мавоиз – пандлар, насиҳатлар, ваъзлар.

¹⁰ Насойиҳ – насиҳатлар, пандлар.

¹¹ Муштамил – қопловчи, ўз ичига олган.

¹² Овон – вақтлар.

номаси ул шаҳзодаи озоданинг назари анвари мутолаасиға етишди ва мусафро хотириға уни («Қобуснома»ни) туркий тил била таржима қилдирмоқ таманноси¹ тушди. Бу бандай фақир Муҳаммад Ризо мироб Огаҳий, бир куни ул жаноб(нинг) (Сайийид Муҳаммад Раҳим Баҳодирхон) мажлисига бориб, дуо шароитин тақдимиға еткурдим ва ул жанобнинг лозимул башорати била ҳам ул мажлиснинг бир гӯшасида ўтирудим. Дарҳол менга неча турлик меҳрибонликлар кўргузиб, мазкур «Насиҳатномаи»ни илкимга бериб дедики: «Бу нусхани туркий тили била таржима қил, токи турк тавоийифи (турухлари)нинг авоми² ҳам бу пандлардин баҳра олғай ва бизнинг отимиз, сенинг сўзинг олам инқирозизигача замон авроқида³ боқий ва ёдгор қолғай».

Фақирким, ул жанобдин бундог марҳаматларни кўрдим. Қуллуқ қилиб, таъзим русумин бажо келтурдим. Хушҳоллик била ул беҳиштнишон мажлисдан чиқиб, ўзимнинг вайронга кулбамга келиб, бир гӯшада ўлтурдим ва ихлос қаламин эътиқод авроқига сурдим ва қудратим борича саъю кўшиш⁴ умурин⁵ зухурға⁶ еткурдим. Энди ҳазрат каримға умидим шулки, бу хизмат ибтидоси⁷ ихтитом⁸ сарҳадига⁹ етушғай ва шаҳзодаи озоданинг ҳумоюн¹⁰ хотириға мақбул ва марғуб¹¹ тушғай, токим фақир ул жанобнинг лутғ ва

¹ Таманно – орзу.

² Авом – халойиқ.

³ Авроқ – саҳифалар.

⁴ Кўшиш – ҳаракат.

⁵ Умур – ишлар, воқеалар.

⁶ Зухур – пайдо бўлмоқ.

⁷ Ибтидо – бошлиш.

⁸ Ихти мом – тамом бўлиш.

⁹ Сарҳад – чегара.

¹⁰ Ҳумоюн – муборак.

¹¹ Марғуб – севимли.

марҳамати бодасидан¹ сархуш ва сероб бўлгаймен ва ул сархушлик воситаси била бу ранжи фамнинг оғир юқидинким неча йилдин бери бўйнумга тушубдур, тезроқ қутулгаймен. Ёрдам ҳам ундандур ва суюниш ҳам унгадур.

Энди бу «Насиҳатнома» жомеининг сўзи булдурким, туркий иборати била маствур² бўлур.

Бу пандни жам эттувчи амир Унсурулмаолий Кайковус бинни Искандар бинни Қобус бинни Вушмагир ўзини(нг) фарзанди Гilonшоҳга дедики: «Эй фарзанд, мен қарибман ва ожизлик менга голиб бўлубдур, ўлим вақти яқин келибдур, азлининг³ ёрлифи бир китобдурки, уни ҳеч чора кўрувчининг қўли ҳийлагарлик била йўқ қила олмагусидур.

Бас, эй фарзанд, мен ўзимни ўлумга бафоят ёвуқ топдим ва шундок маслаҳат кўрдимки, менга тириклиқдан жудо бўлмоқдик ёслиги етушмасидин бурун ҳар мушкул ишнинг тузилиши ва яхши от қолдирмоқ қўшиши бобида бир неча сўз баён қилгайман, токи сен ундан баҳра олгайсан ва мен оталик меҳри шартини бажо келтургайман.

Эй фарзанд, сенга замона ситамининг қўли етмасдан бурун ҳушиңг қулоқи била менинг сўзимни эшитгил ва пандлар била икки жаҳонда ном чиқарғил. Менинг сўзимни эшитмоқдин ибо қилмағил. Агар менинг сўзимни қабул қилиб, ундан баҳра олсанг, ўзгалар доғим (янада) қабул қилурлар ва унга яраша иш шундоқдурки, ҳеч фарзанд отасининг пандин қабул этмагусидир, нединким йигитлар фафлат юзидин ўз ботинида⁴ ўзларини бирдан-бир дониш фаҳм қилурлар ва ўз донишларини қариларнинг донишидин афзал билурлар. Гарчи бу сўз менга маълумдур, лекин

¹ Бода – май, шароб.

² Маствур – ёзилган, кўчирилган.

³ Азл – узоқлаштириш.

⁴ Ботин – ички дунё, қўнгил.

оталик меҳри мени хомуш бўлурға қўймади. Шул вожиб бир қанча пандларни ўзим яратдим ва уни қирқ тўрт бобга жам қилдим, ҳар бобида бир неча сўз зикр этдим.

Эй фарзанд, умид шулки, сен бу пандларни қабул қилгайсан ва мен оталик шартин бажо қилмиш бўлгаймен. Билғилки, жаҳон ҳалқининг расми шулдурки, такупўй¹ ва жустужўй қилиб дунёда бирор нарса ҳосил этарлар ва уни ўзларининг яхши кўргон кишисига қўйиб кетарлар. Мен дунёда ушбу сўзларни ҳосил қилмишман ва менинг яхши кўргон кишим сендурансан. Менга риҳлат² вақти ёвуқ³ етди, дунёдин ҳар нимаки ҳосил қилдим, сенинг олдингга қўйдим, токим худоком⁴ бўлмағайсан ва бeroҳлик⁵ йўлига қадам қўймағайсан.

Эй фарзанд, икки тарафдин ҳам сенинг аслинг ва насабинг покдур ва улуғдур. Бобонг Малик Шамсулмаолий Қобус бинни Вушмагир Аъшақ Фарҳодоннинг набирасидур, Аъшақ Фарҳодон Кайхусравнинг замонида Гilon мулкининг подшоҳи бўлғон ва Гilon мамлакати сенинг авлод-аждодингга ундин ёдгор бўлиб қолди. Менинг онамнинг момоси «Марзбоннома» отлиқ китобнинг мусаннифи маликзодаи Алмарзбон бинни Рустам бинни Шарвининг қизидур. Унинг ўн учинчи отаси Ануширавон Одилнинг биродари Қубоднинг ўғли Кайковусдур. Сенинг онанг султон Маҳмуд Фозий бинни Насриддин Сабуктагинни(нг) фарзанди ва менинг момом Дайлимийлар подшоҳи Ҳасан Ферузоннинг қизидур.

Бас, эй фарзанд, аслингнинг қадру қимматин бил ва асли кам одамлардин бўлмағил. Ҳар не-

¹ Такупўй – югуриш, елиш.

² Риҳлат – жўнаш.

³ Ёвуқ – яқин.

⁴ Худоком – қайсар.

⁵ Беҳор – йўлсиз, адашган.

чаким мен сенда яхшилик нишонасин фаҳм қи-
лурман ва лекин сўз такрорин ўзимга вожиб би-
лурман. Эй фарзанд, огоҳ бўлки, менинг охират
сари кетмоғим ёвуқдур, сен ҳам менинг изимдан
тез етгунгдур. Нединким, бу дунё орият жойидур
ва охират асли саройдур ва ул саройнинг йўли оз
ва қийин. Бу жойда жамъ қилмоқ керакдур.

Бу жаҳон бир зироатгоҳдур, ҳар нима эксанг,
шуни ўрасан ва ҳар на сўз десанг, шунинг жа-
вобин эшитурсан. Деғилким, дунё жойи фоний
ва охират саройи боқийдур. Бу жойда иффатли,
парҳезкорларнинг ҳиммати шерларнинг ҳимма-
тидекдур, бадкирдорларнинг ҳиммати итлар-
нинг ҳимматидекдур. Ит ҳар сайдниким олса,
ўша жойда ер, шер сайдники олса, бошқа жой-
да ер. Бу орият саройи сенинг сайдгоҳингдур ва
Тангри таолонинг ибодати сенинг сайдингдур.
Агар дунё саройида тоат сайдини инкор қилсанг
оқибатининг мужиби бўлур.

Эй фарзанд, худони таниғил, ҳамиша они
ибодатин пеша қилғил. Жалла жалалуҳу ва аммо
навануҳу¹. Бобларнинг феҳристи будурким,
марқум бўлур. Аввалги боб – Худо таолони тани-
моқ зикридадур. Иккинчи боб – пайфамбарлар-
нинг хилқати зикридадур. Учинчи боб – Ҳақ та-
олонинг шукргузарлиги зикрида. Тўртинчи боб
– неъматлар сипасдорлиги зикрида. Бешинчи
боб – ота ва она ҳақини билмак зикрида. Олтин-
чи боб – ҳунар фузуналиқ била баланд қадр бўл-
моқ зикрида. Етгинчи боб – сухандонлик билан
баланд мартабали бўлмоқ зикрида. Саккизинчи
боб – Ануширағоннинг пандин ёд олмоқ зикри-
да. Тўққизинчи боб – йигитлик ва қарилик сифа-
ти зикрида. Ўн биринчи боб – шароб ичмак зикрида.

¹ Жалла жалалуҳу ва аммо навануҳу – улуғлиги улуғ бўл-
ди, эҳсони умум бўлди.

Ўн иккинчи боб – меҳмон олмоқ ва меҳмон бўлмоқ зикрида. Ўн учинчи боб – нард ва шатранж ўйнамоқ зикрида. Ўн тўртинчи боб – ишқ варзиш қилмоқ зикрида. Ўн бешинчи боб – нафъ олмоқ зикрида. Ўн олтинчи боб – ҳаммомга бормоқ зикрида. Ўн еттинчи боб – ухламоқ ва осуда бўлмоқ зикрида. Ўн саккизинчи боб – сайд этмак зикрида. Ўн тўққизинчи боб – гўй чавгон ўйнамоқ зикрида. Йигирманчи боб – уруш қилмоқ зикрида. Йигирма биринчи боб – мол жамъ этмоқ зикрида. Йигирма иккинчи боб – омонат сақдамоқ зикрида. Йигирма учинчи боб – асир сотғун олмоқ зикрида. Йигирма тўртинчи боб – уй ва ер сотиб олмоқ зикрида. Йигирма бешинчи боб – чаҳорпой улоф сотиб олмоқ зикрида. Йигирма олтинчи боб – хотун олмоқ зикрида. Йигирма еттинчи боб – фарзанд парвариш қилмоқ зикрида. Йигирма саккизинчи боб – дўст тутмоқ зикрида. Йигирма тўққизинчи боб – душмандан андиша қилмоқ зикрида. Ўттиз биринчи боб – афв ва уқубат этмак зикрида. Ўттиз иккинчи боб – илм талаби ва қозигарлик зикрида. Ўттиз учинчи боб – тиб илми расми зикрида. Ўттиз тўртинчи боб – нужум ва ҳандаса илми зикрида. Ўттиз бешинчи боб – шоирлик расми зикрида. Ўттиз олтинчи боб – ханягарлик, яъни созандалик зикрида. Ўттиз еттинчи боб – подшоҳ хизматининг шарт ва қоидаси зикрида. Ўттиз саккизинчи боб – подшоҳ надимлигининг зикрида. Ўттиз тўққизинчи боб – дабирлик ва котиблик зикрида. Қирқинчи боб – вазирликнинг шарт ва расмлари зикрида. Қирқ биринчи боб – сипоҳсоларлик шартлари ва одатлари зикрида. Қирқ иккинчи боб – подшоҳдик шарти ва расми зикрида. Қирқ учинчи боб – деҳқончилик ва бозор пешалари баёни зикрида. Қирқ тўртинчи боб – саховат ва жувонмардлик зикрида.

БИРИНЧИ БОБ

ПАРВАРДИГОРИ ОЛАМНИ ТАНИМОҚ ЗИКРИДА

Эй фарзанд, билғилким, жаҳонда одамнинг билмаган ва танимаган ҳеч нимарсаси йўқдур. Магар Худойи таолоким онинг тарафифа танимоқ била асло йўл топмағусидур. Чунки ондин ўзга барча нимарсанни танидинг, аммо ҳар вақтким ўзингни танисанг, они танурсан. Танимоқ нақшдекдур, танилган нимарса манқуш¹декдур ва танифучи наққошдекдур. Манқуш нақшни қабул қилмаса, ҳеч наққош онга нақш қилмағусидир. Кўрмасмусанким, чун мум нақшни тошдин яхшироқ қабул қилур. Бу жиҳатдин мумдин муҳр тузатурлар ва тошдин тузатмаслар. Бас, барча танилған нимарсада танимоқ қабули бордур ва сен ўзингга боққил, яратувчига боқмагил ва созга қараб созандани таниғил. Ҳақ таолонинг ҳамиша неъматларига андиша қилғил. Аммо унинг зотига андиша қилмағил. Чунки жаҳонда йўлдан адашадурғон ул кишидирким, йўлсиз жойдин йўл талаб қилгай. Андоқким пайғамбар алайҳиссалом дебдурлар, Аллоҳнинг нозу неъматлари ҳақида фикр қил, ўзи ҳақида фикр қилма.

Агар Худойи таоло шариат соҳибининг тили бирла бандаларга ўзин танимоқ густоҳдигига йўл бермаса эрди, ҳеч ким Худони танимоқда бир сўз айтурға ҳаргиз далирлик² қила олмас эрди. Чун ҳар тил, ҳар сифат билаким Худойи таолони айтурсан, ўзингни ажзу бечоралиғингдан бил. Йўқ эрса, Худони(нг) зотига лойиқ ситойиш³ қилолмас-

¹ Манқуш – безалган, нақшланган.

² Далир – ботир, довюрак.

³ Ситойиш – мақтов.

сан. Вақтиким, анинг зотин ситойиш қила олмасанг, они таний олмассан. Ва чун ҳар киши бизни ҳақиқат била билди, ширк¹ чуркидин қутилди.

Бир ҳақиқатда Худодур. Андин ўзга ҳамма иккидур. Ҳар нарсаким, сифатда икки бўлса, то таркибда ҳам икки бўлур. Андоқким, жисм ё тафриқада² икки бўлур. Андоқким, адад ё жамъда икки бўлур. Андоқким, мабсуготда³ икки бўлур, жавоҳир ё тавалудда икки бўлур. Андоқким, асл фаръ ё маконда икки бўлур, арз ё ваҳмда икки бўлур. Андоқким, ақл ва нафса ё эътидолда⁴ икки бўлур. Андоқким, табъ ва сурат ё адад учун икки бўлур. Андоқким, ҳар нимарсанинг муқобаласида⁵ икки бўлур. Андоқким, мисл ва шабиҳ⁶ ё бир нимарсанинг сурати учун икки бўлур. Андоқким, унсур⁷ ё ҳаюло⁸, ё мадад юзасидан икки бўлур. Андоқким, мол ё худо учун икки бўлур. Андоқким, нишони⁹ камол¹⁰ ё бир нимарсанинг қабули учун икки бўлур. Андоқким, хосият ё бешким учун икки бўлур. Андоқким, борлиқ ва йўқлиқнинг tengлари учун Худойи таоло нишонининг қиёслари мундокдур. Ушбу нимарсаларким, буларнинг нишони икки бўлур – Худодин бошқа бўлур ва тавҳид¹¹ ва ҳақиқати улдурким, билғил, ҳарна ким сенинг кўнглунгфа келса, Худо

¹ Ширк – кофирилик, кўп худолик.

² Тафриқа – бўлиш, ажралиш.

³ Мабсугот – муфассаллик, батафсилик.

⁴ Эътидол – мўътадиллик, ўрта даражা.

⁵ Муқобала – рўпара бўлиш.

⁶ Шабиҳ – ўхшаш, монанд.

⁷ Унсур – асосий модда.

⁸ Ҳаюло – ҳар бир нарсанинг асли, моҳияти.

⁹ Нишон – белги, аломат.

¹⁰ Камол – тўлалик, етуклик.

¹¹ Тавҳид – ягоналик, худонинг бирлиги.

эрмасдур, балки Худо онинг холиқидурким¹, мисли ва шибҳи² мубарродур³. Унинг қудрати улуф бўлди, эҳсони ом бўлди.

ИККИНЧИ БОБ

ПАЙГАМБАРЛАРНИНГ ХИЛҚАТИ⁴ ЗИКРИДА

Эй фарзанд, билғилким, Худойи таоло жаҳонни беҳуда ва бекор яратмади. Адл мужиби⁵ била яратди ва ҳикмат мужиби била оройиш берди. Чун билғилким, вужуд адамдин⁶ яхши ва кун фасоддин яхши ва хуб зийнатдин яхши. Бу икковига ҳам тавоно ва доно эрди. Барча нимарсаларни билиб яратди, керак жойида яратди ва улчаким адл мужиби била мавжуд қилди. Ҳикмат мужиби била мувоғиқ қилди ва чун қодир эрдиким, қуёшсиз оламни ёрутқай ва булутсиз ёмғур ёғдургай ва ёмғур тарбиятисиз сабза кўкартургай ва юлдуз таъсиризиз оламда яхши ва ёмонни зуҳурга⁷ еткургай. Чунки иш ҳикмат мужиби била эрди. Ҳеч нимарсани воситасиз пайдо қилмади. Кун ва фасодга воситани сабаб қилди. Чун восита бўлмаса, ҳеч нимарсада шараф манзилат⁸ ва тарбият бўлмағусидур ва чун феъл низомсиз бўлмағусидур, воситасиз ҳам бўлмағусидур. Воситани ул жиҳатдин пайдо қилдиким, бирор қоҳир⁹, бирор

¹ Холиқ – яратувчи, оллоҳ.

² Шубҳи – монанд, ўшашлик.

³ Мубарро – озод, холи.

⁴ Хилқат – яратилиш, пайдо бўлиш.

⁵ Мужиб – сабаб, тарз.

⁶ Адам – йўқдик.

⁷ Зуҳур – пайдо бўлиш, кўриниши.

⁸ Манзилат – мартаба, даража, мақом.

⁹ Қоҳир – қаҳрли, разабнок.

мақхур¹, бирор зўрхор ва бирор зўри учун зор бўлгай ва бу иккови ҳам Худонинг бирлиғига гувоҳдур. Бас, агар сен ҳар воситаниким кўрсанг, Худодин билғил. Агар ер ҳосил бермаса, гуноҳни ерга қўймагил ва агар юлдуз нафъ еткурмаса, юлдузга товон² қилмагил. Недин юлдуз нафъ еткурмак ва еткурмасликда ер янглиғдурким, чун ерга шакар тухумин эксанг, ер заҳар ҳосил берса-да, гуноҳ йўқдир. Юлдуз ҳам бу тариқадурким, яшини ёмон ва ёмонни яхши қила олмагусидур. Чун Ҳақ таоло жаҳонни ҳикмат бирла ораста қилди, анга зийнат ва оро бермак лозим эрди. Бас, бу жаҳонни томоша қил. То набот³ ва ҳайвон ва хуруш ва пўшишлардин неча турлик зийнат ва хўбликлар кўрасанким, Ҳақ таоло ҳикмат мушкиби пайдо қилди. Андоқким, ўз қаломида айтур: «Самоларни ва ерни ва улар орасидағиларни ўйнаб яратмадик». Ва чун билдингким, Ҳақ таоло икки жаҳонда ҳеч неъматни беҳуда қилмади ва беҳуда ул вақтда бўлгайким, рўзи⁴ ва неъматинг доди⁵ берилмай қолса. Рўзи ва неъматнинг доди улдурким, рўзини рўзихорга берилгай, то ул тановул қилгай ва неъматни(нг) доди учун барча улусни⁶ яратди ва жами неъматларни улар учун. Чунки улусга адл ва сиёсат ва тарбият қилмоқ лозим эрди. Аммо раҳнамосиз сиёсат қилмоқ хом эрди. Нединким, ҳар рўзихор адл ва тарбиятсиз, рўзи эса рўзи бергувчининг шукру сипосин билмаса, рўзи бергувчининг айби бўлгайким, они бедониш қўйди. Ондинким, ўз китобида айтур-

¹ Макхур – қаҳрга лойик.

² Товон – жарима.

³ Набот – гиёҳ.

⁴ Рўзи – ризқ, насиба.

⁵ Дод – адолат.

⁶ Улус – халқ, эл, омма.

ким: «Мен инс ва жинсни менга фақат ибодат қилишлари учун яратдим». Шунинг учун пайғамбарларни халойиқ орасига юборди. То аларга йўл кўргузгайлар ва рўзи емакнинг қоидаси ва рўзи бергувчига шукр қилмоқ расмин ўргатгайлар. То жаҳонни яратмоқ адл била тамом бўлгай ва рўзихор раҳнамо пайғамбарлар била тамом бўлгай, камолга етғай ва ҳақиқатга рўзихорнинг неъмат ва рўзлиға фазилати нечоғлиф бўлса, раҳнамо пайғамбарларнинг рўзихорига фазилати ул чоғлиқдур ва рўзихорнинг неъмат ва рўзига ҳурмат ва орзуси на миқдор бўлса, ўз раҳнамосин ҳаққин билмакни ўзига ул миқдор вожиб айлантургай ва рўзи бергувчидан миннатдор бўлгай ва онинг юборган пайғамбарларин Одам алайҳиссаломдин то пайғамбарларимизгача барҳақ билиб, барчасин ростгўй ва раҳнамо эътиқод қилғай ва неъмат бергувчининг неъмати шукрида тақсир қилмағай. Ва дин фарзлари ҳаққин бажо келтургай, то некном¹ ва хўб фаржом² бўлгай.

УЧИНЧИ БОБ

ҲАҚ ТАОЛОНИНГ ШУКРГУЗАРЛИГИ ЗИКРИДА

Эй фарзанд, билғил ва огоҳ бўлғилким, Ҳақ таоло неъматининг шукри барча ҳалқға фармон андозасича вожибдур³ ва истиҳқоқ⁴ андозасигача вожиб эмасдур. Нединким, агар киши барча вақтин шукрга сарф қилса, ҳануз мингдин бир неъмат ҳаққин бажо келтира олмағусидур.

¹ Некном – яхши ном чиқарган.

² Фаржом – оқибат, баҳт.

³ Вожиб – бажарилиши мажбурий.

⁴ Истиҳқоқ – ҳақ, ҳақдли бўлиш.

Агар фармон андозасича бўлса, шукр ҳаққин бажо қила олгусидур. Ва гар оз неъматнинг эгаси бўлғон киши кўп шукр тиласа, раво бўлур. Билғилким, тоат андозаси ислом динида бешдур. Икки хос мунъим¹лардин, учиси ом² ҳалойиқдин ва бу учнинг бири тил била иқрор қўлмоқ ва кўнгил бирла инонмоқдур. Яна бири беш вақт намоз ва рамазон ойининг рўзасидур. Намоз ва рўза Ҳақ таолонинг ҳақлифига иқрор этмакни рост ва маҳкам этмак учундур. Ва чун дерсанким, мен бандамен, бандаликда событ³ бўлмоқ керакдур ва чун дерсанким, Ҳақ ҳақдур. Онинг ҳукми остида доим бўлмоқ керакдур. Агар тиласангким, ўз банданг сенга кўпроқ итоат ва хизмат қилғай: сен Худойи таолога кўпроқ тоат ва ибодат қилғил ва бетоат банда бўлмагил. Банда бетоат хожалиқ қилиб, кишига ҳукм сурмак тиласа, тезроқ беобрў ва ҳалок бўлур. Билғилким, намоз ва рўза Худонинг хосидур. Аларни бажо келтурмакда ҳаргиз тақсир⁴ қилмағилким, агар Худога хос бўлғон ишда тақсир қилсанг, барча авомунносдин⁵ паст бўлурсан. Билғилким, намозни шариат соҳиби барча миллат ва дин била баробар қилибдур. Ҳар кишиким намозни тарк этса, тарки дин этгусидур ва бедин кишининг бу дунёда жазоси қатл этмакдур ва Худойи таолонинг уқубатига гирифтор бўлғусидур.

Эй фарзанд, хабардор бўлғил, зинҳор демагил: намозда тақсир қилмоқ раводур. Агар дин юзидин андиша қилмасанг, ақл юзидин андиша қилким, намознинг фойдаси кўпдур. Аввал буким,

¹ Мунъим – ризқ берувчи.

² Ом – барча, омма.

³ Собит – барқарор.

⁴ Тақсир – сустлик.

⁵ Авомуннос – ҳалқ, умум.

ҳар киши фарз¹ намозин бажо келтирса, ҳамиша бадани ва либоси пок бўлгусидур. Барча ҳолда палидикдан² поклик яхшидур. Яна улким, агар намоз ўқуса, гийбатлик айбидан пок бўлгусидур. Нединким, намознинг биноси тавозеъ³ биладур. Чун табъини тавозеъликка одат қилдурсанг, бандадаги табиятга мутобаат қилур. Яна улким, барча доноларга маълумдурким, ҳар киши ҳар жамоатга тобеъ бўлмоқ тиласа, ул жамоат била сухбат қилмоқ керакдур. Чун ҳар киши бадбаҳт ва шақий⁴ бўлмоқ тиласа, ёмонларнинг сухбатин ихтиёр қилур ва ҳар киши баҳт ва давлатманд бўлмоқ тиласа, яхшиларга тобеъ бўлмоқни ғанимат билур ва ҳушманд⁵ жамоа сухбатин ихтиёр қилур. Бас, эй фарзанд, ҳамиша давлатлиф ва неъматлиф ва роҳатлиф бўлмоқ тиласанг, солиҳ⁶ одамлар била ҳамсуҳбат бўлғил. Зинҳор намозни енгил тутмагил, рукуъ ва сужудни бажо келтиргил ва намозни енгил тутмоқ дин ва дунёни бермакдур.

Эй фарзанд, билғилким, рўза андоқ тоатдурким, бир йилда бир ой бўлур. Они тутмоқда тақсир қилмағил, ниҳоятсиз ярамаслик ва беҳшлиқдур. Хирадманлар⁷ мундоқ тақсирни ўзлариға раво кўрмаслар ва яна ҳаргиз таассуб⁸ қилмағил, яъни жаҳл юзидин бир-икки кун бурун тутмоқфа ё бир-икки кун сўнг очмоқға майл кўргузмағил. Нединким, рўзани тутмоқда ва очмоқда таасусбисиз бўлмағусидур. Ҳар вақтким, шаҳарнинг

¹ Фарз – бажарилиши шарт.

² Палид – ифлос, ярамас.

³ Тавозеъ – одобилик, ҳокисорлик.

⁴ Шақий – гуноҳкор, баҳтсиз.

⁵ Ҳушманд – ақдли, зийрак, ҳушёр.

⁶ Солиҳ – салоҳиятли киши.

⁷ Хирадманд – ақдли, донишманд.

⁸ Таассуб – кўр-кўрона эргашиш.

қозиси ва муфтиси рўза тутсалар, алар била тутғил ва очсалар, алар била очғил ва жаҳл сўзига кўнгил бермагил ва огоҳ бўлғилким, Худойи таоло сенинг очлиқ-тўқдифингдин мустағнийдур¹ ва билғилким, рўза бир муҳрдурким, Худойи таоло ўз мулкига босмоқ учун муҳайё қилибдур ва бу муҳрни баъзи атзо учун тузатмамушдур, балки жами бадан-чун тузалмушдурким, андоғ қўл ва оёғ ва қорин ва қулоқ ва кўз ва аврат-чун бу андомларни муҳрлиқ тутсанг, фисқу фужурдин омон сақласанг, рўза муҳрини(нг) додин бермиш бўлғай. Билғилким, рўзада яхшироқ иш улдурким, ўзинг кечлик таомига қаноат этиб, кундуз нонин очларга ва ожизларга бергайсен. То рўзада чеккан ранжингни(нг) фойдаси зоҳир бўлғай ва ул фойдадин ул вақтда баҳра топқайсанким, ранжингни(нг) манфаати бир мустаҳиқга етгай. Ушбу уч тоатдаким, барча жаҳон аҳлифа омдур. Асло тақсирни раво кўрмагил. Нединким, бу уч тоатнинг тақсирига ҳеч узри йўқтур. Аммо ул икки тоатким, мунъим ва тавонгарларга² махсусдур. Анда тақсир боузр раво бўлур. Аммо бу бобда сўз кўбдур, лекин улчаким лобудидур³, баён қилдим.

ТЎРТИНЧИ БОБ

НЕЪМАТЛАРҒА ШУКР ҚИЛМОҚ ЗИКРИДА

Эй фарзанд, билғилким, Худойи таоло молдору муҳташамлар ва хос бандалар учун икки тарийқ⁴ пайдо қилди: ул ҳаж ва закотдур ва буюрди, то

¹ Мустағний – эҳтиёжсиз, бениёз.

² Тавонгар – қудратли, бадавлат.

³ Лобуд – фақат, бор-йўғи.

⁴ Тарийқ – йўл-йўриқ, йўсин.

ҳар кишининг қудрати етса, они(нг) уйин, яъни Каъбани зиёрат қилфай ва қудрати етмаган кишига буюрмади. Андоқким, дунёда подшоҳлар даргаҳи муомаласин ҳам қудратлиф одамлар қила олурлар, ожизлар қила олмаслар ва яна сафарға эътимод даркордур ва қудрати етмай сафар қилмоқ доноларнинг иши эрмасдур. Нединким, истеъдодсиз¹ сафар қилмоқ ўзин ҳалок биймиға² солмоқдур ва чун қудратинг етиб, сафар қилмасанг лаззат ва неъматни камо ҳақ қуҳу тамом қилмиш бўлгайсан. Лаззат ва неъматни камолга етмаги ул ишда мұяссар бўлурким, кўрмай кўрарсан ва емай егайсан ва топгайсан. Бу ишлар сафардин ўзга ерда мұяссар бўлмағусидур. Нединким, сафар қилғон, яхши ва ёмонни имтиҳон этган кишилар зийрак ва доно бўлурлар. Бас, Худойи таоло қудрат ва неъматлиф одамларга сафар қилмоқни буюрди, то қудрат ва неъматнинг додин берғайлар ва неъмат лаззатидин баҳра олғайлар ва Худонинг фармонин ўзларига фарз билғайлар ва онинг уйин зиёрат қилғайлар. Асбоб ва озуқаларға қудрати етмаган дарвешларға буюрмади. Бас, дарвеш агар ҳаж ирода қилса, ўзин ҳалокат даштида саргардон қилмиш бўлғай, бир бемордекким тандурустларнинг ишига қўл ургай. Онинг достони икки ҳожиға ўхшарким, бири дарвеш, бири тавонгар эрди.

Ҳикоят. Эшитибманким, бир вақтда Бухоро шаҳрининг раиси Макка сафарин ирода қилди, зиёда давлатманд киши эрди ва ул қофила орасида ондин давлатманд киши йўқ эрдиким, юздин кўпроқ тева онинг асбоб ва юкин кўтарур эрди ва ўзи бир кажаванинг устида ўлтуруб, хуррам ва шодмон саҳро-ю биёбонни қатъ қилур эрди ва

¹ Истеъдод – қобилият.

² Бийм – хавф-хатар, таҳлика.

ўзига тавонгардин күб киши онга ҳамроҳ эрдилар. Атрофта ёвуқ етган вақтда бир дарвешким оч ва ташна ва оёқяланг келур эрди. Раисга кўзи тушдиким, фуур ва ноз ва тан осонлик била борадур. Анга қараб деди:

– Сен онча неъмат била борурсан ва мен мунча шиддат била борурман. Икковимизнинг ҳам амалимизнинг жазоси бирдек бўлгусидур.

Раис деди:

– Ҳошоки¹, менинг жазом била сенинг жазонг баробар бўлғай, агар мен билсам эрдиким, менинг савобим била сенинг савобинг тенг бўлғай, ҳаргиз бу йўлга қадам қўймагай эрдим.

Дарвеш деди:

– Нечун?

Раис деди:

– Ул жиҳатдинким, мен Худонинг буйруғи била келурман ва сен Худонинг амри хилофин қилмишсан ва мени чақирмишлар. Мен асли меҳмондурмен ва сен туфайлий²дурсан. Туфайлийнинг иззати меҳмоннинг иззатича бўлмас ва Худойи таоло ҳаж қилмоқни тавонгарларга буюрди ва дарвешларга деди: «Ўз қўлларингни ҳалокатфа ташламанг». Сен буормаган ишни қасд этиб, оч ва оёқяланг келдинг ва ўзингни таҳликаfa солдинг ва Худонинг амри била қилмадинг. Анинг била ҳам фармонбардорлар³ била баробар бўлмоқ тиларсан. Ҳар кишиким қадрини етиб ҳаж қилса, Худонинг неъмат ва фармони додин бермиш бўлғай.

Эй фарзанд, агар қудрат ва дастгоҳинг бўлса, ҳаж қилмоқда асло тақсир қилмағил ва ҳажнинг

¹ Ҳошо – ҳеч қачон.

² Туфайлий – чақирилмаган, аммо чақирилганларга эргашиб борувчи.

³ Фармонбардор – буйруққа итоат қилувчи, бўйсунувчи.

асбоби бешдур: Мұхлат ва муддат ва неъмат ва роҳат ва ният. Булардин баҳра топғандин сүнг тоатни камолға еткур, жаҳд қил ва билғилким, құдратинг етса, ҳаж доимий тоатдур, агар ниятни сүнгги йилға қўйсанг ҳам раво бўлур ва лекин закот бир тоатдурким, агар давлатинг бўлса, анинг ҳеч важъ била узри йўқдур ва Худойи таоло закот бергувчиларни ўзининг муқаррабларидин¹ санабдур ва закот бергувчилар била бошқа жамоанинг мисоли раият орасида подшоҳ мисолидекдурким, подшоҳ неъмат берувчи ва ўзгалар неъмат егучидурлар. Худойи таоло бир жамоани дарвеш ва бир жамоани тавонгар яратибдур. Агарчи барчани тавонгар қилмоққа қодирдур, лекин ул жиҳатдин икки гуруҳ қилдиким, баланд мартаба баландларнинг шараф ва манзилати пастлардан имтиёз топғай, андоқким, подшоҳ ҳар кишини бир шаҳарга ҳоким қиласа, у киши ҳукумат суруб топған неъматни ўзи еб, подшоҳга ҳеч нимарса бермаса, подшоҳ қаҳридин эмин бўлмағусидур. Бу тариқа давлат ва неъматлиғ киши закот бермаса, Худонинг ғазабидин омонлиғ топмағай ва закот санга ҳар йилда бир мартаба фарздур ва садақа гарчи фарз эмасдур, аммо мурувват ва шафқат юзидин құдратинг етгунча берғил ва тақсир қилмағил. Нединким, садақа бергувчилар ҳамиша Худойи таолонинг оминида бўлғайлар ва Худойи таолодин эмин бўлмоқниғанимат билгайлар.

Эй фарзанд, зинҳор ҳаж ва закот борасида кўнглунгга шак келтирмағил ва тилингга беҳуда сўз сурмағил ва демағил: Ҳаж ҳангомида² юрмағил ва надинким, баданни яланғоч қилмоқ,

¹ Муқарраб – яқин турувчи, ҳамсуҳбат.

² Ҳангом – фурсат, вақт.

тирноқ олмоқ, надинким, закот деб йигирма ди-нордин ярим динорни не учун берурлар ва тева-қўйлардин не учун закот олурлар ва не учун қурбон қилурлар? Бу жумлада кўнглунгга гумонға йўл бермағил ва Худонинг амри ҳарна бўлса, они қилғил ва отанг-онанг ҳақини яхши билғил.

БЕШИНЧИ БОБ

ОТА ВА ОНА ҲАҚИНИ БИЛМАК ЗИКРИДА

Эй фарзанд, билғилким, ақл юзасидин фарзандга ота-онани иззат ва ҳурмат қилиш вожибдур, нединким унинг асли ота ва онадур. Отава онани нима учун ҳурмат қилурман деб кўнглингга келтурмағил, билғилки, улар сенинг учун ўлимға ҳам тайёр турадурлар.

Ҳар фарзандки, оқил ва доно бўлса, ҳеч вақт ота-онанинг меҳр ҳақини адо қилмоқдин холи бўлмағусидур. Ота-она фармонбардордур. Бу фармонбардорликда ҳам иш бўлгай ва ҳам фармон бўлгай. Ота-онанинг иши сени парвариш қилмоқдур ва фармони сенга яхшилик ўргатмоқдур. Эй фарзанд, шул важдин ота-онангни сағал ҳам ранжитмагил.

Айтишларича, амиралмўъминин Алидан сўрадиларки, «Фарзандда ота-онанинг ҳақи қанчадур?» Ҳазрат Али деди: «Ҳақ таоло бу адабни Расулнинг ота-онаси ўлумида кўргузди. Нединким, бу ҳазрат ота-онасининг ҳаётлик айёмин топса эрди, уларни ўзидан илгари тутмоқ, уларнинг ҳақини билмоқ ва уларга фарзандлик юзидан тавозеъ кўргузмоқ вожиб булур эрди».

Бас, ота-онанинг ҳақига дин нуқтаи назаридан риоя қилмасанг ҳам, ақл юзидан, мурувват юзидан риоя қил ва кўргил: ота-она аслида сени

жон ва дил била парвариш құлмишлар. Агар улар ҳақида камчиліклар құлсанг, тақсир күргузсанг, сен ҳеч яхшиликка сазовор әмасдурсан, нединким ҳар киши аслини яхшилиғин билмаса, ўзганинг ҳам яхшилиғин билмағусидур. Ўз фарзандини сенинг ҳақингда қандай бўлишин тила-санг, сен ҳам ота-онанг ҳақида шундай бўлғил, нединким сен ота-онангга нима иш құлсанг, фарзандинг ҳам сенинг ҳақингда шундоқ иш қи-лур, чунки одам мевага, ота-она дарахтга ўхшайдур. Дарахтни ҳар қанча яхши тарбият құлсанг, меваси шунча яхшироқ ва ширинроқ бўлур. Ота-онага иззат ва ҳурматни қанча кўп құлсанг, уларнинг дуоси шунча тезроқ мустажоб бўлур.

Зинҳор мерос олмоқ ҳирси била ота-онанг ўли-мин тиламагилки, уларнинг ризқи била сенинг ризқинг етишур. Ота-онанинг ўлимини тила-магил, чунки ота-она ўлмай юрсалар ҳам ризқинг етишаверади, нединким ризқ мақсумдур¹ ва у ҳар йўл била восил бўлур. Рўзий насиба учун ўзингни кўп ранж-машаққатга қўймағил, рўзий ранж ва азоб-уқубат била зиёда бўлмағусидур.

Ҳоли-аҳволи сендан яхшироқ бўлғон кишиларга қарамағил, ҳоли-аҳволи сендан ёмонроқ бўлғон кишиларга қарагил.

Агар молсизликдан қашшоқ бўлсанг, ақлдан бой бўлмоққа сайъ кўргузғилки, мол била бой бўлғондан, ақл била бой бўлғон яхшироқдур, нединким ақл била мол жам этса бўлур, аммо мол била ақл ўрганиб бўлмас. Билғил, ақл бир молдурки, уни ўғри ололмас, у ўтда ёнмас, сувга оқмас.

Бас, агар ақдинг бўлса ҳунар ўрганғил, нединким ҳунарсиз ақл – бошсиз тан, суратсиз бадандекдир. Ундоқким дебдурулар: ал-адаб – суратил-ақл.

¹ Мақсум – тақсимланган, бўлинган.

ОЛТИНЧИ БОБ

ХУНАР АФЗУНЛИГИ¹ БИЛА БАЛАНД ҚАДР ВА ОЛИЙ ТАБЪ БЎЛМОҚ ЗИКРИДА

Эй фарзанд, огоҳ бўлки, ҳунарсиз киши ҳамиша фойдасиз бўлур ва ҳеч кишига нафъ еткурмас. Билурсанки, хори муғилон²нинг тани бордур, аммо сояси йўқдур. Ҳунарсиз киши ҳам хори муғилон янглиф на ўзига ва на ўзгага фойда берур.

Агар киши ҳар қанчаки олий насаб ва асл бўлса, аммо ҳунари бўлмаса, ҳалойиқнинг иззат ва ҳурматидин ноумид бўлур. Агар кишида ҳам насаб гавҳари ва ҳам ҳунар зевари³ бўлмаса, ундан баттарроқдур. Жаҳд қилғил, агар гавҳаринг ҳар нечаким асл бўлса, унга ғарра бўлмағил, нединким тан гавҳари ҳунар зевари била музайян⁴ бўлмаса, у ҳеч нарсага арзимагусидур. Андоқким дебдурлар: «Улуғлик ақл ва донишлик биладур, гавҳар ва насаб била бўлмас».

Отни ота ва онанг қўймишлар, сен унга ғарра бўлмағил, нединким, ул от маҳзи⁵ бир нишондин ўзга нарса эрмасдур. Аммо сен ҳунар била бир номга эга бўлғил. Ўзингни «Жаъфар», «Муҳаммад», «Аҳмад», «устод», «хўжа», «фозил» оти била атаб, аммо унга лойиқ бўлмасанг, у от эрмасдур. Агар кишида насаб гавҳари бўлса, аммо ҳунар зевари бўлмаса, у ҳеч кишининг суҳбатига лойиқ бўлмағусидур. Гарчи бу икки гавҳар ҳосил қилғон кишини топсанг, этагини маҳкам тутғил ва ундин илкингни чекмагил, билки у барча кишиларнинг мушкулин осон қилғай.

¹ Афзунлик – ортиқлиқ.

² Хори муғилон – тиканли бута.

³ Зевар – безак, зийнат.

⁴ Музайян – зийнатланган.

⁵ Маҳз – холис.

Барча ҳунардин сўз ҳунари яхшироқдур, нединким, ҳамма маҳлукотдин одам яхшироқ яралди ва ўзга жониворлардин одам ўн даража зиёдадур ва бу ўн даража одамнинг баданида ҳамиша бордур. Беши ташида зоҳирдур, беши ичида пинҳондур. Ул пинҳон нарсалар: бири бир нарсани ёд олмоқ; бири ҳамиша эсда сақламоқ; бири тахайюл¹; бири таҳаввур², бири такаллум³. Аммо ул бештаким ташида зоҳирдур; бу завқ, яъни эшитмоқ, кўрмоқ, ҳид билмоқ, тотмоқ, сий-паламоқ, яъни сезув. Булар гарчи бошқа жониворларда бўлса ҳам, одамда бўлғондек эмасдурлар. Бу сабабдан одамзот ўзга жониворларга подшоҳ манзаласидандур.

Шуларни билғонингдан кейин тилингни яхши ҳунар била ўргатғил ва мулоим сўздин бошқа нарсани одат қилмағил. Нединким, тилга ҳар нечук сўзни ўргатсанг, шуни айтур, сўзни ўз жойида ишлатғил, сўз агар яхши бўлса, аммо ноўрин ишлатилса, гарчанд у ҳар нечук яхши сўз бўлса ҳам ёмон, нобоп эштилиур. Шунинг учун беҳуда сўзламагилки, фойдасиздур. Бундай бефойда сўз зиён келтирур ва ҳар сўзки ундан ҳунар иси келмаса, бундай сўзни гапирмаслик лозим. Ҳакимлар дебдурлар: «Сўз бир нашъадур, ундан хумор пайдо бўлур».

Аммо сўралмағон сўзни айтмағил ва беҳуда сўздан парҳез қилғил, ҳар бир сўзни сўрасалар, рост айтғил. Сендан талаб қилмаса, кишига насиҳат қилмағил, панд бермағил, хусусан, сени тингламағон кишига ҳеч сўз дема, чунки бундай кишилар пандни эшитмагайлар. Қўп кишиларнинг орасида бир кишига панд-насиҳат қилмағил.

¹ Тахайюл – хаёлга келтирмоқ.

² Таҳаввур – шиддат билан ҳужум этиш.

³ Такаллум – сўзлаш.

Агар бирор киши қажликка¹ одат қилғон бўлса, унинг ёнига бормағилки, у ҳаргиз рост сўзламас. Нединким, бир дараҳт эгри бўлса, то уни чопиб йўнмагунча у тўғри бўлмас.

Мулойим сўзга баҳил бўлмағил, ҳалқ мулойим сўз эшитмаса, мол ва дунёга мағрур бўлур. Қаттиқ сўз демағил, токи яхши сўз эшитғайсан. Шўристонфа тухум сочмағилким ҳосил бермағай, меҳнатинг беҳуда бўлғай, яъни яхшиликни билмағон кишига яхшилик қилмоқ шўристон ерга тухум сочмоқдур. Аммо яхшиликка лойиқ кишидан яхшиликни дариф тутмағил ва унга ҳам яхшиликни ўргатғил.

Эй фарзанд, яхшилик қил ва қилғон яхшиликдин ҳаргиз пушаймон бўлмағил. Бир кишига бир яхшилик қилсанг, кўргилки, яхшилик қилғон вақтда у кишига нақадарро ҳам ундан зиёдроқ шодлиқ ва хуррамлик етишур. Агар бир кишига ёмонлик қилсанг, унга нақадар ранж етса, сенинг кўнглингга ҳам ул миқдор танглик етишур. Демак, бу жаҳонда яхшилик ва ёмонлик мукофоти, албатта, етгусидур. Менинг бу сўзимга мункир бўлмағилки, ҳар киши бутун умрида бир кишига яхшилик ё ёмонлик қилғон бўлса, бу ҳақда андиша қиласин, менинг бу сўзим ростдур. Бас, агар қила олсанг ҳеч кишидан яхшиликни дариф тутмағил, яхшиликнинг фойдаси бир куни рўёбга чиқар.

Ҳикоят. Андоқ эшитибманки, Мутаваккил^{1*} у айёмда Бағдод халифаси эрди. Унинг Фатҳ отлиғ бир бандаси бор эрди, у ғоятда донишманд, гўзал сиймоли, адаблиғ ва таваккалчи эрди. Ҳамма илм ва санъатни ўрганганди. Мутавак-

¹ Қажлик – қинғирлик, ёлғончилик.

^{1*} Юлдузчали сўзларнинг изоҳи китобнинг охирида берилган.

кил Фатҳни фарзанд атаб, ўз фарзандларидан ҳам азизроқ тутарди. Бир куни Фатҳ сувда юзмоқни ўрганмоқ тилади ва кемачилар келиб, унга Дажла дарёсида сувда юзишни ўргатдилар. Аммо Фатҳ ёш бола эрди, сувда юзишни ҳали у қадарли яхши билмасди, шунга қарамай: «Мен энди юзишни яхши ўрфондим», деб кемачиларга айтмай, танҳо ўзи Дажла дарёси қирғонига бориб, ўзини сувга ташлади. Сув тез оқарди. Фатҳни оқизиб кетди. Фатҳ юзмоқдин ожиз эрди ва сувнинг юзида қалқиб бораради. Нихоят, тўлқин зарбидан қирғоққа чиқиб қолди. Бир айланмада дарё қирғонида сув мавжининг қилғон ўнгирликлари бор эрди. Фатҳ шу ўнгирликларнинг бирига тушиб ўтириди ва «Жонимни ҳалокат гирдобидан қутқардим, энди Худойи таоло ҳар не хоҳласа, уни кўргумдур», деб етти кун муддати мазкур ўнгурда ўтириди. Бир неча кундан кейин: «Фатҳ сувга ташлаб гарқ бўлди ва сувнинг юзида қалқиб қолди. Билмадик, қирғоққа чиқдиму ё чиқмадиму», деб Мутаваккилга хабар еткурдилар. Мутаваккил кемачиларни чақириб деди: «Ҳар киши Фатҳнинг ўлугин ё тиригин келтурса, унга минг динор берурман» ва ўзи «То Фатҳни кўрмагунимча таом емағайман», деб онт ичди. Кемачилар ўзларин дарёга ташлаб шўнғиб ва юзиб, ҳар тарафга бориб Фатҳни ахтарур эрдилар. Еттинчи куни иттифоқо бир кемачи ул ўнгурга етиб, Фатҳни кўриб шод бўлди ва унга деди: «Ушбу ерда турғил, то мен бир қайиқ келтуруб, сени халифанинг қошига олиб кетай» ва тезда Мутаваккил халифанинг олдига қайтиб келиб деди: «Эй, амиралмўъминин, агар мен Фатҳни сенинг олдингга тирик олиб келсам, менга нима берурсан?». Мутаваккил деди: «Беш минг динор

берурман». Кемачи қайтиб бориб Фатҳни тирик келтурди. Халифа унга ваъда қилғон динорни берди ва вазирга деди: «Хазинага борғил, қанча мол бўлса, ярмини дарвешларга берғил». Ондин сўнг деди: «Таом келтуринг, Фатҳ етти кундан бери очдур». Фатҳ деди: «Мен тўқдурман». Халифа деди: «Дажла дарёси суви билан тўйғондурсан?». Фатҳ деди: «Йўқ, етти кун муддатида ҳар кун бир табақ¹ ичидা йигирма чоғлик нон сувнинг юзида оқиб келур эрди ва мен чустлик² била ундан икки-уч нон олиб ер эдим. Менинг тириклигимга сабаб ул эрди».

Ҳар нонга бундоқ хат ёзилмиш эрди: «Мен ким, Муҳаммад бинни Ҳусайн ал-Аскоф, яъни бу нонларни дарёга ташлоған киши Ҳусайн кафшдўзнинг ўғли Муҳаммаддур».

Мутаваккил: «Ҳар куни Дажла дарёсига нон ташлағон кимдур? Амиралмўъминин уни қадрлайди ва баҳтиёр қиласди, ўзин маълум қилсун» деб шаҳарга жар солдирди. Сўнгги кун бир киши келиб: «Мен эрдим», – деди. Халифа: «Нишонинг борму?» – деб сўради. Ул: «Нишоним улдурки, ҳар ноннинг юзида «Муҳаммад бинни Ҳусайн ал-Аскоф» деб ёзилғон хат бор», – деб жавоб берди. Халифа: «Нишонинг дурустдур, аммо неча муддатдин бери дарёга нон ташларсан?» – деб сўради. Ул: «Бир йил бўлди», – деб жавоб берди. Халифа: «Бундан муддаонг нима эрди?» – деб сўради. Ул одам: «Бундоқ эшитиб эрдимким, яхшилик қилиб дарёга нон ташлағил, то бир кун сенга фойдаси етғай», аммо менинг қўйлимдан бошқа яхшилик келмас эрди ва құдратим етғони ушбу нон эрдики, дарёга ташлаб, ундин менга қандай

¹ Табақ – лаган.

² Чуст – чаққон.

фойда етушгай? – деб кўз тутар эдим», – деди. Халифа деди: «Ҳар нимани эшиитдинг – қилдинг, ҳар нимаким қилдинг – унинг фойдасини топдинг».

Дарҳол унга Бағдодда кўп мулк ва асбоб берди ва у оз вақт ичида муҳтарам ва муҳташам бўлди. Унинг авлоди ва ихфоди¹ ҳануз Бағдодда бордур. Мен ал-Қойимби-амрийлоҳи замонида ҳажга бормиши эрдим. Байтуллоҳни зиёрат қилиб Бағдодга келдим ва Бағдодда ҳам у кишининг фарзандлари ни кўрдим ва бу ҳикоятни ҳам шу тариқа эшиитдим.

Эй фарзанд, ҳаргиз яхшилик қилмоқни тарк этмағил, ҳамиша яхшиликни халойиққа кўргузғил ва асло унинг аксин кўргузмағил, бошқа тил била сўзламағил. Бошқа кўнгил била фикр этмағил, буғдойни кўргузиб арпани сотмағил ва барча ерда ўзингдин дод берғил. Ҳар кишиким ўзидин дод берса, доди мустағни бўлур. Агар ғаминг бўлса, ғам ва шодлиғи бор кишининг ёнида айтғил ва шодликни ношод кишиларнинг қошида зоҳир қилмағил, ҳар турлук иш учун дилтанг бўлмағилким, бу иш ёш ўғлоннинг ишидур.

Билғилки, донишмандлар охири ғам бўлғон шодликни шодлик билмаслар ва охири шодлик бўлғон ғамни ғам ҳисоб қилмаслар. Ноумидлик вақтида умидворроқ бўл ва ноумидликка борлиқ қилмағил. Ҳеч кишининг меҳнатини зоеъ қилмағил ва ҳар кишининг ҳолига лойик ҳақини бажо келтурғил. Ҳусусан, ўзингнинг яқин қариндошларингға имкон борича яхшилик қил ва ўзингнинг қабила ва уруғинг қариларини иззат, ҳурмат қил, лекин уларга буткул мухлис бўлмағил. Уларнинг ҳунарини кўрсанг, айбларига ҳам қарагил. Агар бегонадан хавфсиз бўлсанг, мазкур хавфсизлик даврни ўзинг сақла, хавфсизликни

¹ Ихфоди – насл.

хавфлилик гумон қилмағыл. Гумон қилиб заҳар ичиш нодонлиқдан ёмонроқдур.

Халқнинг оз ҳунарини кўп кўргил, ҳаққин яхши билғил. Беҳунарликдан, беҳирадликдан яхши от ва яхши таом қўлға келтура олсанг, беҳунар, беҳирад бўлғил, йўқ эрса ҳунар ўрганғил. Ўрганмак, эшитмакдин номус қилмағыл, то хижолат ва пушаймонлиғдин қутулгайсан.

Халойиқнинг айби ва ҳунарига боққил, уларнинг наф ва зарари на чоғлиқдур. Бунинг фойда ва зиёnlари қайси ерга қадар борур, ундан сўнг ўз манфаатингни талаб қил. Кўргил, қайси нарса халқни манфаатга яқин қилур. Ўзинг ана шундօғ ақл ва ҳунарни ўрганмоқ била баландликка кўтариурсан. Бу иш сенга икки нарса била ҳосил бўлур: ё билғон ҳунарга яраша иш қилмоқ била ё билмағон ҳунарни ўрганмоқ била. Суқрот^{2*} ҳаким айтурки: «Ҳунардин яхшироқ нарса йўқтур ва донишдан улугроқ нарса йўқтур, шармдин яхшироқ зевар йўқтур ва бадхўйликдин ёмонроқ душман йўқтур». Ҳунарни ул вақтда ўрганурсанки, агар бир соатни ҳам бекор ўтказмасанг. Агар ул вақтда доно киши ҳозир бўлмаса, нодондин ўрганғил, чунки ҳунарни нодондин яхшироқ ўрганса бўлур. Бу шул жиҳатдинки, ҳар вақт кўнгул кўзи ва ақл назари била нодонга боқсанг унинг нописандида ишларин кўруб, ундин парҳез қилурсан. Искандар деди: «Барча дўстлардин худ манфаат топарман, аммо душманлардин ундин кўпроқ манфаат топарман. Сабаби менинг ёмон феълимни дўстлар манфаат юзидин пинҳон тутарлар ва мен уни билмай қолурман. Душманлар душманлик жиҳатидин ул феълни менга айтурлар ва мен ул феълни ўзимдин йироқ тутарман».

Эй фарзанд, сен ҳам ҳунарни донодин ўрганмасанг, нодондин ўрганғил. Барча катта, кичик-

ка ҳунар ўргатмак возибдур, нединким киши ҳунар ўрганмоқ била ўз ҳамроҳларидин баланд мартабада бўлур. Чунки ўзингда ҳунар кўриб ўз тенгларингда ул фазилатни кўрмасанг, ўзингни улардин баланд кўрарсан ва улар яна сени ўзларидин баланд мартабада билурлар. Ҳунарманд киши улдурким, фазли ва ҳунар сабаби била қадр ва мартабаси ўзгалардин баланд бўлғон эканин билиб фазл ва ҳунарга аввалгидин зиёдроқ ҳаракат қиласай ва бурунғидин зиёдроқ фозил ва ҳунарманд бўлгай. Ҳар кишики бундоқ қиласа тезда халқнинг орасида азиз ва улуғ бўлгай. Бас, буни билғон киши фазл ва ҳунардин қўл тортса, бу ақлсизлик нишонасибур. Ҳунар ўрганмоқда меҳнат қилмоқ, бадани ялқовлик, яъни бекорчилиқдин қутқармоқ фойдалидур, нединким бекорчилиқ баданинг фасод ва беморлигига сабаб бўлур. Агар баданга ранж бериб, уни ўзингга мутеъ қилмасанг, қаҳр била мартабали бўла олмассан. Нединким, бадан коҳилликни¹ ва роҳатни дўст тутғони жиҳатидин ҳам ўз ихтиёри била сенга фармонбардор бўлмас. Ул сабаб билаким, баданда асли ҳаракат йўқтур. У ҳаракатни фармон била қилур, ўз муроди била қилмас ва то сен буюрмагунча баданинг ҳеч ишга рағбати бўлмас.

Бас, эй фарзанд, бадани ўзингга мутеъ қил ва уни қаҳр била итоатга буюргил.

Ҳар киши ўз баданин ўзига мутеъ қиласа, ўзгаларнинг баданин ҳам мутеъ қила олур, чунки ҳар киши ўз баданин ўзига фармонбардор қиласа, фазл ва ҳунар ўрганмак била икки жаҳоннинг саломат ва шарофатин ҳосил қилур.

Барча дониш ва ҳунарнинг сармояси: адаб, тавозе, ҳаё, покдиллик, парҳезкорлик, беозор-

¹ Коҳил – суст, бўш.

лик, сабр ва матонатлиқдур. Лекин күп вақтлар бўлурки, шарм кишига зиён еткарур. Шундай шармли бўлмағилки, бу ишингга халал еткармасин, нединким күп вақтлар бўлурки, бешармлик била мақсуд ҳосил бўлур. Агар қила олсанг фаҳш, ёлғон ва ножувонмардликдин шарм қиласигил, салоҳиятлик сўз ва манфаатлик ишдин шармни қўйғил. Кўп кишилар бўлурки, шарм қилиб ўзларининг барча мақсадларидин айриулурлар. Сен ул миқдор шарм қиласигилки, бу имон субути ҳосилига сабаб бўлсин. Ўзингга зарап ва зиён етказур даражада шарм қиласигил.

Сенга шарм жойин ва бешарм жойин билмак лозимдур, токим қайси яхшироқ бўлса уни қиласиган. Дебдуллар: «Яхшилик муқаддимаси шармдур, ёмонлик муқаддимаси бепарҳезкорлик ва бешармликдур».

Нодон била ҳамсуҳбат бўлмағил, хусусан, сени доно гумон этғон била.

Ўз жаҳдингга хурсанд бўлмағил ва некном¹ кишилар била суҳбат тутғил, некномлар суҳбати шарофатидин некном бўлғунг ва ҳамиша саъй ва кўшиш қиласигилки, олимлар маҳбуби бўлгайсан ва жоҳиллар марғуби² бўлмағайсан. Ундоқим, бир ҳикоятда эшитғонман:

Ҳикоят. Бир кун Афлотун^{3*} ўлтурмиш эрди, шаҳар халқининг улуғларидин бир киши унинг саломига келиб ўлтурди ва ҳар турлук сўз айтиб туриб, сўз орасида деди:

– Эй ҳаким, бугун фалон одамни кўрдим. Ул сени таъриф этиб, ҳаққингга кўп дуолар қилди ва мен унинг шукрин сенга еткурмакдаман.

Афлотун ҳайрон бўлди. Ул киши деди:

¹ Некном – яхши.

² Марғуб – севимли, ёқимли.

– Эй, менинг бу сўзимдин ҳайрон ва дилтанг бўлдингму?

Афлотун деди:

– Йўқ, хўжа, менга сенинг сўзингдин ҳеч ранж ва танглик етушмади. Лекин менинг фикримда улуғ мусибат мавжуд бўлди. Нединким, мени бир жоҳил таъриф қиласмиш ва менинг ишим унга мақбул тушмиш. Гўё мен бир жоҳилона иш қиласмиш эрманки, мени бир жоҳил тавсиф этгай. Мен шул важдин фамгинманки, жоҳилларнинг марғуби бўлмишман. Нединким, жоҳилнинг марғуби жоҳил бўлгусидур.

Яна бу маънода бир ҳикоят ёдимга тушди.

Ҳикоят. Эшитибманки, Муҳаммад Закариёйи Розий^{4*} ўзининг шогирдларидин бир жамоа била ўлтурмиш эрди, бир девона уларнинг олдига келди ва ҳеч кишига қарамади. Аммо бир кун Муҳаммад Закариёйининг юзига қараб кудди. Ундан сўнг Муҳаммад Закариёйи бир яхши таом буюриб, пиширтириб еди.

Шогирдлари сўради:

– Эй ҳаким, бу таомни бурун емас эдингиз, ҳозир нечук ерсиз?

Ҳаким деди:

– Ул девона менинг юзимга қараб кулғони учун ерман, нединким ул то бу вақтгача менга илтифот қиласмас эрди ва юзимга қараб кулмас эрди. Энди билдимки, ул мени ўз аҳлидин ҳисоб қилди. Андоқким дебдурлар:

*«Кабутар бо кабутар, гоз бо гоз,
Кунад ҳамжинс бо ҳамжинс парвоз»*

Тундлик ва тезликни одат қиласмалил. Лекин ул миқдор ҳам мулоийим бўлмалилки, сени одамлар

ёмон күрмасунлар ва дурушт¹ бўлмағилки, сендин қочмасунлар. Дўст ва душманга мувофақат қилмоқдин мурод ҳосил қилса бўлур деб барча била мувофиқ бўлмағил.

Ҳеч кимга ёмонлик ўргатмағил, ўргатмак ҳам ёмонликнинг биридур. Агар бир киши сенга ҳеч гуноҳсиз озор берса, сен унга бермағил, одамнинг асили кам озорлиқдур.

Агар одам эрсанг, кам озор бўл, халойикқа хулқингни яхши қил. Одамга дийдор керакдур, нединким ойинага қарагон агар дийдори яхши бўлса, кирдорини ҳам дийдоридек қилгай. Чунки яхшидин ёмонликнинг чиқмоғи яхши эмасдур, яъни буғдойдин арпа кўкармоғи номуносидур. Агар киши ойинага қарагонда юзи ёмон кўринса ҳам яхшилик қилсун, йўқ эрса ёмонлиқ устига ёмонлиқни зиёда қилмиш бўлғай ва икки ёмоннинг бир ерда жамъ бўлмоғи ниҳоятда ёмондур.

Мушфиқларни қабул этғил ва улар била ҳар вақт хилватда суҳбат қилғил, нединким улардин кўпроқ фойда сенга хилват вақтда етар. Бу сўзларни мен сенга баён қилдим, агар уқиб, билиб фазл ва ҳунарлар ҳосил қилсанг, унда ҳам фазл ва ҳунарингга фарра² бўлмағил ва ўзингни нодон санамағил. Доно ул вақтда бўлурсанким, нодонликдин хабардор бўлсанг.

Ҳикоят. Эшитибманким, Хисрав Парвезнинг^{5*} подшоҳлиғи замонида ва Абузуржмеҳр^{6*}-нинг вазирлиги вақтида Румдин бир элчи келди. Хисрав уни олдига чақириб Абузуржмеҳрнинг донолигини унга маълум этмак истади ва элчининг қошида Абузуржмеҳрга деди: «Эй фалони, ҳар нарсаки оламда бордур, сен унинг барчасин

¹ Дурушт – қўпол, дағал.

² Фарра – мағрур.

билурсан». Хисравнинг бу сўздан муддаоси: «Абузуржмеҳр биламан, деб ҳозир жавоб беради», деб ўйларди. Аммо Абузуржмеҳр: «Билмасман», деб жавоб берди. Хисрав бу жавобдин танг бўлуб, элчининг қошида қўп хижолат чекди ва яна сўради: «Унда ҳамма нарсани ким билур?». Абузуржмеҳр: «Ҳамма нарсани ҳамма билур, аммо ҳамма нарса ҳануз онадин туғилмамишдур», – деди.

Эй фарзанд, сен ҳар нечаки доно бўлсанг, ўзингни халқдин донороқ билмагил, нединким ўзингни нодон билдинг – доно бўлдинг. Рост, доно ул кишидурким, қачон ўзин нодон ва ожиз ҳисоблар. Чунки Суқрот ҳаким айтурки: «Агар бир киши десаким, Суқрот ҳаким донишмандур ва жаҳон донишининг даъвосин қўлур. Дарҳол айтур эрдимки, мен ожизман ва ҳеч нарсани билмасман. Лекин бу сўзни ҳам айта олмағумдур, нединким, бу сўз мен томондин айтилғон улуғ даъводур».

Демак, эй фарзанд, донишлиғингга фарра бўлмагил. Киши донишлиғига фарра бўлса, албатта, ул ҳамиша пушаймон бўлур.

Ҳар ишда машварат¹ қил, нединким машварат қилмоқни айб билмагил, оқил ва мушфиқ дўстларга машварат қил, ҳар ишда ўз ёрларингга машварат қил...

Билғилким, бир кишининг раъий икки кишининг раъий чоғлиқ бўлмағусидур ва бир кўз икки кўз янглиғ кўра олмағусидур. Кўрмасмусанким, бир табиб бемор бўлса, ўз муолажасига эътимод қилмағусидир. Бошқа бир табибни келтуриб, унинг машварати била даво қилғусидир.

Агар ўз ҳамжинсингдин бирининг сенга иши тушса, унинг ишини биткуарарга жонинг била ҳаракат қиагил. Агар ул душман бўлса ҳам мол хар-

¹ Машварат – кенгаш, маслаҳат.

жин ва тан мушқулин осон қылғонингни билса, бул жиҳатдин унинг душманлиги дўстликка айланур.

Сухандон кишилар сенинг саломингга келсалар, уларни ҳурмат қил ва эҳсон кўргазғил. Шунда сендин улар ҳушҳол ва миннатдор бўлғайлар ва ҳамиша саломингга келгайлар. Жаҳонда нокасроқ киши ул кишидурким, ҳеч ким унинг саломига келмағай.

Сухандон кишилар била ҳам сұхбатда бўлғил ва қандай қилиб сўзлаш кераклиги шартларин ҳам билғил.

ЕТТИНЧИ БОБ

СУХАНДОНЛИК БИЛА БАЛАНД МАРТАБАЛИ БЎЛМОҚ ЗИКРИДА

Киши сухандон, сухангўй (нотиқ) бўлиши керак. Аммо, эй фарзанд, сен сухангўй бўлғил ва лекин дуруғгўй (ёлғончи) бўлмағил. Ростгўйликда ўзинг шуҳрат қозонғил, токим бирор вақт зарурат юзидин ёлғон сўз десанг қабул қилғайлар. Ҳар сўз десанг ҳам рост деғил ва лекин ёлғонга ўхшагон ростни демағилким, ростга ўхшаган дуруғ дуруғга ўхшагон ростдин яхшидур, нединким ул дуруғ мақбул бўлар, аммо ул рост мақбул бўлмас. Демак, номақбул ростни айтишдин парҳез қил, токи менинг била Абу Сувор Шопур бинни Абу ал-Фазлнинг^{7*} орасиндағи воқеа сенинг бошингда содир бўлмасин.

Ҳикоят. Билғил, мен амиралмўъминин замонида бир йил ҳаждан қайтиб келиб, Ганжада қарор тутдим.

Ҳиндистонга кўп ғазот қилмиш эрдим, Румга ҳам юриш қилмоқни ўйладим. Абу Сувор Ганжада улуғ подшоҳ эрди. Ул бағоят хушманд,

одил, сахий ва фозил киши эрди. Бир қун мени күруб күп ҳурмат қилди ва менинг била сўзлашмоқ мақсадинда ҳар турли сўз сўрар ва мендин маъқул жавоб эшитар эрди. Менинг сўзларим унга маъқул тушуб, күп карамлар қилиб, менга кўнгул қўйди. Мен ҳам унинг эҳсонларин кўриб, унга кўнгул қўйдим. Шул сабаб била бир неча йил Ганжада муқим бўйдим ва ҳамиша подшоҳнинг мажлисида ҳозир эрдим. Подшоҳ мендин ҳам турли сўзларни сўрар эрди. Бир куни сўз орасига менинг вилоятим тушди ва мендин Гургон^{8*} қишлоғи ҳолидин сўради. Вилоятларнинг ажойиб-ғаройибларидин сўз очилди. Сўз асносинда мен дедим: «Гургонда Сиёваск деғон бир кент бордур ва унинг бир чашма суви бордурким, ул кентдин узоқроқдур. Хотинлар жам бўлуб, ҳар бири бир кўза кўтариб, ул чашмага бориб сув олурлар ва кўзани бошларига кўтариб, барчаси ҳамроҳ бўлиб уйларига қайтадилар. Уларнинг орасида бир хотин кўза кўтармай, барчадин илгари юруб, йўлига эҳтиёт бўлуб, назар ташлаб боради. Нединким, ул ерларда бир кўк курт бордур. Уни сизак дерлар. Агар ул қуртдин бирини топсалар, йўлдин олиб, йироққа ташлайдурлар, токим хотинлар ул қуртни билмай босиб ўлдурмасунлар. Агар сув кўтарғон хотинлардин бири қуртни босиб ўлдурса, бошига кўтарғон кўзадаги сув сасиб, бадбўй бўлиб кетади. Шундан кейин аввал сувни тўкиш, кўзани ювиш керак бўлади ва кўзани тозалағон хотин қайтиб бориб чашмадин сув олади.

Мен бу сўзни дедим, аммо амир Абу Сувор туршрўй (бадбуруш, қовоғи солиқ) бўлиб, мендин юз ўгуруди ва бир неча кун менга бурунгидек (аввалигидек) мулоқот ва илтифот қилмади.

Бир кун Фирузон Дайламий^{9*} бу аҳволни менга айтди: «Амир сендин гина қилиб деди: «Фалон

киши бағоят донодур, аммо ёш үглонларға айт-гудек ёлғон сўзни менга айтадур. Унингдек кишидан менингдек подшонинг олдида бунингдек дуруф сўзни айтмоқ муносиб эмасдур».

Мен бу сўзни эшитғондин сўнг дарҳол Ганжадан Гургонга бир киши юбориб, уламонинг шаҳодати била бир гувоҳ хат талаб қилдим. Гургоннинг барча уламо, қозилари бу кентнинг, қуртнинг ҳоли ва қиссаси ростлиги ҳақида гувоҳ бўлишиб, бу бобда бир хат ёзиб юбордилар.

Бу хат тўрт ой муддатида менга етиб келди. Мен уни подшоҳга кўргуздим. Подшоҳ уни ўқиди ва табассум қилиб деди: «Мен худ¹ таҳқиқ² билурманким, сенингдек кишидин ёлғон сўз зоҳир бўлмағусидур, хусусан, менингдек подшоҳнинг олдида... Аммо тўрт ой муддатида икки юз одил кишининг гувоҳлиги била бир рост сўзни айтмоқ муносиб эмасдур. Бунингдек сўзлар аввал исбот этилгай, ундин сўнг ул сўзни қабул этгайлар.

Эй фарзанд билғилки, сўз тўрт нав бўлур, ундоқким халойиқ ҳам тўрт нав бўлғондек. Бири улким, билур ва билғонин ҳам билур. Ул олимдур, унга тобе бўлмоқ керакдур. Бири улдурким, билмас ва билмағонин билур, ул қобилдур, унга ўргатмоқ керак. Бири улдурким, билур ва билғонин билмас, уйқудадур, уни бедор қилмоқ керакдур. Бири улдурким, билмас ва билмағонин ҳам билмас, у жоҳилдур, ундин қочмоқ керакдур. Аммо деб эрдимки, сўз ҳам тўрт навдур: бири – билинмайтурғон ва айтилмайтурғон; иккинчиси – айтилатурғон ва билинатурғон; учинчиси – ҳам билинатурғон ва ҳам билишга заруратсиз, аммо айтса бўлатурғон; тўртинчиси – билинатурғон ва

¹ Худ – ўз-ўзим.

² Таҳқиқ – бирор нарсанинг ҳақиқатини излаш.

айтилмайтурғон. Аммо айтилмайтурғон ва билинмай турғон ундоқ сўздорки... дунёнинг салоҳи унга боғлиқдир. Ул сўздин айтгувчига ҳам, эши-тuvчига ҳам кўп наф етар. Аммо билинатурғон, бироқ айтилмайтурғон ундоқ сўздурким, бир муҳташам одамнинг айби сенга маълум бўлур. Лекин ақл тариқидин хаёлга келсанг, уни айтмоқ бешармликдур. Чунки айтсанг ул муҳташамнинг қаҳри ё у дўстнинг озори сенда ҳосил бўлур ёхуд ўз бошингга улуғ шўриш ва favfo пайдо қилурсан. Шул важдин ҳам бул сўз билинатурғон, аммо айтилмайтурғон сўздур. Бу сўзларнинг яхшироғи ҳам билинатурғон ва ҳам айтилатурғон сўздур.

Бу тўрт нав сўзнинг икки юзи бордур. Бири хўб ва бири зишт. Ҳар сўзни ҳалойиққа зоҳир қилсанг, яхши юз била зоҳир қил, токи мақбул бўлсун ва ҳалойиқ сенинг сўз била баланд мартабага эгалигингни билсунлар. Нединким, кишининг мартабасини сўз била билурлар, аммо сўзнинг мартабасини киши била билмаслар, чунки ҳар кишининг аҳволи ўз сўзининг остида пинҳондур, яъни бир сўзни бир иборат била айтса бўлур, эшитғон кишининг эса кўнгли ундин тира¹ бўлғай ва яна ўшал сўзни бир иборат била айтса бўлурким, эшитғон кишининг жони ундин роҳатда бўлғай.

Ҳикоят. Ундоқ эшитдимки, бир кеча Хорун ар-Рашид^{10*} бир туш кўрдиким, оғзидин барча тишлиари тўкулмиш. Эрта тонг туриб бир муаб-бирни чақириб сўрадиким, «бу тушнинг таъбири недур?» Муаббир² деди: «Эй амиралмўъминин, сенинг олдингда барча хеш, акрабо ва қариндошларинг ўлфусидур. Андоғким, сендин ўзга ҳеч киши

¹ Тира – қоронги.

² Муаббир – тушни таъбир қилувчи.

қолмағусидур». Бу сұзни әшитғон Хорун ар-Рашид: «Менинг юзимга бундоқ дардлиғ ва андухлиғ сұзни айтдинг. Менинг барча қариндошларим үлсалар, сұнгра мен қандоғ ишга ярман ва на янглиғ рўзғор сурарман?» – деди ва унга юз таёқ урмоқ буюрди. Сұнг бошқа бир муаббирни чақириб, түшин унга таҳрир¹ қилди. Муаббир деди: «Эй амиралмұғынин, сенинг умринг барча ақраболаринг умридин узоқ бўлур». Хорун ар-Рашид деди: «Барча ақлнинг йўли бирдур ва икковининг таъбири негизи бир ерга борур, аммо бу ибора била ул иборанинг орасида фарқ бағоят кўпдур». Буюрди, сұнгти муаббирга юз тилло бердилар...

Эй фарзанд, сұзниң юзин ва орқасин билғил ва уларга риоя қилғил, ҳар на сұз десанг юзи била деғил, то сухангүй бўлгайсан. Агар сұз айтиб, сұзниң нечук эканин билмасанг қушга ўхшарсанки, унга тўти дерлар, ул доим сўзлар, аммо сұзниң маъносин билмас.

Сухангүй шул киши бўлгайки, ул ҳар сұзни деса, халққа маъқул бўлгай ва халқ ҳам ҳар сұз деса унга маъқул бўлгай. Бундай кишилар оқиллар қаторига кирғай, йўқ эрса ул инсон суратида мавжуд бўлғон бир ҳайвондур.

Сўзни бағоят улуғ билғил, сұз осмондин келмас ва ул хор нарса эмасдур. Қай бир сўзники билсанг жойини ўткармай айтғил, вақтни зое қилмағил, йўқ эрса донишфа ситам қиласон бўлгайсан. Ҳар сұз десанг рост деғил ва бемаъниликтин даъво қиласончи бўлмағил.

Билмағон илмдин дам урмасиғил ва ундин нон талаб қиласон. Ҳар на матлубинг бўлса, билғон илм ва ҳунардин ҳосил бўлур. Билмағон ҳунар

¹ Таҳрир – мақсадни оғзаки англатиши.

даъвосидин ҳеч нарса ҳосил бўлмас, фақат беҳуда заҳмат чекарсан.

Ҳикоят. Бундоғ айтурларки, Ануширавон^{11*} Одилнинг замонида бир хотин Абузуржмеҳрнинг олдига келиб, ундин бир савол сўрди. Абузуржмеҳр ул саволни билмамиш эрди ва хотинга қараб деди: «Эй хотин, ул сўзни сен сўрорсан, уни билмасман». У хотин деди: «Сен бугина сўзники билмассан, подшоҳнинг неъматин нечун ерсан?» Абузуржмеҳр деди: «Билғон сўз учун ерман, аммо билмағон сўз учун емасман. Ҳар сўзники билмасман, подшоҳ менга ул сўз учун ҳеч нарса бермас ва ҳарна берса билғон сўзим учун берур».

Аммо, эй фарзанд, ҳеч кишининг олдида ифрат¹ қилмағил ва ифратни шумлиқ деб билғил. Ҳар ишда миёна (ўртача) бўлғил, сўз айтмоқда ва иш қилмоқда... сангин² бўлғил. Розингни³ ўзингдин ўзга кишига айтмағил, агар айтсанг сўнгра уни роз демагил.

Халойиқнинг орасида бир кишининг қулогига сўз айтиш яхши эмасдур. Агар бу сўз гарчанд яхши сўз бўлса ҳам ташқарисиндан уни ёмон сўз деб гумон қиласидилар ва кўп одамлар бир-бирлашибидан даргумон бўладилар. Гар сўз демоқчи бўлсанг, шундай сўз деғилки, сўзингнинг ростлигига гувоҳлик берсинлар. Агар ўзингни зўрлик била айбдор қилмоқ тиламасанг, бирор нарсага гувоҳ бўлмағил ва агар гувоҳ бўлсанг, гувоҳлик берар вақтда эҳтиroz⁴ бўлғил. Агар гувоҳлик берсанг, майл била бермағил.

Ҳар сўзни андиша била бошлиғил, токи айтғон сўзингдин пушаймон бўлмағайсан.

¹ Ифрат – ҳаддан ошиш.

² Сангин – оғир.

³ Роз – сир.

⁴ Эҳтиroz – сақланиш, эҳтиётланиш.

Андишани илгари тутмоқ ҳам бир нав кароматдур. Ҳеч сўзни эшитишдан дилтанг бўлмағил. Ул сўз ишингга хоҳ ярасун, хоҳ ярамасун, уни эшифтфил, то юзингга сўз эшиги бекланмасун ва фойдаси фавт¹ бўлмасин.

Совуқ сўзлик бўлмағил. Совуқ сўз бир тухумдур, ундин душманлик ҳосил бўлур.

Агар ҳар қанча доно бўлсанг ҳам ўзингни нодон тутғил, токи сенга ҳунар ўргатиш эшиги ҳамиша очиқ бўлгай. Гар сўзни ва ҳунарни яхши билсанг ҳам ҳеч бир сўзни синдирмағил, тўғри таъриф қиласи ва уни бир рангда айтғил: хосга хос сўз, омийга омий сўз деғил, токи у ҳикматга мувофиқ бўлсун ва эшиғон кишиға оғир келмасин, йўқса сўзингни далил ва ҳужжат била ҳам эшиғтмажайлар. Ундин сўнг уларнинг ризосига қараб сўзлағил, то саломат бўлгайсан.

Эй фарзанд, агар ҳар нечаким сухандон бўлсанг, ўзингни билғондан камроқ тутғил, то сўзлаш вақтида нодон ва бебурд бўлиб қолмағайсан. Кўп билиб, оз сўзлағил ва кам билиб кўп сўз демагил. Нима учунки ақлсиз шундоқ киши бўладур – у кўп сўзлар. Дебдурларки, хомушлиқ саломатлик сабабидур, чунки кўп сўзлагучи оқил киши бўлса ҳам авом уни ақлсиз дерлар. Ақлсиз киши хомуш бўлса, уни оқил ҳисоблайдилар. Ҳар неча пок, порсо², равиш³ бўлсанг ҳам ўзингни таъриф қиласи, ҳеч киши сенинг гувоҳлигингни эшиғтмас. Кўшиш қилким, халойиқ сени таъриф қилсунлар ва шундоқ сўз деғилким, у ишга ярасун, бекор ва зое кетмасун.

Ҳикоят. Бир донишманд киши бор эди. У Зинжон вилоятининг шайхи ҳамда музаккар⁴

¹ Фавт – йўқотиш, ўлим; фавт бўлмоқ – ўлмоқ.

² Посро – художўй.

³ Равиш – йўл, йўсин, қоида.

⁴ Музаккар – покиза, тоза.

ва музакки¹ эрди ва бир алавий йигит бор эрди. У ҳам музаккарлик қилур эрди. Ҳамиша бу иккенинг бир-бiri била мукошафа² қилур эрдилар. Бир кун бу алавий курсининг устида ул шайхни «кофир» деди. Бу хабар шайхга етиб, бир кун ул ҳам курсининг устида деди: «Агар мен кофир бўлсам, бу алавий ҳаромзодадур». Бу хабар алавийнинг қулоғига етди. Алавий дарҳол ўрнидан сапчиб туриб, суръат била Рай шаҳрига бориб, ул шаҳарнинг ҳакими Соҳиби Аббоднинг^{12*} одигга борди ҳам ул шайхдин шикоят қилиб йиллади ва деди: «Равомуудурким, сизнинг айёмингизда ул шайх Расул алайҳиссаломнинг фарзандига ҳаромзода дегай». Бу сўздин Соҳиби Аббоднинг қаҳри келиб, дарҳол киши буюруб, ул шайхни Рай шаҳрига келтурди ва ўзи Райнинг барча сайидлари ва фикҳлари билан музолим³ девонида ўлтуруб, ул шайхни ҳам бу ерга ҳозир қилиб, деди: «Эй шайх, сен имон Шофиъий асҳобининг⁴ имомларидан дурсан. Ўзинг бағоят олим, қари ва гўрнинг лабига ёвуқ етғон киши дурсан. Не учун Расул алайҳиссаломнинг фарзандига ҳаромзода дерсан? Энди айтғон сўзингни дуруст қил. Йўқ эрса сенга шундоқ уқубат⁵ қилурманки, барча халойиқ сендин иборат олғайлар ва бундин бўён ҳеч киши бундоқ беадаблиғ қилмагайлар».

Шайх деди: «Бу ишда адл қиалғилким, менинг гувоҳим алавийнинг ўзидур ва унинг ўзига ўзидан яхши гувоҳ талаб қилмағил. Аммо менинг сўзим била у ҳалолзодадур». Соҳиби Аббод деди: «Қайси важҳ била?». Шайх деди: «Халқнинг бар-

¹ Музакка – нотик.

² Мукошафа – фош қилиш.

³ Музолим – зулм кўрган, мазлум.

⁴ Асҳоб – суҳбатдошлар.

⁵ Уқубат – жазо.

часи билурларки, унинг онасининг никоҳин мен қилмишман. Ул курсининг устида ўтириб, мени «Коғир» дебдур. Агар ул бу сўзни эътиқод юзидин айтғон бўлса, унда коғирнинг никоҳи дуруст бўлмағусидур ва ул сўзи билан бешак ҳаромзода бўлғусидур. Агар ул бу сўзни эътиқод юзидин айтмағон бўлса, ул ёлғончидур. Ҳеч шак йўқдурким, бу иккининг бири бўлур. Энди унга шариат ҳукми била сиз на қилсангиз қилинг». Бу сўздин сўнг алавий ниҳоятда хижолатманд бўлуб, ҳеч жавоб қила олмади ва андишасиз айтғон сўзи ўзига шунча зарар еткурди.

Эй фарзанд, демак, ёлғон ва бехуда сўз айтмак девоналиknинг бир қисмидур. Ҳар кишига сўз айтур бўлсанг қарагил, ул сенинг сўзингга харидорму ёки харидор эмасму? Агарда уни сўзингга харидор топсанг, унга сўзингни сотғил. Йўқ эрса, ул сўзни қўйиб, шундоқ сўз дефилким, унга хуш келсин ва сенинг сўзингга харидор бўлсин. Лекин инсон била инсон бўлғил, одамий била одам бўлғил, нединким инсон бошқа, одамий бошқадур. Ҳар кишиким гафлат уйқусидин бедор бўлса, халойиқ била қандоқ зиндагонлиf¹ қиларин мен баён қилдим.

Эй фарзанд, токи қила олсанг, сўз эшитмакдин қочмағилким, киши сўз эшитмак била сухангўйлик ҳосил қилур. Аввало буни шундоқ далиллаш мумкин, агар бир ўғлон онадин туғилса, унга ернинг остидан бир жой қилиб сут бериб, ул жойда парвариш қилсалар, онаси ва дояси унга гапирмасалар, у ўғлон ҳеч кишининг сўзин эшитмаса, улуғ бўлғонда лол² бўлур. Кўрмасмусанким, барча лоллар кар бўлурлар.

¹ Зиндагонлиf – ҳаёт кечириш.

² Лол – соқов.

Бу сўзни қабул қиласи, хусусан, донишмандларнинг сўзин, нединким донишлар дебдурлар: «Дононинг панд-насиҳати кўнгил кўзин равшан қилур, нединким ул панд ақд ва ҳикмат кўзининг сурмаси ва тўтиёсидур». Бас бу тоифанинг сўзин хушқулоги била эшитмак керакдур. Бу жамоанинг сўзида манфаат кўпдур. Бу вақтда Ануширавон Одилнинг бадеъ¹ ва нофеъ² сўзларидин бир неча сўз ёдимга келди, уни бу китобда карам қилдим.

Эй фарзанд, сен дафи ўқигайсан, билгайсан, ёд қилгайсан ва унга қараб иш қилгайсан, нединким ул подшоҳнинг сўзларига ва пандлариға амал қилмоқ сенга ўзга ишдин вожиб ва лозимдур. Огоҳ бўлким, мен ўтғон халифаларнинг қиссаларин ҳам ўқимишман. Бир кун Маъмун халифа Ануширавон Одилнинг турбатини³ кўрмоққа борди ва унинг даҳмасининг қиссаси бағоят узундур. Аммо мақсад будур: Маъмун унинг даҳмасига бориб очиб кўрдики, унинг аъзоси бир тахтнинг устида тупроқ бўлуб ётибдур. Унинг тахти устида даҳма деворига паҳлавий⁴ ибора била бир неча сўз зар била ёзилмишдур. Маъмун буюрди ва паҳлавий лафзин билатурғон далирларни⁵ ҳозир қилдилар. Улар ёзилғон хатни ўқиб, арабий ибора ажам^{13*} халқининг орасида маъруф ва машҳур эрди. Унда шундай деб эрди: «То мен тирик ва подшоҳ эрдим, барча бандалар менинг аддимдин баҳраманд эрдилар. Менинг хизматимга ҳар кишиким келмиш эрди, менинг марҳаматимдин баҳравар бўлур эрди. Мана энди ожизлик вақти келди, бундин ўзга ҳеч чора топ-

¹ Бадеъ – ажойиб, нодир.

² Нофеъ – гўзал.

³ Турбат – қабр.

⁴ Паҳлавий – қадимги форс тили.

⁵ Далир – паҳлавон, ботир.

мадим ва бу сўзларни даҳма деворига ёздим:
«Агар бирон киши менинг зиёратимга келса бу
сўзларни ўқисин, билсин ва бу сўзларнинг фой-
дасидин маҳрум қолмасин, менинг бу пандларим
у кишининг қадам ранжининг музди¹ бўлсин». Ануширавоннинг ул пандлари бу туур.

САККИЗИНЧИ БОБ

АНУШИРАВОН ПАНДЛАРИН ЁД ОЛМОҚ ЗИКРИДА

Эй фарзанд, Ануширавон деди: «Модомики, кеча ва кундуз келадурлар ва кетадурлар, барча ҳолларнинг тағайюри² ва табаддулига³ таажжуб кўргузмагил».

Яна деди: «Халқ не важдин бир бор пушаймон бўлғон ишдин яна пушаймон бўлур?»

Ва яна деди: «Хунарсиз киши била дўстлик қиласигил, нединким бундай киши дўстлик ва душманликка лойик эрмасдур».

Яна деди: «Ўзини доно санафон нодондин парҳез қиласигил».

Яна деди: «Гарчанд ҳар қанча талх бўлса ҳам ҳақ дўстингга айтмагил».

Яна деди: «Агар розимни душман билмасин десанг, дўстингга айтмагил».

Яна деди: «Ҳар бандани⁴ сотарлар ва сотиб оларлар. Аммо ул банда нафс бандасидин озодроқ бўлгай».

Яна деди: «Ҳар кишининг (билими) бўлса-ю, аммо унга лойик ақди бўлмаса, бу билим унга зарар еткаргусидур».

¹ Музди – иш ҳақи.

² Тағайюр – ўзгариш.

³ Табаддул – алмашиниб туриш.

⁴ Банда – кул.

Яна деди: «Агар ҳар кишини турмуш устоди доно этмаса, ҳеч бир доно унга сўз ўргатиш учун ранж чекмасун, ранжи зое бўлур».

Яна деди: «Нодондин барча нарсани сақламоқ осондур, худди нодондин ўз танин сақлафондек».

Яна деди: «Агар ҳалқ сенинг ҳақингда яхши сўз айтарин тиласанг, ҳалқ ҳақида яхши сўз айтғил».

Яна деди: «Агар ҳалқ ҳақидин чеккан ранжинг зое бўлмаслигин тиласанг, ўзинг ҳақингда ҳалқ чеккан ранжин зое қилмағил».

Яна деди: «Агар ёру дўст бўлмоқни тиласанг, сергиналик бўлмағил».

Яна деди: «Агар ғамсиз бўлмоқ тиласанг, ҳасадлик бўлмағил».

Яна деди: «Осон зиндагонлиф сурмоқ сенга муяссар бўлса, ўз ютуғингни қўлдин бермағил».

Яна деди: «Агар ранжишдин узоқ бўлишни истасанг, битмайдифон иш учун урунмағил».

Яна деди: «Агар сени девона демасунлар десанг, топилмас нарсани ахтармағил».

Яна деди: «Агар беобрў бўлмайин десанг, яхшиликни касб қилғил».

Яна деди: «Агар шармисор бўлмайин десанг, қилмағон ишни қилдим дема».

Яна деди: «Агар ўз сирингни очилишини истасанг, бироннинг сирини фош қилмағил».

Яна деди: «Агар юзимнинг пардаси йиртилмасин десанг, бироннинг юз пардасин йиртмағил».

Яна деди: «Агар изимдин кулмасунлар десанг, зардастлар¹га шафқатлиф бўлғил».

Яна деди: «Узоқ пушаймонлиқдин холис бўлмоқ тиласанг, кўнгил ҳавоси била иш қилмағил».

Яна деди: «Агар зийраклардин бўлмоқ тиласанг, юзингни ҳалқнинг кўзгусида кўргил».

¹ Зердаст – бироннинг қўли остида яшовчи

Яна деди: «Агар қадрли бўлмоқ тиласанг, халқ-нинг қадрин билғил».

Яна деди: «Агар халқ сенинг сўзинг била иш қилмоғин тиласанг, сен ўз сўзинг била иш қилғил».

Яна деди: «Агар халойик орасида марғуб бўлмоқ тиласанг, пинҳон сўзингни ошкор қилмағил».

Яна деди: «Агар барча одамдин юқори бўлмоқ тиласанг, вафолиғ бўлғил».

Яна деди: «Агар айбсизлар қаторида бўлмоқликни тиласанг, тамани кўнгулга келтурмағил».

Яна деди: «Агар додгарлар¹ зумрасидин² бўлмоқ тиласанг, зердастларни итоатингда яхши тутғил».

Яна деди: «Агар халойиқнинг ёмон сўзларидин йироқ бўлмоқ тиласанг, улардин зўрлиғ била ҳеч нарса олмағил».

Яна деди: «Агар халойиқнинг севимлиси бўлмоқ тиласанг, улардан ҳеч нимани аямағил».

Яна деди: «Агар тилинг узун бўлмоқин тиласанг, қўлингни қисқа қилғил».

Эй фарзанд, Ануширавон Одилнинг сўзлари ва пандлари бу туур. Буларни ўқифил ва уни хор тутмағил, нединким бу сўзлардин ҳам ҳикмат, ҳам салтанатнинг иси келур. Буларнинг барчасин йигитлик вақтида ўқифил ва билғил. Аммо қарифондан сўнг пандни эшитмоққа хожат йўқдур, қарилар ҳар бобдан хабардор бўлурлар ва улар панди эшитмоқдин ожиз бўлурлар.

¹ Додгар – адолатли.

² Зумра – тўда, гуруҳ

ТҮҚҚИЗИНЧИ БОБ

ҚАРИЛИК ВА ЙИГИТЛИК СИФАТИ ЗИКРИДА

Эй фарзанд, ҳар нечун йигит бўлсанг ҳам, ақлинг қари бўлсун. Мен сенга: «Йигитлик қилмағил» демасман. Аммо йигитликни чидам била қилғил. Енгил йигитлардин бўлмағил, чунки йигитларга оғирлиқ муносибдур. Бу ҳақда Аристотолис^{14 *} дониш шундай дебдур: «Йигитлик жунуннинг бир навидур». Жоҳил йигитлардин бўлмағил, жоҳилликдин бало пайдо бўлғусидур. Йигитлик замонида зиндагонлиғ қил, токим қарифон чоғда ўз ҳолингга йилгамағил. Ҳар қанча ёш бўлсанг ҳам ҳеч вақтда ўлимдин бехабар бўлмағил, нединким ўлим на қарини ва на йигитни қўйфусидур.

Ҳикоят. Ундоқ эшитибманким, бир шаҳарда бир пардозгир устанинг дўкони бор эрди ва қозуққа бир кўзани осиб қўймиш эрди. Унинг иши шул эрдиким, ҳар ўликни гўристонга кетирғонларида уста кўзанинг ичига бир тош ташлар эрди ва ҳар ойда ул тошларни санаб, неча киши ўлғонин билур эрди. Яна кўзани бўшатиб, уни мазкур қозуққа осиб қўяр эрди. Яна шул зайл бир ой муддатинда кўзага тош ташлар эрди. У неча вақтгача умрини шундай ўтказди. Қазо етиб ул пардозгир ўлди. Бир неча кундан сўнг бир киши уни йўқлаб келди: унинг ўлғонидин бу кишининг хабари йўқ эрди. Дўконнинг эшиги боғлиқ эрди. У устанинг ҳамсоғи (қўшниси)дан: «Пардозгир дўконида йўқдур, қаерга кетғон?» – деб сўради. Ҳамсоғи эрса: «Пардозгир ҳам кўзанинг ичига тушди», – дея жавоб берди.

Эй фарзанд, ҳушёр бўл, йигитликка гарра бўлмағил, афв тилағил ва ўлимдин қўрқғил, то ул

пардозгир янглиф оғир юқ ва гуноҳ била кўзанинг ичига тушмағайсан.

Барча вақт йигитлар била суҳбатда бўлмағил. қарилар била ҳам суҳбатда бўлғил ва мажлисингни ҳам қарилар била, ҳам йигитлар суҳбати била музайян қил, нединким йигитлар билмағон кўп нарсани қарилар билурлар. Йигитларнинг одати андоқдурким, улар қариларни кўп тамасхур¹ қилиб ўйнарлар, улар қариларни йигитликка муҳтож билурлар. Ушбу сабаб била қариларни тамасхур қилиб, беҳурмат қилмоқдари яхши эмасдур. Чунки қарилар қанчалик йигитлик орзусида бўлсалар, йигитлар ҳам бешак қарилик орзусидадурлар. Лекин қарилар ул орзуга етибдурлар, аммо йигитларга маъдум эрмаским, бул орзуга улар ё етгайлар, ё етмагайлар. Яхши назар қил, чунки қари ва йигит бир-бирларининг маҳсулидур.

Йигит ўзини ҳамма кишидан донороқ билур, аммо шул иши била у барчадин нодонроқдур. Бас, эй фарзанд, бундоқ йигитларнинг қаторидин бўлмағил, қариларни ҳурмат қилғил. Улар ҳақида беҳуда сўз демагил, уларнинг олдида одобва мискинлик била сўзлағил.

Ҳикоят. Ундоқ эшитибманким, юз йил яшағон ва қадди ёйдек ҳам бўлғон бир қари киши қўлига асо тутуб борур эрди. Бир йигит уни тамасхур қилиб деди: «Эй шайх, ушбу ёйни неча тангага олдинг? Айтғил, то мен ҳам олурман». Шайх деди: «Агар умр топсанг ва сабр қилсанг бу ёйни сенга текинга берурлар».

Эй фарзанд, қарилик ҳолига етсанг, йигитлардин йироқ бўлғил, нединким қарилиғда йигит феълин қилмоқ номуносибдур ва йигитликда қа-

¹ Тамасхур – масхаралаш

рилар феълин қилмоқ ҳам ёмон кўринур. Ўзифа оро берғон қаридин қочфил, нединким зоҳирин безагон қари жоҳил йигитдин ёмонроқдур. Но-пок қарилардин қочфил. Йигитлик замонин ғанимат бил ва унга муносиб иш қил, чунки сезгила-ринг ишдин қолиб, эшитмоқ, қўрмоқ, ишламоқ, маза топмоқ, қаттиқ ва юмшоқни сийпалаб билмоқ лаззатидин жудо бўлсанг, ундоқ тирикли-дин ўзинг ҳам шод бўла олмассан, ўзгани ҳам шод қила олмассан. Шунда одамларнинг бўйнифа тушган оғир юқ бўлурсан, ундоқ тирикликидин эса ўлим яхшироқдур. Аммо қаригонда йигит хаёли ва мажолидин йироқ бўл, чунки қарилик ўлимга яқинроқдур».

Барча халойиқнинг умри қуёш янглиғдур: йигитларнинг қуёши машриқдур, қариларнинг қуёши мағрибдадур ва мағрибда бўлғон қуёш тез ботғусидур. Бу сабабдин қариларга йигитлар феълин қилмоқ номуносибдур.

Эй фарзанд, ҳамиша қариларга тараҳҳум қил, қарилик бир беморликдур, ҳеч киши уни кўришга бормас. Қарилик иллатдурки, ўлимдан бошқа ҳеч киши унинг иложи борисин билмас. Қарилар то улгунча қарилик ранжидин асло қутулмаслар. Ундин бошқа ҳар иллат борки, ул иллатнинг ҳар кун яхшироқ бўлмоқ умиди бордур, аммо қарилик иллати ҳар кун ёмонроқ бўлар ва яхшилик умиди йўқдур. Фақир (мен) китобда ўқимишман-ким, одамнинг қуввати то ўттиз тўрт йилгача ҳар кун зиёда бўлур. Ўттиз ёшдин сўнг қуёш осмоннинг ўртасига етғондек зиёда бўлмай ва нуқсон топмай турар. Ундин сўнг ботиш сайри оҳиста-роқ бўлғай. Қирқ ёшига етғондин сўнг то эллик ёшгача ҳар йил ўзида нуқсон кўргайким, бурунги йилда кўрмамиш бўлғай. Эллик ёшидин олтмиш

ёшгача ҳар он ўзида нуқсон кўрарким, аввалги ойда кўрмамиш бўлғай. Агар ёши олтмишдан ўтса, ҳар соатда дард ва ранж кўргайким, ўтғон соатда кўрмамиш бўлғай. Умрнинг ҳадди қирқ йил бўлур. Мана, умр нурининг қирқинчи зинасига чиқдинг, энди юқорига йўл топмагунгдур, ундин сўнг даража ошмофинг учун пастга тушиб, бурунги жойингга етмофинг лозимдур.

Эй фарзанд, қариликнинг ҳикоятин сенинг олдингда шул жиҳатдин айтдимки, мен ундин гилеманддурман¹. Нединким, қарилик душмандур ва душмандин шикоят этмак ажаб эрмасдур. Сен менинг дўст кишимдурсан. Душманинг шикоятин дўстнинг олдида айтурлар (илоҳим, сен ҳам фарзандларингга шундай шикоят қилғайсан), нединким қариларнинг дард ва ранжин қарилар яхши билурлар.

Отам ҳожиблар² жумласидин эрди ва уни ҳожиби комил дер эрдилар. Ул саксон ёшдин ўтғон қари киши эрди. Бир куни от олмоқ тилади. Унинг олдига бир от келтурдиларки, от ниҳоятда семиз ва хушранг эрди. Ул отни кўриб хоҳлади ва лабларин очиб, тишин кўрди. Бироқ от қари эркон, бул жиҳатдин уни олмади. Мен дедим: «Эй ота, ул отни фалони олди, сиз нечун олмадингиз?» Отам дедим: «У йигит кишидур, қарилик ранжидин хабари йўқдур. Ул отнинг ранг ва суратига маҳдиё бўлибдур. Бу ишда у маъзурдур. Мен қариликнинг ранж, офат ва заифликларидин хабардордурман. Қари от олсам маъзур бўлмагумдур».

Эй фарзанд, агар қарилик мақомига етсанг, бир жойда мутамаккин³ бўлғил. Айниқса, қа-

¹ Гиламанддурман – норозиман.

² Ҳожиб – пардадор.

³ Мутамаккин – бир жойда маҳкам турувчи.

риликда, хусусан, бенаволикда¹ сафар қилмоқ ақддин йироқдур. Нединким, қарилек бир душмантур ва бенаволик ҳам бир душмантур. Бу икки душман била сафар қилмоқ доноликдин эрмасдур. Аммо агар бир иш бошингга тушса ва изтироб² била уйингдин чиқсанг ва агар сафарда яхшироқ роҳат олсанг, ҳаргиз уйингни орзу қилмағил, мол ва озуқталаб қилмағил. Ҳар жойдаким ишингга (тартиб) топсанг, унда мақом қил ва у жойни ўзингга яхши мол ва озуқ бил. Ўз ҳолингнинг фойдасига қарагил. Дебдурларким, некбаҳтлар³ ўз ҳолин яхши бўлишилигин орзу қилурлар, бадбаҳтлар эса озуқ ва мол жам этмакни яхши иш билурлар. Аммо сен ўзингда бир яхши ҳол кўрсанг ва бир фойдали ишни қўлга киритсанг, жаҳд қилиб ул ишингни собит ва маҳкам қил, то шу ишни мустаҳкам қилмагунча ундин баландроқ ишни талаб қилмағил, токи баландликни талаб қилиш била пастликка тушмағайсан. Дебдурларким, яхши нарсани қўйиб, ундин яхшироқ нарсани талаб қилмағил, бундай маҳалда тамаъ била ундин ҳам бебаҳра қолгайсан. Аммо ўз рўзгорингни ўткармакда бетартиб бўлмағил. Агар дўст ва душманнинг кўзига яхши кўринмоқ тиласанг, даража ва ҳунарингни халойиқнинг орасида зоҳир қил, беҳуда зиндагонлик қилмағил ва барча ишингни тартиб била қилғи.

¹ Бенаволик – қашшоқлик.

² Изтироб – бетоқатлик.

³ Некбаҳт – баҳтиёр.

ЎНИНЧИ БОБ

ТАМКИН¹ ШАРОФАТИ ВА ТАОМ ТАРТИБИНИНГ БАЁНИ

Эй фарзанд, билғилки, авом², ҳалойиқнинг барча ишларида вақт тартиби йўқдур. Улар вақтига ва бевақтига қарамаслар. Аммо ҳушманд³ кишилар ўзларининг ҳар бир ишларига аниқ вақтни тайин этибдурлар. Улар кеча ва кундузнинг йигирма тўрт соатни ўз ишларига тақсим қилибдурлар. Бир ишни яна бир ишдин фарқ этиб, унга вақт, ҳад⁴ ва андоза⁵ пайдо қилибдурлар, токи ишлари бир-бирига аралашмагай. Уларнинг хизматкашлари ҳам қайси вақтда қайси ишга машғул бўлурин яхши билғайлар. Шунда уларнинг барча ишлари тартиб била бўлгай.

Даставвал таом емак сўзининг маъносин билғил. Бозор одамларининг одати шундоқдурки, уларнинг аксари қисми таомни оқшом ерлар, бу беҳад зиёндур ва улар ҳамиша ўз жонларига бешак қасд қилғайлар.

Сипоҳпеша одамларнинг одати шундоқдурки, улар вақтига ва бевақтига қарамаслар. Вақт топсалар емакка машғул бўлғайлар. Бу одат ҳайвонларнинг одатидур, нединким улар ҳар вақт алаф⁶ топсалар, емак била машғул бўлурлар. Аммо хос⁷ ва муҳташам⁸ одамларнинг одати улдурки, кечада ва кундузда бир мартаба таом ер-

¹ Тамкин – сабот, нафсни тийиш.

² Авом – кўпчилик.

³ Ҳушманд – ақдли.

⁴ Ҳад – чегара.

⁵ Андоза – ўлчов.

⁶ Алаф – ўт, кўккат.

⁷ Хос – эътиборли.

⁸ Муҳташам – мўътабар.

лар. Нафсни тийишнинг бу йўли бафоят яхшидур. Лекин бадан бафоят заиф бўлур. Бас, энди шул нарса яхшидурки, муҳташам одамлар тонг вақтида хилватда бирон нарса ерлар. Шундин сўнг ташқарига чиқиб, то пешин вақтигача ўзларининг ишларига машғул бўлғайлар. Ундин сўнг ҳар на таом бўлса, ҳозир қылғайлар ва атрофларида ким бўлса, уни ҳам чақириб бирга егайлар.

Эй фарзанд, агар таом бўлса, ҳамтовоқларингни чақирғил, то сенинг бирла таом есуналар, аммо таомни тез емагил ва оҳиста еғил. Таом емак вақтида одамлар била сўзлашғил, бу ислом шартидур, лекин бошингни қуи солиб ўтур, ҳамтовоқларингнинг олғон луқмасиға қарамагил.

Ҳикоят. Эшитибманки, бир вақти Соҳиби Исмоил бинни Соҳиби Аббос ўзининг қариндошлари ва надимлари била таом ер эрди. Бир киши табақдин бир луқма кўтарди. Унинг луқмасида бир мўй бор эрди. Соҳиби Исмоил уни кўруб деди: «Эй фалони, у мўйни луқмадин олғил». Ул киши луқмани ташлаб, мажлисдин чиқиб кетди. Соҳиб бир кишини буюрди. Ул киши чиқиб кетғон одамни қайтариб мажлисга келтурди. Соҳиб деди: «Эй фалони, нечун таом еб бўлмасдин бизнинг дастурхонимиздин чиқиб кетдинг?» Ул киши деди: «Бир луқмада бир мўйни кўргон кишининг таомин емак менга лойиқ эмасдур». Соҳиб бул сўздин ниҳоятда хижолатманд бўлди.

Эй фарзанд, таом вақтида ўз-ўзингга машғул бўлғил, ундин сўнг табақ қўймоқ буюргил. Муҳташам халқнинг расми икки нав бўлур: мажлисга турлук таом келтуруб, баъзиси ўзиға бурун табақ қўйдурур, ондин сўнг ўзгаларга қўйдурур; баъзилар один табақни бошқаларга қўйдириб, ундин сўнг ўзи олур. Сўнгиси олижаноб, карам аҳли-

нинг тариқидур ва аввалғиси сиёсат аҳлининг тариқидур. Аммо турлик таом ва ранго-ранг табақ келтурмак ул сабабдинки, барча одамнинг қорни бирдек эмасдур. Пурхўр¹ ва камхўр – ҳамма бирдек тўйсинлар. Агар сенинг олдингдағи табақ ичида бир мазалиф нарса турғон бўлса, ўзгаларнинг олдида мазалиф нарса бўлмаса, мазкур таомдин ўзгаларға ҳам насиб берғил. Таом устида турушрўй² бўлмагил ва таомнинг фалони яхши, фалони ёмон демағилким, бу сўзлар таом устида яхши эрмасдур.

Мана таом емак тартибин билдинг, энди шароб ичмак тартибин ҳам билғил, нединким шароб ичмакнинг ҳам жойи ва расми бордур.

ЎН БИРИНЧИ БОБ

ШАРОБ ИЧМАК ЗИКРИДА

Эй фарзанд, билғилки, сенга шароб ич деб айтмасман, аммо ичма деб ҳам айтмасман, негаки ёш йигитлар қари кишининг сўзи била йигитлик вақтининг ишларин тарк этмаслар. Менга ҳам йигитлигимда кўп панд бердилар, мен ҳам қабул қилмадим, аммо эллик ёшимдан сўнг тавба – тавфиқни қабул этдим.

Эй фарзанд, агар шароб ичмасанг икки жаҳон фойдасини топғунгдур: Ҳақ таолонинг хушнудлигин ҳосил қилғунгдур ва халқнинг маломатидин қутулғунгдур, мен ҳам сени ўзимга ниҳоятсиз дўст тутғумдур. Лекин сен ёш йигитдурсан, ҳарифлар (улфатлар) сенга шароб ичирмай қўймас, мен буни аниқ билурман. Шундай бўлғоч, гарчи

¹ Пурхўр – кўп егувчи.

² Турушрўй – бадбуруш, қовоғи солиқ.

бир ҳол била шароб ичар бўлсанг, ичмак расмин билғил, нединким, агар билмай ичсанг заҳардур, уни билиб ичсанг позаҳардур. Ҳақиқатдан ҳам агар ҳар таом ва шаробни исроф била есанг ё ичсанг заҳардур. Бу жиҳатдин дебдурларким, агар кўп ичилмаса ва андозасидин чиқилмаса, заҳар позаҳардур.

Таомнинг изидин агар ташна бўлсанг, уч марта шароб ичғил ва агар ташна бўлмасанг, уч соат микдори таваққуф¹ қил, нединким агар меъда қавий² ва яхши бўлса, таомни ҳар қанча кўп ва исроф била есанг ҳазм қилур. Шундоқки, меъда уч соатда таомнинг қувватин олур ва жигарга еткарур, жигар эса уни барча ажсадга³ тақсим қилур, нединким жигартаксим қилғувчиidur. Сўнггида неки ортиб қолса, барин ичак йўллар. Саккиз соатда меъда таомдин батамом холи бўлур. Агар меъданинг бу миқдор қуввати бўлмаса, у меъда эрмасдур, қовоқдур. Шунинг учун деб эрдиким, таом егандин уч соатдин сўнг набиз⁴ ичғил. Бу жиҳатдин дедимки, то меъдандан таом пишиб (ҳазм бўлиб), танангнинг тўрт табъи⁵ ундин ўзларининг насибин олсинлар. Ундин сўнг набиз ичғил, то ҳам шаробдин, ҳам таомдин баҳра олғайсан. Аммо шароб ичмакни намози дигарда ибтидо қил, то сен маст бўлғунча оқшом бўлган ва халойиқ масталифингни кўрмагай. Мастликдин сақлан, яъни йиқилмағилки, йиқилиш ёмон бўлур. Шароб ичмак учун боқقا ва сахрона кўп бормагил. Агар борсанг, то уйга қайтиб келгунингча маст бўлмагил ва мастерлик-

¹ Таваққуф – тўхташ.

² Қавий – кучли, қувватли.

³ Ажсад – жисмлар.

⁴ Набиз – хурмо ёки узумдан қилинган май.

⁵ Табъи – таркиби.

ни уйингда қилғил. Уй ичидә қилғон ташқаридә қилиб бўлмағусидур, нединким уй ичининг яширин ҳолати дараҳт соясидин пўшидароқдур¹, нединким киши ўз уйидә подшоҳ бўлса ҳам, дашт фазосида² фарибдур Агар мунъим³ ва муҳташам кишилар ҳам ғурбатга⁴ тушсалар маълумдурки, қўли қисқа бўлур ва ҳеч нарсага қудрати етмас.

Набиз ичғил, аммо икки коса ва уч коса ичмагил. Иштаҳа бор вақтида ичмагил. Луқмаларни кўп емакдин, қадаҳларни кўп ичмакдин парҳез қилғил, нединким ҳар шароб ичишда тўймоқ ва маст бўлмоқ муносиб эрмасдур. Бир ютум шаробни камроқ ичғил, бир луқма таомни камроқ еғил. Демак, таом луқмасин камроқ еғил, шароб косасин камроқ ичғил, токи иккисин ҳам зараридин қутулғайсан.

Шаробхўрларнинг ҳосили икки нарсадур: ё беморлик ёки девоналик. Нединким, шаробхўр ё маст бўлур, ё махмур. Агар маст бўлса, девоналар жумласидин бўлур ва агар махмур бўлса, беморлар зумрасидин бўлур, надинким хумор⁵ беморликнинг бир навъидур. Демак, ундоқ ишга мойил бўлмоқ нолозимдур, чунки унинг ҳосили ё беморлик, ё девоналикдур.

Эй фарзанд, билурманким, сен бу сўзлар била шароб ичмакдин воз кечмассан. Аммо қила олсанг, сабуҳий⁶ ичмакни одат қилмағил ва агар иттифоқо сабуҳий ичсанг, вақти била ичким, хушмандлар сабуҳийни ёмон дебдурлар. Сабуҳийнинг дастлабки шумлиги улдурки эрта

¹ Пўшида – яширин.

² Фазо – майдон, кенглик.

³ Мунъим – неъмат берувчи, ризқ берувчи.

⁴ Ғурбат – фариблиқ, мусофирилик.

⁵ Хумор – ичкилиқдан кейин бош оғрифи.

⁶ Сабуҳий – тонг пайтидаги ичкилиқ.

тонг намози фавт бўлур, яна кечагининг бухори¹ думоғидин ҳануз кетмасдин бурун қундузниңг бухори унинг устиға юкланур ва молиҳулё² иллати шундин ҳосил бўлур. Чунки икки муфсиддинг³ фасоди бир муфсиддинг фасодидин кўпроқ бўлур. Яна шулким, ҳар вақт ҳалқ уйқуга борса, сен но-чор бедор бўлурсан, ҳалқ бедор бўлганда сен уйқуда бўлурсан. Кундуз ухлаб, оқшом уйғоқ бўлсанг, сўнгги кун барча аъзонг хаста бўлур. Бундог улуғ гуноҳни қилиб, сўнгра пушаймонлиғ чекарсан.

Эй фарзанд, агар набиз ичмакни тарқ эта ол-масанг, жума кечаси ичмасликни одат қил... Ва яна жума кечаси ичмасанг бир ҳафта ичмакдин кўнглинг совур, дунёси ичмасанг бир ҳафта ичмакдин кўнглинг совур, дунёда некномлиғ ҳосил бўлур. Бир ҳафта шароб ичмакдин хоригон думоғинг, томирларинг, кўзинг, ақдинг, нафасинг ва руҳинг шул бир кечада осойиш топар ва осудалиғ ҳосил бўлур. Яна молингга тавфир⁴ бўлур ва ҳалқ сен ҳақингда яхши сўзин айтурлар. Демак, бундог фойдали ишни одат қилмоқ керакдур.

ЎН ИККИНЧИ БОБ

МЕҲМОН ОЛМОҚ ВА МЕҲМОН БЎЛМОҚ ЗИКРИДА

Эй фарзанд, билғилким, ҳар кун бегона одамларни меҳмон қилмағил, нединким ҳар кун меҳмон олсанг, меҳмонга лойиқ ишларни кўнгул муродича қила олмағунгдур. Қўрғилким, кўнглинг ҳар ойда неча мартаба меҳмон чақирмоқ тилай-

¹ Бухори – буғ, пар.

² Молиҳулё – савдоғилик касали, бир хил руҳий касал.

³ Муфсид – фасодчи, бузувчи.

⁴ Тавфир – орттириш.

ди. Агар уч мартаба чақиришни тиласа, бир мартаба чақириғил, уч мартабада қиладигон харажатингни бир мартабада қилғил, то дастурхонинг айбсиз бўлгай ва айбжўй¹ларнинг тили боғлиқ бўлгай.

Ҳар вақт меҳмонларинг уйингга оёқ қўйсалар, сен барча одамларинг била уларнинг олдиларига чиққил ва яхши сўз била мулоқот² қил, то улар сенинг шукрингни айтсинлар.

Агар мева вақти бўлса, таом емасдин аввал мева келтурғил, то баҳузуридил есунлар.

Бир замон таваққуф қил, ундин сўнг барча одамларни ўлтурғуз ва ўзинг ўлтурмағил, токи барча меҳмонлар иттифоқ била есунлар. Меҳмонлар бир-икки сўрамагунча сен ўлтурма. Улар ўлтурғил ва бизларга мувофақат³ қил (бизлар розимиз) десалар, сен айтгилким. «Мени қўйинглар, то сизларга хизмат қилғумдур». Агар яна такрор таклиф қиссалар, ундан сўнг ўлтурғил ва уларга мувофақат кўргузгил, аммо ҳаммадин пастда ўлтиргил. ҳар соат: «Эй фалони, таомни яхши егил, ҳеч нима емадинг ва мен сенга лойиқ ҳеч иш қила олмадим. Иншоллоҳ, келгуси сафар бунинг узрин яхшироқ қилғумдир», – деб айтмағил. Бу улуғ ва муҳташамларнинг сўзи эрмасдур, балки бозорийларнинг ва авбошлар⁴нинг лафзидур. Бундоқ сўздин халқ хижолат ерлар, таом емаслар ва овқатга тўймасдин туриб кетарлар. Бизларнинг Гilonда яхши расмларимиз борки, агар меҳмон чақирсалар, дастурхон ёзиб, таомларни келтуруб қўярлар ва кўзаларда сув ҳам келтуруб, дастурхоннинг четларига қўярлар. Барча меҳмонларни таомнинг атрофига ўлтурғузиб, ўзлари

¹ Абжўй – айб ахтарувчи.

² Мулоқот – кўришув.

³ Мувофақат – келишиш, бирорнинг розилигини олиш.

⁴ Авбош – бебош, саёқ.

чиқиб кетарлар. Бир киши табақ ва косаларнинг саранжоми учун қолур. Меҳмон таомдин кўнгли хоҳлагунча ер, ундин сўнг мезбон ўтиришга келур. Араб халқининг дастури ҳам шундайдур.

Меҳмонлар таом еб бўлуб, қўл ювғондин сўнг атир ва гулоб келтируб, мажлисни муаттар қиласи. Меҳмонларнинг чокар ва хизматкорларига ҳам яхши риоя қиласи, нединким кишининг яхши отин улар чиқарурлар. Мажлисга нуқд¹ни кўп келтурғил ва хушвот мутрибларни² ҳам ҳозир қиласи. Набиз ҳам муҳайё қиласи, нединким меҳмонлар таомдин сўнг шароб ичиб, нафма ва наво эшитсалар хушҳол бўлурлар. Агар коса ва таомингда бир айб ва тақсир воқе бўлса, бунинг била пўшида³ бўлур.

Шароб ичмак улуғ гуноҳдур. Агар гуноҳ қилиш тиламасанг, bemаза ва бетартиблик қиласи. Бас, агар менинг бу сўзларимни айтғонимдек қилсанг, ўзингни меҳмоннинг ҳақин ўзингга вожиб билғил.

Ҳикоят. Эшитдимки, ибн Муқла Мансур^{15*} Тамимийнинг ўғли Насрға Басра ҳокими амалини берди. Сўнгги йилда уни чақириб қўп ситойиш⁴ қилди. Айтурларки, у давлатлиғ ва неъматлиғ киши эрди. Халифа ундин кўп мол тамаъ қиларди. Улар ҳисоб қилдилар, қўп мол унинг (Насрнинг) бўйнига юкланди. Ибн Муқла унга деди: «Ё бу молни берғил ёки зинданга кирғил». Наср деди: «Эй мавлоно, менинг кўп молим бордур, аммо бу ерда ҳозир эмасдур. Менга бир ой муҳлат берғил ва бу миқдор мол учун мени зинданга олмоқ муносиб эрмасдур». Ибн Муқла буни: «Мол

¹ Нуқд – мева-чева.

² Мутриб – чолгувчи, созанда.

³ Пўшида – яширин, маҳфий.

⁴ Ситойиш – мақташ.

бермоқقا тоқати йўқтур, бу сўзни кўнгил била айтмади», – деб гумон қилди. Ниҳоят унга деди: «Сенинг жойингга юбориб бу молни олмоқ зарур. Аммо амиралмўъминининг фармони буки, менинг ҳовлимнинг бир ҳужрасида ўлтурғил ва бир ой менга меҳмон бўлғил». Наср қабул қилиб ибн Муқданинг уйида маҳбус бўлиб ўлтурди. Иттифоқо ул ой рамазон ойи эрди. Ибн Муқла ҳар куни Насрни ифторга чақириб, унинг била рўзасин очар эрди. Ийддин сўнг ибн Муқла Насрга киши юбориб, ўшал молни талаб қилди. Наср: «Мен ул зарни бердим», – деди. Ул киши: «Кимга бердинг?» – деди. «Ибн Муқлаға бердим», – деди. Бу сўзни ибн Муқла эшитиб ҳайрон бўлди ва Насрни олдига чақириб: «Эй Наср, зарни менга қачон бердинг?», – деди. Наср деди: «Мен сенга зар берғоним йўқ, лекин бир неча муддат сенинг таомингни текин едим ва сенга меҳмон бўлиб, ҳар куни рўзани сенинг бирла очдим, энди ийд (байрам) келди, сенинг зар талаб қилишга ҳақинг қолмади». Ибн Муқла бу сўздин хушхол бўлди ва кулиб деди: «Зат (тилхат)ни олғил, хушвақт бўлиб кетғил, ул зарни сенга бағишладим». Наср бу сабаб била зар бермоқдин қутулди.

Бас, эй фарзанд, меҳмондил бўлғил ва меҳмонга таъна қилмағил, ҳар вақт очиқ юзлик бўлғил, токи ҳар кишиким меҳмонинг бўлса, шодлик била таомингни есин. Лекин ўзинг набизни кам ичғил, меҳмондин аввал маст бўлмағил ва ҳамиша очиқ юз, хуш хандон бўлғил. Аммо беҳуда кулмағил, кўп кулмак бир навъ девоналиғдур, оз қулмак бир навъ сиёсат ва бурдборлиғ¹дур, нединким дебдурлар, беҳуда ва бевақт кулгу ғам ва кабро² вақтида воқе бўлур.

¹ Бурдборлиғ – бардошли, сабр-тоқатли

² Кабро – азоб-уқубат.

Меҳмонлар маст бўлғондин сўнг кетмак тила-салар бир мартаба, икки мартаба тавозеъ била кетманг деб илтимос қил ва учинчи мартабада кетмак тиласалар, лутф кўргузуб рухсат берғил. Агар хизматкорларинг бир хато қилғон бўлсалар, меҳмоннинг қошида турушрўй бўлуб, уларни коҳиш¹ қилмағил ва хатосин авф қилғил.

Агар меҳмон ҳар нечук қаттиқ сўз айтса, унга қаттиқ сўз демагил, балки ҳурматини сақлағил.

Ҳикоят. Ундоқ эшитибманким, халифа Муътасим^{16*} бир гуноҳкорни оддига келтуруб ўлдирмоқ тилади. Ул киши «Ой амиralмўъминин,,, мени бир коса сув била меҳмон қилким, мен бағоят ташнадурман, ундин сўнг ҳарна қилмоқ тиласанг буюргил». Халифа Муътасим ҳам ул онтнинг ҳурматин сақлаб буюрди, унга сув бердилар. Ул киши сувни ичғондин сўнг араб расми била: «Хайран касиран ё амиралмўъминин, энди бир коса сув била сенинг меҳмоннинг бўлдим. Агар мурувват тариқида меҳмонни ўлдирмоқ вожиб бўлса, буюргилким, мени ўлдурсинлар. Агар авф қилсанг, мени сенинг олдингда барча журмимдин² тавба қилурман». Муътасим: «Рост айтурсан, меҳмон ҳақи улуғдур. Энди гуноҳингни авф қилдим ва сен ҳам тавба қилиб, бундин буёқ ҳеч бир хотога қадам қўймағил», – деди.

Демак, эй фарзанд, агар меҳмон бўлсанг, ҳар кишиникига меҳмон бўлуб боравермағил, чунки ҳашмат шавкатингга зиён еткарурсан. Агар меҳмон бўлуб бир ерга борсанг, кўп оч бўлуб бормағил ва тез юруб бормағилким, таом емакдин маъзур бўлуб ўлтурсанг, мезбон озор топар. Агар таомни кўп есанг, халқнинг кўзига ёмон кўри-

¹ Коҳиш – камситиши.

² Журм – гуноҳ.

нур. Шунинг учун мезбоннинг уйига кирсанг, ўзингга муносиб жойда ўлтиргил. У гарчи ошно кишигнинг уйи бўлса ҳам таом ва набизнинг устида корфармо¹лик қиласағил, яъни мезбоннинг хизматкорларига: «Эй фалони, бу уй менинг ўз уйимдур ва табақни у ерга қўйғил, ўзгаларнинг таом ва косасига қўл урмасиғил», демасиғил. Ўз чокарларингга зулолни² олиб бермасиғилким, дебдурлар, меҳмоннинг уйидин нарса олиш уят.

Шароб ичиб кўп маст бўлмағил, қайтар чоғда йўл асносида мастилик асари сендин зоҳир бўлмасун ва халқ ҳолингни билмасунлар. Ҳар неча мастилик тиласанг ўз уйингда бўлғил. Агар сен шароб ичғон вақтда тобеъларинг ҳар неча гуноҳ қиласалар ҳам уларга адаб ва гўшмол³ бермасиғил, нединким уни ҳеч киши адаб санамас ва дерларки, бадмастилик қиласадур. Неки қилмоқ тиласанг, шароб ичмағон вақтда қиласиғил, ул бадмастилик эмасдур. Дебдурларким, девоналиғ гуногун⁴ арбада⁵, яна гуногундурким, мастилик девоналиқдандур. Бас, бу айтғон сўзлардин парҳез қил. Бегона одамнинг қошида ҳеч вақт маст ва хароб бўлмағил. Ўзингнинг аёл ва бандаларинг орасида бўлғон тақдирингда ҳам одоб била умр кечирғил.

¹ Корфармо – иш буюрувчи, ишбоши.

² Зулол – тиниқ сув.

³ Гўшмол – танбех.

⁴ Гуногун – ранг-баранг, хилма-хил.

⁵ Арбада – шовқин-сурон.

ҮН УЧИНЧИ БОБ

МАЗОХ¹ ҚИЛМОҚ, ШАТРАНЖ² ВА НАРД ҮЙНАМОҚ ОДОБИН БАЁНИ ЗИКРИДА

Эй фарзанд, билғилким, күп кишилар дебдурларким, мазох – фасоднинг муқаддимасидур. Мазоҳ, яъни хонаки сўз била кишига дахл этмақдин ҳазар қилғил. Агар мазоҳ қилсанг мастиликда қилмағилки, кўпроқ шур ва шар³ мазоҳдин пайдо бўлур ва фаҳш⁴ ҳақида сўз очишдин шарм қилғил. Хусусан, нард ва шатранж үйнағон вақтда икки кишининг орасида низо пайдо бўлур деб айтмагил. Нард ва шатранж үйнамоқни кўп одат қилмағил. Агар үйнасанг, гаров боғлаб үйнамағилки, ул қиморбозлиф бўлур. Танга қўймай үйнамоқ адабдантур. Агар үйнамоқни яхши билсанг ҳам қиморбозликда машҳур бўлғон киши била үйнамағил. Нард ва шатранж үйнамоқда адаб улдурки, сен биринчи бўлиб муҳрага қўл урмагайсан, то ҳарифинг⁵ аввал на қилмоқ тиласа, шундоқ қилсун. Агар нард бўлса, аввал қаъбатайн⁶ни ҳарифингга берғил. Аммо мастилар, турк ва авбошлар била ҳаргиз гаров боғлаб үйнамағил ва бир шўриш орттирмағил. Нардда қаъбатайннинг нақши учун ҳарифинг била урушмағил ва фалон ишни қилдинг деб онт ичмағил. Агар рост десанг ҳам уни барча киши ёлғон дерлар. Ҳосил улким, мазоҳ ва арбададин парҳез қилғил.

¹ Мазоҳ – ҳазил-мазах.

² Шатранж – шахмат.

³ Шур ва шар – фитна ва фасод.

⁴ Фаҳш – ярамас сўз, қабиҳлик.

⁵ Ҳариф – рақиб.

⁶ Қаъбатайн – нард үйинидаги икки сўнгак.

Гарчи мазоҳ қилмоқ айб эрмасдур, аммо ундин эҳтиёт бўл...

Эй фарзанд, агар мазоҳ қилсанг, ўзингдин пастроқ кишига қилғил, йўқ эрса қилмағил, то сенинг иззатинг кетмасун. Агар ночор айтсанг, ўзингга баробар одамларга айтғил, то агар бир жавоб берсалар айб бўлмағай.

Фаҳш айтмоқдин парҳез қилғил. Ҳаддан зиёда мазоҳ қилмағилким, ул одамни хор ва бемиқдор¹ қилғувчи мазоҳ бўлур. Нединким, ҳар сўз десанг, ҳалқдин уни эшитурсан ва ҳар иш қилсанг, улусдин уни кўурурсан. Аммо ҳеч киши била урушмағил, нединким урушмоқ оқил ва муҳташам кишиларнинг иши эрмасдур, ёш ўғлонларнинг ва хотинларнинг ишидур. Агар иттифоқо бир киши била урушсанг, оғзингга келғон дашном ва фаҳшларни айтмағил. Ул миқдор урушғилки, ярашмоққа жой қолсун. Бирдан бешармлик қилмағил, бу иш бозорий, авбошларнинг одатидур. Одатларнинг яхшироғи тавозеъли бўлмоқдур.

Шароб ичмак, мазоҳ қилмак ва ишқибозлик этмак йигитларнинг ишидур. Чунки ўз ишингга ҳаддан ташқари қадам урмасанг, ҳалқнинг ма-ломатидин қутулурсан.

Билғилки, энди ишқибозликдин ҳам билғонимча сўзлайдурман. Билмасманки, сен уни бажо келтура олурмусан ё келтура олмасмусан? Бир дилдорга ошиқ бўлмоқ бағоят душвордур².

¹ Бемиқдор – бекадр.

² Душвор – қийин.

ЎН ТҮРТИНЧИ БОБ

ИШҚ ВА УНИНГ ОДАТЛАРИ ЗИКРИДА

Эй фарзанд, то кишининг табъи латиф бўлмағунча ошиқ бўлмағусидур, нединким ишқ бешак табъи латифликдин пайдо бўлур. Ҳар нарсаки таъби латифликдин пайдо бўлса, ул бешак латиф бўлур. Шул важдинким латиф табъидин латифлик тугуулур.

Кўрмасмусан, йигитларнинг кўпи ошиқ бўлур. Ул жиҳатдин йигитларнинг табъи қариларнинг табъидин латиф бўлур. Гализ табъ ва ялқов киши ҳеч вақт ошиқ бўлмас. Нединким, бу бир иллатдурким, у руҳонийларга кўпроқ тушар. Аммо сен жаҳд қилиб ошиқ бўлмағилким, ошиқ бўлмоқ бағоят қаттиқ ишдур. Хусусан, қашшоқликда бир муфлис¹ киши ошиқ бўлса, унинг қарашлари, термулишлари қон била боғланади, қари кишининг эса олтинсиз муроди ҳосил бўлмағусидур. Бас, агар иттифоқо бир вақт сенга ошиқ бўлмоқ насиб қиласа, зинҳор дилтанг бўлмағил. Нединким, киши ошиқ бўлса, ё висолда, ё фироқда бўлур. Билғилки, бир йиллик висол роҳати бир кунлик фироқ меҳнатига арзигусидур. Нединким, ошиқдик сартосар ранж ва меҳнатдур. Агар фироқда бўлсанг, ҳамиша азобдур ва агар висолда бўлсанг, маъшуқсанг сенинг кўнглинг ҳолидин хабари бўлмаса, унинг нозу бадхўйлиғидин² висолнинг роҳатин билмассан. Агар маъшуқсанг фариштага муқарраб³ бўлса ҳам ҳеч вақт халқнинг маломатидин қутула олмассан, халқ ҳамиша сенинг маломатинг ва маъшуқсанг шикоятида бўлурлар, нединким халқнинг одати шундокдур.

¹ Муфлис – камбағал, бечора.

² Бадхўйлик – ярамас қилиқ.

³ Муқарраб – яқин.

Бас, гар шундай экан, ўзингни сақдағил ва ошиқлиқдин пархез қил, ошиқ бўлмоқ хирадманд¹-ларнинг иши эрмасдур. Хирадмандлар ошиқлиқдин пархез қилмишлар, нединким аввал бир зебо суратни кўргусидур, ундин сўнг кўнгулга писанд² тушгусидир. Кўнгулга писанд тушғондин сўнг табъинга мойил бўлур, кўнгул унинг суратини тақозо қилур. Агар сен шаҳватингни кўнглинг ихтиёрига кўйсанг, кўнглингни шаҳватга тобеъ қилурсан ва уни (маъшуқани) яна бир кўрмоқ тадбирида бўлурсан. Икки марта кўргондин сўнг кўнглинг ҳавоси голиб бўлур, ундин сўнг уч марта кўрмакка қасд қилурсан. Учинчи марта уни кўруб, ҳар сўз айтиб жавобин эшитсанг, ихтиёри кўлингдин берурсан ва ундин сўнг ўзингни сақдамоқ тиласанг ҳам сақдай олмассан. Иш илкингдин кетур. Ҳар кун ишқ зиёда бўлур, сўнгра кўнгулга ноилож тобеъ бўлурсан. Аммо агар биринчи кўргонда ўзингни сақдасанг, ақдни кўнгулга муаккал³ қилсанг ва ўзингни ўзга нарсага машгул этсанг ва маъшуқангнинг дийдоридин кўз юмиб, ўзга ерда қарор тутсанг, бир ҳафта ранж чекарсан ва ул балодин ўзингни қутқарурсан.

Лекин бундоқ иш ҳар кишининг иши эрмасдур. Бу иллатнинг иложин қилмоққа бир хирадманд киши керакдур.

Ишқ иллатининг доруси ҳамиша оғир юк чекмак, узоқ сафар қилмоқ ва доимо ўзини ранжга тутмоқ – бунга ўхшаш ишларни ихтиёр этмақдин ўзга нарса эмасдур.

Аммо шундоқ кишини дўст тутки, сенга унинг суҳбатидин ва хизматидин роҳат етишсин. Шун-

¹ Хирадмандлар – ақлли кишилар.

² Писанд – ёқтирилган.

³ Муаккал – вакил этилган, бирор иш топширилган киши.

да уни қабул қыл, нединким ошиқлик бошқа ва дүстлик бошқадур. Дүстликда кишининг вақти гоҳо хуш бўлса, гоҳо нохуш бўлур, аммо ошиқликда мудом ранж ва балода бўлур. Агар киши йигитликда ошиқ бўлса узрдур, уни ҳар киши кўрса маъзур тутгай ва айтурким, йигитдур, айби йўқдур, лекин жаҳд қилким, қариликда ошиқ бўлмағи. Қарининг ҳеч узри йўқдур, агар авомуннос¹дин бўлсанг иш бир нав осондур, агар подшоҳлардин бўлсанг, зинҳор андиша қыл ва ҳеч кишига кўнгул боғламаким, подшоҳга қариликда ишқбоз бўлмоқ бафоят қийиндир.

Ҳикоят. Андоқким, бобом Шамсулмаолий^{17*}-нинг замонида бундоқ хабар келтурдиларки, бир бозоргоннинг² бир зебо ғуломи бор эрди. У ғуломининг баҳосин икки минг динор дер эрди. Аҳмад Жағдий^{18*} амирнинг вазири эрди ва амир унга: «Шу ғуломни соғиб ол» – деб буюрди. Аҳмад Жағдий ул ғуломни икки минг динорга сотиб олди ва Гургонга келтуруб амирга кўргузди. Амир қабул қилиб, бул ғуломга таштдориғ³ мансабин берди. Бир неча муддатдин сўнг амир қўлин ювиб ўлтурғон ҳолда ул ғуломга назар қилди. Ғулом кўзига бафоят яхши кўринди. Бир замон ўтғондин сўнг бу ҳолни ўзининг вазири Абул Аббосга баён қилиб деди: «Бу ғуломни озод қилдим ва фалон кентни унга бағишладим. Унинг отига ёрлиқ ёзғил, унга бир яхши қиз олиб берки, то соқоли чиққунча ўзининг уйида ўлтурсин, ҳаргиз ташқари чиқмасун». Абул Аббос деди: «Жон била қабул қилурмен, аммо бу банданинг муддаоси улдурки, бу ишдин мақсадингиз на эрканин билсам». Амир деди: «Бугун шундог ҳолга

¹ Авомуннос – оддий халқ.

² Бозоргон – савдогар.

³ Таштдориғ – сочиқ тутувчи, яъни қўлга сув қуйиб турвучи хизматкор.

дучор бўлдим: саксон ёшга кирғон подшоҳнинг ошиқ бўлмоғи бағоят қабиҳдур. Мени... бандалар ва лашкарларнинг ҳолидин огоҳ бўлмоқ, мамлакатнинг низомин тузмоқ учун подшоҳ қилибдур. Агар мен бугун ишқа машғул бўлсам, фуқаронинг аҳволи била шуғулланишни тарк этсан, халқнинг маломатидин на янглиф қутулурман?»

Тўғри, агар йигит ошиқ бўлса, маъзурдур. Аммо одам ҳар нечаким йигит бўлса ҳам ошиқ бўлуб, бирдин ўзин олдурмасин, сиёsat, ваҳшат йўлларин барҳам урмасун.

Ҳикоят. Ундоғ эшитибманки, Фазнин вилоятида ўн гулом бор эрди. Уларнинг бирини Нуштегин дер эдилар. Султон Масъуд уни барча қулларидин дўст тутар эрди. Бир неча йил шу аҳводда ўтди. Султон ўн гуломнинг орасида қайси бирига муҳаббат пайдо қиласонин, унинг маъшуқи қайси эканлигин ҳеч ким билмас эрди. Беш йил шундоқ юрди. Бир кун султон маст ҳолда буюрдиким: «Отам Аёзга улуфа¹, ер, пул бағишламиш эрди, уларни Нуштегин отига ёрлиф ёзинглар». Халойиқ шундин сўнг султоннинг мақсади Нуштегин эрканин билдилар.

Эй фарзанд, билғилки, мен сенга ҳаммасин айтдим, аммо билурманки гарчи бошингга ишқ савдоси тушса, менинг айтғон сўзим била иш қилмассан.

Бас, агар ошиқ бўлсанг шундоғ кишига бўлғилки, ул маъшуқалиққа лойиқ бўлсун, Батлимус^{19*} (Птолемей) ва Афлотундек, Яъқубнинг ўғли Юсуфдек^{20*} сабоҳати (ҳусни) бўлмаса ҳам, бир оз малоҳати бўлсун. Шунда халойиқнинг тили таъна ва маломатдин боғлиқ бўлғай ва сенинг ишқингни

¹ Улуфа – аскар ва амалдорларга белгилаб қўйилган маош ва озиқ-овқатлар.

маъзур тутгайлар, нединким халқ бироннинг ма-
ломатин қилмоқдин ва айбларин айтмоқдин бир
лаҳза фориг эмасдур. Аммо бир жойга меҳмон бўл-
санг, маъшуқангни ўзингта ҳамроҳ қилиб олиб бор-
магил. Агар олиб борсанг, бегоналар қошида унинг
била машғул бўлмагил ва кўнглингни унга банд
қилмагил, нединким уни ҳеч ким тилга олмайди ва
ҳамма уни ўзингдек кўради деб хаёл қилмагил. Се-
нинг кўзингта у ҳар қанча яхши кўринса ҳам ўзга-
ларнинг кўзига шу миқдор ёмонроқ кўринур.

Ҳар замон унга мева беравермагил ва ёнингга
чақириб қулоғига сўзламагилким, халқ ҳар хил
гумон қиласди.

ЎН БЕШИНЧИ БОБ

НАФЪ ОЛМОҚ ЗИКРИДА

Эй фарзанд, билфилким, агар бир кишини дўст
тутсанг, ҳамиша онинг била мастиликда ва ҳуш-
ёрликда мужомаъат қилмагил. Агар ҳар нутфа
ҳар кишининг жони пайдо бўлса ҳам мастиликда
мужомаъат қилмагилким, зиёни бағоят кўбдур.
Аммо хумор вақтида қилсанг, яхшидур ва ҳар
вақтким, ёдингфа тушса, ул ишга машғул бўл-
магилким, ул ҳайвонларнинг одатидур. Одамга
вақт таъйин этмак керакдур, то ҳайвонлар била
онинг орасида фарқ бўлгай. Аммо хотундин
майлингни узмагил, то ундин баҳра топгайсен
ва бу тоифа сенга душман бўлмасин. Сен агар
мужомаъат қилсанг, иштаҳа била қилғил ва та-
калдуф била қилмагил, то зиёни камроқ бўлгай.
Аммо хоҳ иштаҳа бўлсун, хоҳ бўлмасун, ёзниг
иссиқ вақтида ва қишининг совуқ бўлғон замони-
да парҳез қилким, бу икки фаслда зиёни кўп

бўлур. Хусусан, қариларга зиёни кўб бўлур ва ҳамма вақтдин баҳор вақти яхшироқ бўлурким, баҳор вақтида ҳаво мўътадил бўлур ва чашмаларнинг суви зиёда бўлур ва жаҳон яхшилиқга юз қўюр ва роҳат берурсан. Чун оламким, ушбу жаҳондур мундоқ бўлса, олам сафир¹дур. Ул ҳам ондоқ бўлур ва мани зиёда бўлур ва томурларда қон зиёда бўлур ва халқ мужомаъат қиургра муҳтож бўлурлар. Ва чун табиат иштаҳаси кўб бўлса, мужомаъат қилмоқнинг зиёни кам бўлур. Ва томурларидин қон олдирмоқ ҳам бу тариқададур. Бас, агар қилолсанг, қаттиқ иссиқда ва қаттиқ совуқда томурдин қон олдурмағил ва агар қонинг зиёда бўлса, мувофиқ таомлар ва шарбатлар ила таскин берғил ва муҳолифат нимарса емағил. Бу бобда сўзни муҳтасар қилдимким, мундин зиёда тафсил ҳожат эрмасдур.

ЎН ОЛТИНЧИ БОБ

ҲАММОМГА БОРМОҚ ЗИКРИДА

Эй фарзанд, билғилким, агар ҳаммомга бориш ниятинг бўлса, қорнинг тўқ вақтида бормағил, бу била ўзингга зиён еткуурсан. Ҳаммомга ҳар кун боришининг фойдаси йўқдур, балки зиёни бордур, чунки ҳаммом одамнинг сужклари, баданларини мулойим қилиб қаттиқлигини йўқотади. Шундин кейин у ҳар куни ҳаммомга боришини одат қиулур. Агар бир кун бормаса киши ўзини бемордек сезади, барча баданларин қотиб қолғондек ҳис этадур. Демак, ҳаммомга бир кун бориб бир кун бормагон яхшидур, чунки бадан тинчланади ва

¹ Сафир – ёқимли, майин.

халқ ҳам бу одатингни раънолиққа¹ мансуб қилмаслар.

Хоҳ ёз, хоҳ қишида ҳаммоломга борсанг, аввал соvuқ хонада ўтирип, бу хонада баданинг роҳат қилсин. Сўнгра иссиқ хонага, яъни ўртадаги уйга кириб, унда бир соат ўтиргил, токи иссиқ уйдан роҳат қилғил. Иссиқ сенга таъсир қилғондин кейин хилват хонага бориб, унда ювингнил.

Икки сувнинг ичида ўтирмағил, кўп иссиқ ва кўп совуқ сувни бошингдан қўймағил, мўътадил² сувни қўйғил. Агар ҳаммолом холи бўлса, фанимат билғил, чунки донишманлар холи ҳаммоломни ганимат билғайлар.

Ҳаммоломга қандай кирғон бўлсанг, шундай чиқиб кетғил, яъни қуритиб чиқғил. Чунки ҳўл мўй била чиқиб йўл юрмоқ улуғларнинг иши эмас ва ҳўл мўй била улуғларнинг саломига бориш ҳам одобдан эмасдур.

Демак, сен ҳаммоломнинг наф ва зарарин билдинг, аммо ҳаммоломда сув ва шарбат ичишдан парҳез қилғил. Бунинг зиёни кўпдур, истисқо касали шундан пайдо бўлур. Агар жуда ҳам хумор ва ташна бўлсанг, оз ичғил, бу билан хумор ва ташналиқ шиддати босилғай.

Донишманлар ҳаммоломдин чиқадигон бўлсалар, ҳаммоломнинг жомахонасида бир оз ухлаб оладилар, сўнгра ҳаммоломдин чиқиб кетадилар.

¹ Раънолиқ – мағрурлик.

² Мўътадил – ўртача.

ҮН ЕТТИНЧИ БОБ

УХЛАМОҚ ВА ОСУДА БЎЛМОҚ¹ ЗИКРИДА

Эй фарзанд, билғилки, донишмандлар уйқуни кичик ўлим дебдурлар. Ул жиҳатдин ўлғон киши ухлагон киши била баробардур ва бу икковининг ҳам ҳеч бири оламдин огоҳ эмаслар.

Кўп ухламоқ ёмон одатдурки, баданни суст ва табиатни вайрон қилур, юзнинг суратин бошқа ҳолга айлантирур. Олти нарса кишига етишса, унинг юз суратини ўзгартиради: бири дарҳол муяссар бўлғон шодлик, бири ногоҳ етишғон ғам, бири қаҳр, бири уйқу, бири мастлик ва яна бири қарилиқдур. Одам қари бўлса сурати ўзгарида, аммо бу ўзгариш бошқа турга киради. Аммо киши ухлагон вақтда тирик ёки ўлик деб ҳукм чиқариб бўлмас, яъни ўлғон кишига ҳукм йўқдир, ухлагон кишига ҳам ҳукм йўқдур.

Кўп ухлаш зиён қилғонидек, ухламаслик ҳам зарар қилур. Масалан, агар бир одамни етмиш икки соат, яъни уч кеча-кундуз жўрттага ухлат-масдин олиб юрилса, тўсатдан ўлим хавфи туғилади. Аммо ҳамма ишнинг ўлчови бордур. Чунки кеча-кундуз йигирма тўрт соат бўлур. Шундан саккиз соатни ибодатга, саккиз соатни ишратга ва руҳни тоза қилмоққа ва саккиз соатни мана шу ўн олти соат давомида қийналғон аъзоларга ором бермакка таайин этмоқ керакдур, токи аъзо ҳаракат такаллуфидин осуда бўлсин. Аммо жоҳиллар ушбу йигирма тўрт соатнинг ярмин уйқу била ўткариб ва ярмида бедор бўлурлар. Коҳиллар² икки ҳиссасида ухлаб, бир ҳиссасида

¹ Осуда бўлмоқ – дам олмоқ.

² Коҳиллар – ялқовлар.

ўзга ишга машғул бўлурлар. Оқиллар бир ҳисса-сида ухлаб, икки ҳиссасида бедор бўлурлар.

Билғилки, кеча бандаларнинг роҳат ва осойиши учун яратилғон ва тан жон била тириқдур. Тан жоннинг маконидур. Жон унда мутамаккиндур.

Жоннинг уч хосияти бордур: ҳаёт, ҳаракат ва сукун (ҳаракатсизлик). Таннинг ҳам уч хосияти бордур: мамот (ўлим), сукун ва оғирлик. Модомики, жон тан била муттасил¹дур, кўнгул танин ўз хосияти била сақлар, ундин сўнг кўнгил танга иш буюрар, гоҳо кўнгил танин ўз хосияти била ишдин қўяр ва гафлатга чекиб, уйқуга элтар. Таннинг уйқуга борғони бир қулаб тушғон уйдек бўлади. Уй қулағон чоғда ичида ҳар ким бўлса, уни босиб қолади. Худди шунингдек, уйқу ҳам кишининг ҳамма аъзосин босиб, гёё ер била яксон қилур. Шунда қулоқ сўз эшитмас, кўз ҳеч нарса кўрмас, бурун исни, оғиз мазани, қўл юмшоқ, қаттиқ, оғир, енгилни билмас.

Уйқу беҳикмат яратилмади, балки барча ҳайвонотнинг роҳат ва осойишлари учун яратилди. Аммо уйқу учун кўп вақт сарф қилиб, кундузни кечага айлантирмоқ ҳикматдин эрмасдур. Аммо улуғлар ёз фаслида чошт² вақти қайлула³ қилсалар раводур, филжумла⁴, бизларга умримизнинг кўпрогин бедорликда ўткармак керакдур, нединким туганмас узоқ уйқу олдимиизда бордур.

Эй фарзанд, уйқу қилмоқ тиласанг оқшом ё кундуз танҳо ухлағил, ё бир зебо шоҳид била ухлағил, нединким ўлғон била ухлағон баробардур, икковининг ҳам оламдин хабари йўқдур. Лекин бири ҳаёт уйқусидир ва бири мамот уйқуси-

¹ Муттасил – туташ.

² Чошт – тушга яқин вақт.

³ Қайлула – чоштгоҳ вақтидаги уйқу.

⁴ Филжумла – лўнда қилиб гапирганда.

дур. Аммо икковининг орасида бундай фарқни билмоқ керақдур.

Эрта туришни одат қил... Ҳар кишиким қуёш чиққунча уйқуда бўлса, ризқи кам бўлур...

Агар ишинг бўлмаса, кўнглинг тиласа шикор¹ томошасига борсанг ва сайд андозлик² қилсанг раводур.

ЎН САККИЗИНЧИ БОБ

ШИКОРГА ЧИҚМОҚ ЗИКРИДА

Эй фарзанд, билғилким, отга минмоқ, шикорга бормоқ ва човгон ўйнамоқ улуғларнинг ҳамда подшоҳдарнинг ишидур. Аммо ҳар ишнинг ҳадди, андозаси ва тартиби бўлур. Ҳар куни шикорга чиқмагил, тартиб бузилур. Бир ҳафта етти кундир. Икки кун шикорга чиқфил... икки кун ўз рўзгоринг ишига машғул бўлфил.

От минсанг кичик отга минмагилким, кишининг жуссаси ҳар қанча улуғ бўлса ҳам кичик ва ҳақири³ кўринур. Агар кишининг сурати ҳар қанча ҳақири бўлса ҳам катта отга минса шукуҳлиф⁴ ва ҳайбатлиф кўринур.

Сафарда йўрга отга минғилкимро ҳаласан. Шаҳарда юртоқ, тунд ва шўх отга минғил, токи отнинг юртоқ ва шўхлиги сабаби била ўзингдин фоғил бўлмагайсан. Шикорга чиқсанг, беҳуда от чопмагил, беҳуда от чопмоқ боланинг ишидур.

Қочғон дарранданинг изидин от чопмагил, нединким унда заарардин бошқа ҳосил йўқдур.

¹ Шикор – ов.

² Сайд андозлик – овчилик.

³ Ҳақири – паст, тубан.

⁴ Шукуҳлиф – савлатли.

Бизнинг аслимиздин икки улуғ подшоҳ сибоъ¹ ва дарранданинг шикорида ҳалок бўлдилар: бири менинг отамнинг бобоси амир Вушмагир бинни Марзаён ибн Зиар бинни Зиёр ва бири менинг амакимнинг ўғли амир Шараф ал-Маолий.

Сен дарранданинг изидин чопмағил, то сендин кичиклар ҳам чопмасунлар. Сен бир улуғ подшоҳнинг олдида бўлсанг, ўзингни кўргузмак ва ном чиқармоқ учун чопсанг арзиди.

Агар шикор томошасига майлинг бўлса, қарчифай, итолуку шоҳин, шунқор ва ит била шикор қилмоққа машғул бўлғил. Бу вақтда ҳам шикор қилғунгдур, ҳам сенга ҳеч хатар бўлмағусидур ва ҳар қанча сайд қилсанг, гўшти емакка ярагусидур. Агар сибоъни сайд қилсанг, гўшти емакка ва пўстини киймакка ярамағусидур. Бас, шикор қилсанг икки тариқада қилғилким, подшоҳлар икки тариқада қилурлар: баъзила-ри ўз қўллари била қуш солурлар ва баъзилар ўз қўллари била қуш солмаслар. Агар подшоҳ бўлмасанг, қўнглинг қандай хоҳласа, шундай қил, агар подшоҳ бўлсанг ва ўз қўлинг била қуш солмоқ тиласанг раводур. Аммо ҳеч қачон қарчифайнини икки марта учирмағил, бу иш подшоҳларнинг иши эрмасдур. Яна агар қуш солмоқ тиласанг, бошқа қушни олиб солғил, недин-ким подшоҳларнинг шикор қилишдин мақсуди гўшт эмас, балки томошадур. Агар подшоҳ ит била шикор қилса, итнинг қалодасин² ўз қўли била очмоги муносиб эрмасдур. Уни подшоҳнинг олдида турғон бандалар очсун ва подшоҳ назорат қилиб турсун.

¹ Сибоъ – йиртқич ҳайвонлар.

² Қалода – итнинг бўйнига тақилган ҳалқасимон тасма.

ҮН ТҮҚҚИЗИНЧИ БОБ

ЧАВГОН ЎЙНАМОҚ ЗИКРИДА

Эй фарзанд, агар чавгон ўйнамоқ тиласанг гоҳ-гоҳ ўйнағил, аммо ҳамма вақт ўйнамоқни одат қилмағилки, күп кишилар бу ишда күп ба-лоларга учрабдурлар.

Хикоят. Бундоқ айтурларким, Амир бинни Лайснинг^{21*} бир кўзи кўр эрди. Хуросонга амир бўлғондин сўнг тўп ўйнамоқ учун бир кун саҳро-га кетаётган эрди. Унинг Азҳархар^{22*} дегон бир сипоҳсолари¹ бор эрди. У келиб Амир бинни Лайс минғон отнинг жиловин ушлаб деди: «Сени тўп ўйнағали юбормайман, чунки сенга чавгон ўйна-моқ раво эрмас». Амир бинни Лайс деди: «Нима учун чавгон ўйнаш сизларга раво-ю, менга раво эрмас?» Азҳархар деди: «Шунинг учунки, бизлар-нинг икки кўзимиз бордур. Агар тўп тегиб бир кўзимизни кўр қилса, яна бир кўзимиз қолур. Шу бир кўз била оламни кўрармиз. Сенинг эса фақат бир кўзинг бор. Агар тўп тегиб уни ҳам кўр қилса, Хуросоннинг амирлиғидин айрилур-сан». Амир бинни Лайс деди: «Ҳар бўлсанг ҳам рост айтурсан, сўзингни қабул қилдим. Бундан буён ҳаргиз чавгон ўйнамасман».

Эй фарзанд, агар томоша учун бир-икки марта бир чавгон ўйнасанг раводур ва лекин кўп отлиғ била чиқиб издиҳом² қилмағилким, саккиз отлиқ-дин зиёда бўлишга ҳожат йўқ. Сен майдоннинг бир бошида турғил, яна бир киши майдоннинг охирида турсин. Олти киши майдонда тўпни ур-син, ҳар вақт тўп сенинг тарафингга келса, тўп-

¹ Сипоҳсолар – бош қўмондон.

² Издиҳом – тўда, оломон.

ни урғил ва майдоннинг охирига сурғил, аммо оломоннинг ичига отмағил, чавгон ўйинининг йўли шудур. Шу била бирга, маррага етказишига муваффақ бўл. Аммо уруш майдонига кирсанг, сусткашлик қилмағил, даранг¹, сусткашлик яхши эрмасдур.

ЙИГИРМАНЧИ БОБ

УРУШ ҚИЛМОҚ ЗИКРИДА

Эй фарзанд, билғилки, урушда даранг, сустлик мақбул эрмасдур. Чунки уруш майдонига кирсанг ҳаргиз тақсир² кўргузмағил ва жонингга раҳм қилмағил. Нединким, ҳар кишига гўрда ётмоқ муқаррар пар бўлса, уйда ётмоққа имкон бўлмас. Маъракада³ ҳаракат қилиб илгари қадам қўя олмасанг ҳам, аммо бир қадамни кейин қўймағил, чунки маъракада душманлар ўртасига тушсанг, урушдан асло илгари чиқмағил. Чунки уруш била душман қўлидин қутуласан. Сенинг ҳаракат ва чобуклиинг⁴ни кўрсалар, улар тагин ҳам сендин кўпроқ файрат ва шиддатта тушарлар. Шундай жойда ўлимга кўнгил қўйғил ва далир⁵ бўлғилким, қисқа қилич баҳодирларнииг қўли бирла узун бўлур.

Асло қўрқмағил. Андак қўрқинч кўнглингга келса, минг жонинг бўлса ҳам бирин ул маҳлака⁶дин омон қутқара олмассан ва ярамас киши устингдин фалаба қилур. Сен эса мақтул⁷ бўлур-

¹ Даранг – аста-секинлик.

² Тақсир – камчилик.

³ Маърака – уруш майдони.

⁴ Чобук – чаққон, эпчил.

⁵ Далир – юракли, жасур.

⁶ Маҳлака – қўрқинчли.

⁷ Мақтул – ўлдирилган.

сан ва бадномлик била от чиқарурсан, қўрқоқлик била машҳур бўлурсан, омманинг орасида ҳеч эътиборинг бўлмас. Бу янглиф тирикликдин ўлим яхшироқдур. Аммо ноҳақ қон тўкмоққа ботирлиқ қилмағил.

Шариат била қатли вожиб бўлғон кишиларнинг – ўғриларнинг, қароқчиларнинг қонин тўқфилки, ноҳақ қон тўксанг икки жаҳонда балоға гирифттор бўлурсан. Аввал улким, қисматингга яраша жазо топурсан, иккинчидан, бу жаҳонда ёмон от кўттарурсан. Ҳеч одам сендин шод бўлмас ва хизматкорларнинг умиди сендин узилур. Ҳамма сендин қочиб, кўнгилларидин душман тутарлар. Ноҳақ қоннинг мукофотин танҳо ўзинг у жаҳону бу жаҳонда кўргунгдур.

Мен буни китобларда ўқимишман ва тажриба ҳам қилмишман. Агар золим бу жаҳонда «мукофотин» кўрмаса, албатта ўзидин сўнг фарзандлари кўргусидур. Эй фарзанд, ўзингга, фарзандларингга раҳм қиласа ва ноҳақ қон тўкмағил. Аммо ҳақ қонни тўкмакда сустлик кўргузмағилким, бу сустлик ўзингга зарар қилгусидир.

Хикоят. Андоқ айтурларки, менинг бобом Шамсулмаолий бағоят қаттол киши эрди ва ҳеч бир кишининг гуноҳин авф қилмас эрди. Унинг бадлигидин лашкаригина пайдо қилиб, менинг амаким Фалакулмаолий^{23*} била бир бўлдилар. Фалакулмаолий лашқар била бирга келиб, отаси била Шамсулмаолийни тутдилар. Ул зарурат юзасидин мулк бегонага кетмасун деб лашкарнинг сўзи била бундоқ ишни қилди. Алқисса, уни (Шамсулмаолийни) тутуб, банд қилиб, бир отга миндириб, атрофига қоровуллар қўйиб, Хаёник қалъасига жўнатдилар. Унинг муаккалларидин бири Абдуллоҳ Жаммозабон отлиқ бир киши эрди. Шамсул-

маолий унга деди: «Эй Абдуллоҳ, менинг бунча улуғлиғим била бу ҳолга гирифтор бўлмоғимга сабаб ким бўлди?» Абдуллоҳ беш кишининг отини айтиб дедиким: «Булар сабаб бўлдилар ва мен ҳам уларнинг орасида эрдим. Мен уларнинг барчасига онт бериб ишни бу ерга еткурдим. Лекин бу ишни ўзингдин кўргил». Шамсулмаолий деди: «Нима учун?» Абдуллоҳ деди: «Халқнинг қонин кўп тўkkанинг учун бу ҳол сенинг бошингга тушди». Шамсулмаолий деди: «Сен ёлғон айтурсан, бу иш менинг бошимга киши ўлдурғоним учун тушмади, балки киши ўлдурмағоним учун тушди. Нединким, мен сени ва ул беш кишини ўлдирсан эрди, бу ҳолга гирифтор бўлмас эрдим».

Эй фарзанд, бу сўзни шу жиҳатдин дедимки, муносиб жойда қон тўкишдин воз кечмағил. Ҳар ким қочса уни қаттиқ қувмағил. Уруш вақтида ўлимдин қўрқмағил ва жонингни аямағил, токи баданингни итлар емасинлар. Аниқ билғилки, ҳар киши бир кун туғулубдур, бир кун ўлғусидур. Нединким, жонивор уч навдур: бири сўзлайтургон тириклар, бири нотиқлар, бири ўликлар, яъни фаришталар, одамлар, ваҳшийлар. Бас, маълум бўлдики, барча тирик ўлғусидур ва ҳеч киши ажал етмай ўлмағусидур. Демак, эй фарзанд, бундоқ эътиқот қилиб кўшиш қилмоқ керакдур, токи яхши от ва олий даражага эга бўлгайсан.

Амиралмўъминин Али Розиёй шундօғ дебдурлар: «Билғилки, жаҳонда мол ва неъмат қўлингга тушса, уларни жамлашга ҳаракат қилғил, яхши сақлағил ва жойида харж этғил».

ЙИГИРМА БИРИНЧИ БОБ

МОЛ ЖАМ ЭТМОҚНИНГ ЗИКРИДА

Эй фарзанд, ўзингни мол жам этмақдин ғоғил тутмағил ва лекин ҳар нарсани этмак тиласанг жаҳд қилғил, токи ҳалоллик била жам бўлсун ва ҳамиша сенга боқий ҳамда ёқимли бўлсун.

Жам этғондин сўнг яхши сақдағил ва ҳар ботил¹ иш учун уни қўлдан бермағил, нединким сақламоқ йифишидин мушқулдур. Агар керак вақтида зарур иш учун олиб харж этсанг, ҳаракат қилиб унинг ўрнини тўлдурғил. Агар харж этиб, яна жойини тўлдирмасанг, агар Қорун^{24*} нинг ганжидек² бўлса ҳам у бир кунда йўқ бўлур.

Молни доимий турар деб унга қўнгул қўймағил. Токи бирор вақт у йўқ бўлса, тангдил бўлмагайсан.

Агар молинг кўп бўлса, уни тақдир ва тадбир била ишга яратғил. Нединким, тақдир ва тадбир била яратғон озгина мол тақдирсиз ва тадбирсиз кўп молдин яхшироқдур. Агар мол оз бўлса ҳам яхши сақламоқни вожиб билғилки, ҳар киши оз нарсани сақлай олмаса, кўп нарсани ҳам сақлай олмағувсидур.

Мол жам этарда коҳиллик қилмағил, бу бад-баҳтликнинг шогирдидур.

Ўзингга ранж берғил, яъни ўзинг мاشаққат тортғил, нединким мол қийинчилик била йифлади ва коҳиллик била йўқ бўлур. Донолар дебдурларки: «Ҳаракат қилинг, то ободон бўлгайсизлар ва озга қаноат қилинг, токи молларингиз кўп бўлгай, юмшоқ табиатли ва ширин сўз бўлинг, дўстингиз кўп бўлгай».

¹ Ботил – бузилган, бузук.

² Ганж – бойлик, разна.

Демак, кўп ранж била топилғон ганжни фафлат ва коҳиллик била қўлдин бермак ақдли кишининг иши эрмасдур. Қашшоқ бўлғондин сўнг ҳар қанча пушаймон бўлса, суд¹ қилмайдур. Демак, молинг барқарор бўлғунча машаққат устига машаққат чекғил, сен бундин баҳраманд бўлгайсан.

Бироқ мол ҳар қанча азиз бўлса ҳам уни дўстлардин дариг тутмагил. Ҳар ҳолда молни гўринингга олиб бормагунгдур. Аммо дахлинг² на чоғлиқ бўлса, харжинг ҳам ул миқдор бўлсун. Шунда сенга қашшоқлик машаққати юзланмагай. Ҳар кишики харжини дахлидин оз қилса, ҳеч вақт қашшоқ бўлмағай.

Бор молингга қаноатда бўлғил, қаноат туганмас ганждур ва сенга тақдим этилғон насиба, кундалик овқат сенга, албатта, етишгусидур.

Яхши сўз ё ҳалқнинг шафоати била ҳар ишки сенга вожиб бўлса, ул ишга йифилғон молни бадал³ қилмагил, чунки молсиз одамнинг ҳеч қадри бўлмағусидур. Ҳалойиққа бойнинг ҳеч фойдаси бўлмаса ҳам уни дўст тутғусидур, ҳеч зарари етмаса ҳам қашшоқдарни душман тутғусидур. Бас, ҳалққа қашшоқликдин ёмон ҳол йўқдур...

Ҳалқнинг оройиши⁴ мол бермақдур ва кишининг оройиши ва чоғлиқ кўп бўлса, унинг қадрин шул чоғлиқ билғил. Аммо исрофни шум эътиқод қиласи. Ҳар ишнинг бир сабаби бордур. Аммо қашшоқликнинг сабаби исрофдур. Истроф танҳо молнинг харжида эрмас, балки овқатда, хулқда, сўзламакда ва ўзга ишларда ҳам ёмондур. Истроф танни алдар, нафсга ранж еткарур, ақдни қочириур, тирикни ўлдирур. Кўрмасмусанму, чироқ-

¹ Суд – фойда

² Даҳл – даромад.

³ Бадал – айирбош.

⁴ Оройиши – зийнат

нинг тириклиги ёғ билантур. Агар ёғни ҳаддан зиёда солсанг, ёғ фатила (пилик)нинг бошига келиб, чироф ўчар. У ёғки чироқнинг ҳаётига сабаб эрди, исроф жиҳатдин мамотифа (сўнишига) сабаб бўлур.

Донишлар дебдурларки, ҳеч бир ишда исроф қилмагил, исроф қилғувчи барча вақт зиёнкордур. Аммо тирикликни талх қилгудек қаттиқлик қилмагил. Рўзгорингнинг зарурий ишларида тақсир нуқсон кўргузмагил. Жонингга жабр қилмагил: мол ҳар нечаким азиздур, аммо жонингдин азиз эрмасдур. Алқисса, жаҳд этиб йифилғон молингни баҳилларнинг қўлига топширмагил ва шаробхўр, қиморбозларга эътимод қилмагил. Барча кишини ўғри гумон этмагил, токи молинг ўғридин омон бўлгай.

Мол жам этмакда хато қилмагил, ҳар одам ўз ишида хато қиласа, саодатдин маҳрум бўлгай ва муддаоларидин бебаҳра қолгай, нединким роҳат меҳнатдадур. Шундоқки, бугуннинг роҳати кечаги меҳнатнинг натижасидур.

Ҳар нарса қўлингга тушса, бир тангадин икки ҳиссани қарилғи ва ожизлиғ вақтининг зарурий ишларига эҳтиёт қилиб қўйғил ва ундин кўз юмиб асло унга қўл урмагил. Қолғон икки ҳиссани ўзингнинг зийнат ва асбобингга сарф этғил.

Жавоҳир, зар ва мис асбоби тартиб била бўлсун. Агар бундин зиёдроқ бўлса, мулк олғил ва бундоғ асбобларни олғондин сўнг сотмагил. Ҳозир сотиб, яна керак вақтида олурман деб ўйламагил, чунки олинмай қолиши ҳам мумкин, уйинг асбобсиз қолур ва оз фурсатда барча муфлис камбағалларнинг муфлиси бўлурсан.

Ҳар зарурий иш учун қарз этмагил ва гаров бериб фойдасин емагил.

Қарзни бетамкин¹ликка улуг далил билғил.

Қила олсанг, кишига танга қарз бермағил. Хусусан, дұст кишиларгаки, қайтиб олмоқнинг озори бермағоннинг озоридин күпроқдур. Агар берсанг, берғон зарни ўз молинг санамағил ва уни дүстимга бағищадим деб хаёл этгил. Ўзи бермагунча ундин талаб қылмағил, то олмоқ сабаби била дүстликка зарап етмасун ва дүстинг душман бўлмасун.

Молингдин мустаҳиқларга² едурғил. Ўзгаларнинг молидин тамаъ қылмағил, токим барча халойиқнинг яхшироқ ва азизроги бўлгайсан.

Молингни ўзгаларнинг моли деб билғил, ўзгаларнинг молин ўз молингдин зиёдроқ билғил, токи омонатга хиёнат қылмаслик, тўғрилик била халқقا машҳур бўлгайсан.

ЙИГИРМА ИККИНЧИ БОБ

ОМОНАТНИ САҚЛАМОҚ ЗИКРИДА

Эй фарзанд, агар сенга бир киши омонат топширса, то қила олсанг, ҳеч ҳол била қабул қылмағил. Ул жиҳатдинки, омонатни қабул қылмоқ бағоят душвордур. Мардум ва жувонмардликнинг йўли улдурки, омонатни қабул қылмағил ва агар қабул қилсанг, яхши сақлағил, токи омонатни эгасига саломат топширгайсан.

Ҳикоят. Мен шундоқ эшитибманки, бир киши кеча саҳар вақтида қоронфуда уйидин ташқари чиқди ва ҳаммомга бормоқ тилади. Ўз дўстларидин бирига деди: «Менинг била ҳаммомга ҳамроҳ бўлиб борғил». Ул деди: «Сенга ҳамроҳлик қилур-

¹ Тамкин – оғирлик, чидам.

² Мустаҳиқ – муносиб, лойиқ.

ман ва лекин ҳаммомга кирмасман, нединким менинг бир зарурий ишими бордур». Ул киши ҳамроҳи била ҳаммом томонга кетди. Икки йўлниг айрилғон бошига бориб, ҳаммомга боргувчи кишига хабар қилмай изига қайтди ва ўзга йўлга равона бўлди. Иттифоқо, бир ўгри ҳаммомга боргувчи нинг изидин тушди. Лекин ул киши: «Изимдин кетатурғон дўстимдур» деб хаёл этди. Ул кишининг қўйнида юз тиллоси бор эрди. Ҳаммомнинг эшигига тиллони қўйнидин чиқариб, кеча қоронфусида танимай тиллони ўгрига берди ва деди: «Эй биродар, мен ҳаммомга кириб чиққунча бу зар сенда турсун, ҳаммомдин чиқсан менга топширгил». Ўгри зарни олиб, ул жойда ўлтурди. Ул киши ҳаммомдин чиқиб, лиbosларин кийиб йўлга равона бўлди. Ўгри унинг изидин чақириб деди: «Эй жувонмард, келғил ва мендан зарингни оғил. Бугун мен сенинг омонатингни сақлаб ўз ишимдин қолдим». Ул киши деди: «Сен кимдурсан, бу олтин қандай олтиндир?» Ўгри деди:

– Мен бир ўгридурман ва бу сенинг менга топширган зарингдур.

Ул киши деди:

– Агар сен ўгри бўлсанг, нима учун зарни олиб кетмадинг?

Ўгри деди:

– Агар минг тилло бўлса ҳам сендин андиша қилмай олиб кетар эрдим. Лекин сен, бу зарни менга омонат топшурдинг. Омонатга хиёнат қилмоқ жувонмардликдин эрмасдур.

Бас, эй фарзанд, омонат қабул қилиб, омон сақлаб, то эгасига топширгагунча сенга кўп ранж етадур. Омонат эгаси сендин ҳеч миннатдор бўлмагусидур ва айтадурким: «Топшурғон молимни олдим, унга не заарар тушди». Демак, чеккан ранжинг зоеъ бўлур. Агар омонатга бир офат етиб йўқ

бўлса, сенинг ўзингга ҳеч киши ишонмагусидур ва сен халойиқнинг ўртасида хиёнатчи номи била машҳур бўлурсан. Ана шундай тухматни бўйинга кўтармоқ яхши эрмасдур. Агар мункир бўлсанг, сендин жабр-ситам била оуллар. Шундин сўнг сенга ҳеч одам эътибор қилмас.

Аммо агар сен бир кишига омонат қўймоқ тиласанг, молингни пинҳон бермағил ва икки одил гувоҳнинг олдида берғил. Бир нима берсанг қози хати олиб берғил, то сўнгра қозининг олдига бормоқдин қутулғайсан ва агар қозининг олдига борсанг, ожиз ва залил¹ бўлмағайсан. Токи қила олсанг, ҳаргиз онт ичмағил ва онт ичмак била машҳур бўлмағил. Агар зарурат бўлғон вақтда онт ичсанг қабул бўлғай. Ундин сўнг тавонгар ва ростгўй бўлсанг ҳам ўзингни дарвешлар жумласидин ҳисоблаб, камтар бўлғил, нединким бадномлик ва дурутгўйликнинг охири қашшоқликдур.

Омонатга хиёнат қилмағил, омонатни кимёйи зар дебдурлар. Ростгўй бўлғил, олам моли ростгўйликка вобастадур². Кўшиш қил, то фириб емагайсан ва ҳазар қил, то фириб бермагайсан.

ЙИГИРМА УЧИНЧИ БОБ

АСИР СОТФУН ОЛМОҚНИ(НГ) ЗИКРИДА³

Эй фарзанд, агар асир сотфун олмоқ (қул сотиб олмоқ) тиласанг, ҳушёр бўлғилким, одам сотфун олмоқ бағоят душвор илмдур. Чунки қўп бандалар бўлурким кўзга қўп яхши кўринур, аммо ақл кўзи билан боқсанг акси зоҳир бўлур. Аксар ха-

¹ Залил – хор, тубан.

² Вобаста – бир-бирига боғлиқ.

³ Ушбу боб Оғаҳий таржимасида тўлиқ бўлмагани учун форс тилидаги Техрон нашри билан Е.Э.Вертельс таржимаси асосида тўлдирилди. (У.Д.)

лойиқ фикр қилурларким қул сотиб олмоқ осон ишдир, аммо кўп мушкулдур ва анча кўп донолиғ керақдур. Нединким, ҳар киши билмаган матони сотиб олди, билғилки, ўзига албатта зарар қилур ва барча нимарсадин одамзотни(нг) айби ҳазин билмак мушкулдур. Чунки одамнинг иллати ҳам, фазилати ҳам кўп бўлур. Баъзан одамнинг бир айбини унинг юз минг фазилати, бир фазилати юз минг иллатини яширур. Одамни фаросат ва тажрибият илми била таниб бўлур. Нединким, бу фаросат илмидинким, одамзотни пайғамбар ва пайғамбар юборгандин ўзга зот билмагусидур. Сен билғилким, банда сотғун бўлмоқда уч шарт бордур. Аввал анинг зоҳир¹ ботинидаги² айб ва ҳазин фаросат била билмак ва иккинчи ташқи белгиларига қараб, анинг пинҳон ва ошкор иллатларин билмак ва учинчи, ҳар қайси жинснинг наслини, нуқсон ва қадрини идрок қилмак. Аммо аввалги шарт улдурким, ҳар вақт банда сотғун олсанг, яхши билғилким, бандаларнинг харидори икки турлик бўлур: бири юзига қарап, тан ва атрофига қарамас. Бири тан ва атрофига қарап, юзига қарамас. Аммо ҳар киши қул олса, бурун-оғзига эҳтиёт била назар қилмоқ, андин сўнг оёқларига ва ўзга аъзоларига назар қилмоқ керакдур. Баъзилар нозик ва бежирим қулни, баъзилар тўла ва гўштдор қулни ёқтирадилар. Лекин шуни билғилки, қулга кўзи тушган одам, биринчи навбатда, унинг юзига қарайди, кейин унинг гавдасига эътибор беради. Чунки ҳамма вақт юз биринчи кўзга ташланади, танаси эътибордан четроқда бўлади. Шунинг учун ҳам қулнинг чиройлилигини танламоқ маъқул, чунки сенинг

¹ Зоҳир – ташқи кўриниши.

² Ботин – руҳий, ичкӣ олам.

ўзинг ҳам у билан мулоқотда бўлурсан. Қул танлашда, биринчидан, унинг кўзи ва қошига аҳамият бер, кейин бурнига, лабига ва тишига, кейин эса сочиға қара. Чунки парвардигори олам гўзалликни одамларнинг кўзига ва қошига, нағисликни бурнига, шириналликни лаб ва тишлирга, нозикликни юзига жо қилган, буларнинг ҳаммасини гўзал қилиш учун сочни вужудга келтирмиш. Сочни одамнинг кўрки учун яратди. Агар икки кўзи ва қоши гўзал, бурни нағис, лаб ва тишлири ширин, юзи тоза бўлса, бу қулни албатта сотиб ол, қолгандари ҳақида ўйлама. Айниқса, унинг назокатлилигига аҳамият бер, назокат чиройдин юқори турадур. Иккинчи, айтадиларким, қул маълум хизмат учун сотиб олинади. Шунинг учун мўлжалланган ишга муносиб белгиларига эътибор бер. Ўз тинчинг, мулоқотинг учун олаётган қулинг бўй-басти ўртача, юмшоқ этли, майин терили, текис суюкли, жигарранг ёки қора ўсиқ қошли, қора кўзли, қирра буруни, хипча белли, юмaloқ энгакли, қизил лабли, текис оппоқ тишли, тани мен айтгандек бўлсин. Бундай қул муносабатда чиройли ва ёқимлидир, хушфеъли, содиқ, зукко ва очиқ чеҳралидир.

Ақдли ва омадли қул аломатлари – қоматли, мўътадил сочли ва этли, оқ-қизил кенг кафтли, бармоқ оралари сербар, кенг пешонали, кулгига мойил, очиқ чеҳрали ва тўқ қулранг кўзли бўлур. Бундай қул илм ўрганишга қодир, китобат, хазина каби хўжалик ишларига мойил ва ишончли одам бўлур.

Мусиқага яроқли қул майин этли, озгин, ингичка бармоқли бўлур. Сергўшт юзли қулдан эҳтиёт бўл, у ҳеч нарсага ўргана олмайди. У юмшоқ кафтли, оралари кенг очиқ бармоқли, очиқ чеҳрали, майин терили бўлур, соchlари жуда узун ҳам эмас, жуда калта ҳам эмас, жуда ҳам қизил,

жуда ҳам қора әмас, күzlари түқ кулранг, оёқ кафти текис бўлади. Бундай қул ҳар қандай нафис ишни, айниқса, мусиқани тез ўрганади.

Ҳарбий ишга лаёқатли қул аломатлари – дагал сочли, қадди-қомати келишган, чидамли, қаттиқ этли, бақувват бармоқли, мустаҳкам суякли, тери ва тан аъзолари дагал, тортилган томирлари билан бўғимлари мустаҳкам, бўртиб чиққан пайлари танасида кўриниб турар, кенг кафтли, кенг кўкракли, кенг елкали ва бўйни бақувват бўлур. Агар кал бўлса, янада яхшироқ. Албатта, қорни ботиқ, думбаси ихчам, улар ўртасида мустаҳкам пай бўлиши, юрганда болдиrlари кўтарилиб туриши керак. Юзи хўмрайган, кўзи қора бўлиши керак. Бундай хусусиятларга эга қул омадли, жасоратли сипоҳ бўлур.

Аёллар хос саройини қўриқловчи қул белгилари – қора танли, аччиқ қиёфали, қўпол терили, қотма, заиф овозли, ориқ оёқди, қалин лабли, япалоқ бурунли, калта бармоқли, букчайган, ориқ бўйинли бўлур. Бундай қул аёллар хос саройида хизмат қилишга қодирдир. Бу хизматга оқ ёки қизгиш танли ярамайди. Айниқса, сочи олдинга тушган малла сочлидан эҳтиёт бўл, агар унинг кўзида хуморлик, рутбуат бўлса, бундай қулни бу ишга яқинлаштирма. Нединким, бундай одамлар аёлни яхши кўрадилар ёки қўшмачилик билан машғул бўладилар.

Итларга ва отларга қарайдиган қулнинг белгилари будур – чақчайган кўзли, қалин қошли, қовоқлари йўғон ва қизил, кўк кўзли, кўз оқида қизил нуқталари бўлур, лаб ва тишлари чўзиқ бўлур, оғзи катта бўлур. Бундай қул анча орсиз, сурбет, қўрс, жаҳддор бўлур ва ҳамиша жанжал қидирар.

Фаррошлик ва ошпазликка ярайдиган қулнинг сифатлари будур – унинг юзи, тани покиза

бўлсин, юзи думалоқ, қўл-оёқлари нозик, кўзлари тўқ кулранг, бўйи баланд, камгап, соchlари тўқ малла бўлсин.

Учинчи шарти шулким, сен белгиларига қараб, қулнинг зоҳирий ва ботиний касалликларидан воқиф бўлғил. Қул сотиб олишда зийрак бўл. Нединким, бир кўришда жуда маъқул кўринган қул ярамас бўлиши ёки аксингча, ярамас бўлиб кўрингани яхши бўлиши мумкин. Бундан ташқари, одамнинг юзи, ташқи кўриниши ҳамма вақт ҳам табиий бўлавермайди: баъзан гўзалликка, баъзан хунуқликка мойил бўлади. Сен унинг та-насин ҳамма аъзоларини эътибор билан кузат. Кўп ҳолларда пинҳона, кўзга ташланмаган ва бир неча кундан кейин юзага чиқадиган хасталик-нинг аломатлари бўлур. Агар юзи бир оз сарфиш, лаблари оқарган ва кўзлари нурсиз бўлса, у бавосил¹ касалига, агар кўз қовоқдарида шиш бўлса, истисқо² касалига мубтало бўлгандир. Кўзларидаги қизиллик, пешонасидағи томирларнинг шишиб чиқиши тутқаноқ (қуёнчик) хасталиги аломатидир. Киприкларининг оҳиста ҳаракати, лабнинг учиши дилгирлик аломатидир. Бурун суюгининг қийшиқдиги бурун қон кетиши ва чипқон аломатидир. Сочнинг ўта қоралиги, қаттиқдиги, қалинлиги, ора-сира қоралиги – сочнинг бўялганлигини билдиради. Тананинг баъзи жойларига ўринсиз тамфа, белги қўйилган бўлса, диққат билан қара, бу тамфалар тагида мохов аломатлари йўқми? Лабнинг оқарганлиги, кўзнинг сарғайиши сариқ касал аломатидир.

Қул сотиб олаётганда уни ётқизиб, икки биқинини пайпасла, яхши эътибор бер, бирор ери оғри-

¹ Бавосил – геморрой.

² Истисқо – аъзо бўшлиқларига сув тўпланиши касаллиги.

маяптими, хавфли саратон¹ йўқми, жигар ёки талоқ хасталиклари аломатлари йўқми. Яширин хасталик белгилари билан бирга, очиқ белгилари-га: оғиз-бурун, чипқон бадбўйига, қулоқ оғирлиги-га, дудуқдигига, қадам ташлашига, милкларининг тўғри ва мустаҳкамлигига ҳам эътибор бер.

Менинг ўтитларимни қулоғингга ол. Қулни ҳалол одамдин ол, бундай қул уйингда ҳам ҳалол бўлур. Форсийда гапира оладиган ажнабий қулдин кўра гапира олмайдиган ажнабий қулни ол, нединким гапира олмайдиганни ўз хоҳишингга солишинг мумкин, гапира оладиган қулни ўз хоҳишингга солишинг мушкулдир.

Сенда кучли иштиёқ уйғотган куни дарров сотиб олма, аввал бу иштиёқни пасайтири, чунки эҳтирос таъсирида қулнинг ножӯя қилиқлари ҳам чиройли кўриниши мумкин. Бошқа хонадонда арзанда бўлган қулни олма: уни эркаламасанг, қочиб кетади ёки бошқага сотиб юборишингни истаб қолади, ё сени ёмон кўриб қолади. Агар уни эркаламасанг, сендан миннатдор бўлмайди, чунки у бошқа жойда ҳам бундай эркалашни кўрган. Аввалги хонадонда ёмон муносабатда бўлган қулни ол, агар сен у билан озгина яхши муомалада бўлсанг, сендин миннатдор бўлади.

Маълум муддатда қулларга бирор нарса тортиқ қилиб тур, уларнинг ҳамма вақт пулга муҳтоҷ бўлишига йўл қўйма. Пулга муҳтоҷ бўлган қул пул топиш йўлига ўтади. Қимматбаҳо қулларни олгин, чунки ҳар қандай нарсанинг қадр-қиммати пулига яраша бўлур. Хўжайини кўп бўлган қулни олма, эри кўп бўлган аёл каби хўжайини кўп бўлган қулдан яхшилик кам бўлур.

¹ Саратон – рак, ўсма

Агар қул ҳақиқатан ҳам сотилишини хоҳлаб қолса, тортишиб ўтирма, сотиб юбор. Ажралишни истаган аёлнинг ҳам, сотилишни истаган қулнинг ҳам баҳридин ўтғил, акс ҳолда унисидин ҳам, бунисидин ҳам кўнглинг тўлмайди. Агар қул атайин ялқовлик қиласа, агар қасддан ножўя иш қиласа, уни чаққонликка ўргатишга овора бўлма, у ҳеч қачон этчил, чаққон бўлмайди. Бундай қулни тезроқ сотиб кутул, негаки ухлаётган одамни бир хитоб билан уйғотиш мумкин, аммо дангасани карнай билан ҳам, дўмбира билан ҳам уйғота олмайсан.

Ўз атрофингда бекорчи нонхўрларни кўпайтирма, чунки кичикроқ оила ҳам – бойлик. Қарроллар билан шундай муомалада бўлғилки, улар сендин қочиши масин, уларни яхши асра, чунки икки ялқовни асрагандин кўра бир андишали кишини асраш маъқулдир.

Билғилки, уйингдаги қуллар ака-ука тутинмасин, асиralар ўзларини уларнинг синглиси деб билмасинлар, кўп мушкул фалокатлар шу туфайли содир бўлади. Итоаткор бўлишлари учун қулларга ҳам, бошқа хизматкорларга ҳам қудратига яраша юкни мутаносиб бўлиб берғил. Ўзинг ҳимматлилар орасида ҳимматли, адолатли бўл. Қул ўзининг хўжайинини ofa, опа, она, ота ўрнида кўриши керак. Агар қул кўплаб қулфурушларни кўрган бўлса, уни сотиб олма, қул қулфурушдин қаттиқ қўрқиши керак. Агар қул ҳар хил арзимаган иш учун ўзини сотиб юборишларини хоҳласа, ўзининг сотилишидин ва сотиб олинишидин қўрқмаса, унга меҳр қўйма, ундин манфаат йўқ, бошқасига алмаштири. Мен айтгандек йўл тутсанг, тилагингга эришасан.

ЙИГИРМА ТҮРТИНЧИ БОБ

УЙ ВА ЕР СОТИБ ОЛМОҚ ЗИКРИДА¹

Билғил ва шоҳид бўлғилки, эй фарзанд, агар сен ер, уй сотиб олмоқ истасанг ва уни сотмоқ истамасанг, қонунга итоат эт. Сотиб олмоқ бўлсанг, қадодлик вақтида сотиб ол, сотмоқчи бўлсанг, талаб қилинган вақтда сот, фойда қидир, бундин уялма, демишиларки, бирон нарсани сотиб олмоқчи бўлсанг, усталик қил. Савдолашувни қўлдин берма, чунки савдолашув ва сўраш – ярим савдодур.

Бир нарса сотиб олар бўлсанг, зарар била фойдаси бир хилда бўлсин. Хонавайрон бўлмоқни тиламасанг даромад устидин харажат қилма. Агар сармояга зарар етказишни истамасанг, зарар келтирувчи фойдадин сақлан. Мўл-кўлчиликка эга бўлмоқни, қашшоқ бўлмасликни, бировга тобеъ ва очкўз бўлмасликни тиласанг, ҳар ишда сабр қил. Сабр қилмоқ оқилларнинг ишидур. Ҳар қандай ишда ўз фойдангга бепарво бўлма, нединким бепарволик ҳам аҳмоқликдур... Шошиш била ҳар бир иш раво бўлмас.

Агар уй сотиб олмоқчи бўлсанг, тўғри одамлар яшайдирғон кўчадин сотиб олғил, шаҳар атрофидин, девор тагидаги уйлардин сотиб олмағил. Арzon бўлур деб бузуқ уй сотиб олмағил. Уй олмоқчи бўлсанг аввал қўшнини кўр, араблар аввал қўшни, кейин уй, деганлар.

Донишманд Абузуржмеҳр дейди: «Тўрт нарса оғир фалокатдур: биринчиси – ёмон қўшни; иккинчиси – катта оила; учинчиси – жиззаки хотин; тўртинчиси – муҳтоҷлик».

¹ Бу бобнинг бош қисми Оғаҳий таржимасида йўқ, форсча қўлёзмадан таржима қилинди. (С.Д.)

...Шундай бир күчадан уй сотиб олғинки.., қўшнинг инсофли одам бўлсин. Уй сотиб олғонингда қўшни ҳурмат қил, унинг ҳақ-ҳуқуқига риоя қил, чунки шундай дейдилар: қўшни ҳаммадин ҳам катта ҳуқуқча эга.

Ўз кўчангдаги ва маҳаллангдаги одамлар била яхши яша, касалларни бориб кўр ва ҳол-аҳволларини сўра, кимга таъзия билдириш зарур бўлса, таъзия билдириш, маъракада иштирок эт. Қўшнининг ҳар бир ишига ёрдам бер. Агар қўшни шод-хуррам бўлса, шодлигига шерик бўл. Мумкин қадар таом ёки кийим-бошдин совғалар юбор, чунки сен шу кўчада энг ҳурматли кишилардан бўлғи¹.

Ҳамсоянинг ёш ўғлонларини кўрсанг, ўпид қуҷоғингга олиб навозиш² кўргузғи, кўчанинг қариларини кўрсанг иззат ва ҳурмат расмин бажо келтур. Ҳар киши бир кишига бир ишни қиласа, ул киши ҳам унга шул ишни қилур ва киши ҳар неча яхшилик ё ёмонлик кўрса, ўз феълидин кўрар. Демак, номуносиб ишни қилмаги ва нолойиқ сўзни айтмағилким, ҳар ким қилинмайдурғон ишни қиласа, айтилмайдурғон сўзни айтса, бошқадин қайтур ва бирордин шундоғ сўзни эшитур.

Ватан қилмоқ тиласонг улуғ шаҳарлардин ватан қилғилки, сенинг беҳбудинг³ унладур. Уй олсанг шундоқ уй олғилки, томи ўзгаларнинг томидин баландроқ бўлсун, то халойиқ сени кўрмасунлар ва сен ҳам халойиқни кўрмагайсан.

Агар ер ва боф олсанг, мададсиз⁴ ва ҳамсоясиз ердин олмағи ва товонлиғ ерга рағбат қилмағи. Ҳар қандай ер олсанг, айбисиз ва шубҳасиз ерни олғайсан ва айблиғ, шубҳалиғ ер олмағи. Ер ол-

¹ Шу ўриндан Огаҳий таржимаси бошланади.

² Навозиш – яхшилик қилиш, сийлаш.

³ Беҳбуд – яхшилик, фойда, нажот.

⁴ Мададсиз – кўмаксиз.

санг, иморат солмоқقا машфул бўлғил ва ҳар кун янги-янги иморатлар қилғил то ҳамма вақт уни янги ва хуррам кўргайсан. Ҳаргиз ер ва боғнинг иморатидин қўл тортмаликни, ерга ҳар қанча хизмат қиласанг азиз бўлур ва ҳосил берур. Агар хизмат қилмасанг, ер юзи сенинг еринг бўлса ҳам ҳеч фойдаси йўқдур, балки заарардур.

ЙИГИРМА БЕШИНЧИ БОБ

ЧАҲОРПОЙ (ОТ) СОТИБ ОЛМОҚНИНГ ЗИКРИДА

Эй фарзанд, агар от олмоқ тиласанг ҳушёр бўл, то хато қилмағайсанки, от била одамнинг зоти бирдек бўлур: яхши от ва яхши одамга ҳар нечук оғир қўйсанг кўтарур. Агар ёмон от ва ёмон одамни ҳар нечаким ёмон десанг ҳануз оздур. Дошишлар дебдурларки, жаҳон одам била барподур ва одамлар ҳайвонлар била барподур. Ҳайвонот жумласининг яхшироғи оттур. Уни азиз тутмоқ ҳам кадхудоликдур ва ҳам мурувватдандур. Масалда айтурларки, отни ва либосни яхши тутғил, токи от ва либос ҳам сени яхши тутғай.

Отнинг яхши ва ёмонин билмоқ одамларнинг яхши ва ёмонин билмакдин мушкулдур, нединким одам сўзлайдур ва унинг қандайлигин сўзининг маъносидин билса бўлур. От сўзламас ва унинг давоси дийдоридур. Аввал отнинг дийдорига қарагил, дийдориға назар этғон киши хато қилмайдур, нединки яхши отнинг дийдори яхши бўлур ва ёмоннинг сурати ёмон бўлур.

Яхши кўркам отга астон байтара дерлар. Унинг тиши нозик, пайваста туташган ва оқ бўлғай. Пастки лаби узунроқ, бурни баландроқ ва

кенг, манглайи кенг, чеккаси очиқ, қулоғи узун ва қулоқларининг ораси очиқ, бўйни тўғри, бўй-нининг туби йўғон, орқаси баланд, бўғини қисқа, сийнаси кенг, қўл-аёғининг ораси очиқ, қуйруғи қаттиқ ва узун, қуйруғининг турраси¹ нозик ва қисқа, кўз киприклари қора бўлур. Йўл юрғонда ҳушёрдур ва орқаси қисқа, қуйруғи ўсуқ, сагриси кенг, икки сонининг ораси гўшт била тўлиқ ва бир-бираға ёпишгон бўлғай. Шунинг учун минғон киши ҳаракат қиласа, унинг ҳаракатидин огоҳ бўлғай. Бу аломатларни баён қилдим. Агар бу аломатлар ҳар бир отда бўлса яхши бўлур.

Яна ҳар рангнинг бир нав ҳунари бўлур. Энг яхши рангли от тўриқ ва хурмо ранг бўлур. Ул иссиқ ва совуққа бардошли бўлур. Аммо хурмо ранг от, яъни жийрон от заиф бўлур. Агар гўшти, сонларининг ораси, қўл-аёғи, туёғи, лабининг ости, манглайи ва қуйруғи қора бўлса, кўп яхши бўлур. Саман от, яъни сариқ қизилга мойил от бағоят яхши бўлур. Агар саман отнинг юзида нуқта-нуқта қораси бўлса, манглайи, гўшти, сонининг ораси, кўзи, лаби қора бўлса, ул энг яхши саман от саналғай. Гулгун тусли, яъни у бир рангда бўлса ва аблак² асари бўлмаса ва адҳам³, яъни тим қора бўлса, кўзи қизил бўлмаса, ул ҳам яхшидур. Нединким, аксари қизил кўзли от девона ва айбдор бўлур. Бўз отнинг яхшиси кам бўлур. Кўк рангдаги от кўпинча бадфеъл бўлур. Хусусан, кўзининг кети, туёғи оқ бўлса, бадхулқ бўлур. Кулранг туслик отнинг аёғлари оқ бўлса, яхши от бўлур. Аблак от ёмон бўлур ва унинг яхши қилиқлари кам бўлур.

¹ Турраси – кокили.

² Аблак – ола-була.

³ Адҳам – қора тўриқ от.

Мана, сен отларнинг фазилатларин билдинг, энди айбларин ҳам билғил. Отларнинг бир неча турлик айблари бўлур: ҳар айбники ишга зиёни бўлса, кўргувчига ҳам зиёни бўлфай. Яна шундай ҳам от бўлурки, ўзи шум бўлур ва эгасин ўлдиратургон бўлур. Бундай от ўзининг шу айби била бадхўй бўлур.

Ҳар айб, иллатнинг бир оти бордур. Отнинг ёмонин шул айб ва иллат била билса бўлур. Буларнинг аломатларин айтурман. Билғилки, отнинг нуқсонларидин бири – гунглик. Гунг от йўлдин чиқиб, йўлин йўқотур. Бирор шарпадин ҳуркса, уни тўхтатиб бўлмас. Аъмо от, яъни шабкўр от янада ёмон бўлур. У ўзга отлар ҳурккан нарсадин ҳуркмас ва ҳар жойга сурсанг борур, парҳез қилас мас ва сени сақламас. Кар от ҳам ёмон бўлур. Бунингдек отнинг аломати улким, ўзга отлар овоз берса, ул жавоб бермас ва ҳамиша қулоғи пастга осилғон бўлур. Чап от ҳам ёмон бўлур, кўп хато қилур. Бул отнинг аломати улки, уни бир уйга бурсанг, аввал чап аёғин бўсағадин ичкари қўяр.

Шилпиқ қўзли, яъни шабкўр от кундузи кўр бўлур. Бу отнинг аломати улки, кўзи кўк ўтга мояил бўлур. Ҳамиша қўзини очиқ тутар ва кипригини тебратмас. Айби бир кўзда бўлур, баъзи отнинг икки кўзида ҳам бўлур. Аҳвал, яъни филай отнинг айби сиртида бўлур, лекин араблар ва форслар бунингдек отга муборак деб қараплар. Шундоқ эшишибманким, Дулдул аҳвал эрди. Аржал ва аҳим от, яъни аёғи оқ шум бўлур, агар чап қўли окроқ бўлса, шумроқ бўлур. Кўк отнинг икки кўзи кўк бўлса, яхши бўлур. Аммо агар бир кўзи кўк бўлса, хусусан, чап кўзи кўк бўлса, ёмон бўлур. Мурғаб от, яъни кўзи қаро от ёмон бўлур. Бура от ёки қўнғир от ҳам ёмон бўлур. Аҳвар от, яъни икки аёғи қий-

шиқ от ёмон бўлур. Форслар уни «камон пой» дерлар – ул кўпинча йиқилур. Қойиф от, яъни кокилининг устида тик мўй бўлғон от шум бўлур. Мақҳуъ от, яъни қўлтифининг остида тик мўй бўлғон от ҳам шум бўлур ва агар икки аёғи оқ бўлса, яна-да шумроқ бўлур. Асдаф от, яъни туёғи кичик от ҳам шум бўлур, уни ахнаф от ҳам дерлар. Отнинг қўл ва аёғи узун бўлса, ёмон бўлур, бунингдек отни афрақ дерлар.

Аъзал от, яъни қўйруғи эгри от ҳам ёмон бўлур, уни аканаф ҳам дерлар... Ит қўйруқлик от ҳам ёмон бўлур. Афҳаж от ҳам ёмон бўлур, чунки у аёғларини қўлининг ўрнига қўя олмас. Асбақ от ҳам ёмон бўлур, чунки у ҳамиша чўлоқ бўлур, не-динким суюкларининг бўғинларида шиш бўлур.

Аруи от ҳам ёмон бўлур, чунки қўл бўғинларида суюқ бўлур. Бул суюқ аёғларининг бўғинида бўлса, акраи дерлар. Бундай от ниҳоятда ёмондур ва ул саркашлик қилур ва миндирфони қўймас.

Шамс от кўп кишиновчи ва тишлоғич бўлур, заррот от тепағон бўлур, бошин кўп кўтарғон от ҳам ёмон бўлур. Қарға кўз от ҳам ёмон бўлур.

Ҳикоят. Андоқким эшитибман, Аҳмад Фаригуннинг чўпони Наврўз куни Аҳмаднинг олдига келиб деди: «Мен наврўзлик келтира олмадим, аммо наврўзликдин яхшироқ бир хушхабар келтирдим». Аҳмад деди: «Айтғил!» Чўпон деди: «Ўтғон кеча сизнинг йилқиларингиз минг нафар зоф кўзлик той тугди». Аҳмад уни юз таёқ уруб деди: «Бу нечук хушхабардурки, менинг минг тойим шабкўр бўлғай!»

Эй фарзанд, буларни билғондин сўнг отларнинг иллатларидин огоҳ бўлғилким, ҳар бирининг бир оти бордур... Мен бу иллатларни қисқача зикр қилдим. Агар бу воқеаларни мукаммал

баён қылсам, сўз чўзилур. Бу деганларимнинг барчаси отнинг айбидур. Аммо қарилик барчасидин ёмонроқ айбдур. Ҳар айбга илож қылса бўлур, лекин қариликка илож қилиб бўлмас.

От минмак тиласанг, хурмо ранг катта отни мингил, нединким агар кишининг сурати ҳар қанча салобатлиғ бўлса ҳам кичик от минса ҳақир кўри нур. Билфилки, отнинг чап тарафининг қовургаси ўнг тарафининг қовургасидин ортиқ бўлур, санаб кўргил, агар ҳар отнинг икки тарафи баробар бўлса, унда чап томонининг қобургаси зиёдроқ бўлғон отни олғилки, у айбсиз ва югурак бўлур, ундин ҳеч от ўтолмас. Чаҳорпой, ер, боф ва бошқа нарсалар олишни истасанг, шундай нарсаларни олғилки, у тириклиқда сенга фойда келтурсинг, сендин сўнг ворисларингга яна ҳам фойда берсун ва сенинг аҳди аёлларинг ҳам манфаат топсунлар.

ӢИГИРМА ОЛТИНЧИ БОБ

ХОТИН ОЛМОҚ ЗИКРИДА

Эй фарзанд, агар хотин олиш тиласанг, ўз ҳурматингни яхши сақлағил. Гарчи мол азиз бўлса ҳам хотин ва фарзандингдин дариф тутмағил. Аммо хотинни покдил, фарзандни фармонбардор ва меҳрибон тутғил, бу иш сенинг қўлингдадур.

Хотин талаб қылсанг, хотиннинг молини талаб қилмағил. Нихоятда хушрўй хотин олмағилки, уни маъшуқ тутарлар. Хотин пок ниҳод¹ ва пок дил бўлсун: кадбону² эрига дўст бўлғай. Ҳаёлиғ, тақводор, тили қисқа, молни яхши сақлағувчи бўлсун. Дебдурларки, яхши хотин эрнинг ва умрнинг роҳати бўлур.

¹ Пок ниҳод – тоза табиат.

² Кадбону – уй бекаси, ишchan хотин.

Агар хотининг хўбрўй, меҳрибон ва мақбул бўлса ҳам ихтиёрингни буткул унга бермағил ва унинг ҳукми остига кирмағил. Нединким, Искандарга дебдурлар: «Доронинг қизин нима учун олиб хотин қилмассан, бағоят хушрўйдур». Искандар деди: «Жаҳон ҳалқига голибман, энди бир хотинга мағлуб бўлсам, кўп ёмон кўринур». Бас, ўзингдин муҳташамроқ хотинни олмағил, қиз топилса, эридин қолгон хотинни талаб қилмағил. Нединким, унинг (қиз боланинг) кўнглида сенинг меҳрингдин ўзга кишининг меҳри бўлмағай, ҳамма киши бирдек бўлғай деб гумон этгай ва ўзга кишидин тами қилмағай.

Аммо дўст бўлмағон ва қадбону бўлмағон хотиндин қочғил, нединким дебдурлар: «Қадбону бўлмағон тезроқ банд бўлур, аммо ул масобада¹ эрмак. Бунингдек хотин сенинг молингни қўлингдин олиб, сўнгра сени унга молик бўлурға қўймағай, ундин сўнг сен унинг хотини бўлурсан, лекин ул сенга хотин бўлмас».

Хотин олсанг улуғ салоҳдиф² хонадондин хотин талаб қилағил. Ҳар турлук авбошнинг қизин олмағил, нединким хотинни уйнинг қадбонулиги учун олурлар, шаҳват учун олмаслар.

Хотин камолга етғон, оқила бўлғон, онасининг қадбонулигин, отасининг қадхудолигин кўргон ва билғон бўлсун. Агар бундоқ нозанин қўлингга тушса, уни асло қўлдин чиқармағил ва жаҳд қилиб уни олғил...

Агар сен хотинингга рашқлик қилмасанг, у сенга самимият била муносабатда бўлур. У сенга отонанг ва фарзандингдин ҳам мушфикроқ бўлур ва сенга ундин дўстроқ киши топилмас. Агар унга

¹ Масоба – дараҷа, ҳолат.

² Салоҳ – яхшилиқ.

файрат¹ кўргузсанг, сенга минг душмандин душманроқ бўлур ва бегона душмандин ҳазар қиласа бўлур, лекин ундин ҳазар қилиб бўлмас.

Агар қиз олсанг, уни ҳар қанча яхши кўрсанг ҳам ҳар кеча унинг била ётмағил, ул барчанинг одати ушбуудур деб хаёл этар, агар бир вақт сенинг узринг бўлса, ул хотин сенсиз сабр қилур. Агар ҳар кеча унинг била ётмоқни одат қиласанг, ул сенсиз ўзгани орзу қиласар ва сабр қилмоқ душвор бўлур.

Файрат мардин² бажо келтурғил. Бегайрат кишини киши демагил. Ҳар кишида файрат бўлмаса, дини ҳам бўлмагусидир. Хотинни айтғонимдек тутғондин сўнг, агар Худойи Таоло сенга фарзанд берса, унинг парвариши фикрида бўлғил.

ЙИГИРМА ЕТТИНЧИ БОБ

ФАРЗАНД ПАРВАРИШ ҚИЛМОҚ ЗИКРИДА

Эй фарзанд, агар фарзандинг бўлса, анга яхши от қўйғил, нединким, отадин фарзанд ҳақларидин бири унга яхши от қўймоқдур. Яна бири улдурким, фарзандни оқил ва меҳрибон дояларга топшурғайсан. Суннат қилур вақтида суннат қилгайсан, қудратингга лойик тўй ва томоша қилгайсан ҳамда ўқишини ўргатгайсан. Улуғроқ бўлғондин сўнг, агар раият³ бўлсанг, унга ҳунар ва қасб ўргатгайсан, агар сипоҳ аҳлидин⁴ бўлсанг, сипоҳ илмин ўргатгайсан. Буларни билғондин сўнг шиноварлик, яъни сувда юзмакни ўргатғил. Андоқким, мен ўн ёшимда эрконда менинг бир ҳожибим бор эрди,

¹ Файрат – рашк, қизғаниш.

² Мардин – ҳақиқий рашк.

³ Раият – тобе халқ.

⁴ Сипоҳ аҳли – ҳарбий кишилар.

уига Манзар соҳиб дер эрдилар. Ул от минмак илмин яхши билур эрди ва Райҳон отлиқ бир ходимим бор эрди. Отам мени ул икковига топширди, токи улар менга отда юрмоқ, найза урмоқ, завбин отмоқ, чавгон урмоқ, каманд ташламоқ илмин ўргатгайлар. Мен уларнинг ёнида юриб, бир оз фурсатда от устида юришнинг барча илмин ўргандим ва ҳунарларини билдим. Ундин сўнг Манзар соҳиб ва Райҳон ходим мени отамнинг одига олиб бориб дедилар: «Эй амир, агар рухсат берсангиз эрта тонгда сахрода фарзандингиз амирзода ўйнаса, сиз унинг барча ўрганғон ишларин кўрсангиз». Амир «Кўп яхши бўлур!» деди. Мен иккинчи кун ҳар на билғон илмим ва ҳунаримни отамга намойиш қилдим, отам ҳожиб ва ходимга яхши хилъатлар инъом қилди. Ундин сўнг уларга деди: «Фарзандимга ўргатғон ишларингизни барчасин яхши билибдур, ҳунарларнинг яхшисин ўргатмишисизлар, лекин яна бир зарур ҳунар қолибдур». Улар дедилар: «Ул на ҳунардур?». Отам деди: «Бу ўргатғон ҳунарларингизни зарур вақтда фарзандим учун бошқалар ҳам қила олур, лекин унинг ўзи қиладурғон, унинг учун бошқалар қила олмайтурғон ҳунар қолибдур». Улар: «Ул қайси ҳунар?» дедилар. Амир: «Сувда юзмақдурким, бундай ишни фарзандим учун ҳамма одамлар қила олмас», – деди. Шундин кейин иккиmallоҳни, яъни икки кемачини келтуриб, мени уларга топширди. Ўлар менга юзмак ҳунарин ўргатдилар. Мен каробит¹ била ул ишга машгул бўлдим ва яхши ўргандим. Бир вақт бир неча киши била кемага кириб (ўтириб), Дажла дарёсидин ўтар бўлдик. Тоғгира отлиғ жойда гирдоб бор эрди ва хавфлиғ жой эрди. Устод кемачилар ундин кўп машиқатлар била ўтар эрдилар. Биз кема била ўша

¹ Каробит – хуррам-нохуррамлик билан.

жойга етушдик. Аммо кемачи уста эрмас ва кемани нечук сурарини билмади. Алқисса, йигирма етти чоғлиқ киши барча бирдан гарқ бўлдик. Аммо мен ва бир киши, яъни менинг фуломим, уни зийрак Кайковус дер эрдилар, сузуб чиқдик. Бу воқеадин сўнг отамнинг меҳри кўнглумда беҳад зиёда бўлди, садақалар бердим ва кўп дуолар қилдим. Мен отамнинг бошига ҳам шундан иш тушғонин билмас эрдим. Шунинг учун менга юзмак ҳунарин ўргатғон эркан.

Бас, керакдурким, ҳар турлик фазл ва ҳунарни фарзандингга ўргатгайсан, то оталик шафқати шартин бажо келтурмиш бўлгайсан. Киши бошига на иш тушарин билмағусидур, фазл ва ҳунар ишга яратгусидур.

Демак, фарзандингга ҳунар ва фазл ўргатмакда тақсир қилмағил ва ҳар илмни ўргатувчи муаллимлар таълим учун урсалар, сен шафқат кўргузғил, майли урсунлар, нединким ёш ўғлон илм ва адабни таёқ била ўрганур ва ўз ихтиёри била ўрганмас. Аммо фарзанд беадаб бўлса ва сенинг ул сабабдин қаҳринг келса, ўз қўлинг била урмағил, муаллимларнинг таёғи била қўрқутғил. Болаларга муаллимлар адаб берсунлар, токи сендин ўғлингнинг кўнглида гина қолмасин. Аммо унинг кўзига ўзингни ҳайбатлиғ кўргузғил, то сени хор тутмасин ва ҳамиша сендин қўрқиб юрсин. У бир нарсани орзу қилса, қудратинг етгунча ундин аямағил, то танга ҳаваси била сенинг ўлимингни тиламасин.

Фарзандга адаб, ҳунар ўргатмакни мерос деб билғил. Агар сен хоҳ унга адаб ўргатғил, хоҳ ўргатмағил турмуш машаққатларининг ўзи унга ўргатур. Ундоқким дебдуrlар, ота-она тарбияламаса, кеча ва кундуз уни тарбиялайдур.

Оталиқ шартин бажо келтурғилки, фарзандинг вужудга келғондагидек тириклик қылсın, яғни ҳар одамки вужудга келур ва шу кундин эътиборан хулқи ва табиати унга ҳамроҳ бўлур, аммо ул ожизлик ва бекувватликдин уни намоён қила олмағусидур. Катта бўлғон сайин жисми ва руҳи қувват топар ва барча руҳи¹ ривожланадур, камолга етғондин сўнг тамоми яхшилик ва ёмонлигини зоҳир қилур. Лекин сен адаб, ҳунар ва донишни фарзандингга ўзингдин мерос қилғил, токи унинг ҳаққин бажо келтурмуш бўлгайсан. Чунки хос кишиларнинг фарзандларига адаб ва ҳунардин яхшироқ мерос йўқтур ва омий хало-йиқнинг фарзандларига ҳирфа², пеша³дин яхшироқ мерос йўқдур. Пеша қилмоқ (ўрганмоқ) муҳташамларнинг фарзандларига номуносиб кўринур. Аммо пеша ҳақиқатда барча ҳунарларнинг улуғидур. Агар хос одамларнинг фарзанди юз ҳунар билса ва лекин ҳеч касбни қилмаса, айб эрмасдур. Ҳунар эса бир кун ишга ярагусидур.

Ҳикоят. Гиштосб^{25*} ўзининг мулки ва салтанатидин жудо бўлди. Унинг қиссаси бафоят узоқдур. Салтанатидин жудо бўлғондин сўнг Рум^{26*} шаҳарларидин Кустантана^{27*} шаҳрига борди. Ёнида бир танга йўқ эрди, кишилардин бир танга ҳам тилай олмади. Аммо ундоқ эрдиким, ёшлиқда бир темирчининг фарзандин кўрмиш эрдики, ул ҳунар ўрганиб, отаси била пичоқлар ва қиличлар тузатур эрди. Гиштосбнинг толеъига ушбу ҳунар эсига тушмиш. Ноилож, бир кун уларнинг олдига бориб, темирчилик пешасин (ҳунарин) ўргонмиш эрди. Бир кун Рум шаҳрига борди, ле-

¹ Барча руҳи – ҳамма феъл-автори.

² Ҳирфа – савдо, ҳунар.

³ Пеша – касб.

кин авқотгузарлик учун ҳеч нарсаси йўқ эрди. Охир бир темирчининг дўконига борди ва деди: «Мен бу ҳунарни билурман». Алар уни муздурулик (мардикорчилик) учун ишлатди. Ул мазкур вилоятда мутаваққиф¹ бўлди ва ул ҳунар сабабидин ўз элига келгунча ҳеч кишига муҳтож бўлмади, унинг қиссаси машхурдур. Ундин сўнг: «Ҳеч бир муҳташам, ҳашаматли, ҳайбатли киши ўз фарзандига ҳунар ва пеша ўргатмоқни айб билмасун. Кўп вақтлар бўлурки, мол, асбоб ва шижаот наф қилмагусидур. Бирон пешани ўргонса, бир кун ул пеша ишга ярагусидур», – деб буюрди. Ундин сўнг Ажам аслзодалари орасида расм ундоқ бўлдиким, муҳташам кишилардин пешасиз ҳеч ким қолмади ва унга муҳтож бўлмасалар ҳам ўзларига ул ҳунарни одат қилдилар.

Бас, фарзандингга ҳар на ўргата олсанг ўргатғил, унинг фойдаси сенга ҳам етишур. Аммо фарзандинг балогатга етғон бўлса қўргил, унинг оила бошлиғи бўлмоққа, хотин олмоқ ва рўзгор ишларига машғул бўлмоққа салоҳияти бўлса, сен унга хотин олиб берғил, токи шу била сен унинг бу ҳақин ҳам бажарғон бўлғайсан. Лекин агар ўғлингни уйлантиromoқ ва қизингни эрга бермоқ тиласанг, зинҳор ўз қариндошларинг била беришиб-олишмағил. Бегонадин хотин олғил, недин-ким ўз қариндошларингдин олмасанг ҳам улар сенинг била гўшт, қондек яқиндорлар. Бошқа қабиладин хотин олғил. Бу била бир қабилани икки қабила қилмиш бўлғайсан, бегонани ўзингга қариндош қилғайсан, токи бир қувватинг икки бўлғай, икки тарафдин мададинг ва қўмагинг кўпайфай.

¹ Мутаваққиф – тўхташ, яшаб қолиш.

Аммо агар билсангким, ўғлингда кадхудо¹ бўлмоқлик ва хотин олмоқлик майли бўлмаса, бир мусулмоннинг қизини балога қўймағилки, иккови ҳам бир-биридин безор бўлурлар. Қиз ва йигитни ўз ҳолига қўйғил, катта бўлғондин сўнг ўзи нима қилса, шундоқ қилсун.

Агар қизинг бўлса, уни мастура дояларга топширгил, токи яхши парвариш қилгайлар ва каттароқ бўлғондин сўнг муаллимга топширгил... Балофатга етғондин сўнг ҳаракат қилиб эрга берғил, унга шафқат ва марҳамат кўргузғил, нединким қиз отанинг асири бўлур. Ўғил отасиз бўлса ҳам бир иш талабига бора олур ва ўзин майшатлиғ тутар. Қиз эса ожиз ва бечора бўлур. Ҳар на боринг бўлса, аввал бурун қизга берғил ва унинг асбобин тузатғил. Тезроқ уни бир кишининг бўйнига банд этғил, токи унинг фамидин қутулғайсан. Агар қизинг эрга тегмағон бўлса, уйланмағон йигитга топширгил, токи унга кўнгул боғласин ва ул бунга кўнгул боғласин.

Ҳикоят. Ундоқ эшитибманки, Ажам подшоҳининг қизи Шаҳрбонуни^{28*} асир этиб, Ажамдин Арабга Салмон Форисининг^{29*} уйига келтурдилар ва шу ерда уни эрга бермоқчи бўлдилар. Шаҳрбону деди: «То куёвни кўрмагунимча унга хотин бўлмасман. Мени мезанага ўтқизиб, арабнинг сайидларини менинг олдимдин ўтказинглар. Мен қай кишини ихтиёр қилсам, ул киши менга эр бўлсун». Уни Салмоннинг уйида бир мезанага ўтқизиб қўйдилар ва Салмон ҳам унинг қошида ўлтуруб, сайидларни унинг олдидан ўтказиб, «Бу фалон, бу фалондур» деб таъриф қилур эрди ва ҳар бирининг ҳақида бир нима дер эрди.

Ҳазрат Умар^{30*} келган вақтда Шаҳрбону: «Бу кимдур?» – деб сўради. Салмон деди: «Умардур!»

¹ Кадхудо – рўзғор боши.

Шаҳрбону деди: «Бу бағоят улуғ ва муҳташам кишидур, аммо қаридур». Ундан сўнг ҳазрат Али^{31*} ўтди. Шаҳрбону сўради: «Бу кимдур?» Салмон деди: «Ҳазрат расул Акрамнинг амакизодаси Алидур».

Шаҳрбону деди: «Бу бағоят улуғ ва муҳташам-дур ва менга муносибдур. Лекин мен эрта қиёматда Фотимай^{32*} заҳродин шарм қилурман, бу жиҳатдин уни қабул қилмасман». Ундин сўнг ҳазрат имом Ҳасанни^{33*} кўриб деди: «Бу менга лойиқдур, аммо кўп хотин олибдур. Бу сабабдин уни ҳам қабул қилмасман». Ундин сўнг имом Ҳуссани^{34*} кўриб деди: «Бу киши менга муносибдур, яъни бўйдоқ йигитга эрга тегмафон қиз муносиб. Мен шу вақтга қадар эрга текканим йўқ, у ҳам шу вақтга қадар уйланмафон.

Аммо, эй фарзанд, яхши юзлик¹ куёв талаб қил ва қизингни хунук юзли одамга бермагил, нединким қиз бадрўй йигитга қўнгул қўймағусидур ва сенга ҳамда куёвга бадномлик ҳосил бўлғусидур. Куёвнинг юзи, сўзи пок бўлсун. У номусли ва қадхудо бўлмоғи керакдур, аммо куёв неъмат ва ҳашаматда сендин пастроқ бўлсун, у сен била фахрлансун, аммо сен у била фахрланмагил, токи қизинг иззат ва роҳат била зиндагонлик қилсун. Бундоқ бўлғондин сўнг куёвдин кўп нарса талаб қилмагил.

Қизингни канизакдек сотмагил, токи унинг ўзи мурувват ва ҳамият² қоидасин қўлдин бермагусидур. Сен ҳар нарсани қабул қилиб, қизингни куёвингнинг бўйнига банд қилғил ва шунинг била қизингнинг ҳам меҳнатидин қутулагил.

¹ Яхши юзлик – хушрўй.

² Ҳамият – ор-номусни сақдаш.

ЙИГИРМА САККИЗИНЧИ БОБ

ДҮСТ ТУТМОҚ ЗИКРИДА

Эй фарзанд, билғилки, то киши тириқдур, дүстсиз бўлмагусидур. Кишининг дүстсиз бўлғонидин биродарсиз бўлғони яхшидур. Бир ҳакимдан сўрдилар: «Дўст яхшироқдурму, ё биродар?» Ҳаким айтди: «Дўст бўлса яхшидур».

Демак, дўстнинг иши ҳақида ўйлағил, уларга ҳадялар бермоқ, мурувватлар қилмоқ била дўстлик қоидасин маҳкам қилғил. Нединким, ҳар киши дўстларни ёд қилмаса, дўстлар ҳам ёд қилмағусидур ва ул киши ҳамиша дўстсиз қолгусидур.

Ҳамма вақт дўст тутмоқни одат қилғил, зеро-ки ҳар кишининг дўсти кўп бўлса, айблари шунча сир тутилур ва фазилати кўпаюр. Лекин ҳар вақт янги дўст топсанг, кўхна дўстларни тарқ этмағил ва улардин юз ўтурмағил, токи ҳамиша дўстинг кўп бўлсун, дебдурларки, яхши дўст кишига улуғ ганждур. Одамлар ҳақида ўйлаб кўрки, улар сен била дўстлик йўлига кирарлар, аммо ярим дўст бўлурлар. Шулар била соз муносабатда бўл ва улар била ҳар турлук яхши ва ёмонда муттафиқ¹ бўлғил, токи улар сендин кўп яхшиликларни кўрса, тад-риж² била кейинроқ яқдил дўст бўлурлар. Бир кун Искандардин сўрдиларки: «Бунча оз сармоя била бу мардикор кўп мулкни қандай хислат била қўлга киргуздинг?» Искандар жавоб бердиким: «Талаттуф³ била душманларни қўлга киритдим ва тааҳҳуд⁴ йўли била дўстларни йўлга солдим. Бу жиҳатдин шунча мамлакатни қўлга олдим».

¹ Муттафиқ – дўст, бирлашган.

² Тадриж – аста-секин.

³ Талаттуф – раҳмдиллик.

⁴ Тааҳҳуд – аҳд қилиш, сўз бериш.

Яна билғилки, дўстларнинг дўстлари ҳам дўстларингдур. Эҳтимолки, унинг ўша одамга дўстлиғи сенинг дўстлиғингдин кўпроқдур. Агар дўстинг сенинг душманингни севса, бундай дўстдин эҳтиёт бўл, нединким бундай дўст душман тарафидин сенга ёмонлик қилишдин ҳам андиша қилмағай. Сенинг дўстингга душман бўлғон дўстдин ҳам парҳез этғил.

Ҳар дўстким, сендин ҳеч сабабсиз гинали бўлса, унинг дўстлиғидин тамаъ қилмағил ва жаҳонда ундин айблироқ ва ундин ҳам ёмонроқ бўлмағай.

Билғилки, жаҳонда айбисиз одам бўлмас, аммо сен салоҳиятли, муруватлиф бўл, нединким бундайларнинг айби кам бўлур. Муруватсиз, фазилатсиз кишини дўст тутмағилки, бундай кишининг хосияти бўлмас ва уларни нон дўстлари зумрасидин тутғил, нединким улар нон дўсти дурлар, ор ва номус дўсти эмасдурлар.

Яхши, ёмон одамни билғил ва икковига ҳам дўстлик қилғил. Яхшиларга кўнгул била ва ёмонларга тил била дўстлик қилғил, токи икки тоифанинг ҳам дўстлиғи сенга нисбатан ҳосил бўлсун, нединким кишининг ҳожати танҳо дўстиға тушмағусидур. Бир вақт бўлурки, кишининг ҳожати зарурат юзидин ёмонларга ҳам тушғусидур. Демак, бу икки тоифанинг ҳам дўстлиғин ҳосил қилғил.

Ақдиз одамлар била ҳаргиз дўст бўлмағил. Ақдиз дўст ақлли душмандин ёмонроқдур, чунки ақдиз дўст шундоқ иш қиуркни, ақлли душман уни қила олмас. Муруватлиф, илмлиф ва вафолиғ кишиларни дўст тутғилки, то сен ҳам ул фазилатлар била янада машҳур бўлғайсан. Бемуруват, меҳр-шафқатсиз, ҳунарсиз (илмсиз) кишилар била ўлтурмагил. Беҳунар била ўлтурғондин танҳолиғ яхшироқдур. Ҳаргиз дўстларнинг ҳақин зоеъ қилмағил, то сендин маломат қилмасунлар.

Одамлар икки гурух бўлурлар: бири – дўстларнинг ҳақин зоёъ қилгувчи ва бири – яхшиликни яхши билгувчи. Билғилки, дўстликка лойиқ одамни икки нарсадин билса бўлур: бири улки, дўстига тангдастлик етишфой вақтда қудрати кетгунча молин дўстидин дариф қилмас ва қашшоқлик вақтида ундин юз ўгирмас, яна бири улки, дўсти бу жаҳондин ўтғондин сўнг ҳам ул дўстининг фарзандларин, қариндошларин ва дўстларин талаб қилфай, уларга яхшилик кўргузфай. Гоҳ-гоҳ дўстининг мозори зиёратига боргай ва ҳасрат чекиб, дуолар қилфай.

Ҳикоят. Ундоғ эшитибманки, Суқрот ҳакими-ни ўлдириш учун олиб бораётган чоғда унга «Бут-параст бўл!» деб кўп айтдилар. Ул деди: «Бундоқ сўзни айтурдин тил чекингларким, мен ҳаргиз ул ишни қилмасман!» Уни ўлдиришга олиб борар эдилар. Шогирдларидин бир жамоа унга ҳамроҳ бўлиб борар эдилар. Улар йиғлаб, зорлиғ қилиб сўрардилар: «Эй ҳаким, энди ўлимга кўнгил қўй-мишсан, айтғил, сени қайси ерга дафн этайлик?» Суқрот табассум қилиб деди: «Қай жойни кўнглунгиз тиласа, ул жойга дафн қилинг, яъни менинг жасадим қайда бўлса, сўнгакларим унда бўлфай, фақат мени ёд қилсангиз бас!»

Эй фарзанд, одамлар била дўстлифинг ўртача бўлсун. Дўстим кўп деб барчасига умид била кўнгул боғламагил, илгари ва кейинга қарагил. Дўстларингнинг эътиқодидин ғофил бўлмагил. Агар сенинг мингта дўстинг бўлса, зоҳирда барчасига сендин дўстроқ киши бўлмагай. Дўстликни фароғлиқда ва тангдастликда имтиҳон қилғил, фароғлиқда роз ва таом била, тангдастликда суд ва зиён била.

Ҳар дўстки, сенинг душманингни душман тутмас, уни дўст демагил.

Агар қашшоқ бўлсанг, молдор дўст талаб қилмағил, нединким қашшоқни ҳеч киши дўст тутмاغусидур, хусусан, молдорлар ёмон кўргусидур. Ўзингга лойиқ дўст ахтарғил. Агар сен молдор бўлсанг ва қашшоқ дўст тутсанг, бу раводур. Аммо ҳалқнинг дўстлиғига кўнглингни роса тутғил, токи барча ишларинг тўғри бўлғай.

Агар дўстингнинг кўнгли ҳеч гуноҳсиз сендин қолса, уни қайтиб келурга машғул бўлмағил, нединким тамаъгир, кекчи дўстдин узоқ бўлғил, унинг дўстлиғи ҳақиқий эрмасдур, балки тамаъ учундур. Ҳасадиг кишиларга ҳаргиз дўст бўлмағил, чунки ҳасадиг киши дўстлиқقا лойиқ эрмасдур, чунки ҳосиднинг¹ ҳасади ҳаргиз кетмагусидур ва ҳамиша сендин озурда² ва гинадор бўлғусидур.

Эй фарзанд, сен чин дўст тутмоқ ҳолидин огоҳ бўлдинг, энди душман ҳолидин ҳам огоҳдик топғил.

ЙИГИРМА ТЎҚҚИЗИНЧИ БОБ

ДУШМАНДИН АНДИША ҚИЛМОҚ ЗИКРИДА

Эй фарзанд, жаҳд³ қилиб ҳаргиз ҳеч кишини ўзингга душман тутмағил. Аммо бир киши ногоҳ сенга душман бўлса, асло қўрқмағил, лекин унинг ошкор ва ниҳон ишларидин ғоғил бўлмағил ва ҳамиша унинг тадбирида бўлғил. Ҳар вақт унинг ҳийласидин хабардор бўлғил. Ҳамиша душманнинг ҳолин ва фикр-хаёлин билмакнинг ҳаракатида бўлғил, то бир бало ва офатга гирифтор бўлмағайсан. Ишинг ривож топмаса, қувватинг бўлмаса,

¹ Ҳосид – ҳасадчи.

² Озурда – озор чеккан.

³ Жаҳд – астойдил ҳаракат қилиш.

душманга душманлиғ құргузмағил. Ўзингни душманга улуғ құргузғил. Агарчи ожиз бўлсанг ҳам файрат қил, ўзингни ожиз құргузмағил.

Душманнинг хуш сўзига кўнгул қўймағил. Агар душман ҳар қанча яхшилик құргузса, ундин бегу-мон бўлмағил. Қувватлик душмандин ҳамиша хуш-ёр ва эҳтиёт бўлғилки, дебдурлар: икки кишидин қўрқмоқ қеракдур: бири қавий¹ душман ва бири ғаддор² дўст. Кичик душманни кам қуч ва хор деб ўйламағил. Унга улуғ душмандин кўпроқ душманлик қил ва уни кичик, ожиз билмағил.

Ҳикоят. Шундоқ, эшитибманким, Хуросонда Мухаллаб отлиғ бир муҳташам иёр^{35*} бор эрди. У бир кун кўчада юриб борур эрди, йўлда ётғон бир қовуннинг пўчоғига суруниб йиқилди. Дарҳол пи-чогини чиқариб ҳалиги пўчоқни пичноқлади. Унинг чокари деди: «Сарҳанг³, бунча иёр ва муҳташам бўла туриб пўчоққа пичноқ урдинг, бунинг боиси недур, шарм қилмасмусан?» Мухаллаб деди: «Мени-ку йиқитғон пўчоқ бўлғоч, хўш, кимга пичноқ урай? Ҳар ким мени йиқса, ул душмандур».

Демак, (душман) ҳар қанча хор бўлса ҳам уни хор ва ҳақири билмағилким, ҳар ким душманни хор тутса, тезроқ ўзи хор бўлур.

Бас, душман сени ҳалок этмасун, балки сен унинг ҳалокати тадбирида бўлғил. Аммо бўлсанг, фахрланиб ҳамиша ожизлигин ва манкуб⁴лигин ҳалққа зоҳир қилмағил ва «шундай ғолиблиқ била унинг ожизлиғига тараҳҳум қилдим», демагил. Агар ул сенга ғолиб бўлса, улуғ ору номусдурки бир ожиз душманга мағлуб бўлмиш бўлгайсан. Агар душман бир кичик подшоҳ бўлса, ногоҳ бир

¹ Қавий – кучли, қувватли.

² Ғаддор – алдамчи, бераҳм, золим.

³ Сарҳанг – лашкарбоши.

⁴ Манкуб – баҳтсиз, азобда қолган, хароб.

улуғ подшоҳга ғолиб бўлса, шоирлар унинг отига зафарномалар айтурлар, котиблар фатҳномалар ёзурлар ва уни улуғ подшоҳдин баландроқ таъриф этурлар, унинг лашкарларини, пиёда ва суворийларини шердин, аждаҳодин зиёдароқ тавсиф қилурлар, шаън-шавкат ва фавқулодда ҳодисаларни мадҳ қилишни вужудга келтиурлар, нединким агар ул мағлуб бўлғон улуғ подшоҳни ожизлик била мазаммат қилсалар, зафар топғон кичик подшоҳга ҳеч қандай ифтихор ва номдорлиғ бўлмағусидур.

Ҳикоят. Бир вақтда бир хотин подшоҳ бор эрди. Уни Сайида^{36*} дер эрдилар. (У хотин) Подшоҳ бағоят афифа, зоҳида¹ ва малик зода² хотин эрди. Сайида менинг онамнинг амакисига қиз эрди ва Фахруддавланинг хотини эрди. Фахруддавла вафот қилди, ундин бир ўғил фарзанд қолди. Унга Миждуддавла деб от қўйиб, подшоҳлик отин бердилар. Аммо ўттиз йилгача онаси подшоҳлик қилди. Миждуддавла катта бўлди, аммо кўп ярамас эрди, оти подшоҳ, лекин ҳамиша канизаклар била ишрат сурар эрди. Онаси Рай, Исфаҳон ва Қўҳистон вилоятларида ўттиз йилдин кўпроқ подшоҳлик маснадида ўлтуриб, ҳукумат сўрарди.

Эй фарзанд, бу сўздин менинг мақсадим улдурким: сенинг бобонг султон Маҳмуд Фозий бир вақт ул хотиннинг олдига элчи юбориб дедики: «Хутба ва сикка³ менинг номимга музайян этғил ва хирож берғил. Йўқ эрса бориб вилоятингни олиб, сени нес-нобуд қилурман ва кўп таҳдид, тахвиф⁴ кўргузиб, вайрон қилурман», – деб нома юборди. Элчи номани ва пайғомни Сайидаға

¹ Зоҳида – диндор.

² Малик зода – подшоҳзода.

³ Сикка – олтин, кумуш ва чақа пул устига урилган тамға.

⁴ Тахвиф – хавф түғдирмоқ.

топширди. Саййида элчига деди: «Султон Маҳмуд-га айтғил, менинг эрим тириклиқда сен биз томонга йўл солмасанг ва Райга ҳужум қиласанг деб кўнглумга келур эрди. Менинг эрим ўлди, сўнг бу андиша менинг бошимга тушди ва дер эрдими, Султон Маҳмуд улуф ва оқил подшоҳдур ва ўзи яхши билурки, шунингдек, улуф подшоҳ менингдек бир ожиз хотиннинг урушига келмоғи бағоят номуносибдур. Энди шунча сўз била ҳам келмак тиласа, келсун. Ҳақ гувоҳ бўлғайки, мен ҳаргиз қочмагумдур ва уруш майдонида барқарор турғумдур, нединким уруш икки ишдин ташқари бўлмағусидур; икки лашкарнинг бирига шикаст берсан, барча оламға: «Жаҳон подшоҳларига шикаст берғон султонга шикаст бердим!» деган мазмун била нома ёзарман. Яна шуаро¹ ва фузалолар² ҳам фатҳнома ёзарлар ва қасидалар айтарлар. Бу иш бутун оламга машҳур бўлур. Агар ул зафар топиб, менга шикаст еткурса, на сўз ёза олғай, чунки бир хотиннинг шикасти унингдек улуф подшоҳга фатҳ ва фаҳр бўлмағусидур».

Султон Маҳмуд бу сўздин сўнг то ул хотин ўлмагунча унинг мулкига шикаст бермакка қасд этмади.

Демак, эй фарзанд, ҳеч душманни кичик тутмалил ва унинг ҳолидин ғофил бўлмағил. Хусусан, уйдаги душмандин кўпроқ қўрқғилки, унинг қиласон ишини бегона душман қила олмағай. Ул сендин хижолатманд бўлғондин сўнг ҳаргиз кўнглини сенинг фикрингдин холи қилас. Сенинг барча аҳволингни билур, бегона душман эса уни билмас. Бас, ҳеч душманга яқдил хақиқий дўстлик қиласағил ва лекин мажозий дўстлиғ қиласағил.

¹ Шуаро – шоирлар.

² Фузало – олимлар, донишмандлар.

Эҳтимол, бундай дўстлик ҳақиқатга айланғай, нединким кўп дўстликнинг охiri душманликка ва кўп душманликнинг охiri дўстликка айланур. Сўнгги бўлғон дўстлик ёки душманлик маҳкам ва қаттиқроқ бўлур. Душмандин кўра дўстни кўпроқ қилмоққа жаҳд қилғил. Лекин мингта дўстинг бўлса, бирисини ҳам ўзингга душман қилмағил, нединким мингта дўстинг сени ҳимоя қила олмас ва ул бир душман сенга бадфеъллик била қарашдин бир нафас ғофил бўлмас.

Халойиқни иссиқ ва совуғин кўтармакни ҳамиша ўзингга ор билғилки, ҳар киши ўз қадрин билмас ўзига нуқсон қилур. Душман сендин қувватлироқ бўлса, унга душманлик изҳор қилмағил ва ҳар душман сендин ожизроқ бўлса, унинг макридин осуда бўлмағил. Агар душман омонлик тиласа, гарчи у бадкирдор ва қаттиқ душман бўлса ҳам унга омонлик берғил ва буни улуғ давлат ва яхшиғанимат кўргил. Дебдурларки: душманнинг қочгони ва омонлик тилағони (унинг) ўлғони била баробардур. Лекин бир душман сенинг илкингда ҳалок бўлса, унга шодлик қилмоғинг раводур ва агар ул ўз ажали била ўлса, бунга шодмон бўлмағил. Агар ўзингни ўлмаслиғингни таҳқиқ билсанг, ундин сўнг шодлик қил. Ҳакимлар дебдурларки: ҳар киши душмандин бир нафас сўнг ўлса, бу ўлимниғанимат деб билмак керакдур. Аммо барчамиз ўлмоғимизни билмағонимиздин сўнг душманнинг ўлимига шодмон бўлғонимиз муносиб эрмасдур. Барчамиз сафар қилурмиз ва ҳеч қачон ўзимиз била бирга яхшиликдин бошқа озуқни олиб кета олмасмиз.

Ҳикоят. Эшитибманки, Искандар Зулқарнайн^{37*} оламнинг атрофин айланиб, жаҳоннинг барча мамоликин¹ мусаххар² қилди. Ундин сўнг ўз

¹ Мамолик – мамлакатлар.

² Мусаххар – фатҳ этилган, бўйсундирилган.

уйига келмак қасди била қайтиб, Домған вилюятыга етгон эрди, ажали етди, умаросига васият қилиб деди: «Мени бир тобуттага қўйинг ва тобутнинг бир тарафин тешиб, ул тешикдин илкимни чиқариб, кафтимни очиб қўйинг, ундин сўнг тобутни кўтариング, то барча халойиқ кўрсунларки, гарчи бутун жаҳон мамоликин олмишман, аммо охири холи (бўш) илик¹ била жаҳондин борурман».

Бас, эй фарзанд, хоҳ дўстлиғ бўлсин ва хоҳ душманлиғ бўлсин, барча ишни андозада эътидол² била қилғил, нединким эътидол ақднинг бир жузъидир. Бадҳоҳ³ларга бадҳоҳ бўлғил, гарданкаш⁴ларга гарданкаш бўлғил, нодон ва жангжўйларга сабр қилғил. Қаҳринг келғон вақтда қаҳрни ютғил ва дўст, душман била оҳиста сўзлашғил, яхши ва ёмон ҳар сўзким айтсанг, унинг жавобига кўз тутғил, ҳар сўзни халқнинг юзига айта олмасанг, изидин ҳам айтма. Сенинг айбингга тил оча олмагудек кишининг айбига ҳам тил очмагил, ҳаргиз икки юзлик бўлмагил ва икки юзлик одамдин йироқ бўлғил. Фаммоз⁵ кишидин қўрқғил, нединким унинг бир соатда бузғон ишин бир йилда тузатиб бўлмагусидур. Ҳар қанча улуғ ва муҳташам бўлсанг ҳам сендин кучлироқ киши била урушмагил. Фашёфурс^{38*} ҳаким дебдурки: ўн хислатни ўзингга пеша қилғил, то балолардин қутулғайсан: бири шуки, ўзингдин зўр киши била урушмагил; тундхўй⁶ кишининг олдида сўзга лажож⁷ бермагил;

¹ Илик – қўл.

² Эътидол – ўрта даражага, мўътадиллик.

³ Бадҳоҳ – бирорвага ёмонлик соғинувчи.

⁴ Гарданкаш – бўйин товловчи, итоатсиз.

⁵ Фаммоз – чақимчи, сир очувчи.

⁶ Тундхўй – бир гаплик, ўжар.

⁷ Лажож – бир иш ва талаб устида қаттиқ туриш.

ҳасуд¹ одам била мажлисда ўлтурмагил; нодон киши била мунозара қилмагил; риёй² одам била дўст бўлмагил; ёлғончи одам била муомала қилмагил; баҳил киши била суҳбат тутмагил; фаюр, тамкин киши била шароб ичмагил; хотинлар била бир ерда кўп ўлтурмагил; кишига сириңгни айтмагил, токи обруйинг тўкилмасин. Агар бир киши сенинг айбингни айтса, жаҳд ва саъй била ул айбни ўзингдин йироқ қилғил; ҳеч одамни ул миқдор таъриф қилмагилки, бир вақти келиб уни мазаммат қила олмагайсан ва ҳеч одамни ул соҳада мазаммат қилмагилки, яна бир вақт келса, уни таъриф эта олмагайсан. Ҳар киши сенга муҳтоҷ бўлса, униfila, қаҳр била қўрқутмагил, нединким ҳар киши сендин мустағний³ бўлмаса, сенинг fila ва қаҳрингдин қўрқмағусидур. Ҳар киши сенга муҳтоҷ бўлса, уни бирдан забун этмагил ва агар улуғ гуноҳ қилғон бўлса ҳам афв этғил ва ўзингдин кичиклар била ободон, меҳрибон бўлғил, нединким кичиклар сенинг зироатгоҳингдурлар ва сенинг барча ишингни улар битказурлар. Агар мазраа⁴ вайрон бўлса, баргу⁵ навосиз⁶ ва ҳосилсиз қолгунгдур.

Бир ишни икки кишига буюрмағил. Бу сенинг амрингдур, амринг халал топмасун. Нединким, дебдурлар: икки киши шерик бўлса, қозон қайнамагусидур.

Агар бир киши сенга иш буюрса, ул ишни бажаришда ўзингга шерик тиламагил, токи ул ишда халал зоҳир бўлмагай ва ул ишда обруйиф

¹ Ҳасуд – ҳасадчи, кўролмовчи.

² Риёй – риёкор, иккиюзламачи.

³ Мустағний – риёкор, иккиюзламачи.

⁴ Мазраа, мазраъ – экинзор.

⁵ Барг – япроқ, бойлик.

⁶ Навосиз – мевасиз.

бўлгайсан. Аммо дўст ва душманинг ҳақида карим¹ бўлғил. Гуноҳи учун халқни қаттиқ тутмагил ва ботил учун халқнинг уқубатига кўнгул боғла-магил. Карам ва лутф тарафин илгари тутғил, токи барча яхшига яхши кўрингайсан.

ЎТТИЗИНЧИ БОБ

АФВ ВА УҚУБАТ ҚИЛМОҚ ЗИКРИДА

Эй фарзанд, ҳар нарса учун халқни уқубатга мустаҳиқ² билмагил. Агар бир киши гуноҳ қилиб, узр айтса, қабул қиласа, нединким ул одамдур ва гуноҳни барчадин бурун Одам қилибдур.

Қаҳр била уқубат қилмагил, токи бир бегуноҳни уқубатга сазовор қилмагайсан. Ҳар нарса учун кишига газаб қилмагил ва газаб вақтида қаҳрни ютмоқни одат қил. Бир гуноҳ учун сендин афв тиласалар афв қилмоқни ўзингга вожиб бил. Агар гуноҳқорнинг гуноҳин афв қилмай, унга уқубат қилсанг, сенинг ундин зиёдалиғинг қачон маълум бўлгай? Унинг гуноҳин афв қилғонингдин сўнг уни койимагил ва унинг гуноҳин асло ёдингга келтурмагил, йўқ эрса гуноҳин афв қилмамиш бўлгайсан. Аммо ўзинг узр сўрагулик даражада гуноҳ қилмагил ва агар қилсанг узр қўлмоқдин³ ор этмагил. Агар бир киши уқубатга лойиқ гуноҳ қилса, унинг гуноҳин ҳаддига қарагил ва гуноҳига лойиқ уқубат буюргил. Инсоф аҳли дебдурларки, уқубатни гуноҳга лойиқ қилмоқ керакдур. Аммо мен айттурманки, бир киши гуноҳ қилиб, унга уқубат қилмоқ вожиб бўлғон

¹ Карим – карамли, олижаноб.

² Мустаҳиқ – муносиб ҳақди.

³ Қўлмоқ – сўрамоқ.

бўлса, сен унинг гуноҳига лойиқ уқубат қилмоқчи бўлсанг, раҳм, карам ва ҳалим тариқин қўлдин бермағил. Бу ҳолда шундоқ қилғилки, бир дирам гуноҳига ярим дирам уқубатни буюргил, токи бу била ҳам сиёsat расмин бажо келтурмиш бўлғайсан ва ҳам мурувват ва карам шартин бажо келтурмиш бўлғайсан, ҳар каримлар хайлидин, ҳам сиёsat аҳлидин бўлғайсан, нединким раҳмлик одамлардин раҳмсиз кишиларнинг иши пайдо бўлмоғи номуносидур.

Ҳикоят. Шундоқ эшитибманким, Муовия-нинг^{39*} замонида бир жамоа гуноҳ қилдиларки, уларга ўлим вожиб эрди. Муовия уларни ўз олдида ўлдурмакка буюрди. Уларнинг орасидин бир кишини ўлдурмак учун келтурдилар. Ул киши деди: «Эй амир, бизлар ўз гуноҳларимизга муқарардурмиз. Ҳар уқубат қилсанг, бизларга сазовордур. Аммо Худо учун мендин икки калима сўз эшит ва жавобин берғил». Муовия деди: «Айтғил!» Ул гуноҳкор деди: «Барча оламда сенинг ҳалим-караминг, мурувватинг ҳақида сўз машҳур ва мунташирдур¹. Агар бизлар бу гуноҳни бирорта бераҳм ва золим подшоҳнинг олдида қилсак, ул подшоҳ бизларнинг ҳақимизда на иш қилур эрди?» Муовия деди: «Мен сизларга на иш қилмоқ бўлғон бўлсам, ул ҳам ушбу ишни қилур эрди». Ул киши деди: «Сенинг шунча ҳалим, раҳим ва каримлигингдин бизларга на фойда бўлғайки, гарчи сен бераҳм ва bemуруvват подшоҳнинг қилғон ишин қилғайсан!» Муовия деди: «Агар бу сўзни бурунги ўлғон киши айтса эрди, барчасин озод қилур эрдим, энди қолғонларин афв қилдим».

Бас, эй фарзанд, агар гуноҳкор афв тиласа, қабул қилғил. Агар ҳар киши сенга ҳожатманд бўлса, бақадри ҳол уни маҳрум қўймагил ва у

¹ Мунташир – ёйилган, тарқалган.

ҳожатмандни ўз ҳақингда ёлғончи гумон айтмағил. Агар у сени яхши гумон этмаса эрди, сендин ҳожатин тиламас эрди. Ҳожатманд ҳожат тилар вақтда сенга асир бўлғусидур, асирларга эса раҳм қилмоқ керакдур, нединким асир бўлмоқ осон эрмасдур ва кўп мушкул ишдур. Бас, ушбу ишда тақсир кўргузмагил, то икки жаҳон некном¹лигин топғайсан.

Агар сенинг бир кишига ҳожатинг тушса, бурун кўргулки, ул киши каримму, ё лайму². Агар карим бўлса, ҳожатингни тилағил, агар лайм бўлса тиламагил. Аммо каримдин ҳожат тиласанг ҳам кўп тиламагил, то қабул умиди кўпроқ бўлғай. Ҳожат тиламакда яхши андиша қилғил ва кўп талаттуф³ била ҳожатингни изҳор этғилки, ҳожат тиламоқдин талатгуф кўргузмак ҳожатни биткармакда улуғ шафеъдур⁴. Нединким, агар ҳожат тиламак қоидасин билсанг ҳеч жойдин ҳожатингни битказмай қайтмассан. Ҳар кишигаки муҳтоҷ бўлсанг, ўзингни унинг чокари, бандаси деб билғил...

Яна бурунги ҳожат қабулига шукр қилмоқ сўнгги ҳожат қабулининг умидидур. Агар ҳар киши ҳожатингни право қилмаса, ўз баҳтингдин кўргил ва ул одамдин фила (гина) қилмагил. Сенинг фила қилмоғингдин унинг парвоси йўқдур, чунки агар унинг парвоси бўлса эрди, ҳожатингни право қилур эрди. Агар ҳожатинг тушғон киши лайм бўлса, ҳушёр вақтида ундин ҳеч нарса тиламагил, бул вақтда у ҳаргиз ҳеч нарса бермағусидур. Аммо мастилик ҳолида тилағил, баҳиллар ва лаймлар мастилик вақтида сахий бўлурлар, гарчи сўнг-

¹ Некном – яхши ном чиқарган.

² Лайм – хасис, нокас.

³ Талаттуф – меҳрибонлик.

⁴ Шафеъ – воситачи, ҳимоячи.

ги кун пушаймон бўлсалар ҳам мастлик чоғида қарам қилурлар. Агар бир лаимга ишинг тушса, ўзингни раҳм жойида билғил, нединким уч кишининг ҳолига раҳм қилмоқ керакдур: бири соҳиби ақд одамки, ақдсиз одамнинг зердасти бўлгай; бири ожиз одамнинг бўйни қавий одамга ҳам бўлгай; яна бири, карим киши лаим одамга муҳтож бўлгай.

Эй фарзанд, агар бундин зиёдароқ илмни биладигон донишманд бўлсан эрди, сенга ўргатур эрдим ва оламдин кетар вақтимда бегам кетар эрдим. Аммо на қилайки, донишдин пиёдамен. Шундоқ бўлса ҳам мендин нимаики сўз эшитгон бўлсанг қабул қилғил. Аммо сен хоҳ қабул қилғил, хоҳ қабул қилмағил, мен ҳар бир илм, ҳунардин билғонимча бир неча сўз айтдим, сўзда баҳиллик қилмадим.

ЎТТИЗ БИРИНЧИ БОБ

ИЛМ ТАЛАБИ ВА ҚОЗИГАРЛИК ЗИКРИДА

Эй фарзанд, билғилки, аввал пешалардин сўз айтурман, пешадин мақсад дўкондорлик эрмасдур. Ҳар киши ҳар ишни қўлига олса, ул ишни яхши билсин ва уни кўп варзиш¹ қилсин, токи ул ишдин кўп наф кўргай. Бироқ одам наф ва ҳунарни талаб қилур. Пеша бағоят кўпдур, ҳар бирин бошқа-бошқа шарҳ қилмоқ мумкин эрмасдур ва сўз узолғусидур. Илмнинг сифати уч важҳдандур: ё бир пеша била боғланғон илм; илм била боғлиқ пеша; хайр ва далолатга тааллуқли одат. Бирор пеша била боғлиқ ишлар табиблик,

¹ Варзиш – машқ, одат.

мунахжимлик, муҳандислик, массоҳдик¹, шоирлик ва буларга ўхшаш ишлардур. Илмга таалуқи бор пешалар хунёгарлик², байторлик³, бинокорлик, коризкунлик ва булардин ташқари ишлар ҳам бордур. Буларнинг ҳар бирисида шундоқ қоида бордурки, агар сен унинг расмин ва тартибин билмасанг, ҳар қанча уста бўлсанг ҳам ул бобда серрайғон кишидек бўлурсан, яъни таажжубланиб тургайсан.

Ақла маълум бўлғон пешани шарҳ қилмоққа ҳожат йўқдур. Лекин мен билғонимча айтурман ва ҳар бирининг тартибин сенга баён қилурман. Булар икки ишдин ташқари эрмасдур: ё бир вақтда рўзгор ҳаводисидин шундай бир вақт келурки, замон ҳодисалари била ул пешага муҳтоҷ бўлурсан. Муҳтоҷ бўлғон вақтда ҳар қайси пешанинг асроридин хабардор бўлғонинг яхшидур. Агар пешага муҳтоҷ бўлмасанг, ушбу улуғлиғингдин ўлтирурсан, лекин улуғларга барча илмни билмак лозимдур...

Фасл. Шариат илмининг пешаси қозилик, муфтилик ва музаккириликдур... Барча пешаларнинг орасида илми толиб бўлсанг, парҳезкор ва қониъ⁴ бўлғил. Илмни дўст, бекорчи турмушни душман тутғил. Соҳиби тамкин ва сабук руҳ⁵ бўлғил, кеч ётғил ва эрта турғил, китоб ва дарсга ҳарис⁶ бўлғил, ишдин малул⁷ бўлмағил, ҳифз этғил, такрор қиласиғил, ҳақ⁸шунос бўлғил, китоб,

¹ Массоҳ – ер ўлчовчи, танобчи.

² Хунёгарлик – мусиқа асбоблари устаси.

³ Байторлик – отларни даволовчи.

⁴ Қониъ – қаноатли.

⁵ Сабук руҳ – шод-хуррам, ҳаракатчан.

⁶ Ҳарис – бирор нарсага берилши.

⁷ Малул – қайгули, фамгин, хафа.

⁸ Ҳақ – тўғри, рост, адл, лаёқат.

қалам, қаламтарош ва бунга ўхшаш нарсаларни ҳамиша ёнингда сақлағил, булардин ўзга нарсани ёдингга асло келтурмагил. Оз сўзлағил ва узоқни ўйлағил. Чунки ҳар бир толиби илм агар бу сифатда бўлса, тез фурсатда замоннинг ягона кишиси бўйлур.

Фасл. Эй фарзанд, муфти бўлсанг, диёнатлиф бўлғил. Ҳифзинг ва дарс ўқишинг кўп бўлсун, икки юзли бўлмағил, тан ва либосингни пок тутғил ва ҳозиржавоб бўлғил. Ҳеч масалага то андиша қилмагунча жавоб бермағил. Ўз тақлидингга қониъ бўлмағил ва кишининг тақлиди била ҳам иш қилмағил. Ўз раъйингни баланд билғил. Қандайдур икки изоҳга қаноат қилмағил, мутьтамад¹ одамларнинг хати бўлмагунча ҳеч сўзга эътиимод этмағил. Ҳар китобни ва жузвни (дафтарни) муқаддас тутғил. Агар рост сўз эшитмак тиласанг, сўз ва ўйларга қарагил. Ҳар одамнинг ноаниқ сўзин эшитмағил.

Хабари мутавотир²га қарагил ва ундин қочмағил, жонкуярлик била сўзламағил. Агар мунозара қилмоқ тиласанг, хасм³га қарагил, агар унинг била тортишмоққа қувватинг бўлса ва сўз узайсун десанг, далиллар ва мисоллар била мунозара қилғил. Йўқ эрса сўзни муқуф⁴ қўйғил ва бир мисолга қаноат қилғил, бир исбот била тур, рад қилма, эҳтиёт бўлғилки, кейинги сўзинг аввалгини тескари баён қилмасин, яъни бурунфи сўзни кейинги сўз вайрон қилмасин. Агар фақиҳлар мунозара қилсалар, сўзни урф-одатдин бошлиғил ва урф-одатни қиёс, мумкинот била айтғил.

¹ Мутьтамад – эътиқодали, ишончли.

² Мутавотир – оғиздан-оғизга кўчган хабар.

³ Хасм – душман, рақиб.

⁴ Муқуф – сўзни қисқартириш.

Мунозара усулида мужабот¹ ва номужабот, мумкинот ва номумкинот бўлса, айб эрмасдур. Охирги мақсадни аниқ маълум қилғил ва сўзни зийнат била дегил. Бафоят қисқа ва бафоят узун сўз айтмағил, бемаъни сўз демагил.

Фасл. Эй фарзанд, агар музаккир бўлсанг, ҳофиз бўлғил ва кўп нарсани ёд қилғил. Ҳеч киши била жадал² ва мунозара қилмағил. Курсининг устида ўлтириб (минбарга чиқиб) кўнглинг тилағон ишни даъво қилмағил, фасиҳ³ тил била дегил, либосингни пок тутғил. Мажлисда ўлтурғон муридларинг орасида таъсирили сўз айтғил, токи ҳар сўзингни эшитиб, улар наъра урсунлар ва мажлисингни қиздирғил. Халқ йигласа, сен ҳам гоҳо йиглағил.

Курсининг устида суст ва совуқ сўзлик бўлиб ўлтурмағил, муридларинг ҳам суст бўлурлар. Ҳамиша мутаҳаррик⁴ бўлғил. Сўз айтур вақтингда мажлис аҳдига қарагил, агар сўз эшитмоқ тиласалар сўз айтғил ва агар афсона эшитмоқ тиласалар афсона айтғил. Чунки авом сенга харидор бўлиб, барча сени қабул этғондин сўнг ҳеч нимадин хавф этмағил. Ёмонроқ сўзни яхшироқ баҳоға сотғил, нединким қабул вақтида ҳар нарсани сотсанг оулрлар ва лекин қабул вақтида мудом қўрқинчда бўлғилки, музаккирларнинг хасми қабул вақтида пайдо бўлғусидур. Қабул топмағон жойда қарор тутмағил. Курсининг устида вақтингда ким сендин бир саволни сўрасалар, билғонингча жавоб берғил, билмағонингга: «курсининг устида бу масалага жавоб бермоқ муносиб эрмасдур ва уйга борғил, токи уйда бунга жавоб берурман», дегил. Агар кўп лажож била

¹ Мужабот – сабаб, баҳона.

² Жадал – тортишув, мунозара, жанжал.

³ Фасиҳ – очиқ, равшан, равон.

⁴ Мутаҳаррик – ҳаракатланувчи, қимиirlab турувчи.

таъна қылсалар, вараққа ёзсалар, айтғилким: «Бу масала мулҳид¹ ва зиндиқлар² масаласидур ва буни сўрағон одам мулҳид ва зиндиқдур». ... Ҳар сўзни бир мажлисда айтсанг, уни ёдингда сақлағил, токи уни яна қайтариб айтмағил ва беобрў бўлмағил. Хушзабон бўлғил. Шаҳарларда кўп ўлтурмағилки, музаккирлар ва фолбинларнинг ризқи оёқ устида юрса кўп бўлур... Бозорда авомуннинг орасида кўп сўзламағил, то уларнинг кўзига азиз кўринғайсан ва ёмон ишдин парҳез қилғил. Курсинишинлик³ одобин сақлағил, такаббурлиқдин, ёлғон сўзлашдин ва ришва⁴дин йироқ бўлғил. Ва ўзинг қила-дурғон ишни буюргилки, халқ ҳам қилсин.

Олим беамал бўлмағай. Илмни яхши ўрганғил. Билғон илмингни яхши иборалар била баён қилғил, то бемаъни даъвобила хижолатманд бўлмағайсан. Ваъз ва пандни хавф ва рижо била айтғил... Шундоқ сўзларни қўпроқ айтғилки, ўзинг унга қодир бўлсанг ва сенга ул сўз яхши маълум бўлғон бўлса, токи бемаъни даъво била шарманда бўлмағайсан.

Фасл. Эй фарзанд, агар донишмандликда баланд даражага етиб, қози бўлсанг, оҳиста ва тамкин бўлғил ва тез фаҳм, соҳиби тадбир, пешбин⁵, мардумшунос⁶ ва соҳиби сиёsat бўлғил, ҳар гуруҳнинг урф-одатидин, йўл-йўриғидин ха-бардор, ҳар қавмнинг мазҳабидин огоҳ бўлғил. Керақдурким, қозилик ҳийлалари сенга маълум бўлғай. Агар бир вақт бир мазлум олдингга келса, унинг гуноҳи бўлмаса ва зулм етиб, унинг ҳаққи

¹ Мулҳид – дин аҳкомини бузгувчи, даҳри дин.

² Зиндиқлар – худосизлар.

³ Курсинишинлик – минбарда туриш.

⁴ Ришва – пора.

⁵ Пешбин – олдиндан кўрувчи.

⁶ Мардумшунос – одамларни текшира оловучи.

бекор кетар бўлса, ул мазлумнинг фарёдига етғил ва тадбир юзидин ул мустаҳиққа ҳаққин еткурғил.

Ҳикоят. Табаристонда бир қуззот шахс бор эрди. Бу шахсни Абу-л-Аббос Рӯёй қозијол қуззот деб атар эрдилар. Бу одам ниҳоятда олим, мастур, пешбин ва соҳиби тадбир эрди. Бир кун бир киши унинг олдига: «Мендин юз тилло олди» деб бошқа бир кишининг устидин даъво қилиб келди. Қози унинг рақибидин сўради, у инкор қилди. Қози ул инкор этғон одамдин: «Онт ичармусан?» – деб сўради. У киши: «Ичаман», – деб жавоб берди. Қози даъво этғон кишидин: «Гувоҳинг борму?» – деб сўради. У одам «Йўқ», – деб жавоб берди. Қози: «Гувоҳинг бўлмаса, унга онт берурман!» – деди. Ул чоғда муддай¹ зор-зор йифлаб деди: «Эй қози, унга онт бермагил, ул ёлғон онт ичмоқдин асло қўрқмағусидур ва онт ичарға бағоят далирдур».

Қози деди:

– Мен шариатдин чиқа олмағумдур. Ё сен гувоҳ топғил, ё у онт ичсин.

Муддай қозининг олдида ўзин тупроққа ташлаб, зор-зор йифлаб деди:

– Эй қози, менинг гувоҳим йўқдур. У, албатта, онт ичар ва мен мазлум бўлиб қолурман. Зинҳор бир тадбир қилғил, йўқ эрса мени мазлум ва мағмум² қилурсан.

Қози унинг зорланғонин кўриб билдиким, унинг сўзи ростдор. Унга деди: «Эй хўжа, на важҳ била у кишига юз тилло қарз бермиш эрдинг?»

Мазлум деди: «Бу киши неча йилдин бери мен била дўст эрди. Иттифоқо бир канизакка ошиқ бўлди. Канизакнинг баҳоси юз эллик тилло эрди ва бу кишининг эллик тиллодин зиёда

¹ Муддай – даъвогар.

² Мағмум – ғамли, ғамгин.

нақдга құдрати етмас әрди. Ҳеч илож топмай, оқшом-кундуз девоналардек ҳар тарафға юrar, йиғлар, фарёд чекар әрди.

Бир күн икковимиз томоша учун саҳро сайри-га чиқдик ва икковимиз танқо бир дашт ичинда ҳар тарафға югурдик. Бир замон икковимиз бир жойда үлтурдик. У киши менга канизак ҳақида айтиб, зор-зор йиғлаб деди: «Мен сенга йигирма йилдан бери дүст әрдим. Энди менинг ҳолимга та-раххұм күргизғил». Ноилож унинг ҳолига күнглум күйиб дедим: «Әй дүст, сенда канизакнинг баҳо-сига етуклиқ ақчанғ йүқдур. Бу ишда фарёдингга етиб, мадад бергудек ҳеч бир кишинг борму?»

У киши деди: «Йўқ, агар менинг фарёдимга сен етмасанғ, ҳолим мушкулдур!» Мен дедим: «Бори менинг юз тиллом бордурким, уни неча йилдин бери күп меҳнатлар била жамъ этдим. Ушбу юз тиллони сенга берурман. Сен буни ўзингнинг эллик тиллонгнинг устига құшиб, ул канизакни олғил ва бир ой муддат унинг била турғил, бир ойдин сүңг сотиб менинг заримни берғил». Бу киши мендин бу сўзни тинглагандин сўңг ўзин тупроққа ташлаб онт ичдики: «Бир ойдин зиёда сақламасман. Бир ойдин сўңг хоҳ зиён бўлсин, хоҳ суд бўлсин, сотиб сенинг тиллонгни берурман». Шундин сўңг мен ҳам ул юз тиллони бе-лимдин ечиб олиб, унга бердим. Ул жойда мен ва унинг ўзидан бошқа киши йўқ әрди. Мана, тўрт ой бўлибдур, канизакни ҳам сотмайдур, менинг тилломни ҳам бермайдур». Қози деди: «Сен тилло-ни унга бергон вақтда қайси ерда үлтурмиш эр-динг?» Ул деди: «Фалон дарахтнинг остида үлту-риб эрдук». Қози деди: «Унда нечун гувоҳим йўқ дерсан?» Ул хасмга деди: «Сен бу ерда үлтурғил!» ва муддаийга деди: «Сен тезроқ дарахтнинг остига бориб, ... дарахтга айтғилки: «Қози сени,

менинг олдимга келиб гувоҳлик берсун, – дер». Хасм бу сўзни эшитиб пинҳоний табассум қилди. Муддаий деди: «Эй қози, дарахт менинг сўзим била келмаса на иш қилай?» Қози деди: «Менинг муҳримни олиб борғил ва дарахтга айтғилки, бу қозининг муҳридуრ, қози сени айтиб юборди, борар эмушсан ва бу бобда кўргон ишингга гувоҳлик берар эмушсан дегил».

Муддаий қозининг муҳрин олиб дарахт томонга равона бўлди ва хасм қозининг қошида ўлтурди. Қози бошқа ҳукмга машғул бўлди ва хасмга асло қарамади. Кўп вақтдин сўнг ўзга ҳукмларнинг орасида бир мартаба хасмга қараб деди: «Фалон муддаий дарахтнинг ёнига етишфонмукан?» Ул деди: «Йўқ!» Қози яна ўзга ишларга машғул бўлди. Муддаий дарахтнинг остига бориб, муҳрни кўргузуб: «Эй дарахт, сени қози чақирадур», – деди. Бир қанча замон ўлтуриб турди. Аммо дарахтдин ҳеч жавоб эшитмади ва фамгин бўлиб қайтди. Қозининг олдига келиб деди: «Эй қози, дарахтга муҳрингни кўргуздим, лекин келмади». Қози деди: «Сен билмадинг, дарахт келиб гувоҳлик берди». Ундин сўнг қози хасмга қараб деди: «Агар заринг бор бўлса, бу кишининг ҳақин бер, йўқ эрса канизакни сотиб берғил». Ул киши деди: «Эй қози, мен бу ерда ўлтуурман, ҳеч дарахт келиб гувоҳлик бермади-ку!» Қози деди: «Агар сен бу одамдин зарни олмағон бўлсанг, нима учун «муддаий ул дарахтнинг остига етдиму эркан, ё йўқ», – дея сендин сўрағонимда, сен «йўқ» дединг ва ул вақтда нечун: «Қайси дарахтдур ва ул муддаий қайси ерга кетибдур, мен уни ҳаргиз билмасман», – демадинг». Қози хасмни мулзам қилиб, ундин тиллоларни муддаийга олиб берди.

Эй фарзанд, билғилки, барча ҳукмни китоб бўйича қилмаслар, ўз фикрлари била ҳам ҳукм

қылурлар ва бундоқ тадбирлар била ҳам ишни билиб олурлар.

Үйингда мутавозеъ¹ бўл. Ҳукм мажлисида ҳай-батлиф ўлтурғил. Лекин турушрўй бўлмағил, савлатлиф бўлғил ва ҳар турли сўзни эшитмоқда ва ҳукм қилмоқда малул бўлмағил ва сабр қиласи. Муфтиларга машварат қил. Ҳар вақт очиқ фикр била сўзлағил. Ҳеч вақтда мазҳаблар, масалалар дарсидин холи бўлмағил, тажриба ва тадбирни ҳам қўлдин бермағилки, булар қози ва қонунлар раъйига баробардур ва кўп ҳукмни шариат раъийдин қилиш қийин бўлур, қози эрса уни осон ҳал қилур. Қози мужтаҳид² доно ва порсо бўлмоғи лозим. Аммо у маълум вақтларда ҳукм қилмағай: очликда, ташналиқда, ҳаммомдан чиқиб турғон пайтида, дилтанг бўлғонида.

Маълумки, қозининг иши ҳукм қилмоқдур, аммо имтиҳон қилмоқ эрмасдур. Сўзни қисқа қилиш зарур. Тезроқ гувоҳга, ё онтга ўтсин. (Қози) даъвода мол кўплигини билса, қила олғунча тафтиш қиласун, шунда у хатога йўл қўймағай. (Қози) ўз ҳузурига одил котиблар қўйсин. У ҳаргиз ўз илки била қарз ҳужжатлари ясамасин ва ёрлиқ ёзмасин, ўзининг сўзин ва хатин қадрласин, азиз тутсин. Қозига яхши ҳунар – илм ва мулојимлиқdir...

Эй фарзанд, бу ҳунарни билғонингдин сўнг тижорат³ йўлин ҳам олдингга олғил, токи ундин улуғ наф топғайсан.

¹ Мутавозеъ – адабли, тавозели.

² Мужтаҳид – тиришқоқ.

³ Тижорат – савдо-сотиқ.

ЎТТИЗ ИККИНЧИ БОБ

ТИЖОРАТ ВА БОЗОРГОНЛИК РАСМИ ЗИКРИДА

Эй фарзанд, ҳар ҳолда тижорат ва бозоргонлик пеша ҳисобида эрмасдур, аммо уни яхши санъат деса бўлур, чунки ҳақиқатда унга назар қилсанг, унинг расм-русуми худди пешаварлар¹нинг расм-русумига ўхшашдур. Улуғлар дебдурларки, бозоргонлик ақлсизлик асосига, фойда топмоқ тартиби ақл асосига қурилмиш, бу агар жоҳиллар бўлмаса эрди, жаҳон вайрон бўлур эди, деган гапдур. Бу сўздин мақсадуд улдурки, ҳар киши молини зиёда қилмоқ тамаъсида бўлса, бир танга учун мағрибдин машриққа борур, ўзин тоққа, дарёга урур, жонин, танин ва молин мухотарарага² солур, йўлнинг ноимнлигидин³, ҳайвонотдин (дарранда, ҳайвондин) кўрқмас, шунинг учун мағрибдин машриққа, машриқдин мағрибга бориб ҳалққа неъмат келтирур. Ложарам⁴ жаҳоннинг ободлиги унинг била вожиб бўлур, бу иш бозоргондин бошқа ҳалқдин зоҳир бўлмас. Бундоқ хавотирлиқ ишни ақлнинг кўзи кўр бўлғон киши ихтиёр қилур.

Бозоргонлик икки нав бўлур ва иккови ҳам хатарлидур: бири муомала ва бири мусофириликдур. Муомала муқимларга⁵ хосдурким, касод молларни фойда тамаъ била сотиб олурлар. Бундай мол хатарлидур ва бу ишда далир⁶, пеш⁷ бин⁸ киши

¹ Пешаварлар – ҳунармандлар.

² Мухотара – кўрқинчли, хатарли.

³ Ноимн – хавфли.

⁴ Ложарам – чорасиз, ноилож.

⁵ Муқим – доимий турувчи.

⁶ Далир – шизкоатли.

⁷ Пеш – илгари, олдин.

⁸ Бин – кўруувчи.

керакдурким, касод матони суд умиди била олгай. Демак, ҳар тариқа йўл била бозоргон ўзининг моли ва танига далир бўлмоғи, бебок¹ бўлмаслиги, ўзининг нафи учун ўзгаларнинг зиёнин тиламаслиги керакдур. Зердаст² бўлғон киши била муомала қилғай, ўзидан улугроқ одам билан муомала қилиши мумкинки, ул диёнатли ва муруватли бўлғай, фирибгар кишидин қочгай. Матонинг яхши, ёмонин билмағон одам била муомала қилмағай ва моли оз одам била ҳам муомала қилмағай. Агар муомала қилса, фойдадин тамаъ қилмағай, токим икковининг орасидағи дўстлик вайрон бўлмағай.

Фойдадин умид этса, нася била муомала қилмағайким, оз суд кўп зиён келтиур.

Ушоқ (майда) нарсаларга назар солмағилки, паст назарлик улувларга зарап еткарур. Бозоргонлик зарарининг асли – беҳуда харж қилмоқдур. Агар молдин суд қилсанг, суддин қил, то суд қилмағунча сармоядин олмағил, нединким бозоргонликнинг катта зиёни сармоядин емакдур. Матонинг яхшиси улдурким, ботмон тош била олиниб, мисқол била сотилса. Аммо суд умиди била ғалла олмоқдин парҳез қилғил, нединким ғаллафуруш ҳамиша бадном ва бадният бўлур.

Диёнат камоли савдода ёлғон сўз айтмакдур, нединким коғир ва мусулмоннинг орасида савдода ёлғон сўз айтмоқ кўп ёмон феълдур. Сотмагунча ҳеч молни қўлдин бермағил. Муомалада шарм қилмағилки, улуғлар дебдурлар, шармдин кўп умид ва орзулар ҳосил бўлмағусидур ва лекин кўп бемуруватлик ва бедиёнатлик ҳам бўлма, бу фойда бермас. Дебдурларки, бозоргонлик-

¹ Бебок – торгинмас, ҳаёсиз, бепарво.

² Зердаст – бировнинг қўли остидаги шахс.

нинг асли тасарруф ва муруватдур, нединким булар молни омон сақламоққа сабаб бўлур.

Ҳикоят. Эшитибманким, бир бозоргон бўёқчининг дўконида юз тиллога мато савдо қилди ва савдодин сўнг унинг била бўёқчининг орасида ҳисоб қилурда бир танганинг устуда хилоф воқеъ бўлди. Бўёқчи муҳташам киши эрди, деди: «Эй тожир¹, сен бир танганинг устида эрта тонгдин пешингача низо қилурсан, ўзга тожирлар бундок қилмас эрдилар».

Алқисса (тожир) кўп сўзлаб, қичқириб бўёқчининг бошин оғритди ва бўёқчи бирор тариқа йўл била бул ғавғодин қутулмоқ бўлди. Охири бўёқчи танг бўлиб, унга бир танга берди ва тожир тангани олиб кетди. Бир киши бу ҳолни кўрди ва тожирни кўп музаммат қилди.

Бўёқчининг шогирди тожирнинг изидан бориб, унга деди: «Эй тожир, менинг шогирдона ва ширинкомамни берғил». Тожир ҳалиги тангани унга берди ва ул тангани олиб қайтиб келди. Бўёқчи шогирдига деди: «Эй ҳаромзода, ул тожир эртандин то пешингача бир танга учун урушиб, ҳалқдин ҳеч шарм қилмади, на тамаъ била унинг изидин бординг?» Шогирд тангани устодига кўргузди. Бўёқчи ҳайрон бўлуб ўзига дедики: «Субҳоналлоҳ, бу шогирд хушрўй эрмасдур ва бағоят ёшдур, бошқа бир ҳеч гумон ҳам йўқдур. Ул тожир бунча баҳиллик била нечук бундок саҳоват қилди?» Бу сўздин сўнг тожирнинг изидин бориб деди: «Эй хўжа, мен бутун сендин кўп таажжуб иш кўрдим. Бир танга учун бутун жамоанинг орасида мунозара қилиб, менинг бошимни оғритиб, ул тангани олдинг. Ундин сўнг ул тангани шогирдимга ширинкома учун бердинг. Менинг бошимни оғритмоғинг на-

¹ Тожир – савдогар.

дин эрди?» Тожир деди: «Бу ишга таажжуб кўргузмағил. Мен бир бозоргон кишидурман. Бозоргонликнинг шарти шундоқдурки, савдо вақтида агар киши бир дирам зиён қиласа, гўё умрининг ярми кетғондек бўлғусидур. Мурувват вақтида агар кишидин бемурувватлик зоҳир бўлса, ўз аслининг нопоклиғига далилдур. Демак, мен умримни кам қилғудек зиён этмадим ва аслимнинг поклиғига гувоҳлик ҳам бердим».

Бозоргоннинг сармояси оз бўлса, ўзгаларга баҳс қилиб улуғ ишларга аралашмасун. Ўз ҳолига лойиқ мато олсун ва унинг била ўз баҳтин имтиҳон қилсун.

Бундай пайтда агар зиён қиласа ҳам сармоядин ортиқ зиён бўлмағусидур.

Агар бир киши фалон жойга еткурғил деб, нома топширса, бурун номани ўқиб кўрсин, ундин сўнг олиб кетсин, нединким чирмаб топширилғон номада кўп балолар бўлғусидур ва нечук ҳол бўларин билиб бўлмағусидур. Ҳар бир одам нома топширса, бурун очиб ўқимоқ керакдир. Чунки бозиргон ҳар шаҳаргаким борса, ёмон хабар тарқатмасун, ҳатто таъзият, мотамли хабарни ҳам еткурмасун, шодлик хабарин айтурда нуқсон қилмасун. Йўлдошсиз ҳеч йўлга қадам урмасун ва тажрибакор ҳамроҳ талаб қилсун ва молларни кўп одамнинг ўртасига қўйисун. Агар пиёда бўлса, отлиқлар била ҳамроҳ бўлиб юрмасун, бегона кишидин йўл сўрамасун. Агар яхши одам эканин билса, сўрсун, нединким кўп нопок одамлар бўлурки, йўлни нотўғри кўрсатурлар. Ҳар кишиким йўлда йўлиқса, очиқ юзлик била салом берсун, ўзини мустар, ғамнок қилиб кўргузмасун. Озуқсиз йўлга кирмасун ва ёзда қишлибосин олмай юрмасун.

Гарчи йўл бехатар бўлса ҳам бадрақ¹ ва раҳдор²ни хушнуд қилсун. Бориб бир жойга тушфонда амин (тўғри кўнгил) ва диёнатли одамнинг уйифа тушсун. Уч тоифа била суҳбат тутсун: бири жувонмарди иёргиши била; бири муруватлик одам била; бири йўл билатурғон ва ўзгаларнинг ҳақин ҳимоя қилатурғон киши била. Молни осоийиш ва фароғат вақтида исроф қилмасун, токи бир вақт келиб зарур бўлса ранж чекмасун. Ҳар ишни қила олса, ўзи қилсун ва бошқа кишига буюрмасунки, фирибгар кишилар кўп бўлур. Аммо ростлик ва диёнатликни бозоргонликка сармоя деб билсун. Олмоқ ва сотмоқда чаққон бўлсун, кўп олиб, кўп сотсун. Қила олса, кишига насия қилмасун. Ҳар кимга насия мато бермасун. Агар насия қилса, бир неча одамлар била қилмасун: андоқким, матоси оз одам била, янги бой бўлғон одам била, саййид била, ёш бола била, қозининг вакиллари, шаҳарнинг муфтилари ва ходимлари била. Ҳар одам бу тоифалар била насия муомала қилса, ҳаргиз пушаймонликдин ва дардисарликдин қутулмоғусидур. Имтиҳон қилмағон одамдин бехатар бўлмасун, имтиҳон қилғон одамни ҳали имтиҳон қилинмағон одамдин илгари тутмасун, нединким умрида бир имтиҳон қилинмағон одамнинг қўлига тушфусидур. Масалда бордурки, имтиҳон қилинғон дев, имтиҳон қилинғон бўри имтиҳон этилмағон одамдин яхшидур.

Кишини киши орқали имтиҳон қил, ундин сўнг ўзинг имтиҳон қилиб кўр, нединким бир одам бирорвга мувофиқ бўлмаса, бошқа бирорвга мувофиқ бўлиши мумкин. Аммо ҳар кишини текшириб кўриб, ишда имтиҳон қилғил, тўғридан-тўғри

¹ Бадрақ – йўл бошловчи, карвон бошлифи.

² Раҳдор – йўл соқчиси.

имтиҳонга ўтмағил ва сўзига ишониб қўймағил. Нақд чумчуқни насия товусдин афзал бил.

Сафар қилсанг, дарё йўлининг ўн беш тилло фойдасидин қуруқлик йўлининг ўн тилло фойдасини илгари тутғил, нединким дарё йўлининг суди тезлашар ва зиёни бошдин ўтар. Оз фойда учун барча сармояни барбод бермағил. Қуруқ йўлда агар хатар етса молга етади, аммо жон қолади. Молнинг иложи бўлур, дарёда эса ҳам молга, ҳам жонга зиён ва зарар етур. Дунёнинг ишини подшоҳнинг ишига ўхшатибдурлар: оз-оздин келур ва бирдин кетур, лекин таажжибот осорин¹ қўрмоқ учун бир мартаба кемага минсанг раводур. Баҳо қўймасдин олмоқ ва сотмоқ қилмағил.

Савдо жадалида ишни ўзгаларнинг қўлига бермағил. Ўзингнинг суд ва зиёnlарингни ҳамиша ўзинг ҳисоб қилғил, нединким ҳисоб қилмоқ ва на чоғлик суд ва зиён бўлғонин билмоқ бозоргон учун кўп фойдали ишдур. Ҳамма вақт оз ва кўп фойдани, оз ва кўп зиёнини фикр эт ва мутолаа қил, токи суд ва зиёningдин ғофил қолмағайсан. Кишига хиёнат қилмоқдин қочғилики, ҳар ким бирор кишига хиёнат қиласа, ўзига хиёнат қилғонидур.

Ҳикоят. Шундоқ эшитдимки, бир кишининг қўйлари бағоят кўп эрди. Унинг бир порсо ва диёнатли чўпони бор эрди. У ҳар куни қўйларни соғиб, ҳар на ҳосил бўлғон сутни қўй эгасининг олдига келтирур эрди. Қўй эгаси ул сутга ярим ҳисса сув қўшиб, чўпонга сотғил деб берур эрди. Чўпон унга бундоқ насиҳат берур эрди: «Эй хўжа, мусулмонларга хиёнат қилмағилки, узингга зарар еткарурсан». Ул киши чўпоннинг насиҳатини эшитмасдан ул ишни қилур эрди.

¹ Таажжибот осорин – ажойиботларни.

Бир кеча баҳор вақтида чўпон қўйларни осойиши учун бир сел оқадифон паст жойга қўймиш ва ўзи баланд жойга чиқиб уйқуга кетмиш эрди. Иттифоқо кўп ёмғир ёғиб, сел оқиб келиб қўйларни оқизиб кетди ва барча қўйлар ҳалок бўлди. Сўнгра чўпон шаҳарга келди. Кўй эгаси унга деди: «Бугун нима учун сут келтурмадинг?» Чўпон деди: «Эй хўжа, мен сенга неча бор сутга сув қўшмагил, охирини ўйлагил, дедим. Лекин менинг сўзимни ҳаргиз эшитмадинг. Охири сутга қўшғон сувларинг ҳаммаси йиғилиб, ўтган кеча бир сел бўлиб шундай оқдикки, ҳамма қўйларни оқизиб кетди».

Бас, эй фарзанд, хиёнатдин қочфилки, ҳар киши бир мартаҳа хиёнат қиласа, унга ҳеч одам асло эътимод қилас. Ростликни пеша қиласки, норостлик улуғ қароқчиликдур. Олмоқ ва сотмоқда мулоийм бўлғил ва кишига ваъда қилас. Агар ваъда қилсанг хилоф этмагил. Оловчи одамга ёлғон сўз демагил ва агар сўз десанг, рост сўзни айтғил. Муомалада олмоқ ва бермоқ ҳужжатига огоҳ бўлғил, ҳужжат бермоқ тиласанг, токи аввал ҳақни қўлга олмагунча ҳужжатни қўлдин бермагил.

Ҳар жойга борсанг, ошно талаб қилас. Билмағон киши, жоҳил ва нопоклар била сафар қилас. Агар кишига олмоқ тиласанг, ҳарна сотмоқ тиласанг, буғунги нархидин огоҳ бўлғил ҳамда шарт ва паймон била сотфилки, охиррида дардисарликдин кутулғайсан. Ҳукмронлик йўлини илгари тутфилки, улуғларга улуғроқ иш уй асбобин тузатмоқ ва керак нарсаларни олмоқдур. Аммо бирор нарса олмоқ тиласанг қутлуғ (яхши) вақтда олғил. Ҳар турли керак нарсалардин бир йилга етадифон қилиб икки ҳисса олғил.

Ундин сүнг нархдин хабардор бўлғил. Нарх оғир бўлғон чоғда ул олғон нарсангнинг ярмини сотғил, токи бир йилга етадигон озуқинг муфт¹ бўлғай. Бу ишдин ҳеч гуноҳ, бадномлик бўлмагусидур ва ҳеч одам бу бобда сени баҳил одам деб ўйламас, нединким бу иш кадҳудолик зарурати жумласидандур ва баҳиллиқдин эрмасдур, бу ишда ҳеч айб йўқдур. Кадҳудоликка зарар етмасин десанг, шундай тадбир қиласилки, дахлинг харжингдин зиёда бўлсин, токи кадҳудолифингга халал етмасин. Агар дахлингни зиёда қиммоқ тариқин билмасанг, дахлингдин зиёда харж этмакни тарқ этғил.

Агар бозоргонлик пешаси сенга насиб бўлмаса, шарофатлиф илм ўрганмоқ ва ундин шуҳрат қозонмоқ тиласанг, тиб илмидин судмандроқ² илм йўқдур...

ЎТТИЗ УЧИНЧИ БОБ

ТИБ ИЛМИ РАСМИ ЗИКРИДА

Эй фарзанд, агар табиб бўлсанг, тиб илмининг усулини яхши билғил, нединким бу илм яхши илмдур ва ул фойдали илмлар жумласидандур. Билғил, одамларнинг танасида нимаики бўлса, ё табиатга тегишли бўлади ёки табиатдин ташқари бўлади. Табиатга дахллифи уч хил бўлади: биринчи хили таннинг барқарорлигини ва мустаҳкамлигини сақлайди, иккинчи эргашувчи (тавобеъ)дурки, тани бу ҳолдин бошқа бир ҳолга айлантиради, учинчи хили эса, табиатдин ташқари бўлиб, бевосита ёки билвосита танага зарар етказади.

¹ Муфт – текин.

² Судмандроқ – фойдалироқ.

Инсоннинг танасин ушлаб турғувчи нарсалар ё моддий ёки сурати ҳиссий бўлур. Моддадин узоқ бўлғон унсур тўрттадур: ўт, сув, тупроқ ва ҳаводур. Ёки мижоз – ул унсурга яқин бўлур. Уларнинг миқдори тўққизта бўлур: бирни мўътадил, саккизтаси номўтадилдурки, уларнинг тўрттаси содда, тўрттаси мураккабдур. Ана шуларнинг барчаси мижозга яқинидур. Бундин ахлот миқдори тўрттадур: қон, сафро, балғам, авдо (сариқяшил суюқлик). Ахлотнинг яқинлари ана шулар. Масалан, аъзонинг таркибий бир таълимотига қарағонда иккитадур. Бу баён қилғонларнинг маъноси шундайки, аъзонинг таркиби ахлотдандур, ахлотнинг таркиби эрса мижоздандур. Мижознинг таркиби унсурдандур. Унсур одам танасидин узоқроқ моддадур, ахлот яқин моддадур.

Сурати ҳиссий уч турда бўлғусидур: қавий¹, ал-афъол² ва арвоҳ³. Қавий ҳам уч қисмдур: нафсоний, ҳайвоний ва табиий. Нафсоний олти қисмдур: кўрмоқ, маза қилмоқ, эшиитмоқ, ҳидламоқ, қувват, ҳаракат. Бу қисмлар аъзонинг сони била баробардур. Қувват-ҳаракат уч бўлимин иборатдур. Булар: хаёл қилмоқ, фикрламоқ ва хотира. Ҳайвоний қавий икки хилдур: фаол, но-фаол. Табиий қавий уч хилдур: ишлаб чиқарувчи, ташкил этувчи, сингдирувчи.

Ҳаракат-қувватнинг миқдори ҳам нафсоний, ҳайвоний ва табиий бўлғусидур. Нединким, ал-афъол қавий биринчиидур ва ҳаракат-қувватнинг таъсиридур. Шундай бўлғоч, ал-афъол қавий миқдори била мос келғусидур.

Арвоҳ уч қисмдур: нафсоний, ҳайвоний ва табиий. Шул боисдин ҳам арвоҳ қувватнинг хо-

¹ Қавий – қувват.

² Ал-афъол – ҳаракат.

³ Арвоҳ – руҳ.

димиидур. Шу сабабдин ал-афъол миқдори қавий миқдори била мос келгай. Таннинг мустаҳкамлиги ва барқарорлиги бирон бир нарсага боғлиқдур. Масалан, семизлик мижоз совуқдифининг оқибатидур, қизиллик қоннинг, сариқлик сафронинг оқибатидур, қон томирининг ҳаракати ҳайвоний кучнинг оқибатидур ёки ғазаб ҳайвоний кучнинг, нофаол ҳаракатнинг оқибатидур, иффат мўътадил даражадаги шаҳват қувватининг оқибатидур, донишмандлик сўзловчи руҳий вазминлигининг оқибатидур.

Таннинг бир ҳолдин иккинчи ҳолга айланиши зарурий сабаб деб аталади. Бу олти хилдин иборат: биринчи – ҳаво; иккинчи – таом; учинчи – ҳаракат; тўртинчи – уйқу ва бедорлик; бешинчи – киши табиатининг хушнудлиги ва маъюслиги; олтинчи – тандаги ўзгаришлар, масалан, ғам, ғазаб, ҳавф ва шунга ўхшаш руҳий ҳолат. Буларни шунинг учун зарурий дерларки, одам булардан холи бўла олмайди, булардан ҳар бири инсон та-насида ҳаракатга эга бўладилар. Агар инсон шуларнинг биридин нотўғри фойдаланса, касаллик ва иллат пайдо бўлғусидур. Табиатдин ташқари уч тур бордур; ўзаро ўхшаш аъзоларнинг касаллик сабаблари, ўзаро ўхшаш бўлмағон аъзоларнинг касаллик сабаблари ва боғланиш бўлмасликнинг сабаблари.

Аъзолар ўзаро ўхшаш касалликларининг сабаби ёки иситма касали беш хил бўлади: беморликка сабаб бўлувчи – яра (бу ҳам беш қисмдур), bemorlikka сабаб бўлувчи намгарчилик ёки қурғоқчилик. Бунинг ҳам бири тўрт қисмдур. Ўзаро бир-бирига ўхшамағон аъзолар касаллигининг сабаблари ёки ноҳушликнинг сабаблари, яратилишда тушғон bemorliknинг сабаби,

миқдори ёки ададда тушгон беморликнинг сабаби бўлур. Яратилишдаги беморликнинг сабаби ё шакл беморлигининг сабаби бўлади, ё қўркув касаллигининг сабаби бўлур ва бу етти қисмдур, бунга сержаҳдлик сабаб бўлур. Бу икки қисмдур. Миқдор беморлигининг сабаби уч хилдур, адад беморликларининг сабаби икки хилдур, аъзоларнинг бўғин-бўғин бўлиб ириши тўрт хил бўлур. Касаллик уч қисмдур: ўхшаш аъзоларнинг касаллиги, ўзаро ўхшаш бўлғон аъзоларнинг касаллиги, ўзаро ўхшаш бўлмағон аъзоларнинг касаллиги. Аъзоларнинг бўғин-бўғин бўлиб иришини муштарак касаллик дейилади. Бундай касаллик ўхшаш аъзоларга ва ўзаро ўхшаш бўлмағон аъзоларга тушади.

Ўхшаш аъзоларнинг касалликлари саккиз қисмдур: тўрттаси муфрад¹, тўрттаси мураккабдур. Тўртта муфради шулардин иборат: иссиқ, совуқ, нам, қуруқ; тўртта мураккаби шулардин иборат: иссиғу нам, иссиғу қуруқ, совуғу нам, совуғу қуруқ.

Ўзаро ўхшаш бўлмағон аъзоларнинг касалликлари тўрт хилдур: ташқи кўринишнинг касаллиги, миқдор касаллиги, аҳвол касаллиги, адад касаллиги. Ташқи кўринишнинг касаллиги тўрт хилдур: бу касаллик шаклга, айрим аъзоларнинг нуқсонига, асабиятга, юмшатишга келиб тушади. Миқдор беморликлари икки хилдур: бир нарсани тортириш йўли била касаллик туғилади, бир нарсага заар келтириш била касаллик туғилади. Аъзолар аҳволининг касалланиши ҳам икки хил бўлади: ё бир аъзо ўз жойидин йўқолади, ё бошқа аъзолар била фасодга мойил бўлади. Адад беморликлари ҳам икки хил бўлади: ё

¹ Муфрад – содда.

күпайиш йўли била касаллик пайдо бўлади, ё камайиш йўли била касаллик туғилади.

Бўғин-бўғин ириш эса ё ўхшаш аъзоларга ёки ўзаро ўхшаш бўлмағон аъзоларга ёхуд ҳар иккавига тушадур.

Ирз¹ уч қисмдур, ҳаракатга тааллуқли бўлғон ирз; касалнинг ташқи аломати ёки қайт қилишга тааллуқди бўлғон ирз ёхуд отилиб чиқишида пайдо бўлғон ирз. Алатьғолга тааллуқли бўлғон ирз уч хилдур; қайт қилишга тааллуқли бўлғон ирз уч қисмдур; отилиб чиқишида пайдо бўлғон ирз ҳам уч қисмдур.

Билиш керакки, тиб илми икки қисмдур: назарий ва амалий. Амалий қисмини баён қилдим. Энди буларнинг назарий қисмини қандай қидириб топиш кераклигини баён қиласман, тики ҳар бирининг изоҳини ва маҳсудини билгайсан, ўзинг китобдин излагайсан.

Юқорида сўзлағонларимни Жолинус^{40*} ҳаким «Ўн олти» («Ситта ашар»^{41*}) номли китобида изоҳлайдур ва мукаммал баён қиладур, юқоридағиларнинг баъзиларини эса «Ўн олти»дан ташқарида изоҳлайдур. Аммо истиқсот илми қанча бўлмасин, табибга керакдур, (бу илмни) «Ўн олти» мажмуасифа кирғон «Истиқсот» китобидин излагил. Мижоз илмини эрса, «Ўн олти» мажмуасифа кирғон «Мижоз» китобидин излагил. Ахлот илмини «Ўн олти»га кирғон «Қуввати табия» китобидағи иккинчи мақоладин излагил. Табиатнинг қуввати ҳақидаги илмни «Қуввати табия» китобидин излагил, бу китоб ҳам «Ўн олти»га кирғон. Ҳайвонларнинг қувватлари ҳақидаги илмни «Ўн олти»га кирғон «Аннабз» китобидин излагил. Нафсоният қуввати ҳақидаги илмни «Буқрот ва Афлотун қарашлари» китобидин из-

¹ Ирз – ташқи белги.

лағиғ. Бу китобни ҳам Жолинус тасниф қылғон, «Ўн олти» китобига кирмағон. Агар шу илм юзасидин кучли олим бўлишни истасанг ва ҳамма вақт изланишни давом эттирсанг, истиқсот ва мижоз илмини «Ал қави ва-л-фаод» ва «Ас-Самоъ ва-л-олам» китобларидин излағиғ. Қувват ва ҳаракат илмини тиласанг, «Ан-Нафис», «Ал-Ҳисс ва-л-махсус» китобларидин излағиғ. Аъзолар илмини «ал-Илал ва-л-амроа ал-мараз» китобининг биринчи мақоласи «Ал-Ҳайвон ва ақсому-ал ал-мараз» китобидин излағиғ. Бу китоб ҳам «Ўн олти» китобига кирадур.

Фасд. Ундин сўнг беморни шиша ичига бавл қилдириб кўргил, бавл қылғонда сийдикнинг рангиға қарағиғ, агар сийдик оқ бўлса ва тиниқ бўлмаса, у киши бир ғамдин касалдур. Агар оқ ва тиниқ бўлса, бир кароҳатдин касалдур.

Агар сийдик гуруч ранг бўлса, унда майдада нарсалар бўлса, ошқозон бузилиш касалидур. Агар сийдик ёғдек кўринса, шишанинг тубида бир чизиқ қўринса, бу ўлим яқинлиғи аломатидур. Агар заъфарон ранг бўлса, унинг касали иситма ва сафродур, қон сафро била ҳам қўшилғон бўладур. Агар сийдикнинг усти сариқ, таги қора бўлса, ҳужайралар йиринглашидур, буни дори қилмағиғ. Агар сийдикнинг усти қора, шишанинг ости сариқликка, кўк рангга мойил бўлса, бемор тузалади. Агар бемор алаҳласа ва сийдиги қизилга мойил қора бўлса ёки қон аралашғон бўлса, ундин эҳтиёт бўлғиғ. Агар сийдиги қора бўлиб, устида қон бўлса, бундай беморнинг яқинига бормагиғ, агар сийдиги қора бўлиб, унда кепакдек нарса пайдо бўлғон бўлса ёки устида қон турғон бўлса, ул касалдин умид узғиғ. Агар сийдиги сариқ бўлса унда офтобдек бир нарса ярқираб кўринса ёки қизилга мойил сариқ бўлса, касали қондандур, бу bemor-

дан қон олсанг тезроқ тузаладур. Агар сийдиги сариқ бўлиб, унда оқ чизиқлар кўринса, касаллик тузалиб кетадур. Агар сийдиги қўк рангга мойил сариқ бўлса, қора жигарнинг касаллиги дур. Агар сийдиги қўк рангга мойил бўлса, унда майда курт-дек нарсалар кўринса бавосил касалидур.

Сийдикни кўриб бўлғонингдин кейин касалликнинг турларини қидирғилки, касалликнинг турлари кўпдир ва ҳаммаси бир хил бўлмайдур.

Фасл. Энди гарчи сўз узоқ бўлса ҳам бу илмнинг илмий томонин баён этгумдур, чунки илм ва амал вобасталикда бир-бирига жисм ва руҳдекдур. Жисм руҳсиз, руҳ жисмсиз бўлмағусидур. Агар муолажа қўлмоқ истасанг шуни билғилки, беморнинг муолажаси икки хил бўлур. Шунинг учун табиб токи bemorning қувватидин, мижознинг ҳолидин, иллатнинг сабабидин, bemornинг ёшидин, сўзидин ва табиатидин огоҳ бўлмағунча ҳеч қачон муолажага қўл узатмаслиги лозим.

Беморликнинг аломатлари турлича бўлуб, улар қўйидагичадур. Агар bemorni кўргон вақтингда уни уйқуда ётғондек хаёл этсанг ва сўз айтғонда жавоб берса, аммо сени танимаса, кўзин ярим очиб яна юммаса, бу ёмон аломатдур. Агар ҳушсиз бўлса, қўлин силтаб тортиб урса ва ётғон жойида изтироб ва фифон қиласа ёмон аломатдур. Яна агар ҳушсиз бўлса ва ҳар вақт қичқирса, бармоқлари ни тишлаб тишига қисса, бу ҳам ёмон аломатдур. Агар bemor кўзининг оқи аввалгисига нисбатан кўпроқ оқарив кетса ва қароси бурунгидан зиёда қаро бўлса, тилини оғзининг атрофида айлантираса, қаттиқ-қаттиқ нафас олса, бу ҳам ёмон аломатдур. Агар bemor ҳамиша қайт қиласа, ранги қизил, сариқ, қаро, умуман, ҳар турли рангга айланса, бу ҳам ёмон аломатдур.

Бу айтилғон аломатлар қайси беморда зоҳир бўлса, унга муолажа қилмағил, чунки фойдаси йўқдур. Қайси беморда бу аломатларни кўрмасанг, унинг тузалишига умид боғлағил.

Фасл. Шундин сўнг bemorning томирига қўл ургил. Агар томири қаттиқ урса, билғилки, қон фолибдур. Агар қўлининг кичик бармоғининг остидаги томири қаттиқ урмаса, яъни суст, мулоийм урса, балғам голибдур. Агар қўлдаги катта бармоқнинг томири мухолиф урса ҳам унинг майли қайси тарафга кўпроқ бўлса, ўша тарафга ҳукм қилғил.

Буни билғонингдин кейин касаллик овқат била кифояланса, дори ва малҳам била тузаладигон бўлса, маъжусун ишлатмағил ва дори беришга журъат қилмағил. Бемор тинчлик ва оромдин тузалса, қайт қилдиришга ортиқча ҳаракат қилмағил, агар иш ҳаддин ўтса, дори қилишга ва тинчлантиришга машғул бўлғил. Касални асло қўрқитмағил, касаллик ўтиб кетмасдин илгари даволагил. Қорин бандаси ва беканоат bemorga қаттиқ парҳез буормағилки, у қабул қилмайдур. Сен унинг еган таомини йўқ қилишга ҳаракат қил.

Тиббиётнинг энг яхши нарсаси дорини ва касални билишдур. Бу илм ҳақида кўп гапирдимки, баъзи кишилар узоқ сўзлашни яхши кўрурлар.

Бундин сўнг фойдали илм – илми нужумдурки, уни ўрганишга ҳаракат қил ва бу илм кўп фойдалидур.

ЎТТИЗ ТҮРТИНЧИ БОБ

НУЖКУМ (ЮЛДУЗЛАР) ВА ҲАНДАСА (ГЕОМЕТРИЯ) ИЛМИ ЗИКРИДА

Эй фарзанд, агар мунажжим¹ бўлмоқ истасанг, ҳаракат қилиб риёзиёт² илми устида кўпроқ ма-шаққат чекгил, чунки илми аҳком³ яхши илмдур, уни батамом билиб бўлмайдур ва уни тўғри билғон, хато қилмагон одам йўқдур. Аммо, ҳар ҳолда, аҳком илмининг самараси бордур. Ҳаракат қил, токи унинг усулини яхши билғил, нужумларнинг тақвим⁴ муқаддимасини тўғри тузғил. Нужумларнинг толеини дуруст билғил. Агар нужум толеини яхши билсанг, башоратнинг асли ҳам тўғри келғусидур, тахминий толега эътиимод қилмагил.

Намудорот⁵ ҳисоби тўғри чиқғондин сўнг ну-жумлар ҳолатидин чиқорғон ҳукминг ҳам тўғри бўлгусидур.

Масалан, толе (юлдузнинг) чиқиши ва толе да-ражасидин, ой ва ойнинг бурж⁶ларидин ва ну-жумларинин ойга қандай қилиб яқинлашуви-дин хабардор бўлғил. Яна шундай нужумлар ҳам борки, уларнинг чақнаб туришидин огоҳ бўлғил. Булар шундай нужумларки, улар худди оқ нар-гис гулига ўхшайдур ва худди наргис янглиф бўйсунғондек кўринурлар. Улар юксак мартаба баҳт-саодат нишонлари била тўлгон – буларнинг

¹ Мунажжим – юлдузшунос, астроном.

² Риёзиёт – математика.

³ Аҳком – ҳукмлар, қонунлар, фалсафа.

⁴ Тақвим – сайёralарнинг ҳол ва ҳаракатларини кўрса-тuvчи йиллик жадвал.

⁵ Намудорот – гороскоп – ўрта аср мунажжимларининг юлдуз қарайдиган асбоблари.

⁶ Бурж – қадимги астрономияда Қуёшнинг йиллик дои-расидаги ўн икки нуқта.

ҳаммаси офтоб била намоён бўлур. Буларнинг ҳеч биридин ғофил бўлмагил.

Сен башорат қилишга оид жадвални тузғон вақтингда нужумларнинг ҳолатини, шунингдек, намудоротни, ой ва унинг чамбар йўлини, хўжангга тегишли бўлғон ой чамбарининг белгисини, чамбар белгиси ва нужумлар ҳаракатини, қачонгacha бу белгиларнинг ҳар бир чамбарда мавжуд бўлишини ва қай хилда бўлишини, хўжанинг хонадонида муҳтоҷликни ва бу муҳтоҷликдин қутулишни кўрсатувчи ой ва нужумларнинг сиалжишини, уларнинг намудорот даражалари устидин баланд кўтарилишини, ҳаракатсиз нужумларга ҳаракатли нужумларнинг яқинлашувини ёки даража ва ҳаракат бўйича юлдузларнинг тутилишини, даражанинг зарарли таъсирини, чақнаб турувчи даражани, яъни қуёш даражаларининг қўтарилиши, пасайишини билмасдин туриб жадвал тузмағил, яширин сирларни очмағил, буларнинг ҳеч бирини унутмағил.

Ўн икки белги ва даражалар, учбурчаклар, чегара шакл, баландлик гуруб¹, фамхона, шодлик, офат, авж ва энг паст (қуий) кабиларни билғонингдин кейин баҳт ва толедин хабар беरувчи хилма-хил нужумларга, булутсиз осмонга қарагил, ой ва нужумларнинг ҳолига назар ташлағил, масалан, баҳтли ва баҳтсиз, эзгулик ва ёмонлик, интилиш, яқинлашиш ва тармоқланиш нурдин узоқлашиш, яқинлашишдин узоқлашиш, яқинлашув ва итариб ташлаш, нур бериш, фикр бериш, кун бериш, табиий хоссани бериш, келишувнинг бузилиши қаршилик, яратиш, қўшилиш, уларни зиёда қилиш сайёра ҳаракатининг беш тури каби буларнинг ҳамма-

¹ Гуруб – куннинг ботиши.

сидин огоҳ бўлғондин сўнг ҳукмлар тўғрисида сўзлағил, шунда сенинг ҳукминг тўғри бўлғай. Бу жадвалнинг ҳукми эътимодли устодлар томонидин шундай меҳнат била юзага келмишки, булар ёзув била машхур бўлмиш эдилар. Унинг ўртасига қарағонлар кенг жойнинг йифиндиси ни кўргонлар. Сен унинг тартибини яхшилаб ўйлаб кўргил, яъни бир хато рўй бермасун. Шунча эҳтиёт қилғонингдин кейин ҳам ҳар қандай ҳукм этсам, шундай бўлади, деб эътимол қилмағил ва сўзга ишонмағил.

Яширин фикрларни сўрасалар, айтилиши мумкин бўлғон ҳамма масалани айтаверма, шунда ҳукмингнинг кўпи тўғри чиқиши керак.

Туғилишга келғонда, мен буни ўз устозимдин эшитғонманки, ҳақиқатда одамнинг туғилиши анодин туғилғон вақти бўлмайди. Эрнинг уруғи анонинг бачадонига тушади ва бачадон қабул қиласди. Буни аслий туғилиш дейилади, яхшилик ва ёмонлик у била боғланур. Бола анонинг бачадонидин тушғон соатидан кўринишига буюк таҳвили кубаро¹ дерлар, таҳвилнинг йилдин-йилга ўтишини ўрта таҳвил дерлар... Эркак уруғида нимаики кўринса анонинг қорнига ҳам ўша ўтади...

Буюк таҳвили кубародаги тулуъни² ўтғон устодларнинг йўли бўйича баён қиласи, шундин кейин қандай ҳукм қилсанг, юқорида айтғонимдек қил. Агар вақт масаласини сўрасалар, аввал вақт намудоротига ва унинг соҳибига қарағил, ундин кейин ойға ва ойнинг буржига, унинг соҳибига ҳамда ойга яқинлашиб борадигон нужумга, ойга тескари бўлғон нужумга қарағил,

¹ Таҳвили кубаро – энг улуғ нарсанинг бир ҳолдан бошқа бир ҳолга кўчиши, ўзгариши.

² Тулуъ – кўриниш, қуёш ёки ой.

буни ё тулуъда ёки тиккада топурсан Агар тиккада бир нужумдин кўпроқ нужум кўрсанг, ким устун турғонлигин, кимнинг баландлигин ўшал нужумга қараб гапирғил, шунда сен тўғри гапирғон бўлгайсан.

Фасд. Мен аҳқом шартларидан бир қанча сўзни баён қилдим. Энди, агар, эй фарзанд, мухандис ва танобчи бўлсанг, ҳисобни яхши билғил. Зинҳор бир соатни ҳам ҳисобни такрорлашдин холи ўтказмағил, чунки ҳисоб шиддатли илмдур. Агар ҳар вақт ер ўлчасанг, бурчакларни аниқда, қовурғалари хилма-хил бўлғон шаклларни хор қилмағил, «буни ўлчайман, бошқаларни тахмин била биламан» демагил, чунки ўлчагон вақтда кўп фарқлар вужудга келади. Бурчакларни яхши билишга ҳаракат қилғил, чунки менинг устодим ҳамма вақт менга: «Эй фалони, ҳисоблашда бурчаклардин ғоғил бўлмасликка ҳаракат қил, чунки қавссимон бурчаклари бўлғон кўпёқди шаклларни, ўтмас бурчакларни ўлчашда катта фарқ қилиб қолади», – дер эрди.

Агар бир шакл сенга қийин бўлиб кўринса ва маълум бўлмаса, унинг ўлчовини тахмин била қилмағил. (Бундай шаклнинг) ҳаммасини мусаллас ёки мураббаъга бўлғил, чунки ҳар бир шаклни шундай қилса бўлади, шундин кейин ҳар бирини дуруст ўлчасанг, ҳисоб тўғри чиқади. Бу бобда айтмоқчи бўладифон сўзим кўпдур, аммо зарурларини айтдим.

ЎТТИЗ БЕШИНЧИ БОБ

ШОИРЛИК РАСМИ ЗИКРИДА

Эй фарзанд, агар шоирлик қилмоқчи бўлсанг, ҳаракат қил, токи сўзинг осон ва фойдали бўлсун, ғомиз¹ ва мушқул сўздин парҳез қилғил ва ўзинг билиб, ўзгалар унинг шарҳига муҳтоҷ бўлғудек сўзни айтмағил, нединким шеър айтғон киши халқ учун айтур ва ўзи учун айтмас. Бир хил вазн ва бир хил қофияга қаноат қилмағил, санъатсиз ва тартибсиз шеър айтмағил. Шеърда зарб, яъни оҳанг, яхши садо, мунг бўлса ва шаклда алъал бўлса, яъни вазни тўла бўлса, яхши бўлур. Шоирларнинг расми одатига кўра уларнинг санъатларидин ғофил бўлмағил, чунончи, шоирларнинг зарур усуслари шулардин иборат: музавваж (бирлаштирувчи)², мужонис (ўхшаш), мушокил (шаклдош), мукаррар (такрор), мусаммат, муставий (тeng), мушобеҳ (ўхшаш), музмар (яширин), мулавван (бўялган), мувассал (уланган) муқатташ (кесик), мустазод (қарама-қарши), мустаор (кўчма маъноли), муздавваж (бирлашиш), мувозана (баробарлик), музмин (эскирган, ҳаракатдан қолган), мусажжаш (қофиядош), мувашшаҳ (зийнатланган, безалган), мавсул (қўшилган), мухаллаш, мустаҳиёт (бўртмок), мустаҳил (мумкин эмас), зуқофиятайн (кўш қофияли), ражази мақлуб (ҳарбий мазмундаги шеърларни тантанавор ўқиш), мақлуб (тескари), мутобиқ (уйғун), муташобих (ўхшатиш), мураддаф (радифли) ва буларга ўхшашлар.

¹ Ғомиз – тушунилмайдиган ва ноаниқ.

² Қавс ичидағи таржималар нашрга тайёрлашда кири-тилди (ред).

Аммо сўзингнинг баланд¹ бўлишини истасанг ўт, олов² сўзларни ишлатмагил, лекин бошқача қилиб, яъни мумкин қадар сўзни истиорот шаклида ишлатғил ва кишилар тушуниши мумкин бўлғон тил била баён қиласи. Мадҳда истиоротни ишлатғил, агар ғазал ёзмоқ бўлсанг, осон, ва равон ва латиф сўзлар била ёзғил ва машҳур қофиялар била музайян қиласи, совуқ ва ғариб вазнлар, қофияларни қўлламагил, ошиқона, латиф сўзларни илкингдин бермагил ва яхши масалаларни ҳам унутмагил. Шундай ёёсанг, токи хос ва авом³га хуш кўриниб, шеъринг машҳур бўлгай.

Оғир вазн ва аruz била айтмагил, нединким аruz ва оғир вазн совуқ (табиатли), латиф лафз ҳамда зариф маънидин ожиз бўлғон одамларга яхшидур. Агар бирон киши аruz вазнига талабгор бўлса, бу вазнда шеър ёзишинг мумкин. Аммо яхши шеърни шоирлик, алқоб⁴ ва накд илми била ўрганғил. Токи агар шоирларнинг орасида мунозара бўлса, ё сенинг била бир киши фикрини очиқдин-очиқ сўзласа ёки сени синаб кўрса, ожиз бўлмағайсан. Арузнинг доираларини ва уларнинг номларини, доираларда пайдо бўладигон баҳрларнинг отларини билғил.

Ҳар сўзники шеърда айтмоқ бўлсанг, мадҳия, ғазал, ҳажв ёки марсия ёзмоқ бўлсанг, сўзни батамом ва мукаммал ишлат, ҳаргиз сўзни нотамом айтмагил. Насрда айтилғон сўзни назмда айтмагил, нединким насрый сўз раият манзиласидандур, назм эса подшоҳ мартабасидандур. Агар бирор нарса раиятга лойиқ бўлмаса, подшоҳга ҳам лойиқ эрмасдур.

¹ Баланд – таъсирчан.

² Ўт, олов – киноя, истехзоли.

³ Авом – умум, оддий кишилар.

⁴ Алқоб – лақаблар, номлар.

Фазални гўзал ва равон айтғил, мадҳ айтишда қавий дил ва баланд ҳиммат бўлғил. Ҳар одамга лойиқ сўзни ва ҳар кишининг қадрига мувофиқ шеърни билиб ёзғил. Ҳар одамда диловарлик¹ бўлмаса, уни шижоят ва баҳодирлик била тавсиф этмағил ва агар ҳар одамки белига ҳаргиз пичноқ осмағон бўлса, унга шамшир била шерни ўлдирурсан, найза била Бесутун тогин гардун²-дин оширурсан, ўқни мўр³ кўзидин ўткарурсан демағил. Ҳар одамки эшакка минмағон бўлса, унга сен Дулдулни, Буроқ⁴ни ва Рахш⁵ни яхши сурарсан демағил ва ҳар кишига муносиб сўзни айтғил. Аммо шоирга мамдуҳ⁶нинг табиатидин огоҳ бўлмоқ ва унга қандай сўз хуш келишин билмоқ вожибдур. Унинг хоҳишига лойиқ мадҳ қилғил. Шундин сўнг унинг инъомидин қанча миқдор дилҳоҳинг бўлса, шунча кўз тутғил ва ҳимматингни паст тутмағил, ҳар қиссада ўзингни банда ва ходим деб кўп айтмағил, агар мадҳ қилғон кишининг шул сўзга лойиқ бўлса, айтғил. Ҳажв қилмоқни одат қилмағилки, ёмон бўлур. Гарчи шеърда муболага ва дуругни яхши дерлар, лекин ундан бўлса ҳам дуругни ҳаддан оширмағил, дўстларнинг, муҳташамларнинг баланд мартабали эканини айтмоқни вожиб билғил. Аммо fazal ва марсияни бир тариқда, ҳажв ва мадҳни бир услубда ёзмағил. Ҳар вақт бир кишини мадҳ ва ситойиш⁷ қилсанг, мадҳнинг зидди ҳажв бўлур. Fazal ва марсияда ҳам шундоқдир.

¹ Диловарлик – қаҳрамонлик.

² Гардун – фалақ, осмон.

³ Мўр – чумоли.

⁴ Буроқ – диний ривоятларга кўра Муҳаммад пайғамбар «Меъроқ» кечаси кўкка миниб чиққан учар от.

⁵ Рахш – жуда югурик от.

⁶ Мамдуҳ – мақталаётган киши.

⁷ Ситойиш – мақташ.

Ҳар на ёзмоқ бўлсанг, ўз таъбинг била ёзғил ва ўзгаларнинг сўзини такрор қилмағил. Агар шундоқ қилмасанг, ундан кейин табиатинг очилмағай, шеър майдони сен учун кенг бўлмағай ва шеър ёзишда аввалги аҳволингда қолурсан.

Таъбинг очилиб, шоирликка қодир ва моҳир бўлғонингдин сўнг агар бир ердин бирон гаройиб маънили сўз эшитсанг ва ул сўз сенга хуш келса, уни олиб бошқа бир ерда истеъмол этмак тиласанг (ул сўзни истеъмол қиласдим деб) мукобара¹ қилмағил, яъни баланд парвоз гапни истеъмол этмағил... Агар одамларнинг сўзи ўзини мадҳ қилиш билан боғланса, сен уларнинг мақташлариға қарши ул сўзни ҳажвда келтирғил. Агар у ғазалда бўлса, сен марсияда келтирғил, токи киши бу сўзларнинг қайси ердин олингонин билмай қолсин.

Агар мақтаниш, мамдуҳ талаб бўлсанг ва бозор ишин қилсанг, мудбиррўй² ва палид жома³ бўлмағил. Ҳамиша тоза рўй⁴ ва хандон бўлғил. Нодир ҳикоятларни ва кулгили сўзларни эсда сақлағил, чунки мамдуҳнинг олдида шоирнинг бундин бошқа чораси йўқдир.

ЎТТИЗ ОЛТИНЧИ БОБ

ХОФИЗ ВА СОЗАНДАЛИК ЗИКРИДА

Эй фарзанд, агар ҳофиз бўлсанг, хушфеъл, қувноқ бўл, ҳамиша пок, мутайяб⁵ ва хуш забон бўлғил ва ўз ишингга машғул бўлғил, ярамас хулқ, қўпол башара бўлмағил. Ҳамма вақт оғир йўл⁶лар-

¹ Мукобара – кибрланиш.

² Мудбиррўй – толесиз.

³ Палид жома – ифлос, кир кийим.

⁴ Тоза рўй – очиқ чехрали.

⁵ Мутайяб – хушрўй.

⁶ Йўл – мақом, оҳанг.

ни чертмағил, чунки барча машқ ва оқангни бир хилда чертиш шарт эрмасдур, нединким одамларнинг барчаси бир хилда бўлғон эрмаслар, таъблари ҳам бир-бирига мувофиқ эрмас, яъни халқ мухталиф¹ дурлар. Шул важдин бу фаннинг устодлари санъатга шундог тартиб бермишларки, аввал подшоҳлар мажлиси учун хисравона достонлар тузмишлар, ундин сўнг вазнсиз бир оғир йўл тузмишларки, уни икки суруд² била айтса бўлур ва унга оғир йўл деб от қўймишлар. Бу йўл қариларнинг ва хирадманларнинг таъбига мос келмуш эрди ва бул йўлни мазкур қавм учун туздилар. Ундин сўнг эрса кўрдиларки, халқнинг барчаси қарилар ва хирадманлар эрмасдурлар. Шундин кейин ложарам йигитлар учун бир йўл тузатдилар. Ундин кейин енгилоқ вазнлик шеърлар учун енгили йўллар тузиб, уларга хафиғ³ деб от қўйдилар, оғир йўлдан сўнг бу хафиғ йўлни чертдилар. Мутриблар⁴ қарилар ҳам, йигитлар ҳам ундан баҳраманд бўлсинлар, дедилар. Ундин кейин ёш ўғлонлар ва латиф⁵ таъб одамларнинг баъзилари бебаҳра қолдилар. Мазкур қавм учун тарона айтмоқни пайдо қилдилар, токи мазкур қавм ҳам баҳра ва роҳат топғайлар, чунки барча вазнларнинг орасида таронадин латифроқ вазн йўқдур. Демак, булярнинг барчасини бирдек қилиб чертмағил ва бир хилда куйламагил, менинг баён қылғонимдек чертиб айтғил. Бас, барча улус сенинг созингдин, овозингдин баҳраманд бўлсин.

Бир мажлисда ўлтурсанг, мажлис аҳлига қарагил, агар эшитгувчи қизил юзлик ва мош-би-

¹ Мухталиф – ҳар хил.

² Суруд – ашула, қўшиқ.

³ Хафиғ – вазни енгили.

⁴ Мутриб – созанда.

⁵ Латиф – юмшоқ, мулоийим, гўзал.

ринч¹ соқоллик бўлса, пайвас² зер³ тор била чертғил: агар сариқ юзлик бўлса, бўш тор била чертғил; агар қора юзлик, наҳиф⁴ ва савдойи бўлса, кўпроқ уч тор била чертғил, агар оқ, семиз ва мартуб⁵ бўлса, кўпроқ бам⁶ била чертғил, нединким бу рудни⁷ одамнинг тўрт таъби учун муҳайё қиласилар. Бу айтғонларимда мутриблик, яъни шеър айтмоқ шарти ва расми йўқдур. Ҳофизлик қиласанг, шеър ёзмоқни ҳам билсанг, ўз шеърингни айтмоққа ҳарис⁸ бўлмағил, нединким, сенинг шеъринг ўзингга хуш келса ҳам бошқага хуш келмаслиги мумкин, чунки ҳофизлар халқ шеърининг ровийиси^{42*} дур, ўз шеъринг ровийиси эмас.

Агар сени бир мажлисга олиб борсалар, унда икки киши нард ўйнаб ўтиргон бўлса, гарчи сен нардоз бўлсанг ҳам ҳофизликни тарк этиб, уларнинг таълим ва томошасига машғул бўлма, чунки сени ҳофизлик учун келтирмишлар, нардозлик учун келтиргон эмаслар.

Ҳар сурудни ўргонсанг, вазндин ғофил бўлмағил, вазнсиз тарона айтмағил ва фазал ёзмағил. Куйлар вақтингда сурудинг бошқа жойдин, соzinг бошқа жойдин бўлмасин. Агар бир кишига ошиқ бўлсанг, бутун кунни бошидин охиригача ўзингга хуш келғон фазални айтмоқ била ўткармағил, (бундай фазал) ўзингга хуш келса ҳам ўзгалирга хуш келмагусидур. Ҳар сурудни бошқа бир маънида айтғил.

¹ Мош-биринч – мугуруч.

² Пайвас – тулаш, доимий, узлуксиз.

³ Зер – мусиқийда энг ингичка ва нозик овоз.

⁴ Наҳиф – озгин.

⁵ Мартуб – рутубатли, ҳўл, нам.

⁶ Бам – мусиқадаги баланд тон.

⁷ Руд – мусиқа қуроли.

⁸ Ҳарис – берилиб кетмоқ, ҳирс қўймоқ.

Шеър ва ғазални кўп ёд билғил ва ҳар турли шеър ёзишни ўзингга лозим билғил. Ҳар вақтнинг ўзига муносиб ғазалларни ўқифил: баҳорда хазонга муносиб, хазонда баҳорга муносиб, қишида ёзга муносиб ва ёзда қишига муносиб ғазалларни ўқимагил.

Агар назирсиз¹ устод бўлсанг ҳам мажлис ичидаги ҳариф²ларга қарагил, агар мусиқийдан завқ олғувчи қарилар ва хос одамлар бўлса, мутриблик қил, яхши йўлларни ва наволарни чертғил. Қарилик ва дунёнинг мазаммати³дин кўпроқ суруд айтғил. Агар мажлис аҳли ёш йигитлар бўлса, енгил йўлларни кўпроқ чертғил ва осон суруд айтғил. Агар мажлис аҳди сипоҳий ва баҳодирлар бўлса, уруш қилмоққа, қаҳрамонликка ва иёргик қилмоққа оид маҳсус шеърларни ўқифил. Бундай вақтда улуғ йўллардин – ироқ, наво, фарёд ва буларга ўхшашларни чертаман деб мажлисни совутмагил. Яна диққат қилиб қарагилки, мазкур базмда ҳар киши қайси йўлни яхши кўради, шу кишига коса етғон чоқда уни айтғил. Ундей вақтда ул одамлардин бирор нарса умид қилсанг, шуни топасан, нединким ҳофизлик яхши ҳунардирки, эшитғон одамларнинг кўнглини олурсан.

Ҳар мажлисдаки бўлсанг, бодани ва набизни оз ичғил, чунки сен танга олишинг лозим. Тангадин эса қанча берсалар, рози бўлғил. Ҳаргиз умматларга⁴ истиза⁵ қилмагил ва ишрат аҳли маст бўйғон пайтда сен ўз дўйстларинг била сўзлашмакка машғул бўлғил, нединким танга бу ишдин ҳосил бўлур.

¹ Назирсиз – беназир, мислсиз.

² Ҳариф – улфат.

³ Мазаммат – ёмонлик, кўрлик.

⁴ Уммат – бир тиlda сўзлашувчи инсонлар.

⁵ Истиза – жанжал, кураш.

Хофиз бўлсанг арбада¹ қилфувчи бўлмафи, токи арбада сабабидин ҳофизлик тангаси қўлингдин кетмасин ва бошинг ёрилиб, тўнинг йиртилиб, танбууринг синиб уйингга қайтиб бормафи, нединким ҳофизлар мастрарнинг муздури² бўлурлар. Арбада ва густоҳлик³ қилғон муздурга музд бермаслар.

Агар мажлисда бир одам сени мақтаса, таъриф қиласа, сен унга меҳрибонлик кўргазғил ва у қайси сурудни хоҳласа шуни айтғил, токи ўзгалар ҳам сени таъриф қилсунлар, масти бўлғонларидин сўнг ул таърифга лойиқ танга берсунлар. Агар мастрар бир йўла суруд айт десалар, уни айтмоқ сенга малол келмасин, ҳар на буюрсалар, шуни чертғил ва шуни айтғил, нединким мутрибларнинг улуғ ҳунари мастрарнинг ишига сабр қилмоқдур. Агар сабр қилмасалар, муздурлик инъомидин маҳрум бўлурлар. Яна дебдурларки, ҳофиз кўр, кар ва соқов бўлмоғи керакдир.

Агар ҳофиз бир мажлисга борса, унда кўргон ва эшитғон нарсаларни ўзга жойга бориб айтмасун. Бундай мутриб ҳамиша азиз ва аржуманд бўлур.

ЎТТИЗ ЕТТИНЧИ БОБ

ПОДШОҲГА ХИЗМАТ ҚИЛМОҚ ЗИКРИДА

Эй фарзанд, иттифоқо, подшоҳ хизматига ўтиб, хослар жумласига қўшилсанг, подшоҳ ҳар қанча сени ўзига яқин тутса ҳам, унга фарра⁴ бўлмағилким, унинг яқинлиғидин узоқлигини яхши кўргил. Аммо ҳар турли хизматдин қочманил, не-

¹ Арбада – тўполон, қий-чув.

² Муздур – ёлланиб ишловчи, мардикор.

³ Густоҳ – андишасиз, тортиңмайдиган.

⁴ Фарра – мағурланиш.

динким подшоҳга яқин бўлишнинг охири узоқликдур. Агар подшоҳ сени ҳар қанча имн¹ қиласа, сен ундин ноимнроқ бўлғил ва ўз ҳаддингдин асло ошмагил, нединким сенинг семирмоғинг унинг қурби² била ва ўлиминг ҳам унинг тифи била бўлғусидур. Ҳар қанча азиз бўлсанг ҳам ўз ҳаддингни билмакдин ғофил бўлмағил. Подшоҳнинг муродидин ўзга сўзни айтмағил, ҳар бир сўз устида у била мунозара қилмағил, нединким ҳар одам подшоҳ била мунозара қиласа, ажалидин бурунроқ ўлғусидур. Ўткир тифнинг дамига муштурмоқ ниҳоятда аҳмоқлиқдур.

Подшоҳга яхшилик қилмоқнинг йўлини тузғил, токи ул ҳам сенга яхшилик қилғай. Агар подшоҳга ёмонликни ўргатсанг, у ёмонликни олдин ўзингга қилур.

Ҳикоят. Дебдулларки, амир Фазлун Биссувор ибн Ҳомоннинг^{43*} Ганжада подшоҳлик қилғон замонида Дайламий халқининг улуғларидин бир муҳташам одам унинг муқараби³ ва мушовари⁴ эрди. Ул ҳамиша подшоҳга ёмонлик ўргатур эрди. Мамлакатнинг муҳташам⁵ одамларидин ҳар ким бир гуноҳ қиласа, уни банд қилиб, зинданга солур эрди. Подшоҳга дер эрдиким: «Озод одамга озор бермағил ва озор берғондин сўнг уни ўлдирғил». Мана шул дайламийликнинг машварати⁶ била кўп одам подшоҳнинг қўлида ҳалок бўлди.

Иттифоқо, бир кун шу дайламийлик кенгашдор бир гуноҳ иш қилди. Подшоҳ буюрди, уни банд. этиб, зинданга солдилар. Дайламийлик

¹ Имн – омон, хавфсиз.

² Қурб – яқинлик.

³ Муқараб – яқин дўст.

⁴ Мушовари – кенгашши.

⁵ Муҳташам – ҳашаматли.

⁶ Машварат – кенгаш.

подшоҳнинг олдига киши юбориб дедиким: «Мен минг тилло берурман, мени подшоҳ ўлдирмасун». Подшоҳ деди: «Мен сенинг ўзингдин ўрганмиш эрдим, сен ўзинг озодга озор бермағил ва агар озор берсанг ўлдирғил, деб ўргатар эрдинг». Дай-ламийлик ёмонлик ўргатмоқнинг шумлиғидин ўз жонидин айрилди.

Эй фарзанд, барча орзуларнинг охирини нуқсон билғил, давлатга гарра бўлмағил. Подшоҳнинг хизматида ҳурматли бўлғил, нединким неъмат ҳашаматидин сўнг зиёдароқ бўлур, подшоҳ хизматининг иззати тавонгарликдин зиёдадур. Агар подшоҳнинг амалида ҳар қанча семирсанг ҳам ўзингни ориқ қўргизғил, токи имн бўлғайсан. Кўргилки ориқ қўй ўлимдин имн бўлур.

Дирам учун подшоҳнинг хизматин тарқ этмағил, нединким дирам гулдек хушранг, хушбўй, машҳур ва азиздур ва лекин умри гулнинг умридек бебақодир ва яроқсиздур. Подшоҳнинг хизматида ҳар қанча дирамни кўп жам этсанг, унинг бақоси йўқдур. Подшоҳнинг хизмати дирам судининг сармоясидур. Бас, суд тилаб сармояни қўлдин бермағил, нединким сармоя ўз жойида турса, ҳамиша суд умиди бордур. Аммо сармоя қўлдин кетса, суд умиди йўқолур.

Ҳар одам дирамни ўзидин азизроқ тутса, азизлиқдин хорлиқдарга тушгусидур. Азиз одамнинг мол жамига рағбат этғони ўзин ҳалок қиласонидур.

Молни ўлчов ва андаза била жам этғил ва ўзга халқقا ҳам ундин насиб берғил, токи халойиқнинг тили сенинг мазамматинг била боғлиқ бўлғай. Подшоҳнинг хизматида улуғ мартаба топғондин сўнг ҳаргиз подшоҳга хиёнат қиласонидур. Агар хиёнат қиласонг ул мартабадин тушғонингдур ва хорлик домига етишғонингдур, нединким подшоҳ бир ки-

чик кишини улуф қылса ва у бунинг эвазига хиёнат кўргузса, бу иш ул кишининг иззат ва улуғлиқдин маҳрум бўлмоғига сабабчиидур, нединким агар у кишига меҳнат ва хорлик етишмаса эрди, ўз валенеъмати баробаринда яхшилик қилғон кишига ёмонлик қилмас эрди.

Ҳикоят. Амир Фазлун Биссувор бир кун ўзининг ҳожиби Абу Асирни Бурдаъ вилоятига сипоҳсоларликка юбормоқчи бўлди. Абу Асир ҳожиб деди: «То қиши фасли бўлмағунча бормасман, нединким Бурдаънинг обу ҳавоси ниҳоятда ёмондур». Унга амир Фазлун деди: «Бундоқ эътиқод яхши эрмас, нединким ҳеч киши ҳаргиз беажал ўлмағусидур». Ҳожиб деди: «Айтғонинг дурустдур, лекин то кишининг ажали етмаса Бурдаъга бормағусидур».

Эй фарзанд, дўст ва душман ишидин ғофил бўлмағилки, сенинг нафинг дўстга ва зараринг душманга етсин. Улуғлиқка муносиблик улдурки, дўстга яхшилик, душманга ёмонлик била жазо еткургайсан.

Давлатга, неъматга молик бўлғонингдин сўнг халойиққа наф еткурғил, саховатни халқдин дариф қилмағил. Давлати камолга етғон одамнинг хизматига бормағил, чунки камолга етиш – зало-латга яқиндур.

Қарифон давлатманднинг атрофига яқин бормағил, чунки қарининг умри узоқ бўлса ҳам халойиқ уни йигитларга қарафонда ўлимга яқинроқ тутарлар. Агар подшоҳнинг хизматида ҳамиша барқарор бўлмоқ тиласанг, Расул алайҳиссаломнинг катта амакиси ҳазрати Аббос ўз ўғли Абдуллоҳга айтғондек бўлғил. Ул ўз ўғлига деди: «Эй фарзанд, билғилким, бу киши, яъни Умар сенга эътимод қилди ва барча халқдин илгари тутди. Энди, агар (сенга) душман голиб бўлмасин де-

санг, беш хислатни маҳкам тутғил, шунда сен ҳамиша имн бўлгайсан. Биринчиси шуки, ҳаргиз ёлғон сўзламагил, иккинчиси, подшоҳ олдида ҳеч кишининг айбин айтмагил, учинчиси, подшоҳга ҳеч важҳ била хиёнат қилмагил, тўртинчиси, подшоҳнинг фармонига хилоф иш қилмагил, бешинчиси, подшоҳнинг сири, ҳасрати, кучсизлигини ҳеч бир одамга айтмагил, нединким киши бу беш хислат била ўз мақсадига етса бўлур».

Подшоҳнинг хизматида нуқсон қилмагил. Агар баногоҳ нуқсон қилсанг, ўзингни нодонликка согил ва ул нуқсонни билмағондек кўргизғил, токи сенинг қасд била қилғонингни подшоҳ билмасин ва билмағонингга ишонсин.

Ҳамиша хизматга машғул бўлғил. Агар буюрмаса ҳам ўзгалар қилмоқчи бўлғон хизматни сен қилишни тилагил ва бажарғил. Ҳамиша хизматда ҳозир бўлғил, сени ҳар вақт сўраб қолсалар (тезда) топсунлар, нединким подшоҳлар ҳамма вақт хизматкорларини имтиҳон қилурлар ва сени ҳамиша муқум кўрсалар, улуг ва нофиъ¹ ишларни сенга эътимод қилиб буюрурлар, токи кичиклик ранжин чекмагунча улуғлик роҳатига ета олмағайсан...

Ҳамиша подшоҳнинг fazабидин қўрқғил. Икки нарсани ҳаргиз хор ва саҳл² тутмагил: бири подшоҳнинг қаҳри, яна бири донишманднинг панди. Ҳар одамки бу икки нарсани саҳл ва хор тутса, ўзи хор бўлур ва агар сен бу даражадин илгари ўтиб, подшоҳ надимликлариға восил бўлсанг, надимлик шартларини билмоғинг керакдур.

¹ Нофиъ – фойдали.

² Саҳл – енгил, қулай.

ЎТТИЗ САККИЗИНЧИ БОБ

ПОДШОҲГА НАДИМЛИК ҚИЛМОҚ ЗИКРИДА

Эй фарзанд, агар сени подшоҳ ўз надимлигига талаб қилса ва сенда надимлик хислатлари бўлмаса, қабул қилмагил, нединким ҳар киши подшоҳнинг надимлигини қабул қилса, ул дастлаб ўзида надимлика қанчалик хислати борлигини аниқдамоги лозим. Чунки подшоҳ хизматида жулус¹ рухсатин топгондин сўнг аввал беш сезгиси ҳиссиёти унинг фармонида бўлиши керакдур ва яна одамларга жирканч кўрингудай бадрўй бўлмаслиги керак, токи бу кўринишдин подшоҳга малол етмасин ва яна форсий, арабий тил била иншо ёза билсин, токи агар бир вақт подшоҳ иншога ҳожатманд бўлса, надим шу ишни биткара олсин. Яна керақдурким, надим шоирликни ҳам билсин ва форсий, арабий байтларни кўп ёд ўқисин, токи бир вақт подшоҳга шоир керак бўлса, бошқа жойларга киши юбориб шоир талаб қилиб юрмасин, шоирлик хизматини ўша надимнинг ўзи бажарсин. Бундин бошқа, надим илми тиб ва илми нужумни ҳам билсин, токи табиб ва мунажжим керак бўлса, сен бу бобда ҳам билғонингни баён қилгайсан, бу била надимлик шартин бажо келтиурсан. Подшоҳ эрса сенинг ҳамма илмдин хабардор эканингга эътимод қилгай ва хизматинг маъқул бўлгай. Яна созандалиқдин ҳам хабардор бўлгайсан, токи подшоҳ бир хилват қилса, мутриб бундай хилватга кира олмаса, сен соз чертиб вақтини хуш қилгайсан, шу муносабат била подшоҳ сенга муҳаббат пайдо қилгай. Яна

¹ Жулус, мажлис.

керақдурким муҳоки муҳоко¹ бўлгайсан. Яна кўп кулагили ҳикояларни, ажойиб сўзларни, нодир қиссаларни ёд билгайсан, нединким ҳикоят билмағон надим ноком² бўлур. Яна керақдурким, нардвозликни ва шатранжбозликни ҳам билгайсан, лекин қиморбоз бўлмағайсан. Яна Куръон, тафсир илмидин хабардор бўлгайсан ва ҳадис, шариат илмининг ҳар туридин зуфунун бўлгайсан. Агар подшоҳнинг мажлисида бу илмлар ҳақида орага сўз тушса, сен жавоб бергайсан, шунда қози, муфтиларни талаб қилишга ҳожат бўлмағай.

Яна ўтган подшоҳларнинг қиссаларини кўп ўқифон бўлишинг лозим. Сен барча подшоҳларнинг хислатларини ўз подшоҳинг олдида сўзлаб бергайсан, токи шу сўзларинг подшоҳнинг кўнглига таъсир этгай.

Ҳар сўзнинг истеъмол вақтини билгайсан, вақтга номуносиб сўз айтмағайсан. Мардана ва баҳодир бўлгайсан, нединким подшоҳ ҳамиша ҳам ишрат ва томошага машғул бўлғусидур. Баъзи вақт подшоҳ муҳораба ишига машғул қўргизгусидур. Бундай вақтда баҳодирлик қўргизғил, токи агар ўлсанг яхши от била ўлгайсан ва сенинг қабила, фарзандларингнинг ҳақини тўлаб туриш подшоҳга вожиб бўлгай. Агар ўлмай қутулсанг ишинг улуғ бўлгай ва подшоҳга мұттамад³ мўътабар бўлурсан. Бу айтилғонларнинг ҳаммаси сенда бўлса, шундин кейин подшоҳнинг надимлиғига лойиқ бўлгайсан.

Агар мақсадинг нон емоқ, шарбат ичмоқ, ҳазил айтмоқ бўлса, бу надимлик эмасдур, балки насимлик⁴ дур.

¹ Муҳоки муҳоко – бир-бири билан сўзлашиш.

² Ноком – истагига етмаган.

³ Мұттамад – ишончга сазовор.

⁴ Насимлик – разиллик.

Надимликнинг барча тадбирин билғил, токи хизматинг бекор кетмағай. Мажлисда подшоҳнинг ҳолидин ҳаргиз ғофил бўлмагил ва подшоҳнинг фуломларига қарамагил. Соқий сенга коса берса олғил, аммо унга назар қилмагил ва ўзингни сақдағил, токи подшоҳ сени унга мойил кўрмасин ва қози Абдумалик Ақайрийнинг бўйнига тушғон иш сенинг бўйнингга ҳам тушмасин.

Ҳикоят. Эшитдимки, халифа Маъмун қози Абдумалик Ақайрийни^{44*} ўзига надим қилди. Қози набизни кўп ичар эрди, шунинг учун подшоҳ уни қозиликдин маҳрум этғонди. Бир куни мажлисда бир фулом соқий бўлди ва ул қозига набиз берди. Қози набизни олур вақтида гуломга караб бир кўзи била унга ишорат қилди, бир кўзини юмди. Унга Маъмун халифанинг кўзи тушди. Қози халифанинг кўргонин билиб қолди. Қози фуломга қилғон ишоратини халифадин яширмоқ учун бир кўзини ишорат қилғондек юмуқ тутди. Халифа бир соатдин кейин қасд била: «Эй қози, кўзингга нима тушди?» – деб сўради. Қози деди: «Эй халифа, билмадим, ушбу соат кўзим юмулди». Шундин кейин қози ҳам хоҳ йўлда кетаётгон бўлсин, хоҳ уйга кетаётғон бўлсин, одамлар била кетаётғон вақтда ҳам, якка ўзи бўлғон вақтда ҳам, ҳатто зиёфатга кетаётғон вақтда ҳам асло кўзини очмади, токи халифанинг кўнгли шубҳадин холи бўлмагунча.

Демак, ҳар киши подшоҳга надим бўлмоқ тиласа, келажакни кўргувчи, ақлли ва огоҳ бўлиши лозим. Шунда подшоҳ хизматида кўп вақт яхши от била умр кечирғай ва ишни охирига етказғай.

ҮТТИЗ ТҮҚҚИЗИНЧИ БОБ

ДАБИРЛИК ВА КОТИБЛИК ЗИКРИДА

Эй фарзанд, агар дабир¹ ва котиб бўлсанг, ёзма нутқни яхши эгаллагил, хатни яхши билғил ва кўп ёзмоқни одат қиласи, токи яхшироқ моҳир бўлғайсан.

Ҳикоят. Ундоқ эшитиб эдимки, ҳожиб Исмоил^{45*} шанба куни девонхонада^{46*} ўтириб, бир нарса ёзар эди. Котибларга қараб деди: «Ҳар шанба куни ўзимнинг котиблигимда нуқсон кўраман, бунинг сабаби шу жиҳатданки, мен ҳар жума куни девонхонага келмайман ва ҳеч нарса ёзмайман. Бир кун то пешингача хат ёзишни тарк этғонимнинг нуқсони менга таъсир қилур ва хатимда нуқсон кўурман».

Бас, эй фарзанд, ҳамиша хат ёзишга машғул бўлғил, номада кўп арз ёзишни одат қиласи ва номани истиоралар, ибратли ҳикоялар, масаллар, шеърлар, ибратли фикрлар била бойитғил. Агар ёзув форсча бўлса, бу сўзларни форс тили била ёзиб ўтирмағил, чунки бундай сўзларни халқ тушунмайдур, у яхши эмас, хусусан, қадимги форс дарий тилини кўп халқ тушунмайди, шунинг учун дарий тил била ёзилмағон маъқул.

Араб ёзувидағи қофия – бир санъатдур, у ёқимли эшитилур, аммо форс тилидаги қофия ёқимсиз эшитилади. Энг яхшиси форсча қофияни татбиқ этмаслик керак. Аммо сенинг ўзинг қадимги дарий тилида гапирмаслигинг керак, энг юксак услуб била, нозик ва қисқа сўз била гапирғил.

Номада сажънинг ўзи бир ҳунардур, лекин сажъ форсча номада ноҳуш кўринур. Ҳар сўзниким ёз-

¹ Дабир – иш юритувчи.

санг ширин, мустаар¹ ва мухтасар² ёзғил. Котибға соҳиб идрок бўлмоқ ва котиблик сирларин яхши билмоқ, рамзли сўзларни англамоқ лозимдур.

Ҳикоят. Шундоқ эшитғонманки, эй фарзанд, сенинг бобонг султон Фазнавий (Маҳмуд) Бағдод халифаси Алқодир биллоҳга^{47*} нома ёзиб юборди ва дедиким: «Мовароуннаҳрни менга берғил, йўқ эрса қилич била олурман ва раият³ менга мутиъ бўладилар. Агар сен Мовароуннаҳр тасарруфинг ёрлигини юборсанг, мен у ёрлиқни хало-йиққа кўргузарман, токи сенинг фармонинг била раият менга мутиъ бўлғайлар».

Алқодир биллоҳ элчи юбориб деди: «Оlamда менга Мовароуннаҳр раоёсидин⁴ мутиъроқ қавм йўқдур, ҳаргиз бермасман. Агар сен мендин фармон етмай туриб уларга қасд қилсанг, барча оламни сенга душман қилурман».

Султон Маҳмуд бу сўздин танг бўлиб, халифанинг элчисига қараб: «Менинг ҳақимда бу сўз муносиб эмас эрди. Энди Қодирга айтғил, мен икки минг фил била бориб, халифани филларнинг оёғи остида вайрон қилурман ва Бағдод тупроғини филларга юклаб, Фазнинг олиб келурман ва филларни восита қилиб катта таҳдид⁵ тахвиф⁶ кўргузурман».

Халифанинг элчиси қайтиб келиб, халифага мазкур хабарни еткурди. Халифа бунинг жавобини элчига топшириб юборди ва элчи султон Маҳмуднинг вилоятига етди. Султон Маҳмуд

¹ Мустаар – ўзлаштирилган.

² Мухтасар – қисқача.

³ Раият – бир ҳукмдорга тобе ҳалқ.

⁴ Раоё – тобе ҳалқлар.

⁵ Таҳдид – дўқ қилиш.

⁶ Тахвиф – кўрқитиш.

тахт устида ўтириб эрди. Ҳожиблар¹, муқарраб²-лар, амирлар, сипоҳийлар атрофида саф тортиб турардилар ва масть филларни келтириб, улуғ ҳайбат била кўчаларда қатор қилиб қўймиш эрдилар. Шундин кейин элчини кўринишга келтирдилар. Элчи номани султон олдига қўйиб деди: «Амиралмўъминин юборғон номасин ўқидим, унга лойиқ жавоб ёзиб юбордим», – деб мени сизга йўлламиш». Хўжа Абу Наср Мешкон^{48*} султоннинг муншийси эди. У номани олиб очиб ўқиди. Номани бошида «Бисмиллоҳир раҳмонир раҳим» деб ёзилгон эрди. Ундин кейинги сатрда «алиф, лом, мим» деб ёзилгон эрди ва раббил оламин...» деб ёзилгон эрди, бошқа бирорта сўз ёзилмағон эрди.

Султон Маҳмуд ҳамма котиблар била ўйлашиб кўриб «бу қандай сўздур, – деб Қуръондаги ҳар байтники алиф, лом, мим бўлса ўқиб, тафсир қилди. Ҳеч бири унинг сўзига жавоб эмас эрди. Ниҳоят, Абу Бакр Қаҳновоний^{49*} (у ўтиргонича йўқ эрди, аёқ устида турғон ёш йигит эрди) шундай деди: «Эй худованд, халифа сизга алиф, лом, мимни ёзиб юборғани йўқдур. Сиз уни фил била қўрқитиб ва хавф бериб нома юбормиш эрдингиз ва Бағдоднинг тупроғини филларга юклаб Фазнинг келтурурмиз, деб эрдингиз. Шу жиҳатдин халифа: «Худо филбонларинг бошига не кўйларни солғонин наҳотки тушунмамишсан?» – деб ёзмишдур. Сизнинг фил юришингизга жавоб ушбуудур».

Султон Маҳмуд бағоят диёнатлиф одам эрди. Бу сўзни эшигтгач, ҳайратда қолиб, кўп вақтга қадар ҳуши қочди ва йиглаб зорлиқлар қилиб, халифадин узр тилаб, унга мактуб йўллади. Абу

¹ Ҳожиб – дарвозабон.

² Муқарраб – яқин дўст.

Бакр Қаҳнонийга хилъат бериб, тарбият қилди ва надимларнинг орасидин ўрин берди. Кўрмас-мусан, Қаҳноний бир сўзнинг сабаби била шунингдек улуғ даражага етди.

Ҳикоят. Эшитибманким, Сосонийларнинг салтанати замонида Абу Али Самжур^{50*} деғон шахс Нишопурда ҳоким эрди. Айтур эдиким, мен Хурросон амирининг сипоҳсолари дурман, лекин амирнинг даргоҳига бормас эрди. Бу замон Сосонийлар давлати замонининг охири эрди. Уларнинг Абу Алини зўр била қўлга киргизгудек қуввати йўқ эрди. Абу Али уларнинг отига хутба ва сикка ўқиб, ақча чиқаради ва бир оз ҳадя юборарди. Улар Абу Алидин ложарм рози бўлардилар. Ўша замонда Абдулжаббор Ҳўжоний дегон бир одам бор эрди. У одам Ҳўжонда хатиб эрди. Ул фикҳ¹ ва одоб илмини яхши билур, эс-ҳушлик ва доно котиб эрди. Абу Али уни Ҳўжондин чақириб келтириб, ўзига котиб қилиб олди ва баланд мартабага кўтарди. Абу Али ундин бемашварат ҳеч иш қилмас эрди, нединким ул бағоят кифоятлиғ² одам эрди.

Аҳмад Рофеъ Хурросон амирининг котиби эрди, кўп фозил ва муҳташам одам эрди. Мовароуннахрнинг жами иши унинг қалами остида эрди. Ул Абдулжаббор Ҳўжоний била қаттиқ дўст эрди. Хусусан, фазли илм муносабатидин бир-бира га дўстлик қилур эрдилар. Бир кун Хурросон амирининг вазири амирга деди: «Агар Абдулжаббор Ҳўжоний Абу Алини осонлик била қўлга киргизса бўлур эрди, нединким Абдулжабборнинг тадбири била Абу Али шундоқ густоҳлиқларга иқдом³ кўр-

¹ Фикҳ – диний одам.

² Кифоятлиғ – етук.

³ Иқдом – қадам.

гузадур. Абу Алига шундоқ нома ёзмоқ керакдурки, агар сен менга чокарлик¹ қилиб итоатимда бўлсанг, ушбу нома етишгач, Абдужабборнинг бошини кесиб, тўрвага солиб, борғон қосид²га топшириб, даргоҳга юборғил. Шундин кейин сенинг итоатингнинг ростлигини билурман, нединким ҳарнаки қилурсан, унинг тадбири била қилурсан. Агар юбормасанг, менким Хурросон амиридурман, сенинг устингга бостириб борурман, урушга омода³ бўлғил».

Бу тадбирни иттифоқ қилишфондин сўнг ҳамма деди: «Бу нома Аҳмад Рофеънинг хати била ёзилсин, нединким Аҳмад Абдужабборнинг дўстидур. Ул одам юбориб Абдужабборни хабардор қилур ва Абдужаббор бир тарафга қочиб кетур». Бу маслаҳатдин сўнг Хурросон амири Аҳмад Рофеъни чақириб деди: «Абу Алига ушбу тариқа нома ёзғил ва номани ёзғонингдин сўнг уч кечакундуз ушбу маконда бўлғил, ҳеч жойга кетмағил. Сенинг мутобеъ⁴ларингдин ҳеч одам қошингга келмасин, нединким Абдужаббор сенинг дўстингдур. Агар у қўлга кирмаса, сен унга хабар юбориб, қочишга йўл кўрсатғон бўлурсан».

Аҳмад ҳеч чора қила олмади ва ўз-ўзига деди: «Кошкийди, мен ҳаргиз котиб бўлмасам ва шундоқ фозил, донишманд дўстим менинг хатим била ўлмагай эрди». Ниҳоят, «ан юқатталу», яъни «агар ўлдирсалар, оёқ-қўлни михласалар», – деғон араб ибораси ёдига тушди. Аҳмад ўз-ўзига деди: «Бу рамзни Абдужаббор билур ва ўзга киши бу сўзнинг сирига тушунмас. Энди мен дўстлик шартини бажо келтирай».

¹ Чокар – хизматкор.

² Қосид – элчи.

³ Омода – тайёр.

⁴ Мутобеъ – тобеъ.

Номани ёзиб бўлғондин сўнг номанинг охирига, яъни унвон¹нинг бир тарафига нозик қалам била бир алиф, иккинчи бир тарафига бир нун ёзди, яъни «ан юқатталу»га ишора қилди. Номани Хуросон амирининг қўлига берди. Амир номанинг унвонига қарамай, ўқиб муҳр босди, хатни Жаммозабон отлиқ бир ишончли кишига топширди, лекин уни хат мазмунидин огоҳ қилмади ва деди: «Бу номани Абу Алига элтиб берғил, у сенга бир нима берса олиб келғил». Аҳмад Рофеъни эса уч кунгача уйдин чиқармадилар, уч кундин сўнг қўйиб юбордилар. У дилтанг бўлиб уйига келди.

Жаммозабон Нишопурга келиб, мазкур номани Абу Алига топширди. Абу Али номани олиб ўпди ва Хуросон амирининг ҳоли-саломатлигин сўради. Абдужаббор ҳам бу мажлисда ўтиргон эди. Абу Али номани унга бериб деди: «У муҳрни йиртиб, хатни олиб ўқифил. Фармонда ҳар на хабар бўлса маълум қилғил».

Абдужаббор номани олиб унвонга қаради: бир тарафда бир алиф ва бир нун кўрди. Дарҳол «ан юқатталу» ояти ёдига тушди. Билдики, бу нома унинг қатли бобида келмишдур. Муҳрини очмай, номани ерга қўйиб, бир қўли била бурнини ушлаб: «Бурнимнинг қонини ювиб келаман», деб ташқарига чиқди ва бир жойга бориб пинҳон бўлди. Абу Али унга мунтазир бир оз вақт ўтиргондин кейин деди: «Ташқари чиқиб Абдужабборни чақириб келтиринг». Аммо ташқари чиқиб уни топмадилар. Бир кўргон киши деди: «Абдужаббор мажлисдин чиқиб, бир отга миниб кетди».

Абу Али бошқа бир котибга номанинг муҳрини очиб ўқишини буюрди. Ул котиб номани ўқи-

¹ Унвон – мактубдаги манзилгоҳ.

ди. Жаммозабоннинг олдида аҳвол маълум бўлди. «Бу номада не сўз ёзилғонин ким айтдики, ул чиқиб қочди», – деб барча таажжуб қиласарди. Абу Али гарчи бу ишга шодмон бўлса ҳам, аммо Жаммозабоннинг олдида кўп хижолатлиф бўлиб кўринди ва шаҳарга муноди¹ қиласди. Абдужаббор пинҳоний бир одам юбориб дедиким: «Мен фалон жойда ўтирибман». Абду Али бунга хушҳол бўлиб, унинг омонлигига шукр қилиб айтиб юборди: «То Жаммозабон кетгунча ўша жойда бўлғил». Бир неча кундин сўнг Жаммозабонга хилъат бериб, бутун бўлғон ҳолининг мазмунини бир номага ёзиб: «Бизларнинг бу ҳолдин ҳеч хабаримиз йўқдур», – деб онт ичди ва кўп узрлар била номага зинҳор жавоб ёзишни тилади. Хуросон амири ҳам бу ҳолнинг сиридин ҳайрон бўлиб, тезда нома юборди ва деди: «Гуноҳини бу шарт била афв қилурманки, бу номада на сўз ёзилғонин қандай қилиб билғонини айтсан». Шу аснода Аҳмад Рофеъ айтди: «Менга омонлик берғил, токи у розни мен сенга айттайин».

Кейин унга омонлик берди. Аҳмад барча аҳволни айтиб деди: «Мен унга хабар бердим». Шундин кейин Хуросон амири Абдужабборнинг гуноҳин афв қиласди ва ўзининг юборғон номасини қайта-ришни талаб қиласди. Шу рамузни² ўз кўзи била кўрмоқ истади. Номани қайтариб келтирдилар, шу рамузни амир ўз кўзи била кўрди, у Аҳмаднинг айтғонидек эрди. Абдужабборнинг донишлигига ва унинг идрокига таажжуб қиласдилар.

Эй фарзанд, котибликнинг яна бир шарти улдурки, котиб бўлғонингда ҳамиша подшоҳ ҳузурида ҳозир бўлғил ва ҳар ишнинг отини билғил.

¹ Муноди – хабар бериш.

² Рамуз – имо-ишорат.

Барча ишни имтиҳон қилғил, бир ишдин фаромуш бўлмагил, ҳамма ишни ёдингда сақдагил ва барча девоннинг¹ ҳолидин огоҳ бўлғил. Ҳамма омилнинг² муомалаларин билғил ва ҳар турли ишни билмакда тажассус³ қилғил. Мазкур изланишларнинг суди сенга ҳозир кўринмаса ҳам, кейинчалик киши мазкур изланишларга муҳтоҷ бўлиб қолади. Лекин билғонингни бировга айтмагил, агар ноилож бўлсанг ва айтсанг ихтиёр ўзингда. Зоҳирда⁴ вазир ишининг имтиҳонига машғул бўлмагил ва лекин ботинда барча ишдин огоҳ бўлғил. Барча ҳисобга қодир бўлғил ва ҳар дақиқа иш била машғул бўлғил. Бу ишлар котибнинг ишидур. Подшоҳнинг сирини айтмагил ва ҳар бир ишдин подшоҳни огоҳ қилғил.

Хаттотликка қодир бўлиб, ҳар турли хатни ўқиб, ёзмоқни билсанг улуғ ҳунардур. Лекин буни бошқа бир кишига зоҳир қилмагил, токи ҳар қандай хатни ҳаммага машҳур қилмагил ва сендин подшоҳнинг эътимоди кам бўлмасин. Алдамчилик била шуҳрат қозонмагил, агар киши одамлар орасида ёлғон-яшиқларни сўзловчи бўлса ва буни ким сўзлағонин билмасалар, балки сенинг бўйнингга тушар. Ҳар қандай таҳқирланғон, паст ишни қилмагил. Бекор қолгон чоғларингда хатингни уйдирма қилмагил. Ҳожат вақтида бир нав ишни бажарғилки, у бир кун ишингга яраб, улуғ ишларга сабабчи бўлсин ва ҳеч одам сендин даргумон бўлмасин. Нетайким, кўп муҳташам ва фозил кишилар хато қилишдин ҳалок бўлдилар.

¹ Девон – давлатнинг кирим-чиқимлари ёзиладиган дафтар ва шу ишлар олиб бориладиган маҳкамаси.

² Омил – амалдор.

³ Тажассус – қидириши.

⁴ Зоҳирда – очикдан-очик.

Ҳикоят. Эшитибманки, Рабеъ ибн Мутахҳар ал-Қусвий ҳожиб Исмоилнинг девонхонасида бағоят улуғ ва муҳтарам котиб эрди. У музаввар¹лик хатини ёзарди. Бу хабар ҳожиб Исмоилнинг қулоғига етди. Ҳожиб Исмоил ҳайрон бўлди ва шунингдек фозил ва доно кишини музавварлик журми² била ўлдириб юборишга андиша қилур эрди. Ҳожиб энди нима иш қиласини билмасди, унинг ўзига бу розни ҳаргиз изҳор қила олмас эрди.

Иттифоқо, бир кун соҳиб (ҳожиб Исмоил) касал бўлди. Ҳамма ҳалқ уни кўргани борди. Ҳатто Рабеъ ҳам соҳибнинг олдига бориб ўтириди ва сўради: «Эй соҳиб, касалингиз нечукдир, қайси шаробни ичарсиз ва қайси таомни ерсиз?» Соҳиб деди: «Шаробдин фалон шаробни ичарман ва таомдин сен ейдиган таомни танаввул қиласанки, у музавварлик таомидур». Котиб билдики, Ҳожиб Исмоил унинг ишидин огоҳ бўлибдур. У деди: «Эй худованд, сенинг бошинг ҳақи, энди бу ишни қиласанг». Соҳиб деди: «Агар бундин сўнг қиласанг, бурунги қилғон гуноҳларингни афв қилурман!»

Демак, музавварлик қилмоқ улуғ гуноҳдур, ундин парҳез қилмоқ керакдур. Мен ҳар пешанинг сўзини айтиб тамом қила олмасман, ҳар бобдин сенга бир неча керак сўзни айтарман, бундин ҳар бир воқеа сенга маълум бўлғай. Агар котиблик даражасидин ўтиб, вазирлик мартабасига етсанг, ҳар сўзга вақти била амал қилғайсан.

¹ Музаввар – сохта, ёлғон.

² Журм – гуноҳ.

ҚИРҚИНЧИ БОБ

ВАЗИРЛИКНИНГ ШАРТ ВА РАСМЛАРИ ЗИКРИДА

Эй фарзанд, агар вазирлик мансабига етсанг, турил ҳисобот йўлларини, муомала тариқини яхши ўрганиб олғил, подшоҳга ҳамма вақт тўғри йўлларни баён қиласи, инсофлик бўлғил. Барча молни ўз уйингга жам этмағилки, кўп нарсага ҳирс қўйғон киши кўп нарсадин тезроқ ажралур. Агар сени ўз ҳолингга қўйсалар ҳам кейинроқ қўймаслар. Сенга вақти била берсалар ҳам кеинин сендин талаб қилурлар. Подшоҳнинг молини яхши сақдагил. Агарда есанг, икки бармоқ била егил, токи томоғингда қолмасин.

Ўзга амалдорларнинг қўлини буткул боғла-мағил, нединким ўтга ўтин солмасанг, кабоб хом қолур. Ўзгаларга ярим тантанни едирмасанг, ўзинг бир тантанни ея олмассан ва агар едирмай есанг, у амалдорлар барча хомуш ўтирумаслар ва барча пинҳон ишларни ошкора қилурлар.

Валинеъмат подшоҳ ҳақида инсофлик бўлғоннингдек, лашкар ҳақида ҳам инсофлик бўлғил ва арзимас нарсаларга назар солмағил. Оз маблағ учун кўп лашкарни ўзингга ва подшоҳга душман қилмағил. Агар кифоят қилмоқ ва мол жам этмак тиласанг, вайрон мамлакатларни обод қиласи, токи чандон даромад ҳосил бўлғай ва ўзгага зараринг этмағай.

Ҳикоят. Бундоқ эшишибманки, форс подшоҳларининг бири бир важҳ била ўзининг вазирини маъзул этиб¹, вазирлик мансабини бошқа бир кишига берди. Маъзул бўлғон вазирга деди: «Сен

¹ Маъзул этиш – ишдан бўшатиш.

қайси жойни ихтиёр этсанг, ўша жойни сенга бे-
турман, то ўзингнинг хеш ва акраболаринг била
унда макон тутиб, ризқ-рўзингни еб, осоиишта
яшагил». Вазир деди: «Менга ризқ-рўз даркор эр-
мас ва мен барча нарсамни подшоҳга бердим.
Мен ҳаргиз ободон мулк тиламасман. Агар менга
тараҳҳум қиласангиз, ўз мулкингиздан бир вайрон
кентни беринг токи мен ўзимнинг мутааллиқотим¹
била унга бориб обод қилиб ўтирай». Подшоҳ буор-
диким: «Ҳар қанча вайрон кент вилоятимда бўлса,
унга беринг!?!» Подшоҳ фармонин бажармоқ учун
кишилар мамлакатнинг бошидан аёғигача ахта-
риб, бир қарич вайрон ерни топмадилар. Охирада
қайтиб келишиб: «Мамлакатда унга бергулик вай-
рон ер топмадик», – деб хабар бердилар. Вазир
подшоҳга қараб деди: «Эй худованд, мен билур эр-
димки, менга бергудек вайрона йўқдур, аммо муд-
даом шулдурки, бу вилоятни мендин олдинг, энди
уни шундоқ одамга берғилки, бир вақт ул одамдин
қайтиб олур бўлсанг, менинг қайтиб берғонимдек
бўлсин ва шу ободлик била яна сенга топширсин».
Подшоҳ бу сўзни эшитғондин сўнг мутаассир бў-
либ, маъзул бўлғон вазирга узрлар айтди ва хилъ-
атлар кийдириб, яна вазирлик мансабини унинг
ўзига қайтариб берди.

Демак, вазир бўлсанг ҳамиша вайроналар-
ни обод қилғил ва додгар бўлғил, токи ҳамиша
подшоҳнинг олдида тилинг узун бўлсин. Деҳқон-
га парвариш ва ободонликка кўшиш кўргузиб,
жаҳондорлик қилғил. Билки, жаҳонни лашкар
била ва ободонликни адл-инсоф била қўлга кир-
гузса бўлур. Демак, адл ва инсофдин ғофиљ бўл-
магил. Агар ҳар нечаким рост ва бехиёнат бўлсанг
ҳам ҳамиша подшоҳдин кўрқғил. Агар подшоҳ

¹ Мутааллиқотим – тааллуқли нарсаларим.

ёш ўғлон бўлса ҳам уни кичик деб ўйламагил, не-динким подшоҳзодалар сув қушларининг чофа-сидек¹ дурки, улар юзмакни ўрганишга муҳтоҷ эрмаслар. Демак, оз фурсатда сенинг яхши ва ёмонлиғингдан огоҳ бўлурлар. Агар подшоҳ улуғ ва балогатга етғон бўлса, икки хил ҳулқа эга бўлур: ё донондири ёки нодондур. Агар доно бўлса, сенинг хиёнатингга ҳеч рози бўлмас ва бир важҳ топиб сенинг кўлингни қисқа қилур ва агар худ нодон ва жоҳил бўлса, сени ёмонроқ важҳ била ишдин маъзул этиб, ўлимга ҳукм қилур, нодондин жонинг омон қолур, нодондин бирор важҳ била ҳам қутула олмассан.

Подшоҳ ҳар ерга борса, ундин ажралмагил ва уни танҳо юбормагил, токи душманлар сенинг ёмон сўзингни (подшоҳга) айтиб, подшоҳни сендин мутағайийир² қилмасинлар. Подшоҳнинг ҳолидан ҳаргиз ғофил бўлмағил, чунки подшоҳ даргоҳидаги акобирларнинг³ барчаси жосусингдурлар ва аҳволингни подшоҳга айтурлар. Подшоҳнинг ҳар нафасидан огоҳ бўлғил, токи ҳамиша эминда бўлғайсан, яъни заҳарни заҳар тузатмишдур. Атрофингдаги подшоҳлар ҳолидан ҳам огоҳ бўлғил, нединким дўст ва душман подшоҳнинг не егонин ва не ичғонин билғай. Сен уларнинг мамлакатидин ўз мамлакатингдин кўра ҳам яхшироқ огоҳ бўлғил.

Ҳикоят. Ундоқ эшитдимки, Фахруддавланинг замонида Исмоил бинни Аббод икки кун уйидин ташқари чиқиб, девон маснадида⁴ ўлтурмади ва кўриниш бериб, девон ва ҳалқ аҳволин сўрамади. Фахруддавланинг жосуслари бу аҳволни

¹ Чоғасидек – боласи, жўжасидек.

² Мутағайийир – ўзгарган.

³ Акобир – энг катталар.

⁴ Маснад – тахт.

келиб айтдилар. Фахруддавла унга киши юбориб, ул орқали шундай нома йўллади: «Сенинг паришон ҳоллифинг ва дилтанглифингни эшитдим, қайси воқеага кўнглинг машғул бўлиб, паришонлиф етишғонин айтфил, токи биз ҳам ўшал ишнинг маслаҳатин қилғаймиз. Агар биз тарафдин дилтанглик етғон бўлса айтфил, токи биз сенга узр айтайлиф». И smoил бинни Аббод деди: «...ул ҳазратдин бу бандага ҳеч бир дилтанглик етишғон эрмас ва мамлакатинг ҳоли тартиблиф ва фароғатдадур. Ул ҳазратнинг давлатидин ҳамиша вақтим хушнуддур, бул банданинг кўнгли паришонлифи тезда зойил бўлур¹». Учинчи кун ҳушҳоллик била Фахруддавланинг олдиға келди. Фахруддавла сўради: «На важж била кўнглингга паришонлиф етди?» И smoил бинни Аббод деди: «Қашқарға юборган жосуслаrimning бири ёзиб юбормишки, хоқон ўзининг сипоҳсоларининг қулоғига бир сўз айтибдур, аммо ул на сўз деғонин билмабдур. Бу сўзни эшитғонимдин сўнг, яъни Қашқарда хоқон сипоҳсоларига на сўз деғонлигин бул ерда туриб билмағонимдин жуда дилтанг бўлиб, томогимдин нон ўтмади. Ушбу кун «Хоқон на сўз деғони менга маълум бўлди», деғон яна бир хабар келди. Шундин сўнг кўнглимга хушҳоллик етишди ва дарҳол даргоҳингизга келдим».

Бас, эй фарзанд, подшоҳларнинг ҳолидин ҳабардор бўлғил ва барчасининг аҳволин ўз подшоҳингга маълум қиласиғил. Сенинг ихлосмандағинг ва хайриҳоҳлифинг ўз подшоҳингта зоҳир бўлсин, токи дўст-душман қўлидин омон қолгайсан.

Агар бировга амал берсанг, муносиб одамга берғил. Мол-дунёга тамаътири бўлғон жоҳиллар-

¹ Зойил бўлмоқ – тарқалмоқ.

нинг ва бедодгарларнинг¹ қўлига халқни топширмагил ва сармоясиз амалдорларга улуф амал бермагил.

Бир кун Абу Зар Жамҳардин: «Сосоний авлодининг иши амал бобида нима учун тубанликка тушди?» – деб сўрадилар. Абу Зар Жамҳар деди: «Шул жиҳатдинки, улар улуф ишда кичик амалдорлардин мадад талаб қилдиларки, уларнинг иши бу ерга етди».

Муфлис ва бенаво омилларга² амал бермагил, хусусан, улуф амал бермагил, чунки у ўзининг қорни тўймагунча сенинг беҳбудингга³ қарамағай. Омилким қувватлик ва молдор бўлса, билки ул ўз ишига асло машғул бўлмас, тезда сенинг ишинг била ишғол бўлур. Чунончи, кўргилки, экинга сув бермоқ тиласалар, экин солмаси⁴ сув ичиб ҳўл турғон бўлса, сув тезроқ экинга етар ва агар солма қуруқ турғон бўлса, то солма ўзи сувдин тўймагунча экинга сув юбормас. Бас, бенаво омил ҳам қуруқ солмадекдурки, бурун ўзи тўяр, ундин кейин сенга берар.

Ўз сўзингни улуф тутғил ва фармонингни улуф ҳисоблагил, ҳеч одамга унинг хилофини қилдирмагил.

Ҳикоят. Эшитдимки, Абул Фазл Балъамий^{51*} Суҳайл Хўжонийни Самарқанднинг соҳиб девонлигига буюриб, хилъат ва ёрлиқ берди. Суҳайл кетар куни хайрлашмоқ ва фармон тиламоқ учун Абул Фазлнинг олдига борди ва айтадургон сўзин айта олмай хилват (жой) талаб қилди. Жойни холи қилдилар. Суҳайл деди: «Эй худованд, мен банда кетаман, маъмур бўлғон иш устига борғон-

¹ Бедодгар – зулм қилювчи.

² Муфлис ва бенаво омиллар – камбағал ва бечораҳол амалдорлар.

³ Беҳбудингга – ишингга.

⁴ Экин солмаси – экин арифи.

дин сўнг, албатта, сизнинг тарафингиздин неча фармонлар бандангизнинг олдига борур. Энди сиз мен қулингизга бир нишон қиласангиз эрдики, токи мен банда қайси фармонни айтарни ва қайси фармонни қиласлиғимни билсам». Абул Фазл деди: «Тўғри, эй Суҳайл, яхши сўз дединг. Билурманки, бу сўзни сен кўп вақт андиша қилмишсан¹, бизга ҳам андиша қилмоқ керакдур, аммо дарҳол жавоб бериб бўлмагусидур. Сен бир неча кун таваққуф қиласи». Суҳайл уйига кетди. Абул Фазл дарҳол Сулаймон бинни Яхё ал-Маонийни соҳиб девон қилиб, унга ёрлиқ ва сарупо бериб юборди. Суҳайлга деди: «Сен бир йил уйдан чиқмай ўтиргил». Суҳайл бир йил уйда ўтиреди ва Абул Фазл бир йилдин сўнг уни олдига чақириб деди: «Эй Суҳайл, бизнинг икки фармонимизнинг бири рост ва бири ёлғон эканин қачон кўрмиш эдинг. Улуғ жаҳонни биз шамшир била итоат қилишга ўргатурмиз. Бизнинг кичикларга беадаблик ва нофармонлик ўргатиб, фармон била иш қиласи, деганимиз камоли аҳмоқликдур. Бизнинг фармонимиз бирдур, дарҳол ул ишни қилурлар ва ҳар ишни қилмоқ тиламасак, ҳаргиз буюрмасмиз. Бизнинг ҳеч одамдин қўрқинчимиз йўқдур. Бизнинг ҳаққимизда шундоф гумон қилибсан, бу сенинг ожизлиғингдур. Сен бу ишда бизни пиёда қилмоқчи бўлмишсан, биз ҳам сени амалдин пиёда қилдик, токи сен ушбу гумон била ҳеч бир амалга ярамагайсан».

Бас, эй фарзанд, то ўлгунча ёлғон фармон ёзмагил. Агар қайсики амалдор сенинг фармонинг била иш қиласа, унга қаттиқ уқубат қиласи, то ўзинг тириклиқда фармонингни муazzзам тутмасанг, сендин сўнг ҳеч ким сенинг фармонинг

¹ Андиша қилмишсан – ўйлаб қўргансан.

била иш қилмас. Ундоқким, ҳали ҳам ўлғон вазирларнинг фармони била иш қилурлар. Бас, подшоҳ била вазирнинг сўзи бир бўлмоғи керакдур, то амр қатъий, хурмати барқарор ва давлати пойдор бўлмоғи зарур.

Набизни ичмагилки, ундин гафлат пайдо бўйур. Агар вазир ҳам, подшоҳ ҳам набиз ичишга машғул бўлса, мамлакатда ҳалал¹ пайдо бўйур.

Бас, ўзингни ва подшоҳингни омон сақдағил ва айтғонимдек бўлғил, нединким вазир мамлакатнинг посбони бўйур ва посбонга посбон кепрак бўлғони ниҳоятда айбдур. Бас, агар вазир бўлмай, сипоҳсолар бўлсанг, унинг шартларини энди айтурман.

ҚИРҚ БИРИНЧИ БОБ

СИПОҲСОЛАРЛИК ШАРТЛАРИ ВА ОДАТЛАРИ ЗИКРИДА

Эй фарзанд, агар сипоҳсолар бўлсанг, лашкарингта эҳсон кўргузғил, ҳам ўз тарафингдин, ҳам подшоҳ томонидин уларга яхшилик расмини тузғил. Ҳамиша ҳайбатлик бўлғил, лашкар чекмак ва уруш қимак тариқин билғил. Уруш куни ўнг тарафга ва сўл тарафга кўп уруш кўргон саркардаларни юборғил. Шижоатлироқ саркардани ёки баҳодирроқ қавмни лашкарнинг орқа жаноҳига² қўйғил, токи лашкарнинг орқаси қувватлик бўлсин. Агар душман қанчаки ожиз бўлса ҳам уни ожиз қўрмагил ва унинг ҳақида ҳам қувватлик душман ҳақида қилғон эҳтиётингни қиласи.

Урушда далирлик қилмағилким, далирлик сабабидин лашкарни барбод қилурсан ва баддил

¹ Ҳалал – камчилик.

² Жаноҳ – қанот.

бўлмағилким, баддилик жиҳатидин ўз лашкарингга ҳазимат¹ еткаурсан.

Жосус юбориб, ҳасмнинг ҳолидин огоҳ бўлмоқдин ғофил бўлмағил. Кеча-кундуз тилла юборишиндик тақсир қилмағил. Уруш куни лашкарга назар қилғил ва икки лашкар бир-бирига рўбарў бўлғон чоқда очиқ юзлик ва яхши сўзлик бўлғил. Лашкарингга дегилким, «Душман лашкари шундай бир итки, биз уни бир соатда қириб ташлармиз». Лашкарни бирданига юбормағил, подшоҳнинг олдига фавж-фавж² лашкар юборғил. Сарҳанг ва саркардаларнинг отларини бир-бир тутғил, уларни танҳо-танҳо тайинла ва буюргил. «Эй фалончи, сен ҳам ўз тобеъларинг била борғил». Ҳар одамки аъло мурод маслаҳатчилар жумласидин бўлса, ўз қошингда сақлағил.

Ҳар бир киши уруш қилса, урушда бирор кишини йиқса, мажруҳ қилса ёки ўзи мажруҳ бўлса, бирор душман кишини тутса, ё отни тутиб келтурса, ё бош кесиб келтурса ёки бошқачароқ яхши хизмат қилса, унга ўша хизмати учун икки чандон мукофот берғил, сарупо тақдим қилғил, иш ҳақини ва вазифасини бурунгидин зиёда этғил ва молингни худди шу вақтда сарф қилғил, токи мақсадинг тезроқ ҳосил бўлгай. Бу сабаб била ўзгалар ҳам мардоналилкка ҳаракат қилгайлар ва сен ғалаба қозонгайсан.

Агар шу билан ҳамма мақсадинг ҳосил бўлса, сен шошиб қолмағил, ўзинг шитоб қилмағил ва жойингдин тебранмағил, душманга от отмағил, нединким сипоҳсолар шикаст топса улуғ ор бўлур.

Агар урушга кирсанг, мардана ҳаракат килғил ва кўнглингга қочмоқ фикрини келтурмағил.

¹ Ҳазимат – чекиниш.

² Фавж-фавж – гуруҳ-гуруҳ.

Үлимга күнгүл қўйғил, нединким ҳар одамнинг муроди ўлим бўлса, уни ҳеч лашкар жойидин кўтара олмас.

Зафар топсанг, қочғоннинг изидин қувмағил-ким, бу ишда хатар кўп бўлади. Менинг отамнинг хулқ-атвори шундок эрди, Султон Маҳмуд ҳам шу хилдаги одатни кўзда тутиб, қочғон одамнинг изидин қувмасди ва дер эдики: «Қочғон киши жонини аямай ҳаракат қилур ва ҳар киши жон била саъй кўргузса, албатта, зафар топар».

Урушда зинҳор бир қадамни кейин қўймағил. Агар бир қадамни кейинга қўйсанг, албатта ҳазимат топарсан. Ҳамиша жаҳд қилки, турғон жойингдин илгари юргил ва ҳаргиз бир қадам кейин юрмағил.

Ҳамма вақт лашкарга хуш сўз айтғил ва бир луқма нон, бир коса сув топсанг, улар била баҳам кўргилки, бир парча ноннинг қиласон ишини кўп зар ва саруполар қила олмағусидур. Лашкарнинг кўнглини ҳамиша хушҳол тутғил. Агар улар сендин жонини дариф тутмасин десанг, улардин сен нонингни дариф тутмағил... Агар сени подшоҳлик шарафига еткурса, подшоҳлик тариқин яхши тутғил.

ҚИРҚ ИККИНЧИ БОБ

ПОДШОҲЛИК ШАРТИ ВА РАСМИ ЗИКРИДА

Эй фарзанд, агар подшоҳ бўлсанг, порсо бўлғил ва кўзингни, қўлингни халойиқнинг аёл ва атфолидин¹ йироқ тутғил. Пок ва имн бўлғилки, пок ва имнлик покдилликдур.

¹ Аёл ва атфолидин – (аёллар) хотин ва бола-чақаларидан.

Ҳар иш қилсанг, ақл фармони била қилғил ва ақддин бемаслаңат иш қилмағил, нединким подшохнинг вазирлари ақлдур.

Ҳеч ишда шитоб қилмағил. Ҳар ишгаки киришар бўлсанг, олдин ўша ишдин чиқмоқни яхши кўзлағил ва ишнинг охирига қарагил. Ҳар бир ишнинг ўлчогин билғил ва барча ишни ўйлаб қилғил. Барча ишга, сўзга ақл юзи била қарагил, токи ботилни кўра олгайсан.

Ҳамиша ростгўй бўлғил, кам сўзлағил ва оз кулагил, токи кичиклар сенга густоҳ ва далир бўлмасинлар, нединким дебдурулар: «Подшоҳ учун энг ёмон иш халқнинг густоҳлиғидур».

Ҳар наки ато¹ қилсанг, мустаҳиқ қилғил ва ўзингни азиз тутғил, лашкар ва раиятнинг кўзига хор кўринмағил. Ҳеч одамдин зинҳор бир нарса тиламағил ва бандаларга раҳмдил бўлғил, аммо бераҳмларга раҳм қилмағил. Ҳамиша лутф ва карамни одат қилғил, лекин сиёсатлик бўлғил. Барча ишни буткул вазирга таслим қилмағил, унинг раъйига ҳамиша муҳтож бўлмағил. Вазир ҳар одамнинг ҳақида ҳар сўзни айтса эшитғил, аммо дарҳол қабул қилмағил. Вазирга айтғилки: «Ўйлаб кўурман, агар маъқул бўлса, у ишни бахшиш била имтиҳон қилғил, токи унинг наф ва зарари сенга маълум бўлғондин кейин ҳар наки ҳукм қилсанг қилғил. Агар хоҳ қари, хоҳ йигитликда подшоҳ бўлсанг, қари кишини вазир қилғил, йигит одамга вазирликни бермағил. Агар сен қари бўлиб, вазиринг йигит бўлса, номуносиб ишдур. Агар сен йигит бўлиб, вазиринг ҳам йигит бўлса, икки йигит бир ўт бўлиб мамлакатни куйдирадур.

¹ Ато – ҳадя қилиш.

Вазир хушсуратлик ва узун бўйлик, кенг қоринлик, қари одам бўлса яхшидур. Қисқа бўйлик, бадрўйлик, таҳфиф¹ суратлик киши бўлса, унда ҳеч ҳайбат ва шукуҳлик бўлмагусидур. Узун соқоллик одам вазирликка яхшироқ муносибдур.

Ҳикоят. Ундоқки бир куни султон Тўғрил^{52*} Хуросон фозилларидан бир кишини вазир қилмоқ тилаб, бир донишманд кишини вазирликка ихтиёр этди. Ул донишманднинг соқоли ниҳоятда қалин ва узун эрди. Шундоқ эдики, унинг соқоли бетидан ошоққа тушарди. Уни келтуришиб, султонинг пайғомини унга еткурдилар ва дедилар: «Биз сени ўзимизга вазир қилдик, нединким, сендин муносиброқ одамни топмадик». Ул донишманд деди: «Султонга айтингларки, вазирлик кўп хусусият ва ҳунари бўлғон кишига яхши бўлур. Банданинг эрса соқолидин ўзга ҳеч хусусияти ва ҳунари йўқдур. Подшоҳ менинг соқолимга алданмасун, ушбу хизматни бошқа одамга буюрсун».

Эй фарзанд, агар бир кишини вазир қилсанг, уни тамкинлик била узоқ тутғил, токи мамлакатнинг ишлари тўхталиб қолмасин. Аммо вазирнинг хеш ва ақраболарига ҳеч амал бермағил.

Фуқаронинг ҳолидин хабардор бўлғилки, подшоҳлар – чўпон, фуқаролари қўй рама²си манзарасида бўлур. Агар чўпон қўй рамасини сақдашга урунмаса, рама қисқа вақт ичида ҳалок бўлур.

Ҳеч одамдин хизматни дариф тутмағил ва лекин ҳар кишига иш буюрсанг, ўзига муносиб ишни буюргил, номуносиб ишни буюрмағил, ундоқким, фаррошликка муносиб одамга шаробдорликни буюрмағил, шаробдорликка муносиб

¹ Таҳфиф – енгил.

² Рама – тўда, сурув.

кишини хазинадор қилмағил. Алқисса, ҳар кишига ҳар ишни буюриб бўлмас. Агар иш билмағон кишига бир ишни буюрсанг, у киши ўз манфаати учун бу ишни билмаслигин айтмаса, ул иш дуруст ва фойдали бўлмағусидур. Бас, ишни билғон одамга буюргил, токи дардисарликдин қутулагон бўлгайсен.

Агар бир чокарга иноят қилиб, уни улуғ ва муҳташам қилмоқ тиласанг, уни амалсиз ҳам ҳашаматлик ва неъматлик қилса бўлур. Агар бир нодонга хизмат буюрсанг, ўз нодонлиғингга гувоҳлик берғон бўлурсан.

Подшоҳлиғингда ҳеч одамнинг фармонингни хор тутишига йўл қўйма, сўзингни хор тутма – ўзингни хор тутғон бўлурсан, нединким, подшоҳликнинг роҳати амрини юритмоқдадур, йўқ эрса подшоҳ била раиятнинг хулқи бирдек бўлиб қолур. Подшоҳ била раиятнинг фарқи фармонбардорликдадур.

Ҳикоят. Эй фарзанд, эшитдимки, сенинг боғонг Султон Маҳмуд Фазнавийнинг замонида бир киши бор эрди. Уни Абул Фатҳ Бустий^{53*} дердилар. У Нисанинг омили эрди. Султон бошқа бир омил юбориб, уни туттириб келтирди ва барча мол-мулкини хоса¹ликка олди, ўзини қаҳр била зиндонга солурди. Бир неча муддатдин кейин у киши зиндондин қочиб, Фазнинга борди ва сultonнинг олдида кўп тазарруъ қилиб ва ёрлиқ бериб юборди. У Нисага бориб, мазкур номани кейинги омилнинг қўлига берди. Омил ўйлаб туриб, ўз кўнглида деди: «У қайтиб яна Фазнинга кетғай». Алқисса, номани ўқимади ва мазмунига амал қилмади. У киши (Абул Фатҳ Бустий) яна Фазнинга бориб сultonнинг боғдин танҳо чиқадигон йў-

¹ Хоса – подшоҳ моли.

лининг устида кутиб турди ва султонга йўлиқиб, Ниса омилидин шикоят қилди. Султон яна нома берди. У киши деди: «Берғон номангизни омил эшитмагусидур». Шу вақтда султоннинг кўнгли бошқа бир иш била машғул эрди Шу жиҳатдан унга деди: «Мен худ нома бердим, бас, уни қабул этмасалар, бошингга тупроқ сочфил!» У киши деди: «Эй султони олам, фармонингни эшитмасалар, энди тупроқни менинг бошимга сочиш керакму?» Султон ўйлаб қолди ва деди: «Мен хато қилмишман, тупроқни менинг бошимга сочмоқ керакдур». Дарҳол икки гуломни юбориб, Ниса вилоятидаги омилни дорга остирди ва жар солдирди. «Ҳар ким подшоҳнинг фармонидин бош тортса, жазоси ушбуудур». Шундин кейин ҳеч ким фармонга хилоф иш қилмади.

Ҳикоят. Эй фарзанд, сенинг тоғанг Султон Масъуд^{54*} салтанат таҳтига минди, у шиҷоат ва мардоналик тариқин яхши билур эрди. Аммо мамлакатдорлик¹ тариқин ҳеч билмасди. Подшоҳликдин кўра канизаклар била айш-ишрат қилмоқни яхши кўрар ва барча молларини шу ишга сарф қиласди. Уммол² ва лашкарлар унинг шундай ишга машғул бўйронин кўриб, нофармонлик³ йўлин тутдилар ва халойиқнинг ҳолига футур етди. Лашкар, раият густоҳ ва далир бўлдилар.

Бир куни Фаррова қалъасидин бир хотин келиб, омилнинг зулмидин доддоҳлик қилди. Султон Масъуд унга хат берди. Хотин у хатни олиб бориб омилга кўргузди. Омил хатнинг мазмунига амал қилмади. Хотин яна келиб султондин адолат тилади. Султон унга яна хат бермоқни буюорди. Хо-

¹ Мамлакатдорлик – мамлакатни бошқариш.

² Уммол – солиқ солувчи.

³ Нофармонлик – итоатсизлик.

тин деди: «Омил сенинг хатингни қабул қиласағы-сидур». Султон деди: «Мен ўзим хат бердим, унга амал қиласалар, мен нима қиласай!» Хотин деди: «Эй султон, подшоҳ бўлсанг шундог бўлғилки, сенинг ҳукмингни қабул этсинлар ва токи бандалар зулм ва балога гирифтор бўлмасинлар, сен эрса ишрат тахтида ҳамиша барқарор бўлғил». Султон бу хотиннинг сўзидин хижолатманд бўлиб, хотиннинг додига етди ва у омилни тутиб дарвозага осди. Шундин кейин султон фафлат уйқусидин уйғонди ва ҳеч одам унинг фармони қабулида тақсир қиласади.

Бас, эй фарзанд, ҳар бир подшоҳнинг ҳукми юрмаса, у подшоҳ эмасдур ва подшоҳлик фармон раволикка вобастадур¹. Фармонни рано қилдирмоқ сиёсат била бўлур. Демак, сиёсат қилмоқда камчиликка йўл қўймоқ яхшимас.

Сипоҳийни раиятга мусаллат² қиласади. Сипоҳийни на янглиф тарбият қиласанг, раиятга ҳам шундоқ меҳрибонлик кўргузғил, токи мамлакат обод бўлғай, нединким подшоҳ офтобдекдур, офтоб биронга соя солиб, яна бирондин юз ўгирамас. Раиятни лашкар била мутеъ этса бўлур ва лашкарларни раият била хушҳол, ободон этса бўлур. Асло зулмни кўнглингга келтурмагилки, одил подшоҳнинг хонадони кўп йиллар боқий қолур ва золимнинг хонумони тезда барбод ва нобуд бўлур, нединким адаб ободонликнинг нишонидур ва зулм вайронлик аломатидур. Ҳукамолар дебдурларки, одил подшоҳ олам хуррамлигининг сарчашмасидур, золим подшоҳ жаҳон ҳаробалигининг селоба³сидур.

¹ Раволикка вобастадур – бажарилишга боғлиқдир.

² Мусаллат – қўлга олиш, молик бўлиш.

³ Селоба – тўйфон.

Мазлумлар дуосидин ғофил бўлмағилки, уларнинг дуоси, албатта, мустажобдур. Хилватда кўп ўтирмағил, лашкардин ва ўзга халойиқдин қочмағил, агар қочсанг, улар ҳам сендин қочурлар. Раиятнинг ҳолига қарашда тақсир қилмағилки, бу тақсиринг душманнинг тавфиридур. Аммо лашкар тутсанг, барча лашкарни бир қабиладин тутмағил. Агар подшоҳ барча лашкарни бир қабиладин тутса, лашкари забун бўлур, нединким улар ҳамиша бир-бирлари била иттифоқ бўлурлар ва ҳаммасига бирдек сиёsat қилиб бўлмас. Агар ҳар турли қабиладин лашкар тутсанг, у ҳолда бир тоифа иккинчи тоифадин бийм¹ қилур ва нофармонлик қила олмаслар, сенинг фармонинг эса лашкарингга раво бўлур. Шундоқки, сенинг бобонг Султон Маҳмуднинг тўрт минг турк гуломи ва тўрт минг ҳинду гуломи бор эрди. Туркларни ҳиндулардин қўрқитарди. Бу икки тоифа бир-биридин қўрқиши натижасида мутеъ ва фармонбардор бўлур эрдилар.

Эй фарзанд, гоҳ-гоҳ лашкар улуғларини нон емак, набиз ичмак учун ўз мажлисингга чақириб, карам ва меҳрибонлик кўргузфил ва сарупо бериб, қўнгилларин хуш қилғил. Лекин кишига оз нарса бермоқ тиласанг, кўп халқнинг орасида бермағил, токи ҳимматинг пастилиғи маълум бўлмасин. Масалан, мен саккиз йил Фазнинда султон Мавдуднинг^{55*} надими² бўлдим. Унда уч ишни ҳаргиз кўрмадим: бир улки, агар инъом икки юз тиллодин оз бўлса, уни кўп халқ орасида ҳеч кишига бермасди, хилватда парвоначисига³ буюриб берур эрди. Иккинчиси, ҳаргиз

¹ Бийм – қўрқув.

² Надим – яқин хизматкор, маҳрам.

³ Парвоначи – вазирнинг муовини.

тиши кўрингудек қаттиқ кулмас эрди, учинчи-си, ҳар қанчаки қаттиқ қаҳри келса ҳам ҳаргиз «беҳамият» дейишидин бошқа дашном қилмасди. Бу одат бағоят яхши ишдур. Эшитғон эдимки, Рум султонининг одати ҳам шу хилда экан. Бас, эй фарзанд, сахий бўлғил ва паст ҳиммат бўлмағил, йўқ эрса, кўпнинг орасида ҳимматингни кўргузмағил. Агар шундай қилмассанг, ҳалқ сенга душман бўлур. Гарчи ҳатто сенга бирон-бир душманлик қила олмасалар ҳам, ҳар ҳолда сенга бир душман бўлса, хизмат қилмаслар ва душманнингга дўст бўлурлар. Аммо жаҳд қилиб подшоҳлик шаробидин масти бўлмағил. Олти хислатдин воз кечмағил ва уларни маҳкам тутғил, масалан: ҳайбат, ада, саховат, муҳофазат, мулоҳимлик ва ростгўйлик. Ҳар подшоҳ бу олти хислатнинг биридин узоқ бўлса, подшоҳлиф шароби мастилиғига яқин бўлур. Ҳар подшоҳ подшоҳлиф шаробидин масти бўлса, подшоҳликдин жудо бўлғондин сўнг бўлсанг, бу ишларга эҳтиёт бўлғил ва олам подшоҳдарининг ҳолидин шундоғ хабардор бўлиб турғилки, уларнинг нафас олғонларидин ҳам ҳатто ғофил бўлмағил.

Ҳикоят. Мен отамдин эшитдимки, у шундай деди: Фахруддавла ўзининг биродари Азудудавладин бир амаллаб қочиб, кўздин гойиб бўлди ва ҳеч жойда маҳом қила олмай, менинг бобом Қобуснинг даргоҳига омонлик тилаб келди. Бобом унга омонлик бериб, кўп лутф ва қарам қилди, нединким бобом Фахруддавланинг тоғаси эрди. Фахруддавланинг отаси била бобом Қобус Ҳусн Фирузоннинг қизидин туғилмиш эрдилар. Шундин кейин Азудудавла бобом Шамсул Маолий Қобуснинг олдига элчи юборди ва элчи

келиб номани топширди Номада шундай де-йилмиш эрди: «Биродарим у ерга борибдур. Сен била менинг орамизда дўстлик биноси маҳкам-дур ва икки юрт бир юртдур. Биродарим менга душмандур. Уни тутиб менинг олдимга юборғил. Бу ишнинг мукофоти учун мен сенга вилоятим-дин қайси шаҳарни тиласанг, ўшани берурмен, токи дўстлик бурунғидин зиёдароқ бўлғай. Агар бу бадномлиқдин қочсанг, унга заҳар бериб ўл-дурғил, токи менинг муродим ҳосил бўлсин ва сенга бадномлик бўлмасин. Ҳар на тиласанг уни қабул қиуруман».

Амир Қобус деди: «...шундоқ улуғ подшоҳ ман-дек кишига то қиёматгача бадном бўлғудек сўз-ни айтмаса керак эрди». Шундин кейин элчига деди: «Азудуддавла бағоят ғофил кишидур. Нечук бундоқ мумкин бўлмағон сўзни айтадур?» Элчи деди: «Эй худованд, Азууддавлани Фахруд-давлага сотмағил, яъни Фахруддавлани Азудуд-давладин илгари тутмағилки, Азудуддавла сени ўзининг тувишғон биродаридин ҳам дўст тутар ва айтарки, худди шу мактубни берғон куни эшитдим: «Бир кун дўстим Қобус ҳаммомга борди, ҳаммомда оёғи тойиб йиқилди. Мен дилтанг бўлиб дедим: «У қирқ ёшида қариб қолдимики, забун бўлиб, қуввати кетиб йиқилибди».

Элчининг бу сўздин маҳсуди: «Менинг под-шоҳим сенинг ҳолингни кўп яхши билур», демоқ эрди. Қобус деди: «Умри узоқ бўлсин, менга кўп шафқат қилибдур. Лекин унинг учун мен ҳам ғам ерман: фалон ойнинг фалон кунида, сени бу та-рафга юбормасдин бир кун илгари кечаси фалон уйда ўтириб шароб ичди ва фалон жойда ётиб ухлади. Нуштегин соқий яrim кечада унинг қо-шига келди ва у уйқудин туриб ичкари саройга

бориб, учок¹ка чиқди. Шу чорда қаттиқ шамол эсди ва у учоқдин тушар вақтида оёфи дуруст тегмай, зангуниң² иккинчи тишидин йиқилди. У киши учун менинг ҳам күнглум анчагина азобланди ва дедимки: «Қирқ икки ёшдағи подшоҳ шунча шароб ичиб, учокка чиқа олмайдыон ва ярим кечада ундин туша олмайдыон даражада ожиз бўлиб қолибдими, бундоқ ҳодисага гирифтор бўладур?» Бу сўз билан Қобус элчига ўзининг ҳам уларнинг ҳолидин хабардорлигини билдириди.

Эй фарзанд, атрофдағи подшоҳларнинг ҳолидин огоҳ бўлғондин сўнг ўз вилоятинг, раият ва лашкар ҳолидин ҳам огоҳ бўлғил. Агар ўз шаҳрингнинг ҳолини билмасанг, бегоналар ҳолини қандай қилиб билурсан?

Ҳикоят. Эй фарзанд, тоғангнинг ўғли султон Мавлуд бинни султон Масъуднинг замонида мен Фазнинг борғондим. Менга кўп эъзоз ва эҳтиром қилди. Бир неча муддатдин сўнг мени имтиҳон қилиб, ўзига хос надим қилди. У ҳамиша таомни менинг била бирга ерди. Хоҳ ўзга надимлар била бўлсин, хоҳ бўлмасин, мен унинг сұхбатида ҳозир эрдим.

Бир кун субҳидамда надимлар била набиз ичиб ўтиргон вақтда лашкарга кўриниш берди ва барча лашкар келиб салом бериб қайтдилар. Хўжа Абдулло Раззок Аҳмад бинни Ҳасан Маймандий^{56*} унинг вазири эрди. Бир мунҳий³ бир хат келтириб хўжага берди. Хўжа ичкари кириб, у хатни Али ходимга берди ва Али ходим султонга берди. Султон набиз ичиб ўтириб эрди, ўшал хатни ўқиди ва Хўжага қараб деди: «Буюргил, мунҳийга беш юз таёқ урсинлар, токи бундин

¹ Учок – том.

² Зангу – нарвон.

³ Мунҳий – хабарчи.

буён хабар келтурса, шарқ била ёзиб келтурсин, нединким бу хатда: ўтган кеча Фазнинда икки минг уйда ош пиширмамишлар, деб ёзмиш. Мен у уйлар кимларнинг уйлариidур, қайси кўчада, қайси маҳаллада эканин билмасман». Хўжа деди: «Мунҳийнинг гуноҳин афв қилинг, бу жиҳатдин у мужмал гаплар ёзибдур. Аммо агар шарқ била ёзса, бу сўз бир улуф китоб бўлурки, уни бир мажлисда ўқиб тамом қилиб бўлмағусидур. Ноилож ошни зикр этибдур, аммо ошнинг рангин ва навин ёзмабдур. Энди тараҳхум қиссангиз, бундин буён ҳар сўзни мужмал қилмай, фалон киши, фалон маҳалла ва фалон ош деб шарқ ва тафсил била ёзсин». Султон деди: «Бу навбат афв қилдим. Агар яна шундоғ ёзса, гуноҳи ўз бўйнидадур».

Бас, эй фарзанд, ҳамиша лашкар ва раият ҳолидин хабар олғил, хусусан, вазирнинг ҳолига тафаҳҳус¹ қилғил ва шароб ичишга йўл қўймағил, нединким сен барча аҳду аёл ва хонумонингни унга топширгонсан. Агар унинг ҳолидин ғоғил бўлсанг, ўзингдин, хонумон ва мол-мулқдин ғоғил бўлғонингдур. Атрофингдаги ўзингга баробар подшоҳдар била зоҳирда дўст бўлсанг ҳам ботинда² дўст бўлмағил ва агар ботинда душман бўлсанг, зоҳирда ошкор қилмағил.

Ҳикоят. Шундоқ эшитибманки, Искандар Румий бир кун ўз душманига қарши урушга бормоқ бўлди. Унга дедилар: «Эй малик³, хасм ғоғилдур, унга шабхун⁴ урмоқ керакдур». Искандар деди: «Ўғрилик била зафар топмоқ менга ордур!»

Бас, подшоҳликда улуф ишларни одат қилғил, нединким подшоҳ барча кишидин улуғроқдур.

¹ Тафаҳҳус – атрофлича текшириш.

² Ботинда – ички томондан.

³ Малик – подшоҳ.

⁴ Шабхун – кечки ҳужум.

Унинг гуфтор¹ ва кирдори² ўзгаларнинг гуфтор ва кирдоридин улуғроқ бўлмоғи керакдур ва бундоқ гуфтор ва кирдор била улуғ ном ҳосил қиласа бўлур. Паст ҳиммат подшоҳнинг номи баланд чиқмағусидур.

Ҳукмингни улуғ тутғил ва ҳар муҳаққар³ нарсаға ҳукм қилмағил. Агар бирор нарсаға ҳукм қилсанг, унинг хилофини қилмағил, нединким хилоф иш қилмоқ барча кишига ёмондур, хусусан, подшоҳга ёмондур.

Подшоҳдик пешасининг шартларини баён қилдим.

Агар деҳқончилик ё бозор пешалари насибинг бўлса, улар янада яхши пешадир. Сен ҳар бирининг шартларини бажо келтиргил, токи ишинг ҳамиша ривож топғай ва муродга етғайсан.

ҚИРҚ УЧИНЧИ БОБ

ДЕҲҚОНЧИЛИК ВА БОЗОР ПЕШАЛАРИ БАЁНИ ЗИКРИДА

Эй фарзанд, агар деҳқон бўлсанг барча деҳқондин шиностароқ⁴ бўлғил ва ҳар бир экинни эксанг, вақтидин ўтказиб экмағил. Агар вақтидин ўн кун бурун экканинг икки кун вақтидин сўнг эккандин яхшироқдур.

Ҳўқизни жуфт этиб, барча асбобни муҳайё қиласиғил. Зўравон, қувватли ҳўқизларни сотиб олғил, охурига алафни ва дон-дунларни солғил. Уни шу хилда тарбият қиласиғилки, ҳўқизларинг зўрликда ва семизликда барча халойиқнинг ҳўки-

¹ Гуфтор – сўзлаш, сұжбат.

² Кирдор – қилиқ.

³ Муҳаққар – таҳқирланган.

⁴ Шиностароқ – билимдонроқ.

зидин илгари бўлсин. Агар бир ҳўқизинг ишга ярамай қолса, тезлиқда яна бир ҳўқиз олишга ҳаракат қилғил, токи экин вақти ўтмасин. Агар экиш ва ўриш вақти бўлмаса, ҳамма вақт ер суриб, шудгор қилишдин ғофил бўлмағил. Сўнгти йилнинг тадбирини ушбу йил қилғил. Экинни бақувват ерга эккилки, агар ернинг қуввати бўлмаса, ер сенга фойда бермас.

Ҳамма вақт ерни тарбият қилғил, деҳқончилик пешасидин бархурдор¹ бўлғайсан.

Агар ўзга пеша қилмоқ тиласанг, бозор пешаларини қилғил. Ҳар бир пешани қилсанг ҳам чобук бўлғил ва покиза иш қилғил. Шунда сенинг ишинг ҳамма пешаварларнинг ишидин яхшироқ бўлғай.

Ҳариф ва ошналаринг кўпайсин. Оз фойдага қаноат қилғил ва харидорни кўп лажож ва оғир баҳо била ўзингдин қочирмагил, токи мазкур пешада ризқинг зиёда бўлсин. Ҳалқ сенинг олдингга бир нарсани олмоқ ва сотмоқ учун келса, дўстимсан ва биродаримсан демакдин тақсир қилмағил, токи сенинг бундоқ меҳрибонлиғингни кўриб, улар молларига оғир баҳо қўйишидин шарм қилсинлар ва сенинг мақсадинг ҳосил бўлсин. Шунда ҳамиша пешаварларнинг орасида яхши отинг чиққай. Аммо рост сўзлағил, баҳилликдин парҳез қилғил. Савдонгни яхши ишга сарф этғил, қашшоқларга инъом берғил ва ўзингдин қавийларга ниёзманд² бўлғил. Савдода кўп қаттиқ бўлмағил, гарилардин кўп фойда истамағил ва мустаҳиқни хушҳол қилғил. Подшоҳинг ҳақида ростлиғ қилғил, аммо подшоҳнинг хизматига ҳарис бўлмағил, сипоҳийларга аралашмағил. Бозор ҳалқи била бозори бўлғил. Тош ва тарози-

¹ Бархурдор – баҳраманд.

² Ниёзманд – ҳожатманд.

ни рост қылғил. Ўз ақчанг ҳақида икки дил ва икки ҳамён бўлмағил. Шерикларингга хиёнат қилмағил, ҳар пешаким қилсанг, унда ҳийла қилмағил ва ҳамиша ҳамма ишингни бирдек қилғил. Агар молдор бўлсанг, муҳтожга қарз бермоқни фанимат билғил.

Ёлғондин онт ичмағил ва киши била қаттиқ муомала қилмағил. Пок дил бўлғил, токи савдонгда, фойдангда баракат бўлгай. Ҳар бир пешадурки, менинг айтғонимдек бўлса, барча пешаварларнинг жувонмарди¹ бўлгайсан. Энди билғилки, жувонмардликнинг барча шармлари ни қудратим етгунча баён қилурман.

ҚИРҚ ТҮРТИНЧИ БОБ

ЖУВОНМАРДЛИК ЗИКРИДА

Эй фарзанд, агар сен жувонмардлардек ҳаракат қилмоқ тиласанг, дастлаб жувонмардлик нима эканлигин ва унинг қандоғ пайдо бўлурин аниқ билғил. Қилғилки, одам уч хил сифатга эгадур. Барча шахс у хоҳ доно, хоҳ нодон бўлсин, шу уч нарса била хушнуддур... Бу уч нарсанинг бири ақл, бири ростлик ва бири жувонмардликдур.

Халқнинг даъвосига ҳақиқат била қарасанг, ҳеч киши ақл ростлик ва жувонмардлик била ёлғон даъво қилмағусидур. Нединким, бу уч сифатга эга бўлмағон ҳеч киши йўқдур. Аммо одатнинг тундлиғи (шиддатлиғи, разаби) ва хиралиғи (даҳшатли қоронғилик) халқнинг асли йўлини боғлаб қўяди. Инсон асли барча илмни ўргана олади. Одамнинг тани кўзга кўринадурғон ва кўзга кўринмайдурғон моддалардин тузилғон. Демак, инсоннинг бадани-

¹ Жувонмард – сахий.

да бир қисм табиий күчлар осмон гумбази, юлдузлар, моддалар, унсурлар, нафас шакллар, жонлар, ақллар мавжуддурки, уларнинг ҳар бири алоҳида бир оламдур, яъни мураккаб бир мажмуъ бўлмишдур. Бас, кўрмасмусан, бу улуғ жаҳонда кўк гумбази ҳам, юлдузлар ҳам, табиий күчлар ҳам буларнинг бари хилма-хил моддалар бўлсалар ҳам табиат бандида бир-бирларига боғлиқдурлар, яъни ўт ва сув барча сифатда бир-бирига зиддур. Андоқким, ўт ва сув барча сифатлари била зиддурлар, тупроқ ва ел ҳам бир-бирига зиддур. Демак, ер тупроқ, ўт ва сувнинг орасида воситачи бўлиб, уларнинг орасини улуғ банд қилиб боғлайдур. Шу тариқа ердаги қургоқчиликнинг олов била, совуқликнинг сув била боғланиши орасида банд пайдо бўлди, лекин қувват моддаси била мазкур банд узилди. Куч фалақдин, фалак ҳаюло¹дин, яъни ҳар бир нарсанинг асл моддаси ва моҳиятидин, ҳаюло нафасдин, нафас ақлдин ушбу қиёс била жудо бўлди. Одам жисмида тириклик ва оғирлик табиат қуввати орқали жам бўлди. Сурат, чеҳра, ҳаё, қувват, ҳаракат фалақдин жам бўлди. Бешта жисмоний сезги, яъни эшитмоқ, кўрмоқ, иска-моқ, тотмоқ, сийпаламоқ ҳаюлодин жам бўлди; ёд этмоқ, тафаккур қилмоқ, хаёл этмоқ, сўз айтмоқ, тадбир қилмоқ жон орқали жам бўлди. Одамнинг баданидаги шариф² нарсаларнинг манбаи йўқдур ва уларнинг ўрнини кўрсатиб ҳам бўлмас. Нединким, жувонмардлик, донишлик, камолот, шариф – буларнинг ҳаммаси ақлнинг сармоясидур ва олий ақл ташаббуси била баданда пайдо бўлдилар. Демак, тан жон била, жон нафас била ва нафас ақл била тирикдур. Ҳар кишини тирик кўрсанг, у

¹ Ҳаюло – модда.

² Шариф – тароватли.

жонсиз эмасдур, ҳар одамни жонли кўрсанг, у нафассиз эмасдур, ҳар кишини нафасли кўрсанг, у ақлсиз эмасдур. Бу аҳвол барча одамда мавжуддур. Лекин тан била жоннинг орасида беморлик пардаси бўлса, жондин танга модда, яъни қувват ва ҳаракат етишмас. Ҳар кишининг нафаси била жони орасида оғирлик ва нодурустлик пардаси бўлса, нафасдин жонга модда тамом етишмас. Ҳар бир одамнинг нафаси била ақли орасида жаҳл хиралик пардаси бўлса, ақддин жонга фикр, тадбир, жувонмардлик ва ростлик етишмас. Демак, ҳақиқатан, ақлли ҳамиятсиз бўлмағусидур. Лекин олий файрга руҳоний йўли боғланса, бундай ҳолда бемаъни фикрлар туғиладур.

Дунёда мардумлик, яъни жувонмардлик даъвосини қилмағон ҳеч одам йўқдур, лекин, эй фарзанд, сен жаҳд қилиб ўзгалардек бўлмағил ва беъмани даъво қилмағил. Файзи олийни ўрганмоқ ва идрок қилмоқ зикринда руҳоний йўлни таълим ва тафҳим¹ била очиқ тутғил, токи сендин маъно даъво қилмағайлар.

Эй фарзанд, билғилки донишлар ақл ва жувонмардликдин алфоз² била жасадсиз бир неча сурат ясадбурулар. Бу суратлар тан, жон, ҳавос³ ва маоний⁴ суратидур. Дебдуруларки, бу суратнинг тани – жувонмардлик, жони – ростлик, ҳавоси – донишмандлик, маонийси – сафодур. Бу суратларни ҳалққа тақсим қилдилар: бир гуруҳга тан тегди, ўзга нарса етмади, бир гуруҳга тан, жон, ҳавос ва маоний тегди. Тан етғон гуруҳ иёrlар ва сипоҳийлардурки, ҳалойиқ уларга жувонмардлар деб от қўйдилар; тан ва жон етғон гуруҳ зоҳирда

¹ Тафҳим – англатиш.

² Алфоз – сўзлар.

³ Ҳавос – сезгилар.

⁴ Маоний – маънолар.

маърифат соҳибидурларки, ҳалойиқ уларга ёлғон маърифат деб от қўйдилар; тан, жон ва ҳавос етғон гуруҳ ҳукамо, анбиё ва авлиёдурларки, ҳалойиқ уларга ғоят донишманд деб от қўйдилар; тан, жон, ҳавос ва маоний етғон гуруҳ фариштадардур ва уларга жувонмардлик насиб бўлди.

Жувонмардлик асли уч нарсадур: бири улким, айтғон сўзингни ўзинг қиласанг, иккинчиси улким, ростликка хилоф қилмасанг, учинчиси улки, хайр ишини илгари тутсанг. Одамдағи қолғон барча сифатлар бу уч нарсанинг остидадур.

Эй фарзанд, агар сенга мушкул бўлса, мен бу уч сифатни тадбир била, бу қавмнинг ҳар бирига мартаба ва андозасига лойиқ тақсим қилурман. Билғил, жувонмардлик ва иёрлик щундай кишига сазовордурки, бир қанча ҳунари бўлсин. Бу ҳунарлардин бири: жасур, мард, сабр-матонат, ваъдага вафо қилмоқ, пок дил ва пок забон бўлмоқ бўлса, яна бири улким, ўз манфаатин кўзлаб асирларга озор бермаса, бечораларга мадад еткурса, ёмонларнинг ёмонлигини яхшилардин йироқ тутса, рост сўз айтса, ўз танидин дод берса, яхшига ёмонлик еткурмаса, зиёндин омон тутса, одамларга зиён-зарар еткурмаса, яхши қарагилки, бундай ишларнинг ҳам охири ул уч сифатга вобастадур.

Ҳикоят. Айтурларки, бир куни Кўҳистондағи бир уйда иёрлар жам бўлиб ўлтирас эрдилар. Бир киши эшиқдин кириб, салом бериб деди: «Мен Марв иёрларининг элчисидурман. Улар сизларга салом юбордилар ва дедиларки, бизлар бир масалани сўрармиз. Агар бу масалага жавоб берсангизлар, сизларнинг улуғлиғингизга рози бўлурмиз. Агар тўғри жавоб бера олмасангизлар сизлар бизларнинг улуғлиғимизга иқрор бўлингизлар». Улар элчига дедилар: «У масалани

сўрагил». Элчи деди: «Улар сўраб юбордиларки, жувонмардлик недур ва жувонмардлик билан ножувонмардликнинг орасида фарқ nedur? Агар бир иёрга бир йўлнинг бошида ўтиргон бўлса ва бир киши унинг олдидан ўтиб кетса, бир оз фурсатдин сўнг унинг изидин ялангоч қилични қўлга олиб бошқа бир киши ўтса. У ўтиб кетғон одамни ўлдирмоқ учун йўл бошида ўтиргон иёрдан «фалон киши шу ердан ўтдими» деб сўраса, қандай жавоб бермоқ керақдур? Ўтмади деса ёлгон сўз айтғон бўлур, агар ўтди деса фаммозлик қилғай. Бу икки иш ҳам жувонмардлик тариқидан эмас».

Кўҳистон иёрлари бу масалани ва бу сўзни эшитғонларидин сўнг ҳайрон бўлуб, бир-бирларига қаращдилар. Буларнинг орасида Афзал Ҳамадоний деғон бир киши бор эрди. У деди: «Жувонмардликнинг асли – айтғон сўзни бажармоқдур. Жувонмардлик била ножувонмардлик орасидағи фарқ сабрдур. Йўл устидағи иёрга ўтиргон жойидин бир қадам илгари ёки бир қадам кейинроқ ўтириб: «Мен бу ерда ўтириб эрдим, ҳеч киши бу ердин ўтгони йўқдур», – деб жавоб берса, у шу тадбир била рост сўз айтғон бўлур».

Демак, эй фарзанд, бу иёрларни эсга солсада, сипоҳийлар ҳам бу расм била бўлмоқлари шартдурки, сипоҳийнинг иши иёрлик иши била та мом бўлур. Лекин каримлик, меҳмондорлик, саҳийлик, тўғрилик, ҳақшунослик, пок жомалик, яхши яроғланиш сипоҳийга хосдур. Сипоҳийга тавозеъ ва сарафкандалик¹ бир ҳунардур, иёрга айбдур. Аммо бозор одамларининг жувонмардлигига ҳам анча шартлар бордурки, уларни мен ўзга пешаварларнинг бобида зикр қилдим, такрор қилмоққа ҳожат йўқдур... Жувонмардлик

¹ Сарафканда – боши эгик, камтар.

одоби шундоқки, нифоқ жиҳатдин ҳеч одамнинг пардасин йиртмаслар; халойиқни бир ишда саҳв¹ этиб, омонлик тилаб келса баҳиллик қилмаслар, ...халқнинг орасида кишига кўп панд² бермаслар. Кишининг ҳаргиз қони тўклишига саъй этмаслар. Қатли вожибга ҳам фатво бермаслар, нединким хато фатвони тузатса бўлур, аммо бегуноҳ ўлдирилғонни тузатиб бўлмас, ўлғон асло тирилмас. Авомни гуноҳга далир қилмаслар.

Аҳди тасаввуфнинг жувонмардлигини ўтғон устодлар кўп китобларда зикр этибдурлар, мен уларнинг ҳаммасин баён қила олмагайман.

Эй фарзанд, менинг арзим бу китобда сенга панд бермоқдур. Агар сен ушбу гуруҳ била ҳаммажлис бўлсанг, сен уларга оғир тушмағил ва улар ҳам сенга оғир тушмасин. Бу тоифанинг жувонмардлигини сенга айтурман, нединким яхши зиндагонлик қилмоқда бу тоифага ўзга тоифадан кўп ранж етишар ва ўзларин барчадин баландроқ кўрарлар. Жувонмардликнинг асосий фазилати манманликни бошидин чиқармоқ ва ўзгага қасд қилмасликдур. Яна бу тоифанинг адаб ва жувонмардлиги икки нав бўлур: бири тасаввуф дарвешларига хос бўлур, бири муҳибларга мансуб бўлур. Мен иккала навини ҳам баён қилурман.

Билғил, дарвешликнинг шарти улдурким, у ҳамиша мужаррад³ бўлғай.

Ҳикоят. Шундоқ эшитдимки, бир вақт икки сўфи йўлдош бўлиб, бир тарафга борур эрдилар. Бири мужаррад эрди ва бирининг ёнида беш тиллоси бор эрди. Мужаррад сўфи ҳеч хавфсиз борур эрди ва ҳамроҳ талаб қилмасди. Ҳар жой-

¹ Саҳв – хато, янгилишиш.

² Панд – ўгит, насиҳат.

³ Мужаррад – холи, танҳо.

гаки борса, у жой қанчалик хавотирли бўлса ҳам у ҳеч андиша қилмас ва ўтириб роҳат қилар эрди. Беш тиллоси бор сўфи ҳам унинг била кетиб борарди. Аммо доимо бадбуруш, мутафаккир ва андуҳгин эрди. Бир вақт бир қудуқнинг бошига етдилар. Бу ер ҳаддин зиёда хавфли ва ўғриси кўп эрди. Мужаррад сўфи мазкур қудуқдин сув ичиб, бехавотир ётиб роҳат қилди, аммо беш тиллоси бор сўфи хавфдин ухлай олмади ва ҳамиша ўзига дер эдики: «Оҳ, на қилай?!» Бунинг овози мужаррад сўфининг қулогига етиб уйфонди ва унга деди: «Эй фалончи, сенга нима бўлди, тинмай: «Оҳ, на қилай, дерсан?» У деди: «Эй биродар, менда бешта тилло бордур. Бу жой хавфлидур, сен бу жойда бехавотир ухларсен, мен эрса хавотирдин ухлай олмасман ва ҳатто ўтира олмасман ҳам».

Мужаррад сўфи деди: «Тиллонгни менга бер-ғил, токи мен бу тиллонгга бирон чора қилай». Сўфи тиллони унга берди. У олиб тиллони қудуқقا ташлаб юборди ва деди: «Мана энди, «оҳ на қилай»ингдин қутулдинг. Энди тинчгина ўтиргил, фарогат била ухлагил. Билғилки, мужаррад кишининг ҳеч оғатдин хавфи бўлмагай».

Эй фарзанд, билғилки, агар назаринг бир бўлса, барча оғатдин омон юргайсан. Агар биродаринг ҳақида жанжал қилсанг ҳам ўзинг ҳақингда биродаринг била ҳеч вақт мукошафа¹ қилмагил. Манманликни бошингдин чиқарғил ва соҳиби бегараз бўлғил. Тасдиқ ва тажаррудга назар қилғил ва ҳеч нарсага иккилик кўзи била қарамагил.

Эй фарзанд, билғилки, агар киши сидқидил била сувга оёқ қўйса, сув ҳам унинг оёғи остида қаттиқ бўлур. Агар бирон киши бу бобда сенга

¹ Мукошафа – фош қилиш.

авлиё кароматидин бир ҳикоят қылса ва ул ҳикоят ақд тариқасидин йироқ бўлса ҳамда сенга номумкин кўринса ҳам унга рой, эътиқод қилғил. Дарвеш шундай кишиидурки, у ҳар бир нарсага сидқ қўзи била қарағай, унинг зоҳири ва ботини бир бўлғай ва кўнглини тавҳид фикридин холи қилмагай. Қаттиқ андиша ва оҳисталикни ихтиёр этғай, токим тафаккур ўтига қуймагай, нединким бу тариқа соҳиблари тафаккурни улуғ ўт деб билурлар, сидқ суви эса унинг тасаллиси бўлур. Демак, улар ишрат ва рақс, самоъ¹ни тасаллига дом қилмишлар, агар дарвешлар самоъ оҳангига мойил бўлмасалар, ҳамиша тафаккур ўтига куярлар, нединким ҳар кишида тавҳид тафаккури бўлмаса, унга самоъ қилмоқ маҳодур... Дарвеш ...мулойим сўзлик бўлғай; тан ва жаомасин пок тутғай; сафарни дўст тутғай ва биродарларига ҳамма вақт хизмат қилғай; сафарга ҳар одам ҳамроҳ бўлмоғ тиласа ман этмагай ва белини устидин боғлаб, халқ орасига бормагай; ҳар ердин жой берсалар, унда ўтиргай; ичкари кирғон вақтида салом берғай; яхши одамлар била суҳбат тутғай, беҳуда сўзлашмагай; бир ерга чақирсалар тезроқ борғай, токи азиз бўлғай. Бир иш қилмоқ бўлса, кўпнинг ҳукми ва ризоси била қилғай... Агар ҳожат юзасидин бир жойга кетмоқ, ё либос киймоқ ёки либосни тандин чиқармоқ тиласа, кўпдин рухсат олғай; халқдин яширин равишда ҳеч нарса емагай ва халқнинг олдида кўп сўзламагай... Кўп халқнинг орасида шитоб била юрмагай.

Бу гуруҳ ранж била топғон нонни ганж билғай. Нон емоқ вақтида суфра²дин фойиб бўлмагай,

¹ Самоъ – ашбула.

² Суфра – дастурхон.

токи ўзгалар уни келур деб интизорлик чекмағай-лар. Халқнинг олдидағи нонга қўлин урмағай. Агар бир иллат сабаби била таом егуси келмаса суфра ёйилмасдин бурун узр айтғай.

Эй фарзанд, жаҳд қилки, ҳар қандай сифатга эга бўлсанг ҳам олдинни қўрадиғон бўлғил ва жувонмардликка яқин бўлғил, токи жаҳон аҳдининг яхшиси бўлғайсан.

Агар жувонмардлик йўлида юрмоқ тиласанг, ҳамиша уч нарсани қўзда тутғил: қўзни ёмон на-зардин, қўлни ёмон ишдин ва тилни ёмон сўздин сақлашни. Уч нарсани дўст ва душманга очиқ тутғил: уй эшигини, суфра бошини, ҳамёнинг-нинг боғичини.

Ҳаргиз ёлгон сўз демагилки, барча ножувон-мардлар ёлгон сўз айтмоқдадурлар. Агар ҳар киши сенинг жувонмардлиғингга эътиқод қиласа, агар азиз киши бўлса ҳам сенинг олдингда ўзи-ни хор тутар, агар улуғ душман бўлса ҳам сенга ўзини таслим қилур ва барча халқнинг орасида сенинг жувонмардлиғингга эътимод этар.

Бас, жонинг борича кўшиш қилиб, жувон-мардикни эгаллағил. Ва яна ҳаргиз ўтғон иш юзасидин интиқом қилмоқ¹қа машғул бўлмағил, хиёнат қилмоқни асло ўйламағил, нединким хиё-нат қилмоқ жувонмардликнинг шарти эмасдур.

Эй фарзанд, огоҳ бўлғилки, сўз кўпдур. Агар ҳар тоифанинг жувонмардлиғини айтсам сўз чў-зилур, аммо сўзни мухтасар қилурманки, айтғон-ларимнинг барчаси юқорида баён этилғон фикр-ларга тобедур.

Билғилки, камоли жувонмардлик шудурки, ўз молингни аниқ билғил, киши молини киши моли билғил, халқ молидин тамаъ қилмағил. Ўз

¹ Интиқом қилмоқ – ўч олмоқ.

қўлинг била қўймағон нарсани олмағил. Халқقا яхшилик қила олмасанг ҳам ёмонлик қилмағил. Оламда жувонмардроқ киши ҳамиша менинг айтғонимдек тирикчилик қилғай, токи ҳам бу дунёни, ҳам охиратни топғай.

Эй фарзанд, билғилки, бу китобнинг неча жойида қаноатни зикр этдим ва яна такрор қилемурман. Аммо ҳамиша дилтанг бўлмасликни тиласанг, қаноатлиф бўлғил, ҳасадчи бўлмағил, токи вақтинг ҳамиша хуш бўлғай. Нединким, барча фамнокликнинг асли ҳасаддур. Билғилки фалак гардишнинг таъсиридин одамга нек¹ ва бад² етар. Менинг устозим дердики: «Фалак таъсири била одам бўйинни узатғай ва оғзини очгай. Фалакдин бир саъб³ етса, одам бўйнида кўтарғай ва агар бир луқма етса, оғзига олғай...»

Фалак таъсирида ҳам шул икки ишдин ташқари эрмасдур. Бу тариқани илгари тутиб, қаноатга одат қилсанг, озод баданинг ҳеч кишининг бандаси бўлмас. Ҳаргиз тамаъни хаёлингга келтурмағил. Нек ёки баддин наинки олдингга келса, рози бўлғил. Билғилки, одам тоифаси хилма-хилдур. Лекин уларнинг бир-биридан кам бўлмоғи ниёз⁴ ва тамаъ жиҳатидиндур. Шунинг учун киши тамаъни тарк этиб, қаноатни одат қилса, барча жаҳон аҳдидин бениёз бўлғай. Демак, ҳеч кишидин тамаъ талаб қилмағон киши жаҳонда энг азиз, муҳташамдир. Ул ҳеч одамга ниёзи бўлмағай, тамаъгир ва ниёзманд паст ва хордир. Нединким, бундай киши ўз моли ва жувонмардлигидин тамаъ қилғай.

Ҳикоят. Шундоқ эшитибманки, шайх Шибли бир кун бир мачитга борди ва икки ракат намоз

¹ Нек – яхши.

² Бад – ёмон.

³ Саъб – машаққатли.

⁴ Ниёз – муҳтоҗлик.

ўқиб, бир оз вақт осойиши топди. Ул мачитда ёш ўғлонлар жам бўлиб китоб ўқир эрдилар. Ўғлонларнинг таом ейдифон вақтлари бўлиб қолди. Буларнинг орасида бир бойнинг ўғли ҳам бор эрди ва бир фақирнинг ҳам ўғли бор эрди. Бойнинг ўғли олдида ҳалво, фақирнинг ўғли олдида қуруқ нон эрди. Бойнинг ўғли унга деди: «Агар ҳалво емак тиласанг, менинг итим бўл, шундин сўнг ҳалво берурман». Фақирнинг ўғли деди: «Мен сенинг итингман». Бойнинг ўғли деди: «Шундоқ бўлса, итдек ҳурғил». У бечора ит янглиф ҳурди, шундин кейин бойнинг ўғли бир бўлак ҳалво берди. У ҳар вақт итдек ҳурарди ва бир бўлак ҳалво оларди. Шайх Шибли ҳар вақт уларга қараб йиғлар эрди. Бир куни муридлари ундин сўрадилар: «Эй шайх, не важдин йиғларсан?» Шайх деди: «Кўрингларки, беқаноатлик ва тамаъгирилик одамнинг бошига на савдоларни солур. Агар бу ўғлон қуруқ нонга қаноатли бўлиб, ундин ҳалво тиламаса эрди, ўзиdek бир ўғлоннинг ити бўлмасди».

Бас, агар зоҳир ва фосиқ бўлсанг ҳам қаноатли бўлғил.

Эй фарзанд, билғилки, мен шу қирқ тўрт бобда ҳар хил ишлар тўғрисида сўз дедим ва ҳар боб ҳақидаги масалалар юзасидин панд-насиҳат қилдим. Аммо ақдлилик бобини зўрлик била айта олмасман. Ақдни кишига зўрлик била ўргатиб бўлмас. Билғилки, ақд икки хилдур: бири туфма ақдтур, уни азалий дерлар, иккинчиси касбий ақд, буни муктасиб дерлар, касбий ақдга дониш ҳам дерлар. Бас, агар азалий ақд бўлмаса, мен ва сен ҳеч илож қила олмасмиз. Сен муктасиб ақдни пеша қилмоқда камчил қилмағил, қурбинг етғонича ўрганғил. Ақдлилар тоифасидин бўлмасанг ҳам донишлар тоифасидинсан, иккисидин бири-

га эга бўлғонинг яхшидур, нединким дебурлар, агар ота бўлмаса, онадин яхши киши йўқдур. Агар оқил бўлмоқ тиласанг, ҳикмат ўрганғил, ақд ҳикмат била камолга етар. Аристотолис донишдин: «Оқилнинг қуввати нимада?» – деб сўрабдурлар. Донишманд: «Барча кишининг кучи овқатдандур, ақлнинг кучи эса ҳикматдандур», – дея жавоб бермишдур.

Эй фарзанд, билғилки, ҳар неки иш менинг одатим эрди, ҳаммасини сенинг учун бу китобга ёздим, бу фақат сенинг учундур, яъни барча фикр ва тушунчаларимни сенинг учун китобга ёздим ва ҳар бир илм, ҳар ҳунар ва ҳар пешаким билур эрдим, ҳаммасини қирқ тўрт бобда баён этдим.

Билғилки, кичиқлиқдин менинг одатим шундоқ эрди. Мен олтмиш уч ёшимни шу сират ва шу одатда ўткардим. Бу китобни сана тўрт юз етмиш бешда бошлидим. Агар бундин буён ҳам Худо таоло умр бериб, тирик бўлсам, яна шу одат била бўлурман. Агар сен бундин яхшироқ хислатни билсанг, ўша била бўлғил. Шуларни ўзимга раво кўрдим, сенга ҳам раво кўрдим. Агар сен менинг бу пандларимни эшитмасанг ва булар била иш қилмасанг, сенга менинг зўрим йўқдур. Ҳар қандай киши бу китобни ўқир, тушунар ва шу китоб юзасидин иш кўрар, нединким менинг ҳар бир сўзим баҳтнинг аломатидур.

ИЗОҲЛАР

1. *Мутаваккил* – 847–861 йиллар орасида ҳукмронлик қилган аббосийларнинг учинчи халифаси.
2. *Суқрот* – юонон олимларидан бўлиб, эрамиздан илгари 469–399 йилларда яшаб ўтган.
3. *Афлотун* – *Платон* – эрамиздан илгари 427 йилда туғилиб, 343 йилда вафот этган юонон олими.
4. *Муҳаммад Закариёйи Рози* – Эроннинг машҳур табибларидан бири. У Рай шаҳрида 240 ҳижрий иили (854–856 милодий иили)да туғилди, 320 ҳижрий иили (932 милодий иили)да вафот этди.
5. *Хисрав Парвез* – Ануширавон (Хисрав I) 579 йилда вафот этгандан кейин таҳтни унинг ўғли Ҳурмузд IV эгаллайди. Аммо 90-йилларнинг охирида Михран қабиласидан бўлган Ҳурмузднинг сипоҳсолари Баҳром Чубин бошчилигида Ҳурмуздга қарши исён кўтарилади. Баҳром ўз яқинлари билан пойтахтга юриш қиласи. Бу вақтда пойтахтда Испахпат уруғидан бўлган Виндол ва Вистахм номли икки ака-ука бошчилигидаги оқсуяқ гуруҳи Баҳром Чубиннинг келишини кутмасдан мустақил равишда ҳаракат қиласидар. Бу гуруҳ Ҳурмуздни қўлга оладилар ва унинг иккала кўзини ўйиб олиб кўр қиласидар, кейин ўлдирадилар. Унинг ўрнига Ҳурмузднинг ўғли Хисрав II ни подшоҳ қилиб тайинлайдилар. Хисрав II кейинроқ «Парвез» лақабини олади, «Парвез» сўзининг маъноси музaffer, ғалаба қилувчи, голиб демакдир.

Аммо Хисрав Парвез ўзини ўраб олган давлат кишиларига, қўшиналарига ишонмайди ва Ктеси-

фонни ташлаб, Византия императори даргоҳига боради, улар билан келишиб, яна ўз ватанини эгаллайди. Аммо Хисрав Парвезнинг душманлари уни зиндонга ташлайдилар ва ўлдирадилар.

6. *Абу Сувор Шопур* – Сосоний Нўширавоннинг афсонавий вазири бўлиб, асли оти Бузургмехрdir. Бу номга арабча тус берилиб, «Абузуржмехр» дейилган.

7. *Абу Сувор Шовур* (Шовур) бинни Абу ал Фазл. Абу Сувор Шовур бинни Абу ал Фазл Шаддодийлар сулоласидан саккизинчи амир Бус Сувор (ёки Абул Асовар) Шовур (ёки Шопур) ибн Фазл ҳақида сўз юритилади. Шаддодийлар тарихи кам ўрганилган. Улар курдлардан бўлиб, 340 ҳижрий (951–952 милодий) йилида Арронда ҳукмронлик қилганлар. Амир Бус Сувор Двинанинг ҳокими сифатида эсга олинади. Маълумки, салжуқийлар 1021 йилданоқ Арманистонга ҳарбий юриш қилдилар. Арманистон Византиядан ёрдам сўрашга ҳаракат қиласиди. Бу курашга Шаддодийлар ҳам тортилган эди. Жумладан, Бус Сувор аввал византияликлар томонига ўтади, аммо улардан норози бўлиб салжуқийларга қўшилади, улар билан 1047 йилда муносабатни тиклади. Тўғрулбекнинг Арманистон билан бошлаган урушини унинг валиаҳди Олп Арслон давом эттиради. Олп Арслон узоқ вақт Аня шаҳрини қамал қилгандан сўнг уни забт этади (1064 йил 6 июнда). Аня шаҳри олингандан сўнг бир қанча вақт салжуқий ноиблари ҳукм сурадилар. 1072 йилда эса Абу Сувор бу шаҳарни ўз ўғли Манучага таг-туги билан сотиб олиб беради. Шу вақтдан бошлаб Шаддодийлар икки шажараға бўлинганлар, улардан бири Ганжада ҳукмронлик қиласидилар, иккинчи шажара эса Аняда яшадилар. Бу оддий маълумот тахминий бўлса ҳам «Қобуснома» муаллифининг

Бус Сувор ҳузурига келганидан дарак беради. Афтидан, бу вақтда Ганжа Шаддодийлар томонидан олинмаган, византияликлар қўлида бўлган бўлиши мумкин. Шундай тахмин қилиш мумкинки, «Қобуснома» муаллифи Кайковуснинг Бус Сувор ҳузурига келган 1021–1047 йилларнинг ўрталарида тўғри келади.

8. *Гургон* – Журжон вилоятининг маркази бўлиб, у Каспий дengизининг шарқи жанубий қирғофида Гургон дарёсининг ҳавзасидаги вилоятdir. Беруний Журжонда бўлган вақтда бу вилоятнинг ҳокими Кайковуснинг бобоси Қобус бинни Вушмагир эди.

9. *Фирузон Дайламий* – Дайлам вилоятининг ҳукмдори. 289 ҳижрий (901 милодий) йилида Исмоил Сомоний қўшинлари жангда ўлдиради.

10. *Хорун ар-Рашид* – Аббосийлар сулоласининг халифаларидан (786–809) «Минг бир кеча» асаридаги эртакларнинг қаҳрамони.

11. *Ануширавон* – Асли исми Хисрав I бўлиб, лақаби Ануширавондир. Баъзи манбаларда «Нўширавон» деб ҳам юритилади. «Ануширавон» сўзининг маъноси «абадий руҳ эгаси, ўлмас руҳ эгаси» демакдир. Унинг отаси Қубод ўлгандан сўнг (531 йил) Ануширавон отасининг таҳтини эгаллади (531–579) ва Маздак қўзғолонини бостиради. Шунинг учун воқеаномаларда адолат тимсоли сифатида шуҳрат қозонган.

12. *Соҳиби Аббод* – 932–1055 йилларда Фарбий Эрон ва Ироқда ҳукмронлик қилган феодал давлати сулоласи Бувайҳийларнинг машҳур вазири Соҳиби Исмоил ибн Аббод кўзда тутилади.

13. *Ажам* – Дастлаб араблар Арабистондан ташқари мамлакатларни Ажам деб атаганлар, кейинроқ Эрон мамлакатини ва эронликларни Ажам деганлар.

14. *Аристотолис* (Аристотель) – юонон файласуфларидан бири. У эрамиздан аввалги 384 йилда туғиљди, 322 йилда вафот этди.

15. *Ибн Муқла* – Абу Али Мұхаммад ибн Ҳусайн ибн Муқла машҳур адабиётчи, вазир ва ҳаттот. У 272 йил ҳижрий (885–886 милодий) йилида Бағдодда туғиљди ва Аббосийлардан Муқтадир (908–932)нинг вазири эди. Бунинг даргоҳида ибн Муқла зинданга ташланди (324 ҳижрий, 936 милодий йилида), аввал унинг ўнг қўлини кесадилар, 326/938 йили тишини суғуриб оладилар. У 328/939 йилда зинданда вафот қиласди.

16. *Ал Мұтасим* – Аббосийлар сулоласидан саккизинчи халифа бўлиб, у 833–842 йилларда ҳукмронлик қиласди.

17. *Шамсулмаолий* – Кайковуснинг бобоси Қобуснинг исми.

18. *Аҳмад Жағдий* – Огаҳий таржима қилган «Қобуснома»да Аҳмад Жағдий. Е.Э. Бертельс таржима қилган «Кабус-наме»да Ахмед (Аҳмад) Сади (Саъдий) деб юритилади.

19. *Ботлимус Птоломей*. Милодий иккинчи асрининг бошларида Искандарияда яшаган риёзиёт (математика), фалакиёт (астрономия) олимидир. У кўпроқ астрономия илми билан шуҳрат қозонганди.

20. *Юсуф* – Шарқда кўп шоирлар томонидан ижод қилинган «Юсуф ва Зулайҳо» достонининг асосий қаҳрамони пайғамбар Яъқубнинг ўғли.

21. *Амир бинни Лайс*. Сеистондаги Саффорийлар сулоласининг асосчиси Яъқуб ибн Лайснинг биродари ва бу сулоланинг иккинчи ҳукмдори. У 265/879, 287/900 йилларда ҳукмронлик қиласди.

22. *Азҳари ҳар*. «Азҳар» – оппоқ, жуда оқ, ёрқин, ой, ёввойи буқа маъносида; «ҳар» эса эшак маъносида ишлатилади.

23. *Фалакул маолий* – Манучехр – Қобуснинг ўғли.

24. Қорун – Тавротда Қорей деб аталади. Қорун бой одам бўлган, бу ривоят Куръонда ҳам учрайди. Афсоналарга қўра у жуда бой бўлган ва куфронийлиги учун Қорунни ва бутун бойлигини ер ютган экан.

25. Гиштосб – Қадимги Эроннинг афсонавий подшоҳи, Абулқосим Фирдавсий Тусий «Шоҳнома» асарининг қаҳрамонларидан бири. Йигирма еттинчи бобдаги ҳикоя «Муқаддас подшоҳ» Гиштосбнинг ёшлик чофида Византияга қилган саёҳати ҳақидаги ривоят билан боғланади.

26. Рум – Юнон, рим империяси, Туркия, Кичик Осиё мамлакатларининг қадимги номи.

27. Қустантания – Истамбул шаҳрининг қадимги номи.

28. Шаҳрбону – Сосонийларнинг сўнгти подшоҳи Ийаздегирнинг қизи, 637 йилда Эронни араблар истило қилганда ўлдирилган.

29. Салмон Форисий – Афсонавий шахс бўлиши эҳтимол.

30. Умар ибн ал Хаттоб. Мусулмонларнинг тўрт халифаларидан иккинчisi, 634–644 йилларда ҳукмронлик қилган. Халифаликни ташкил қилувчилардан бири.

31. Али ибн Абу Толиб – 656–661 йилларда ҳукмронлик қилган тўртинчи халифа.

32. Фатима – Муҳаммаднинг қизи, Алиниң хотини.

33-34. Ҳасан. Ҳусан – Алиниң фарзандлари, араб халифалиги учун бўлган ўзаро низолар даврида (680–683 йилларда) Умавийлар халифаси Язид томонидан ўлдирилади.

35. Иёр – Халифалик шаҳарларида маълум касбга эга бўлмаган, тасодифий иш ҳақи билан яшайдиган шахслар шундай ном билан аталгандар. Улардан кўнгилли қўшин тузилган эди.

36. *Сайида* – Бувайхийлардан Фахруддавла (976–997)нинг беваси.

37. *Искандар Зулқарнайн* – Александр Македонский.

38. *Фашёгурс* (Фифогурс – Пифагор) ёки Фусофуррос – юонон олимларидан бўлиб, эрамиздан илгари, бир ривоятга қараганда 608, бошқа бир ривоятга қараганда 572 йилда Сисом оролида дунёга келган. У ўз юртида таълим олди, риёзиёт илмини эгаллади, катта олим даражасига етишди.

39. *Муовия* – Умавийларнинг биринчи халифаси, 661–680 йилларда ҳукмронлик қилган.

40. *Жолинус* – Гален Клавдий тахминан милюдий 130 йилда туғилиб, тахминан 200 йилда вафот этган. Жолинус Рим табиби ва табиатшунос бўлган. Унинг бизгача етиб келган озгина асарлари Гиппократдан кейин тиббиёт соҳасида машҳур на зариётчи эканлигидан далолат бсрэди.

41. *Ситта ашар* – Тиббиёт бўйича ўн олтида илмий асарнинг номи.

42. *Ровий* – Бу даврнинг одати бўйича сарой ҳофизи ўз шеърини ўзи ифодали ўқимайди, балки саройда шоир ва ҳофизнинг шеърини ифодали ўқитувчи маҳсус ёш хушвуз йигит тайин этилади, унга ровий дейилади.

43. *Амир Фазлун Биссувор ибн Хомон* – Ozарбайжон ҳукмдорларидан бири.

44. *Абдумалик Ақайрий* – баъзи манбаларда «Акбар» деб ёзилган.

45. *Ҳожиб Исмоил ибн Аббод* – Буидларнинг машҳур вазири.

46. *Девон* – 1) шоҳнинг вазирлари, маслаҳатчилари тўпланадиган жой; 2) идора, маҳкама; 3) бир шоир томонидан ёзилган шеърларнинг тўплами.

47. *Алқодир биллоҳ* – Аббосийларнинг 25-халифаси, 991–1031 йилларда ҳукмронлик қилган.

48. *Хўжа Абу Наср Мешкон* – Маҳмуд Фазнавий ва унинг ўғли Масъуднинг соҳиби девонларидан. У нома услубининг устози ва машҳур хаттотдир. Мешкон зўр тарихчи Байҳақийнинг устози.

49. *Абу Бакр Қаҳновий* – Султон Маҳмуднинг машҳур шоири.

50. *Абу Али Симжур* – Сомонийларнинг машҳур ҳокимларидан бўлиб, бир вақт Хуросонда ҳам ҳукмронлик қилган.

51. *Абул Фазл Балъамий* – И smoил (892-907), Аҳмад (907-914) ва Наср II (914-943) Сомонийларнинг машҳур вазиридир. Балъамий 892 йилдан 938 йилга қадар шу вазифада бўлган.

52. *Султон Тўғрил* – 1035 йилда Ўрта Осиё чўлларини зухур этиб, Хуросон ўлкасида равнақ топган Салжуқий туркларининг салтанатига асос солади. Тўғрил 1038 йилдан бошлаб ҳукмронлик қилади, 1063 йилда вафот этади.

53. *Абул Фатҳ Бустий* – Бу шахсни 401/1011 йилда вафот қилган Абул Фатҳ Бустий (исми, отасининг оти бир хилда) билан аралаштирмаслик керак. Байҳақиқийнинг кўрсатувича, «Қобуснома»да тилга олинган шахс 430/1038 йилга қадар ҳаёт эди.

54. *Султон Масъуд* – Султон Маҳмуднинг ўғли 1030-1041 йилларда ҳукмронлик қилган.

55. *Султон Мавдуд* – Шаҳобуддавла Мавдуд (1041-1048) Фазнавий сулоласининг 10-султони. Масъуднинг ўғли, Маҳмуднинг набираси.

56. *Хўжа Абдур Рассоқ Аҳмад бинни Ҳасан Маймандий* – Султон Маҳмуднинг мактабдош ўртоғи Аҳмад Маймандийнинг ўғли. Маҳмуд уни Ҳиндистондаги бир саройга қамаган эди. Абдур Рассоқ қамоқни отаси билан тақсим қилганди. У қамоқдан қутулгач, Мавдудга вазир бўлиб тайинланган эди.

МУНДАРИЖА

Муқаддима	3
Мавъизатномаи Кайковус	12
БИРИНЧИ БОБ. Парвардигори оламни танимоқ зикрида ..	19
ИККИНЧИ БОБ. Пайгамбарларнинг хилқати зикрида....	21
УЧИНЧИ БОБ. Ҳақ таолонинг шукргузарлиғи зикрида....	23
ТҮРТИНЧИ БОБ. Неъматларға шукр қилмоқ зикрида....	26
БЕШИНЧИ БОБ. Ота ва она ҳақини билмак зикрида	30
ОЛТИНЧИ БОБ. Ҳунар афзунлиғи била баланд қадр ва олий табъ бўлмоқ зикрида	32
ЕТТИНЧИ БОБ. Сухандонлик била баланд мартабали бўлмоқ зикрида	44
САККИЗИНЧИ БОБ. Ануширавон пандларин ёд олмоқ зикрида	54
ТҮҚҚИЗИНЧИ БОБ. Қарилик ва йигитлик сифати зикрида...	57
ЎНИНЧИ БОБ. Тамкин шарофати ва таом тартибининг баёни	62
ЎН БИРИНЧИ БОБ. Шароб ичмак зикрида	64
ЎН ИККИНЧИ БОБ. Мехмон олмоқ ва меҳмон бўлмоқ зикрида	67
ЎН УЧИНЧИ БОБ. Мазоҳ қилмоқ, шатранж ва нард ўйнамоқ одобин баёни зикрида	73
ЎН ТҮРТИНЧИ БОБ. Ишқ ва унинг одатлари зикрида....	75
ЎН БЕШИНЧИ БОБ. Нафъ олмоқ зикрида	79
ЎН ОЛТИНЧИ БОБ. Ҳаммомга бормоқ зикрида	80
ЎН ЕТТИНЧИ БОБ. Ухламоқ ва осуда бўлмоқ зикрида....	82
ЎН САККИЗИНЧИ БОБ. Шикорга чиқмоқ зикрида.....	84
ЎН ТҮҚҚИЗИНЧИ БОБ. Чавгон ўйнамоқ зикрида.....	86
ЙИГИРМАНЧИ БОБ. Уруш қилмоқ зикрида	87
ЙИГИРМА БИРИНЧИ БОБ. Мол жам этмоқнинг зикрида ...	90
ЙИГИРМА ИККИНЧИ БОБ. Омонатни сақламоқ зикрида...	93
ЙИГИРМА УЧИНЧИ БОБ. Асир сотгун олмоқни(нг) зикрида...	95
ЙИГИРМА ТҮРТИНЧИ БОБ. Ўй ва ер сотиб олмоқ зикрида.....	102
ЙИГИРМА БЕШИНЧИ БОБ. Чаҳорпой (от) сотиб олмоқнинг зикрида.....	104

ЙИГИРМА ОЛТИНЧИ БОБ. Хотин олмоқ зикрида	108
ЙИГИРМА ЕТТИНЧИ БОБ. Фарзанд парвариши	
қилмоқ зикрида	110
ЙИГИРМА САККИЗИНЧИ БОБ. Дўст тутмоқ зикрида	117
ЙИГИРМА ТЎҚҚИЗИНЧИ БОБ. Душмандин андиша	
қилмоқ зикрида	120
ЎТТИЗИНЧИ БОБ. Афв ва уқубат қилмоқ зикрида	127
ЎТТИЗ БИРИНЧИ БОБ. Илм талаби ва	
қозигарлик зикрида	130
ЎТТИЗ ИККИНЧИ БОБ. Тижорат ва бозоргонлик	
расми зикрида.....	139
ЎТТИЗ УЧИНЧИ БОБ. Тиб илми расми зикрида.....	146
ЎТТИЗ ТЎРТИНЧИ БОБ. Нужум (юлдузлар) ва ҳандаса	
(геометрия) илми зикрида	154
ЎТТИЗ БЕШИНЧИ БОБ. Шоирлик расми зикрида.....	158
ЎТТИЗ ОЛТИНЧИ БОБ. Ҳофиз ва созандалик зикрида.....	161
ЎТТИЗ ЕТТИНЧИ БОБ. Подшоҳга хизмат	
қилмоқ зикрида	165
ЎТТИЗ САККИЗИНЧИ БОБ. Подшоҳга надимлик	
қилмоқ зикрида	170
ЎТТИЗ ТЎҚҚИЗИНЧИ БОБ. Дабирлик ва котиблиқ	
зикрида	173
ҚИРҚИНЧИ БОБ. Вазирликнинг шарт ва	
расмлари зикрида	182
ҚИРҚ БИРИНЧИ БОБ. Сипоҳсоларлик шартлари ва	
одатлари зикрида	188
ҚИРҚ ИККИНЧИ БОБ. Подшоҳлик шарти ва	
расми зикрида.....	190
ҚИРҚ УЧИНЧИ БОБ. Дехқончилик ва бозор пешалари	
баёни зикрида	201
ҚИРҚ ТЎРТИНЧИ БОБ. Жувонмардлик зикрида	203
 Изоҳлар.....	215

Адабий-бадиий нашр

КАЙКОВУС

ҚОБУСНОМА

Мұхаррирлар
Маъмурға ҚҰТГЛИЕВА,
МұхайдіРІХСИБЕКОВА

Бадиий мұхаррир
Үйгүн СОЛИХОВ

Мусақхық
Мадина МАҲМУДОВА

Саҳифаловчи
Суннат МУСАМЕДОВ

Техник мұхаррир
Сурайә АҲМЕДОВА

Лицензия рақами: AI № 252,
2014 йил 02.10 да берилған.

Босишига 2016 йил 28.01.да рухсат этилди.

Бичими 84x108^{1/32}.

Босма тобоги 7,0

Шартлы босма тобоги 11,76

Гарнитура «Bookman Old Style». Офсет қоғоз.

Адади 5000 нұсха. Буюртма № 33.

Бағоси келишилған нархда.

«Янги аср авлоди» НММда тайёрланди.
100113. Тошкент, Чилонзор-8,
Қатортол күчаси, 60.

Мурожаат үчүн телефонлар:

Нашр бўлими – 147-00-14; 129-09-72;
Маркетинг бўлими – 128-78-43; 397-10-87;
факс – 273-00-14;
e-mail: yangiasravlod@mail.ru